

● 湖南省青苹果数据中心制作

新元史

(第一册)

新元史

(第一册)

目 录

新元史卷一		
本纪第一	序纪·····	1
新元史卷二		
本纪第二	太祖上·····	7
新元史卷三		
本纪第三	太祖下 ·····	16
新元史卷四		
本纪第四	太宗 ·····	32
新元史卷五		
本纪第五	定宗 ·····	46
新元史卷六		
本纪第六	宪宗 ·····	50
新元史卷七		
本纪第七	世祖一 ·····	62
新元史卷八		
本纪第八	世祖二 ·····	76
新元史卷九		
本纪第九	世祖三 ·····	93
新元史卷十		
本纪第十	世祖四·····	109

新元史卷十一		
本纪第十一	世祖五·····	118
新元史卷十二		
本纪第十二	世祖六·····	132
新元史卷十三		
本纪第十三	成宗上·····	144
新元史卷十四		
本纪第十四	成宗下·····	153
新元史卷十五		
本纪第十五	武宗·····	166
新元史卷十六		
本纪第十六	仁宗上·····	181
新元史卷十七		
本纪第十七	仁宗下·····	191
新元史卷十八		
本纪第十八	英宗·····	201
新元史卷十九		
本纪第十九	泰定帝·····	213
新元史卷二十		
本纪第二十	明宗·····	227
新元史卷二十一		
本纪第二十一	文宗上·····	232
新元史卷二十二		
本纪第二十二	文宗下 宁宗·····	244
新元史卷二十三		

本纪第二十三	惠宗一·····	254
新元史卷二十四		
本纪第二十四	惠宗二·····	266
新元史卷二十五		
本纪第二十五	惠宗三·····	277
新元史卷二十六		
本纪第二十六	惠宗四 昭宗·····	295
新元史卷二十七		
志第一	历一·····	311
新元史卷二十八		
志第二	历二·····	326
新元史卷二十九		
志第三	历三·····	334
新元史卷三十		
志第四	历四·····	352
新元史卷三十一		
志第五	历五·····	369
新元史卷三十二		
志第六	历六·····	393
新元史卷三十三		
志第七	历七·····	421
新元史卷三十四		
志第八	天文上·····	422
新元史卷三十五		
志第九	天文下·····	444

新元史卷三十六

志第十 五行上·····	460
--------------	-----

新元史卷三十七

志第十一 五行中·····	486
---------------	-----

新元史卷三十八

志第十二 五行下·····	501
---------------	-----

新元史卷三十九

志第十三 地理一·····	521
---------------	-----

新元史卷四十

志第十四 地理二·····	560
---------------	-----

新元史卷四十一

志第十五 地理三·····	581
---------------	-----

新元史卷四十二

志第十六 地理四·····	610
---------------	-----

新元史卷四十三

志第十七 地理五·····	639
---------------	-----

新元史卷四十四

志第十八 地理六·····	662
---------------	-----

新元史卷四十五

志第十九 河渠一·····	706
---------------	-----

新元史卷四十六

志第二十 河渠二·····	727
---------------	-----

新元史卷四十七

志第二十一 河渠三·····	742
----------------	-----

新元史卷四十八

志第二十二 百官一.....	755
新元史卷四十九	
志第二十三 百官二.....	787
新元史卷五十	
志第二十四 百官三.....	806
新元史卷五十一	
志第二十五 百官四.....	820
新元史卷五十二	
志第二十六 百官五.....	834

新元史

卷一

本纪第一

序 纪

蒙古之先，出于突厥。本为忙豁仑，译音之变为蒙兀儿，又为蒙古。金人谓之鞑靼，又谓之达达儿。蒙古衣尚灰暗，故称黑达达。其本非蒙古，而归于蒙古者，为白达达、野达达。详《氏族表》。其国姓曰乞颜特孛儿只斤氏。太祖十世祖孛端察儿之后，称孛儿只斤氏。皇考也速该又称乞颜特孛儿只斤氏。“孛儿只斤”，突厥语译义灰色眼睛，蒙古以灰睛为贵种也。

蒙古初无文字，世事远近人相传述。其先世与他族相攻，

部族尽为所杀。惟余男女二人，遁入一山，径路险峻，仅通出入，遂居之，名其山曰“阿儿格乃袞”。生二子，长曰恼古，次曰乞颜。“乞颜”义为奔流急瀑，言其勇往迈众似之。乞颜子孙众多，称为乞颜特，又译为计牙特，亦译为却特。“特”者，统类之词也。又译为奇渥温。“温”者，国语之尾音也。后以地狭人稠，欲出山，而涂已塞。有铁矿洞穴深邃乃，篝火洞中，宰七十牛，剖革为筒，而鼓之。铁石既融，径路遂通。蒙古旧俗，元旦锻铁于炉，尊卑次第捶之，其事盖缘起于此。

乞颜之后，有孛儿帖赤那，译义为苍狼。其妻曰豁埃马兰勒，译义为惨白牡鹿。皆取物为名，世俗附会，乃谓狼妻牝鹿，诬莫甚矣。孛儿帖赤那与豁埃马兰勒，同渡腾吉思海，徙于斡难河源不儿罕山之下，生子曰巴塔赤罕。

巴塔赤罕生子曰塔马察。塔马察生子曰豁里察儿蔑儿干。豁里察儿蔑儿干生子曰阿兀站孛罗温勒。阿兀站孛罗温勒生子曰撒里合察兀。撒里合察兀生子曰也客你敦。也客你敦生子曰扈锁赤。扈锁赤生子曰合儿出。合儿出生子曰孛儿只吉歹蔑儿干。其妻曰忙豁勒真豁阿，生子曰脱罗豁勒真伯颜。其妻曰孛罗黑臣豁阿。生二子：长曰都蛙锁豁儿，次曰朵奔蔑儿干。“都蛙”，译义为远视；“锁豁儿”译义为一目；言其一目能远视也。

有豁里秃马敦部长豁里刺儿台蔑儿干率所部至不儿罕山，都蛙锁豁儿见其女美，为弟朵奔蔑儿干娶之。是为阿兰豁阿哈屯，生二子，曰不古讷台，曰别勒古讷台。朵奔蔑儿干卒，阿兰豁阿嫠居有孕，众疑之。阿兰豁阿曰：“夜有白光，

自天窗而入，化为黄人，摩挲我腹，斯殆神灵诞降。不信，请汝等伺之。”曰：“诺。”次夜，果见白光出入，群疑乃释。既而，生三子，长曰不忽合塔吉，次曰不合秃撒勒只，次曰勃端察儿蒙合黑。凡三子之支派，蒙古称之曰尼而伦，译义为清洁，以其为神灵之允。别派则谓之塔立斤，译义常人也。

阿兰豁阿尝束箭五枝，谓其诸子曰：“汝兄弟五人，犹五枝箭，分则易折，若合为一束，谁能折之？汝五人一心，则坚强无敌矣！”其后，宣懿皇后犹引此言以教太祖云。

阿兰豁阿幼子勃端察儿蒙合黑沈默寡言，家人谓之痴，独阿兰豁阿曰：“此儿不痴，后世子孙必有大贵者。”及阿兰豁阿卒，诸兄分家资不及勃端察儿蒙合黑。勃端察儿蒙合黑乘一青白马，至巴勒諄阿刺勒，饮食无所得，见黄鹰搏雉，勃端察儿蒙合黑缴而获之，鹰即驯熟，乃臂鹰猎雉免，以为食。有鄂郭尔察克部游牧于统格黎河，亦时以马乳奉之。后诸兄悔，来视勃端察儿蒙合黑，邀与俱归。勃端察儿蒙合黑曰：“统格黎河之民，无所属，可抚而有也。”诸兄以为然，至家，使勃端察儿蒙合黑率壮士以往，果尽降之。自是，蒙古始有部众。

勃端察儿蒙合黑之妻曰勃端哈屯，生二子。又娶一妻，生子曰把林失亦刺秃合必赤，生子曰蔑年土敦。其妻曰莫拏伦，生七子，而蔑年土敦卒。莫拏伦亦称莫拏伦塔儿袞，译义有力也，徙于诺赛儿吉及黑山之地。是时，札刺亦部强盛，以千车为一库伦，有七十库伦，恃众与契丹相拒。契丹渡克鲁伦河，大破之。札刺亦败，众遁至莫拏伦牧地。其小儿掘速都逊草根，食之，莫拏伦乘车出，见而呵之曰：“此我之牧地，

何得践踏！”以车辗小儿，有死者。札刺亦人怒，驱其牧马以去。莫拏伦诸子闻之，不及甲而追之。莫拏伦私忧曰：“吾儿无甲，何以御敌？”使其子妇，载甲从之。及至，诸子已战没。札刺亦人遂乘胜杀莫拏伦，灭其家。

惟一孙海都尚幼，乳母匿于酒瓮中获免。海都父合赤曲鲁克，蔑年土敦之长子也。先是，蔑年土敦第七子纳臣赘于巴儿忽氏，故不及难。至是归，惟海都及病姬十余人在焉。有其兄所乘之黄马，自札刺亦逸归，纳臣乃乘之。至札刺亦牧地，遇猎者，纳臣给杀之。又遇牧马小儿，方击髀石为戏，纳臣亦杀之，臂鹰驱马而返。遂将海都徙于巴儿忽。海都稍长，纳臣与巴儿忽怯谷诸部共立之蒙古，称罕。自海都，始率众攻札刺亦，虏其部众为奴。后海都又徙于巴儿忽真土窟姆之地，造一桥于巴儿忽真河以通来往，名曰海都赤勒拉姆。纳臣则徙于斡难河。

海都卒，长子伯升豁儿多黑申嗣。伯升豁儿多黑申卒，子屯必乃薛禅嗣。屯必乃薛禅生九子，皆有智勇，部众益强。卒，第六子合不勒罕嗣。海都次子察刺孩领忽生子曰想昆必勒格。“想昆”即契丹之“详袞”，译义办事官也。想昆必勒格生子曰俺巴孩，后嗣合不勒之罕位。

合不勒罕有威望，蒙古诸部莫不降附。金主闻其名，召见，礼遇甚优，合不勒恐饮食中毒，宴会辄托词沐浴出，而吐其食物。一日，酒酣，合不勒拊掌而跃，捋金主之须。左右呵其失礼，合不勒惶恐谢罪。金主释不问，仍厚赐遣之。金之大臣谓：“纵去此人，将为边患。”遣使要之返，合不勒不从，语倔强。金人再遣使诘问，合不勒他往，以避之。使者

归，遇诸涂，挟以入朝。中道遇其谄达赛亦柱歹，告之故。赛亦柱歹赠以良马，使乘间逸去。至夜，使者以索縶其足。次日，得间，始疾驰而返。使者追及之，合不勒次妻蔑台，火鲁拉思氏，以所居之新帐居使者。合不勒告其部众曰：“不杀此人，我终不免。汝等不助我，则先杀汝等。”众从之。遂袭杀使者。未几，合不勒病卒。

合不勒生七子，不立其子，而立其从弟俺巴孩为罕。先是，合不勒妻呼阿忽豁阿，其弟曰赛因特斤，翁吉拉特人也，延塔塔儿巫者治疾，不效而卒，执巫者杀之。塔塔儿部众怒，与翁吉拉特构兵。合不勒诸子助母党，与塔塔儿部战于贝阑色夷阔端之地。合不勒第四子合丹刺伤塔塔儿酋，疮愈，战于攸刺伊拉克，再战于开儿伊拉克，卒为合丹所杀。故塔塔儿仇蒙古。俺巴孩既立，嫁女于塔塔儿，自往送之。塔塔儿遂执俺巴孩及其弟乌斤巴勒哈里，献于金。金人以蒙古杀其使者，乃制木驴之刑，钉俺巴孩兄弟于驴背。俺巴孩将死，谓从者布勒格赤曰：“汝归，为我告合不勒罕七子中之忽图刺及我合答安太石，言我为一国之主，不忍儿女之爱，以至如此，后人当以我为鉴。若等将五指爪磨秃，纵磨伤十指，亦当为我复仇。”又使告于金主曰：“汝假他人之手以获我，又置我于非刑。我死，则我之伯叔兄弟，必能复仇。”金主曰：“此言可告汝部众，朕不畏也。”纵布勒格赤归。

于是，部众共立合不勒第五子忽图刺为罕。忽图刺罕纠诸部复仇。败金人于境上，大掠而去。是时，金熙宗皇统三年也。其后，金大定间，童谣曰：“达达来，达达去，趁得官家没去处。”金世宗闻之，曰：“此必鞑靼将为国患。”乃下减

丁之令，岁岁用兵北边，恣行杀戮。蒙古诸部衔仇刺骨，亦出没为金边患。金丞相完颜襄乃筑长城以限之，而使汪古部守其要隘。至太祖伐金，汪古部反为蒙古向导焉。忽图刺骁勇，力能折人，每食尽一羊，音吐甚洪，隔七岭之远犹闻之。一日，出猎，遇朵儿奔人欺其无从者，欲追而杀之。忽图刺之马陷淖中，自马上跃登于岸，追者骇走。家人闻，遇朵儿奔，以为必死，设筵祭之。其妻独不谓然。及归，忽图刺曰：“我出猎，而徒手返，何以对众？”复入朵儿奔牧群，夺其马。中道获野鸭卵，盛以靴。家人乃撤祭筵，以享其夫妇。忽图刺长子曰拙赤罕，后率所部千人归于太祖；次曰阿勒坛，亦素附太祖，后叛归客烈亦部王罕。初，俺巴该为金人所杀，部众会议立罕，推族人朵答儿主议。朵答儿请使哈答儿秃克主之。哈答儿秃克让于莫图根。莫图根曰：“汝等公议立罕，则事可定。否则必有内乱。”言毕而出，部众遂共立忽图刺为罕。及忽图刺卒，布拉火力儿等欲立塔儿忽台为罕，部众不从。于是诸部各立部长，不相统属。

为尼而伦部长者曰也速该，合不勒罕第二子把儿坛之子也，是为太祖皇考，追谥烈祖神元皇帝。自此，塔儿忽台与烈祖有隙。塔儿忽台者，合答安太石之子，为泰亦赤兀部长。故太祖屡为泰亦赤兀部所困。把儿坛娶于巴儿忽氏，曰苏尼吉儿哈屯，生四子，长曰蒙哥秃乞颜，次曰捏坤太石。捏坤太石长子曰火察儿，善射，从太祖攻讨诸部，屡有功，后从攻塔塔儿违军令，太祖夺其所获，遂与阿勒坛奔王罕。王罕败，复奔乃蛮。太祖平乃蛮，俱伏诛。次为烈祖。次曰答力台，亦叛附王罕，后自归于太祖，太祖宥之。烈祖为部长十

三年，屡伐金。又讨塔塔儿，获其二酋，曰帖木真兀格，曰库鲁布哈，诸部畏服。客烈亦部王罕为其叔父古儿堪所攻，乞援于烈祖。烈祖逐古儿堪以定客烈亦之乱，王罕德之，与烈祖约为谿达。后烈祖为太祖求婚于翁吉刺氏，中道至扯克扯儿之地，遇塔塔儿人以毒酒饮之。烈祖暴疾，至家召察刺合额不格之子蒙力克，以太祖兄弟托之而崩，时太祖十三岁。

史臣曰：“元人数典忘祖，称其国姓曰奇渥温氏，而旧史因之。我高宗纯皇帝既命馆臣改译，复据《蒙古源流》证元之国姓为博尔济锦氏，数百载相沿之谬，至我高宗始为之厘订焉。博尔济锦即孛儿只斤之异译也。今蒙古喀儿喀诸部，非博尔济锦氏不得为台吉，盖犹自别于庶姓云。”

卷二

本纪第二

太祖上

太祖法天启运圣武皇帝，讳帖木真，烈祖长子也。母曰宣懿皇后诃额伦。烈祖讨塔塔儿，获其部酋曰帖木真兀格。师还，驻于迭里温孛勒答黑，适宣懿皇后生太祖，烈祖因名曰帖木真，以志武功。太祖生时，右手握凝血如赤石，面目有光。是岁为乙亥，金主亮贞元三年也。

先是，泰亦赤兀部长塔儿忽台等与烈祖有隙，烈祖崩，部

众多叛附泰亦赤兀。宗人最长者曰脱端火儿真，亦欲叛去，蒙力克之父察刺合留之。脱端火儿真曰：“深池已涸，坚石已裂，留复何为！”卒不顾而去。宣懿皇后自持旄纛追叛众，始还其大半。然察刺合竟以力战，脑中流矢。帝视之，察刺合曰：“汝父卒，部众尽叛，我力战邀之，乃为所伤。”帝感泣。察刺合创甚，旋卒。

及帝稍长，泰亦赤兀人忌之。一日，其酋率部众奄至。帝入帖儿古捏山，为逻者所获；乘间逸去。泰亦赤兀部下锁儿干失刺匿之，获免。遂徙帐于合刺只鲁格山之青海子。

帝娶于宏吉刺氏，曰光献翼圣皇后孛儿台，以后之黑貂裘献于客烈亦部王罕。王罕大悦，乃为帝招集旧部，归附渐众。又徙帐于客鲁涟河源不儿吉之地。

已而，蔑儿乞三部酋，曰脱黑脱阿，曰答亦儿兀孙，曰合阿台答儿麻刺，悉众来攻。帝与皇弟别勒古台、阿鲁剌人博尔术、兀良合人者勒蔑奉宣懿皇后入不儿罕山。蔑儿乞人掠孛儿台而去。帝获免，乃椎胸告天：“不儿罕山遮护我，他日子孙世祀之，勿敢忘。”已而，帝乞援于王罕及宗人札木合大败蔑儿乞于不兀刺之地，迎孛儿台归。

帝幼与札木合约为谥达，至是交日，密徙帐于豁儿豁纳黑主不儿之地，与札木合连营逾年，复分军而去，仍还合刺只鲁格山。于是，巴鲁剌人忽必来，忙忽人哲台，兀良合人速不台，者勒蔑之弟察兀儿罕，博尔术之弟斡歌连，蒙格秃与其子汪古儿，及撒察别乞、孛图驸马，帝从父答里台，从弟阿勒坛、忽察儿等俱先后来归。阿勒坛、忽察儿、撒察别乞三人首谋推戴，与诸将盟于青海子，请帝称罕，以统蒙古

之部众，时为金大定二十九年。己酉，帝以称罕事告于王罕及札木合。札木合使谓阿勒坛、忽察儿曰：“吾与帖木真谳达交不终，皆由汝等之离间。今汝等立吾谳达为罕，其忠于所事，勿使疑汝等反复也。”其后，阿勒坛等卒叛附于王罕云。

太祖既称罕，命斡歌连扯儿必、合赤温脱忽刺温、哲台、多豁勒忽扯儿必四人为火儿赤，汪古儿、薛赤兀儿、合答安答勒都儿罕三人为保兀儿赤，迭该为火你赤，古出古儿为抹赤，朵歹扯儿必总管家中奴婢，忽必来、赤勒古台、合刺孩脱忽刺温三人同皇弟合萨儿为兀勒都赤，合刺勒歹脱忽刺温二人与皇弟别勒古台为阿黑答赤，泰亦赤兀忽图、抹里赤、木勒合勒忽三人为阿都兀赤，命阿儿孩合撒儿、塔孩、速客该、察兀儿孩四人巡逻远近，速不台为前锋护卫，以博尔术、者勒蔑归附独早，命为众官之长。是时，官制草创而已。

久之，札木合弟给察儿牧于斡列该不刺合，与帝之牧地近，夺部将答儿马刺之马；答儿马刺射杀之。札木合大怒，遂纠泰亦赤兀、亦乞列思、兀鲁特、那牙勤、火鲁刺思、巴邻、宏吉刺、合塔斤、撒勒只兀、朵儿边、塔塔儿，共十三部，合兵三万人来攻。

时孛图父捏坤在泰亦赤兀部下，使巴鲁刺思人木勒客脱塔黑等来告变。帝在古连勒古之地，分部众为十三翼以待之。宣懿皇后及斡勒忽讷部为第一翼。帝与子弟及宗人之子弟为第二翼。撒姆哈准之后人曰布拉柱，阿答儿斤将木忽儿忽兰，火鲁刺思将曰察鲁哈，与客烈亦之分部为第三翼。苏儿嘎图之子曰得林赤，博歹阿特人曰火力台为第四翼。莎儿合秃主儿乞之子撒察别乞（曰），泰出与札刺亦部为第五、六翼。乞

颜特人渥秃助忽都朵端乞为第七翼，蒙格秃之子曰程克索特，巴牙兀将曰汪古儿为第八翼。答里台、忽察儿及都黑刺特、努古思、火儿罕、撒哈夷特、委神四部为第九翼。忽都刺之子拙赤罕为第十翼。阿勒坛为第十一翼。答忽与晃火攸特部、速客特部为第十二翼。努古思部为第十三翼。与札木合大战于答兰巴泐渚纳，军失利，部将察合安死之。

帝退保斡难河哲捏列之地，兀鲁特人术赤台、忙兀特人畏答儿各率所部来归。顷之，帝与照烈人同猎于乌者儿哲儿们山。照烈人食尽，已归其半，帝要与同宿，分粮给之。明日，再猎，复驱兽向之，使获多。照烈人感悦，中道相谓曰：“泰亦赤兀与我兄弟，然薄待我。今帖木真厚我如此，盍归之。”其酋曰乌鲁克，曰塔海答鲁俱请降，谓帝曰：“我等为泰亦赤兀所虐，如无主之马，无牧之牛羊，故弃彼而从汝。”帝大悦曰：“我方熟寐，幸汝摔我发以醒我，异日汝兵车所至，我必悉力助之。”然其后照烈人复叛去。塔海答鲁为泰亦赤兀所杀，照烈部遂亡。帝宽仁有度量，诸部皆谓：“泰亦赤兀无道，帖木真以己衣衣人，以己马乘人，真吾主也。”于是远近相率归附。

甲寅，帝年四十岁，金章宗明昌四年也，塔塔儿酋蔑古真薛兀勒图等为金边患，金丞相完颜襄讨之。帝闻之，欲复世仇，助金人攻塔塔儿。征兵于主儿乞，迟六日，主儿乞部长撒察别乞、泰出俱不至。乃与王罕攻塔塔儿于忽刺秃失秃延之地，获蔑古真薛兀勒图。金人授帝为札兀惕忽里，译言百户长也。

师还，遣六十人赍俘获，遗主儿乞部长。主儿乞杀十人，夺五十人之衣马而归之。帝大怒，引众逾沙磧，攻主儿乞于阔朵额阿刺勒，大破之。撒察别乞、泰出仅以妻孥免。先是，帝奉宣懿皇后以旄车载湏酪，大会诸部于斡难河。撒察别乞从者斫皇弟别勒古台，创甚。众怒执其二哈敦。故主儿乞人有憾于帝焉。

是年，札剌亦人古温兀阿率其子木华黎来归，董喀亦部、秃别干部来降。

乙卯，王罕弟额儿客合刺以乃蛮兵攻王罕。王罕奔西辽，欲归于帝，中途资用乏绝。

丙辰，王罕至古薛兀儿海子，帝使塔海速客该迎之，振其部众饥，与王罕宴于上兀拉河，重订父子之约。冬，与王罕合兵攻主儿乞于帖列秃阿马撒刺之地，获撒察别乞、泰出，诛之。

丁巳，帝在霍拉思布拉思之地，攻兀都亦特蔑儿乞，战于那莫察山，败之，归其俘于王罕。

戊午，王罕兵势渐振，不谋于帝，自率所部攻蔑儿乞于土兀刺河。蔑儿乞酋脱黑脱阿奔巴儿古真。王罕俘获甚多，而无所遗于帝。帝亦不以为意。

己未，帝与王罕合兵攻乃蛮不亦鲁黑罕，逾阿尔泰山，追至兀陇古河，又至乞失泐巴失海子，获其将也的脱孛鲁。不亦鲁黑奔谦谦州。

冬，复与乃蛮骁将可克薛兀撒卜刺黑战于巴亦答刺黑之地，交绥而退。明日，将复战，札木合构帝于王罕曰：“帖木真如野鸟依人，终必飞去。我如白翎雀，栖汝幕上，宁肯去

乎？”王罕将兀卜赤儿古邻闻而斥之曰：“既为宗人，又为谄达，奈何谗之。”然王罕终信其言，乘夜引众去。帝闻王罕去，怒曰：“彼弃我之易如此，直以烧饭待我也。”乃退舍于撒里河。王罕至土兀刺河，其子桑昆为可克薛兀撒卜刺黑所袭，部众溃散。王罕复遣使乞援，且请以博尔术、木华黎、博尔忽、赤老温将援兵。帝许之。博尔术等败乃蛮，返所虏以归王罕。王罕大悦，遣使谓帝曰：“曩者衣食乏绝，我子帖木真食之、衣之，今又救我之难，不知何以为报也。”又召博尔术往，赐以衣一袭、金们忽儿十。博尔术还白其事，帝命受之。冬，帝与皇弟合萨儿再伐乃蛮，战于忽兰盏侧山，大败之，封尸以为京观。

庚申，帝会王罕于撒里河之不鲁古崖。时蔑儿乞酋托黑托阿遣泰亦赤兀人忽敦忽儿章，纠合泰亦赤兀诸酋，曰盎库兀库楚，曰忽里儿，曰忽都答儿，曰塔儿忽台，曰哈刺儿秃克等共会于斡难河沙碛中。帝与王罕轻骑袭之，塔儿忽台、忽都答儿败死，盎库兀库楚、忽敦忽儿章奔巴儿古真，忽里儿奔乃蛮，泰亦赤兀部亡。

哈答斤部、撒儿助特部素附泰亦赤兀，乃与朵儿奔、塔塔儿、宏吉刺诸部会于阿雷泉，斩牛马为誓，欲乘我不备，攻之。宏吉刺人特因恐事不就，遣使来告变。帝与王罕自虎图海子，逆战于捕鱼儿海子，诸部皆败走，宏吉刺部来降。

冬，帝幸彻彻儿山，金之边地也，又败塔塔儿酋阿刺兀都儿、合丹太石、察忽斤、帖木儿等于答兰捏木儿格思之地。是役也，合萨儿留后，闻部将者卜客言宏吉刺人有异志，遽率所部攻之。宏吉刺人怒，遂叛附于札木合。

辛酉，宏吉剌、亦乞列思、火鲁拉思、朵儿奔、塔塔儿、哈答斤、撒儿助特诸部会于刊河，议立札木合为古儿罕，以足蹋岸土，刀斫林木，而誓曰：“有泄此谋，如土崩、木折。”遂悉众来攻。有火鲁拉思人火力台知其事，与妻弟麦儿吉台言之。麦儿吉台赠以剪耳白马，使驰告于帝。夜至一古阑，其将曰忽兰，曰哈刺蔑儿乞歹，见而执之。然二将亦心附于帝。易以良马，使疾去。火力台来告变，帝得先期戒严。战于海拉儿帖泥河，大败之。札木合遁走，宏吉剌部复降。

壬戌，帝亲征察合安、阿勒赤、都答兀惕、阿鲁孩四部塔塔儿，追至兀鲁回河。其众降，帝悉诛之。阿勒坛、忽察儿、答里台三人违军令，帝命忽必来、哲别夺其所获。三人怒，遂有异志。

秋，乃蛮不亦鲁黑汗、蔑儿乞酋托黑托阿之子忽都、泰亦赤兀酋盎库兀库楚，又合撒儿助特、卫拉持、朵儿奔、哈答斤诸部来攻。帝与王罕会于汪古部哈刺温赤敦之地。桑昆后至，逾山隘。乃蛮兵从之，使神巫投石水中，以致风雪。俄风反，乃蛮众大溃，退至奎腾之地，士马僵冻，坠崖谷死者无算。札木合率部众来应，见不亦鲁黑败，乃大掠诸部而去。帝自追盎库兀库楚，颈中流矢，创甚，卒获盎库兀库楚诛之。遂与王罕同驻于阿刺儿。

冬，帝徙帐于阿儿却宏哥儿之地。帝为皇子术赤求婚于王罕。王罕辞。桑昆子欲尚帝女豁真别乞，帝亦不从。自此与王罕有隙。帝移驻阿不只合阔帖格儿之地。王罕亦西还彻彻尔温都尔。

癸亥，桑昆谋害帝，伪许婚，请帝饮布浑察儿，译言许

婚酒也。帝率十骑以往，道过蒙力克帐宿焉。蒙力克谏谓：“王罕父子意叵测，请以马疲道远谢之。”帝从之，使从骑不合台、乞刺台往谢，自率八骑返。

桑昆计不就，欲潜师来袭。其圉人乞失力克知之，密与弟巴歹来告变。帝亟移营于卯温都儿山后，使者勒蔑断后、哨敌。山前多红柳，王罕兵至，蔽于柳林，侦者不之觉。阿勒赤歹从者曰泰赤吉歹，曰牙的儿，方牧马，见之，驰告于帝。帝仓卒戒严，以忙兀特将畏答儿、兀鲁特将术赤台为前锋，大战至晡。术赤台射桑昆中其颊，王罕始敛兵而退。帝以众寡不敌，亟引去。次日，皇子窝阔台，大将博尔术、博尔忽始至。畏答儿受重伤，创发，中道卒。

时部众溃散，帝率左右至巴勒渚纳河，饮水誓众曰：“异日甘苦相同，倘负约，使我如河之水涸。”饮毕，以杯与从者。从者亦誓死相从无贰志。其后称诸臣为巴勒渚纳特，延赏及于子孙焉。既而部众渐集，得四千六百人，分两军。帝自将一军，忙兀特、兀鲁兀特人为一军，循合勒哈河两岸而行，至宏吉拉别部帖儿格阿蔑勒牧地。帝使术赤台告之曰：“我等本为谄达，如从我，则不失旧好。否则以兵相见。”于是帖儿格阿蔑勒来降。帝遂驻于董嘎淖尔、脱儿哈河。是地水草茂美，可以休息士卒。遣阿儿海者温告于王罕及阿勒坛、忽察儿、脱忽鲁儿等，语详《王罕传》。帝遣使后，复徙帐于巴勒渚纳，以其地险阻可保也。撒哈夷部、呼真部俱来降。

秋，帝将攻王罕，遣合萨儿伪请降。王罕信之，不设备。帝昼夜兼进，袭王罕于彻彻尔温都尔，尽俘其众。王罕父子走死。客烈亦部亡。时王罕诸将皆降，独哈里巴卒数十骑驰

去，不知所终。

帝既灭王罕，拓地西至乃蛮。乃蛮太阳罕忌帝威名，遣使约汪古部长阿剌忽思的斤忽里夹攻我。阿剌忽思的斤忽里遣使告其事于帝，且请降。

甲子春，猎于帖蔑延河，与诸将会议讨乃蛮。猎毕。猎毕，驻兵于哈勒哈河建忒垓山。宣布札萨克，以令于众。立千户、百户、牌子头，设六等扯克必官。选宿卫士八十人，散班七十人，又命阿儿孩选护卫千人，临敌则为前锋。

夏四月，弼牙伐乃蛮。师至乃蛮境外客勒忒该哈答，滨哈利河。乃蛮按兵不动，帝引还。

秋，再议进兵，以忽必来、哲别为前锋。时太阳罕已至杭海山之哈儿只兀孙河，与朵儿奔、塔塔儿、合答斤、撒儿助特诸部，及蔑儿乞酋托黑托阿、客烈亦酋纳邻大石、卫拉特酋忽都哈别乞、札只刺酋札木合等连兵而进，阵于纳忽东崖察儿乞马兀惕之地。帝自临前敌，指挥诸将大破乃蛮兵，擒太阳罕，杀之，乃蛮将火力罕速八赤等犹力战，帝欲降之，不从，皆战死。帝奖叹久之，曰：“使我麾下诸将皆如此，我复何忧。”是日，朵儿奔、塔塔儿、合答斤、撒儿助特诸部皆降，札木合、托黑托阿遁去，太阳罕子古出鲁克奔于不亦鲁黑。乃蛮南部亡。

冬，再伐蔑儿乞，至塔儿河。其别部酋带亦儿兀孙来献女，后复叛去。托黑托阿奔于不亦鲁黑。带亦儿兀孙遁至呼鲁哈察卜，筑垒自守。遣博儿忽、沈伯率右翼兵，讨平之。

乙丑春，袭不亦鲁黑于兀鲁塔山莎合水上，禽之。乃蛮北部亡。

帝以西夏纳我仇人桑昆，自将伐之。围力吉里城，又进攻乞邻古撒城，俱克之，大掠而还。

是年，札木合至唐努岭，其家奴五人执之来降。帝曰：“以奴卖主，不忠莫甚焉。”札木合及五人并伏诛。

卷三

本纪第三

太祖下

元年丙寅，帝大会部众于斡难河之源，建九游白纛，即皇帝位。群臣共上尊号曰成吉思合罕。先是，有巫者阔阔出，蒙力克之子也，自诡闻神语，畀帖木真以天下，其号曰成吉思。群臣以札木合僭号古儿罕，旋败，乃废古儿罕不称，而从阔阔出之言，尊帝为成吉思合罕。国语“成”为气力强固，“吉思”为多数也。

帝大封功臣，以博尔术为右翼万户，木华黎为左翼万户，纳牙阿为中军万户。豁儿赤以言符命，亦封为万户，以博尔忽为第一千户功。功臣封万户、千户者共八十五人。以忽都虎为札儿忽，译言断事官也。以也客捏兀邻，领宿卫千人，也孙帖额领箭筒士千人，斡哥连、不合、阿勒赤歹、朵歹、朵豁勒忽、察乃、阿忽台、阿儿孩分领护卫散班八千人，分番入直，是为四怯薛。

是年，命忽必来征合儿鲁，者别追古出鲁克。

二年丁卯秋，帝亲下西夏，入兀刺海城。遣阿勒坛、布刺二人往谕乞儿吉思部。

是年，皇子术赤领右翼军，征和林西北部族。斡亦剌部长忽都哈别乞迎降。进讨秃马、斡亦剌于失黑失特之地，于是斡亦剌、不里牙特、巴儿浑、兀儿速特、哈卜哈纳思、康哈思、秃巴思诸部悉降。乞儿吉思部长也迪亦纳勒、阿勒迪额儿、斡列别克的斤亦望风纳款，献白海青、白马、黑貂等方物。林木中部族失必儿、客思的音、巴亦特、秃哈思、田列克、脱额列思、塔思、巴只吉等亦降。

三年戊辰春，帝至自西夏。

冬十月，金主璟卒，其叔父卫王永济嗣位。帝再讨古出鲁克、托黑托阿，以斡亦剌部长忽都哈别乞为向导，至也儿的石河。托黑托阿中流矢死，蔑儿乞部亡。古出鲁克奔西辽，其后篡西辽主直鲁古而自立。

四年己巳春，畏兀儿部亦都护来降。先是，托黑托阿死，其子忽都等将奔畏兀儿。亦都护不纳，与忽都等战于真河，败之，以蔑儿乞为帝世仇，遣使来告战事，帝命阿惕乞剌黑、答儿伯前后再使其国，且征贡献。亦都护遂遣使贡方物，帝悦，赐大红衣、金带以宠之。

五年，庚午秋，帝再伐西夏。西夏主李安全遣基世子遵頊拒战。败之，获其副元帅高令公。复入兀刺海城，获其太傅鲜卑讹答。至克夷门，又败夏师，获其将嵬名令公。进薄中兴府，引河水灌城。水决坏其堤，乃班师。遣讹答入城谕西夏主，西夏主纳女请和，师还。

遂议伐金。先是，帝贡岁币于金，金主使卫王永济受贡

于净州。帝见永济不为礼，永济归，欲请兵会金主，卒不果。及永济嗣位，诏使来传言，当拜受。帝问使者曰：“新天子为谁？”曰：“卫王也。”帝遽南向唾曰：“我谓中原皇帝是天上人作，此等庸懦者亦为之耶！何以拜为？”即乘马北去。永济闻之，益怒，遣兵分屯山后，欲俟帝入贡，就害之，然后引兵深入。会金纥军来降，泄其事。帝遣人伺之，得实，遂与金绝。金边将纳哈买住亦言于永济曰：“蒙古已并吞邻部，而修弓矢甲盾不休，行营令男子乘车惜马力，其意非图我而何？”永济以为妄言，囚之，至是始释之。帝复遣使于畏兀儿，征兵助战。

六年辛未春，忽必来招降合儿鲁，其部长阿儿思兰与畏兀儿亦都护俱觐帝于克鲁伦河。亦都护奏曰：“蒙陛下恩赐，愿藉袞衣金带之宠，使臣得预四子之末。”帝感其言，遂以亦都护为义子，尚阿勒敦公主。

二月，帝自将伐金，登克鲁伦山，解衣以带置顶，跪祷于天，誓复俺巴孩罕之仇，使脱忽察儿率三千骑巡西边，以防后路。

三月，帝渡漠而南，以者别为前锋。

夏四月，金主遣其西北路招讨使粘合合达求和，帝不许，乃使其将独吉千家奴、完颜胡沙筑乌沙堡以备我。

秋七月，帝奄至，千家奴等败遁，克乌沙堡及乌月营。

八月，帝进克白登城，围西京。自克乌沙堡至此，凡七日。金将纥石烈胡沙虎以麾下突围走，率三千骑追之，败胡沙虎于翠屏口，遂克西京及昌、桓、抚等州。金招讨使纥石烈九斤、监军斡奴等率大兵屯于野狐岭，号四十万，以完颜

胡沙为后援。其裨将巴古失、桑臣二人谓九斤曰：“闻蒙古破抚州，方纵兵大掠，若掩其不备，必获大胜。”九斤曰：“不然，彼之形势不易遽破，宜明日马步俱进，为万全之计。”次日，帝闻金兵至，方食，投匕箸而起，与九斤等战于野狐岭北口之獾儿嘴。木华黎先登陷阵，帝率诸军继之。九斤等大败，伏尸遍野。金之精兵、猛将尽没于此。

九月，完颜胡沙遁至宣平，大兵追击之，复败其众于浚河堡，胡沙仅以身免。

闰九月，帝进克宣德州，薄德兴府。军不利，引还。命皇子拖雷、驸马赤苦等尽拔德兴境内诸堡。

冬十月，者别乘胜入居庸关，游兵至中都城外。金主欲南奔。会纥军来援，蒙古问乡民：“纥军多少？”乡民给曰：“二十万。”者别乃袭金群牧监，驱其马而还。

是冬，皇子术赤、察合台、窝阔台分徇云内、东胜、武朔、宁、丰、净等州，俱克之。

七年壬申春正月，金耶律留哥聚众于隆安，自称都元帅，遣使来降。

时西京复为金守。秋，帝自将攻之。金将奥屯襄来援，帝诱至密谷口，大败之，尽歼其众。帝攻城，为流矢所中，乃彻围。

冬十二月，者别克东京。先是，者别至东京城下，不攻而退。金人兵已退，不设备，者别率精骑突至，遂克之。

八年癸酉春，耶律留哥自立为辽王，改元元统。

秋七月，帝自将大军围德兴府，皇子拖雷、驸马赤古先登，克之。

八月，者别、古亦捏克等略地怀来，金将完颜纲、术虎高琪拒战，大败之。追至居庸关北口，又败之。金人严兵守隘，熔铁锢关门，布铁蒺藜百余里，大军不能进。帝遣翁吉剌将哈台、布札留攻北口，自率大军绕出紫荆关。金人以奥屯襄守紫荆。比至，帝已逾隘，败金于五回岭，分遣者别、速不台从间道袭居庸南口，克之，金将讹鲁不儿等以北口降，遂取居庸。帝驻蹕龙虎台，遣喀台、哈台二将，率五千骑，断中都援路。

是月，金胡沙虎废其主永济弑之，而立丰王珣，改元贞祐。

冬十月，帝自将大军，攻克涿、易二州。分兵三道：命皇子术赤、察合台、窝阔台为右军，循太行而南，取保、遂、安肃、安、定、邢、洺、磁、相、卫、怀、孟，掠泽、潞、辽、沁、平阳、太原、吉、隰、拔汾、石、欣、代、武等州；皇弟合撒儿、斡陈那颜、布札为左军，循海而东，取平、滦、蓟等州；帝与皇子拖雷为中军，取雄、霸、莫、安、河间、沧、景、献、深、祁、蠡、冀、恩、濮、开、滑、博、济、泰安、济南、滨、棣、益都、淄、潍、登、莱、沂等州。别遣木华黎攻密州。凡克九十余城，两河、山东数千里之地，望风瓦解，惟中都及通、顺、真定、清、沃、大名、东平、德、邳、海州十一城坚守不下。

冬十月，三道兵还，合屯大口，以逼中都。

是月，与金将术虎高琪战于中都城下，大败之。金将胡沙虎为高琪所杀。

九年甲戌春正月，帝驻蹕中都北郊。初，金粘罕营中都，

于城外筑四子城，楼橹、仓廩、甲仗库各穿地道通于内城，人笑之。粘罕曰：“不及百年，吾言当验。”至是，金人分守四城，大兵攻内城，四城兵迭用炮击之。又开南薰门，橹、仓廩、甲仗库各穿地道通于内城，人笑之。粘罕曰：“不及百年，吾言当验。”至是，金人分守四城，大兵攻内城，四城兵迭用炮击之。又开南薰门，诱兵入，纵火焚之，死伤甚众。

二月，帝欲班师，遣阿剌浅入城诏谕金主。

三月，金主遣其平章完颜承晖来乞和，帝复遣阿剌浅报之，谕金主曰：“山东、河北州县尽为我有，汝所守唯中都耳！天既弱汝，我复迫汝于险，天其谓我何！我今归，汝不能犒军，以弭诸将之怒耶？”金主与廷臣会议，其丞相术虎高琪曰：“彼兵力已疲，再与决战，何如？”完颜承晖曰：“此孤注也，败则不能复振。不如俟其退，再为战守之计。”金主从之，奉卫绍王女岐国公主及金帛、童男女五百人、马三千匹以献。遣承晖送帝出居庸，至野麻池而返。

是月，大兵克岚州。

夏五月，金主迁于南京，留其太子守忠守中都。帝闻之，怒曰：“既和而复迁，是有疑心，特以和议款我耳！遣阿剌浅往诘责之。会金纥军扈金主南迁，至良乡。金主命输铠仗入官，纥军怒，杀其帅详袞，推斫答、比涉耳、札刺儿三人为帅，来请降。时帝避暑于鱼儿泺，遣石抹明安、撒木合入古北口，与斫答等围中都。

秋七月，金主召太子守忠赴南京。

冬十月，木华黎克顺州。

十二月，木华黎徇辽西诸路，克懿州。锦州张鲸，高州

卢琮、金朴等，俱以城降。

是年，始置行省于宣平，以撒木合领之，部署降众。

十年乙亥春正月丁丑，金右副元帅蒲察七斤以通州降。以七斤为都元帅。

二月，木华黎围北京。留守奥屯襄先为其部将习烈所杀，推寅答虎为帅，寅答虎以城降。以吾也而权北京兵马都元帅，寅答虎为留守。金兴中府元帅石天应降，以天应为兴中府尹。帝遣阿剌浅谕金主以河北、山东未下诸城来献，及去帝号为河南王，金主不从。

三月，金主遣其将永锡、庆寿、李英等援中都，人负粮三斗，庆寿、英亦负之以率其众。庆寿至涿州旋风寨，英至霸州青戈寨，皆为大军所败。中都援绝，人相食。

夏五月庚申，金右丞相兼都元帅承晖仰药死，众以城降。石抹明安入中都，遣使来献捷。帝驻蹕桓州之凉陁，命忽都虎等按视中都帑藏，以石抹明安为太傅，兼管蒙古、汉军都元帅。

秋八月，木华黎遣史天倪克平州，又遣史进道等克广宁府。红罗山贼帅杜秀降，以秀为锦州节度使。

冬十月，金宣抚使蒲鲜万奴据辽东，僭号天王。

十一月，耶律留哥来朝。史天祥克兴州，擒其节度使赵守玉。

十二月，史天倪克大名府及曹州。张鲸总北京十提控兵，从木华黎南伐。鲸谋反伏诛，其弟致据锦州以叛。

是年，取城邑凡八百六十有二。改中都为蓟州，改河间路之深州隶真定路，升鼓城县为晋州，改千溢县为滏阳县。

十一年丙子春，帝自鱼儿泺还卢沟河行宫，脱仑扯儿必克真定府。

夏四月，金将张开复取河间府、沧、献、邢、清等州。

六月，张致陷兴中府。

秋七月，木华黎败张致于神木县，进围锦州。

八月，木华黎克锦州，张致伏诛。进拔苏、复、海等州，获金将完颜众家奴。帝命撒木合率万骑，假途西夏，以趋关中。

冬十月，撒木合攻潼关，间道出禁坑。金兵溃走，获其将尼兰古蒲鲁虎。进略汝州，直抵南京之杏花营。金花帽军入援，撒木合战不利。引还。花帽军者，金蔚州人郭忠所将之义兵也。

十一月，撒木合败金将蒲察阿里不孙于滏池，渡河，围平阳府。金主遣使乞和，帝欲许之，诏撒木合曰：“譬围场中，獐鹿吾已尽取，只余一兔，盍舍之。”撒木合请使金主去帝号，金主不从。

是冬，蒲鲜万奴遣使来降。已而复叛，自称大真国。

十二年丁丑春，木华黎觐帝于土拉河。夏，史天祥击斩武平贼祁和尚及兴州叛将重儿。察罕败金将夹谷监军于霸州。帝闻蔑儿乞余众入乃蛮境，问：“诸将谁能为我讨蔑儿乞者？”速不台请行，帝许之，命脱忽察儿率二千骑同往。速不台至垂河，大败蔑儿乞，尽歼其众。托黑托阿子忽都、赤剌温二人，奔奇卜察克。

秋八月，封木华黎为国王，赐九旂旗，诸将咸听节制。诏曰：“太行以北，朕自制之；太行以南，悉以付卿。”于是木

华黎专征河北，连拔遂城、蠡州。

冬，进克大名府，金中山府、赵、邢、威、磁、洺等州守将俱以城降，遂东取淄、潍、登、莱、沂等州。

是年，秃马特叛。秃马特酋歹都秃勒死，其妻脱灰塔儿浑率部众以叛。帝遣博尔忽讨之，战没。帝怒，议亲征。博尔术等谏，乃使朵儿伯朵黑申往。朵儿伯朵黑申槎山通道，一战平之，获脱灰塔儿浑。

是年，帝将征货勒自弥，征兵于西夏，不应，遂伐之。

十三年戊宣春正月，围中兴府，西夏主李遵顼出走西凉，师还。遣者别讨古出鲁克。古出鲁克篡西辽王直鲁古，部众不服。者别至，远近响应，古出鲁克奔巴达克山，者别获而杀之。

三月，木华黎克新城、霸州。

秋八月，石抹明安出紫荆关，获金经略使行元帅事张柔。柔不屈，明安壮而释之。诏还柔旧职，得以便宜行事。木华黎自太和岭徇河东，克代、隰二州。

九月，进克太原府。

冬十月，克平阳府。遂定忻、泽、绛、潞、汾、霍等州。

是年，契丹人耶律喊舍等据高丽江东城，遣元帅哈真、副元帅札剌讨之。高丽王暉使其仆射赵冲等以兵来会。

十二月，克江东城，喊舍自缢死，斩其伪丞相以下百余人。高丽王暉来贡方物。

十四年己卯春，帝亲征货勒自弥，以皇弟斡赤斤留守和林。

五月，遣刘仲禄佩金虎符，征道士邱处机于登州。

六月，帝会诸皇子、大将于也儿的失河，议分兵讨货勒自弥。禡牙之日，雪深三尺。

九月，皇子察合台、窝阔台围讹剌脱儿城；术赤西北攻毡的城；诸将阿刺黑等东南攻伯讷特克城；帝与拖雷径渡锡尔河趋布哈尔。帝至赛尔奴克城，遣丹尼世们谕降之；从间道袭努尔城，遣前锋将岱尔巴图谕降之；遂围布哈尔城。

是年，张柔克金雄、昌、保诸州，败贾瑀于孔山台，擒斩之。复败金恒山公武仙于满城，拔完城、曲阳、中山诸州县。于是，深、冀以北，镇定以东三十余城悉降。

冬十一月，木华黎克晋安府屠之。金丞相高琪用事；聚精兵于河南，而置河北不问。金主杀高琪。

十五年庚辰春，帝亲攻布哈尔。其酋率所部二万余人突围走，追及于阿母河，尽杀之，城民出降。是时，察合台、窝阔台已拔讹剌脱儿，获其守将伊那克只克，槛送行在诛之。术赤先攻下八儿真等城，阿刺黑等攻下忽毡等城。

夏五月，进至撒马尔干城，术赤等三路之师亦傅城下。货勒自弥苏尔滩先居撒马尔干，闻大兵至，遁走，使其将阿尔泼汗婴城固守。帝遣者别、速不台各率轻骑追苏尔滩，又使脱所察儿为二将后援。帝自率诸皇子围撒马尔干，阿儿泼汗以波斯兵出战，中伏，大败。康里兵开门出降。阿儿泼汗引亲兵突围走。帝恐康里兵反覆，仍尽诛之，以降将巴克曷勒蔑里克、哀密儿阿米守撒马尔干。

夏，帝避暑于渴石。帝以苏尔滩母土而堪哈敦在乌尔鞑赤，遣丹尼世们往谕之。土而堪不答，奔马三德兰，与苏尔滩妻俱为者别、速不台所获。

秋，命术赤、察合台、窝阔台攻乌尔鞑赤。帝自率大军攻忒耳迷城，克之。进至赛蛮，分军略巴达克山，以阿母河北之地悉定，遂渡河，攻克巴而黑城。见其城险固。恐为后路之患，堕之。东入塔里堪山，攻诺司雷脱柯寨。遣塔忽等使于金。

冬十月，复遣蒙古塔忽、讹里刺等使于金。十二月，苏尔滩入嘎比斯海岛，闻其母妻被获，幼子又为帝所杀，心悸而卒。

是年，木华黎略地至真定府，金恒山公武仙降，木华黎承制授史天倪河北都元帅，以仙副之。济南严实籍大名、彰德、磁、洺、恩、博、滑、浚等州户三十万来降。木华黎承制授实金紫光禄大夫、行尚书省事。木华黎留实围东平，分兵徇河北诸州。董俊判官李全以中山叛。

十六年，辛巳春，克诺司雷脱柯寨，屠之。术赤等攻乌尔鞑赤，屡失利。帝驻蹕塔里堪，术赤等以军事来告。帝廉知术赤、察合台素不合，改命窝阔台总诸军，并力急攻，克之。召察合台、窝阔台赴塔里堪，使术赤屯兵咸海、里海之间。拖雷渡阿母河，进拔安狄枯、马鲁诸城。进围你沙不儿城，三月，克之。又进拔海拉脱城，旋奉帝命，会师于塔里堪。

夏六月，宋使苟梦玉来聘。

秋七月，金主使乌库里仲端来乞和，帝曰：“念汝远来，河朔既为我有，关西未下数城，宜割付于我，封汝主为河南王，勿复违也。”帝以苏尔滩子札剌勒丁据嘎自尼，与阿敏蔑里克兵合，自率三皇子讨之。

八月，逾印度固斯大山，至八米俺，命忽都虎扼喀不尔山之隘。忽都虎与札刺勒丁战于巴鲁安，失利。

九月，帝亲攻八米俺城，皇孙谟阿图堪中流矢卒。帝怒，城下之后，遇生物悉屠之，改城名曰卯库儿干。帝闻忽都虎失利，疾趋嘎自尼，军中不及爨，掬米食之。帝至巴鲁安，巡视战地，以诸将不知形势，自忽都虎以下皆受谴责。时札刺勒丁已遁，追及于印度河。会日暮，帝命列阵围之，又使乌克儿古儿札、古都斯古儿札濒河设伏，截其登舟之路。黎明，大战，败其右翼兵，获阿敏蔑里克。未几，其右翼亦溃，札刺勒丁以中军七百人突围走。帝欲生致札刺勒丁，令军中毋发矢。札刺勒丁以盖自蔽，策马自峭岸投于印度河，溺水而遁。帝见之，以口龇指，谓诸皇子曰：“凡为将者，皆应如此也。”寻遣巴刺土尔台渡河追札刺勒丁，不及而还。

是月，木华黎出河西，克葭、绥德、保安、酃、坊、丹等州，进围延安府。

十二月，宋京东安抚使张林来降，以林为沧、景、滨、棣等州行都元帅。

是年，帝遣搠儿马罕讨巴里塔部，遣朵儿伯朵黑申讨朵儿别部，遣者别、速不台讨康里、奇卜察克等十一部。者别、速不台与奇卜察克兵战于高喀斯，败之，获其部酋之弟玉儿格及其子塔阿儿。

十七年，壬午春，以札刺勒丁未获，嘎自尼诸城复叛，遣窝阔台讨平之。初，巴鲁安之败，海拉脱亦叛，至是帝遣按只吉歹讨平之。窝阔台既定嘎自尼，请进攻昔义斯单，帝曰：“隆暑将至，宜遣别将攻之，汝勿往。”

三月，封昆仑山神为元极王，大盐池神为惠济王。

夏四月，道士邱处机谒帝于行在。帝闻巴里黑复叛，自将讨平之。遂避暑于巴鲁安。以西域大定，设达鲁花赤监治之。

秋，窝阔台来觐于古南柯而干城。配克部酋萨拉尔阿黑默特来降，并献军粮，以地热，令居民每户舂黍米百斤，供士卒三人食。帝欲从印度斯单经唐古特而归，行数城，闻唐古特复叛，又以道路险恶，乃改途，渡质浑河，循故道至撒马尔干。或曰：左右见一角兽，形如鹿而马尾，作人言曰：“汝主宜早还。”帝遂决意班师。帝次布哈尔，召天方教士干曷世甫等述其教规。帝曰：“麦哈礼拜我不谓然，上帝降鉴无所不周，何为拘拘于一地乎？”命自后祈祷之文，皆书御名，又命免天方教士赋役。

秋九月丙午朔，车驾渡阿母河，中途见邱处机，驻蹕于撒马尔干。金平阳公胡天祚以青龙堡降。

冬十月丙子朔，下诏班师。

十一月，金河中府降，以石天应为兵马都元帅守之。

十二月，车驾驻忽毡河，察合台、窝阔台自布哈儿来献猎获，术赤以疾不至。

是年，者别、速不台平奇卜察克，其酋遁入斡罗斯。

十八年癸未春正月甲寅，车驾发忽毡河，驻蹕赤儿赤克河。二月庚辰，猎于东山，见大豕射之，马踏，帝易马而还。自此两月不出猎。

三月，国王木华黎卒。

夏，者别、速不台与斡罗斯战于喀勒吉河孩儿桑之地，大

败之，获其计掖甫、扯而尼哥等部酋，槛送术赤诛之。诏以马十万匹犒师。

十月，金主珣卒，其太子守绪立。宋复遣苟梦玉来聘。西夏李遵顼传位于子德旺。

十九年甲申，帝避暑额儿的失之地。初，帝遣者别、速不台追苏尔滩，命之曰：“事定之后，由奇卜察克回至蒙兀儿斯单，与我相见，然后全师东返。”至是，者别、速不台来告捷，请遵前命，觐帝于行在。未几，者别中道卒。

秋七月，嗣国王孛鲁伐西夏，克银州。

冬，皇孙忽必烈、旭烈兀来迎，忽必烈射一兔，旭烈兀射一山羊以献。帝进次布哈苏赤忽之地，大犒三军，支金帐以宴之。帝命诸将取石压行帐，以免倾覆，乌布赤不从，会猎，又不从众合围，帝怒，囚乌布赤于营中三日，既而宥之。

二十年乙酉春，帝至和林行宫，分封诸子：以和林之地与拖雷，以叶密尔河边之地与窝阔台，以锡尔河东之地与察合台，以咸海西货勒自弥之地与术赤。

二月，武仙以真定叛，袭杀史天倪。

三月，史天泽复真定，武仙败走。

夏六月，史天泽败宋将彭义斌于赞皇，获之。

秋，帝亲征西夏。初，西夏主伪降，请纳质子，且言愿助兵西讨。及征兵于西夏，其大将阿沙敢卜对使者曰：“俟大国兵败，吾师方出。”帝怒，西夏主乃阴结漠北诸部酋，为拒守之计。至是，帝自将伐之，假道于畏兀儿。

冬十月，武仙入真定，史天泽奔藁城。

十一月，帝猎于阿儿不合之地，堕马，遂不豫。驻蹕于
搆斡儿合惕，遣使责西夏主拒命。

是年，皇子术赤卒。

二十一年丙戌春，帝驻蹕汪古答兰呼图克之地，感恶梦，
时诸孙在侧者惟亦孙哥。遣使召窝阔台、拖雷至。次日，帝
屏诸将及从官，谓窝阔台、拖雷曰：“我殆将死矣。我为汝等
创业，无论东、西、南、北，皆有一岁程。我遗命无他，汝
等欲御敌广土众民，必合众心为一，方能永享国祚。我死，奉
窝阔台为主。”又曰：“我享此大名，死无所憾，我愿归于故
土。察合台虽不在侧，当不至背我遗命。”言毕，麾二子出。

三月，自将诸军，拔西夏黑水等城。败其将阿沙敢卜于
贺兰山，获之。

夏，避暑于浑垂山。诏封功臣户口食邑为十投下，以国
王孛鲁为首。克西夏、甘、肃等州。

秋七月，西夏主李德旺卒，从子眘立。大军克西凉府及
搆罗、河源等县，遂逾沙陀，至黄河九渡，拔应昌等县。

九月，李全执张林以叛。郡王带孙围全于益都。

冬十一月庚申，帝亲攻灵州，西夏主李眘率五十营来援。
丙寅，逆击之。时河冰已合，诸将从冰上渡河。西夏主败遁。
帝曰：“李眘经此败，不能复振矣。”丁丑，五星聚于西南。帝
驻蹕盐川州。

十二月，国王孛鲁遣李喜孙谕李全，为全部将所杀。西
夏亦集乃路来降。

二十二年丁亥春，帝留兵围中兴府，自率师渡河，攻积

石州。

三月，克洮、河二州及西宁县。分遣斡真那颜克信都府。是月，李全降。

夏四月，帝驻蹕隆德县，进拔德顺等州。

五月，克临洮府，遣唐庆等赍岁币于金。

闰月，避暑于六盘山。

六月，金遣完颜合周、奥屯阿虎来请和。帝谓群臣曰：“朕自去岁五星聚之时。已许不杀略，遽忘下诏耶？今可布告中外，令彼行人亦知朕意。”

是月，西夏主上表乞降，贡黄金佛及童男女、驼马、金银器，备九九之礼。帝允之，赐西夏主名失都儿忽，译言正直也。西夏主乞展期一月后入朝。帝遣脱仑扯而必慰谕之。是时，帝已不豫，密谕左右：“我死，勿发丧，俟西夏主来，即杀之。”

秋七月，帝驻蹕清水县之西江。壬午，帝疾甚。己丑，崩于灵州。帝临崩，谓左右曰：“金精兵在潼关，南据连山，北限大河，难以遽破。若假途于宋，金，宋之世仇也，必许我，则由唐、邓直捣大梁。金虽撤潼关之兵以自救，然千里赴援，士马俱疲，吾破之必矣。”言乞而崩，年七十有三。

西夏主来朝；托言帝有疾，不能见，令于帐外行礼。越三日，诸将遵遗命杀之。西夏亡。

诸皇子奉梓宫还漠北，至萨里川哈老徒之行宫，乃发丧，葬起辇谷。先是，帝道过起辇谷，见一大树，爱之，盘桓树下良久，谓从者曰：“异日必葬我于此。至是有述前命者，遂葬树下焉。”

至元三年冬十月，追谥圣武皇帝，庙号太祖。至大二年冬十一月，加谥法天启运圣武皇帝。

史臣曰：“天下之势，由分而合，虽阻山限海、异类殊俗，终归于统一。太祖龙兴朔漠，践夏戎金，荡平西域，师行万里，犹出入户闼之内，三代而后未尝有也。天将大九州而一中外，使太祖挾其藩、躡其途，以穷其兵力之所及，虽谓华、夷之大同，肇于博尔济锦氏可也。”

卷四

本纪第四

太宗

太宗英文皇帝，讳窝阔台，太祖第三子也。母曰光献翼圣皇后。太祖长子术赤，次察合台，二人素不相能。太祖十四年，亲征西征，议立嗣而行，察合台请以帝为嗣，太祖从之，事具《术赤传》。十六年，术赤、察合台攻乌尔鞑赤，屡失利，太祖改命帝为统帅。帝调和两兄，兵复振，遂克乌尔鞑赤。十七年春，帝略地印度河下游，请进攻昔义斯单，太祖召帝还，与察合台等从太祖班师。二十一年，从太祖伐西夏。太祖崩，皇弟拖雷监国，帝分地在叶密尔河，留于霍博之地，安辑部众。

元年己丑夏，帝至忽鲁班雪不只之地，皇弟拖雷来迎。

秋八月己未，诸王百官会于怯绿连河阔迭额阿剌勒，请帝遵太祖遗诏即位，共上尊号曰木亦坚合罕。皇兄察合台持帝右手，皇叔斡赤斤持帝左手，皇弟拖雷以金杯进酒赞。帝东向拜日，察合台率皇族及群臣拜于帐下。

先是，太祖崩，金主遣其知开封府完颜麻斤来吊。至是，复遣其御史大夫完颜讷申来归太祖之赙。帝曰：“汝主久不降，使先帝劳于兵间，朕岂忘耶？何以赙为！”却之。

敕宿卫等依前番直，宣太祖圣训以谕之。始建仓廩，立驢传。蒙古人有马百者，输牝马一；牛百者，输犍牛一；羊百者，输羴羊一；著为令。中原人以户计出赋调，命耶律楚材主之。西域人以丁计出赋调，命麻合没的牙刺瓦赤主之。凡诸王、驸马朝会，及使者往来，不得科敛百姓。

冬十一月，敕诸王、众官人管辖之地金军事理有妄分彼此者，罢其达鲁花赤以下等官。

是年，始立三万户，以刘黑马、粘合重山、史天泽为之。赐撒吉思不花金符，安辑山东、河北诸州。木剌夷国王来朝。西域伊思八剌纳酋内附。

二年庚寅春正月，诏自元年以前事勿问。定诸路课税、酒课，验实息，十取一；杂税，三十取一。帝与拖雷猎于斡儿寒河。

夏四月，帝避暑于塔密儿河。朵豁勒围庆阳，与金将完颜彝等战于大昌原，失利。东平行省严实入覲。帝遣斡骨栾使于金，北还，金陕西左副元帅卢鼓椎见使者，有不逊语。帝闻之，大怒。

六月，金主复遣完颜奴申来聘，帝不受。

秋七月，帝自将伐金，命斡赤斤留守，皇弟拖雷及其子蒙哥皆从。

八月，史天泽克卫州。

冬十月，遣速哥使于金。

十一月，始置十路征收课税使：以陈时可、赵昉使燕京，刘中、刘桓使宣德，周立和、王贞使西京，吕振、刘子振使太原，杨简、高廷英使平阳，王晋、贾从使真定，张瑜、王锐使东平，王德亨、侯显使北京，夹谷永、程泰使平州，田木西、李天德使济南。大兵攻潼关、蓝田关，俱不克。

十二月，大兵拔天胜寨及韩城、蒲坂。帝至平阳，以田野不治，问都总管李守贤。对曰：“贫民无耕具，故荒田多。”诏给牛万头，仍徙关中户口，垦河东荒地。

是年，改乾宁军为清宁军，复改隆德府为潞州。遣李邦瑞使于宋，至宝应县不得入。诏行省李全护送邦端，宋边将又拒之。乃改道出于蕲、黄，与宋行人定约而还。遣绰儿马罕率精兵三万，讨札剌勒丁，战于合而拉耳之地，大败之。

三年辛卯春正月，李全攻扬州，为宋将赵葵所杀。

二月，大兵克凤翔府，分兵攻宋西和州，获其将强俊。金平凉、庆阳、邠原等府州皆降。速不台与金将完颜彝战于倒回谷，失利。

夏五月，帝避暑于九十九泉，以李全妻杨妙真为山东淮南行省。金降人李国昌言于拖雷，请出宝鸡，自汉中达于唐、邓，从之。遣搠不罕使于宋，假道且请会兵。搠不罕至沔州，宋青野原统制张宣杀之。

秋八月，帝幸西京，始立中书省，改侍从官名，以耶律

楚材为中书令，粘合重山为左丞相，镇海为右丞相。耶律楚材奏请州县长吏专理民事，万户府专理军政，课税所专理钱谷，各不相统摄。从之。拖雷入大散关，拔宋凤州、洋州，进围兴元。分军为二：西军由沔州渡嘉陵江，东军趋饶风关，略地而东。初，皇叔斡赤斤遣著古与等使于高丽，高丽人杀之。至是，帝使撒里塔征高丽，讨其杀使者之罪。

九月，帝自将围河中府。命平阳移粟西京，都总管李守贤言：“百姓疲敝，不任输载。”诏罢之。

冬十二月己未，克河中府。戊辰，拖雷渡汉水，与金将布哈战于禹山，布哈引兵还，邀其輜重获之。撒里塔围高丽东京，高丽王敞请降。是年，大名守将苏椿反，命杨杰只哥讨斩之。绰儿马罕追札拉勒丁至库儿忒山，札拉勒丁败死。货勒自弥亡。绰儿马罕遂取阿尼忒、爱而西愣、梅法而司三部之地。

四年壬辰春正月壬午朔，拖雷败金将完颜两娄室于襄城。丙戌，帝自河清县白坡渡河，三日军毕渡。庚寅，拖雷使者至，奏已渡汉江。诏诸军即日进发。甲午，帝至郑州，金屯军元帅马伯坚以城降。丙申，大雪。丁酉，帝至新郑县。是日，拖雷及金兵战于钧州之三峰山，大败之，获其大将布哈。自是，金兵不能复振。戊戌，帝至三峰山。壬寅，克钧州，获金大将合达及完颜彝等。辛丑，金潼关守将李平以城降。庚戌，金许州兵以城降。是月，撒里塔自高丽班师。帝遣使以玺书谕高丽王敞。

二月戊午，帝至卢氏县，遇金将徒单兀典等，金兵不战而溃。完颜重喜来降。帝命斩重喜于马前。遂下商、虢、嵩、

汝、陕等州。乙丑，分兵攻归德府，许、郑、陈、亳、寿、颍、睢、永等州进。

三月丁亥，克中京，金将强伸复取之。命速不台等围南京。宋人以兵来会。遣使谕金主降。壬寅，金主使其谏议大夫裴满阿虎带、大府监国世荣来乞和，以其弟之子曹王讹可爲质。癸卯，速不台攻南京不克。

夏四月丁巳，金主复使其户部侍郎杨仁奉金帛乞和，速不台城不易下，许之。戊午，金主又使仁赍珍宝来谢。己未，遣没忒入城诏谕金主。是月，车驾北还，留速不台围南京。帝由半渡至真定府。幸中都，出居庸关，避暑于官山。高丽国遣使来贡方物。

五月，敕使臣无牌面文字，始给马之县官及元差官皆罪之。若兵事及送御用物，仍验数应付车牛。帝不豫。

六月，疾甚。拖雷祷于天地请以身代之。未几，帝疾瘳。遣金质子曹王讹可归。高丽复叛，徙都于江华岛。

七月，遣唐庆谕金主降。甲申，金人杀唐庆及从者三十余人。乙酉，国安用叛附于金。

八月辛亥，速不台败金将武仙等于京水。复遣撒里塔征高丽。

九月，帝次阿剌合的思之地。皇弟拖雷卒。

冬十月，高丽国遣使来谢罪。

十一月，帝猎于纳兰赤刺温之地。

十二月，驻蹕于太祖大斡尔朵。金主以汴京不能守，议渡河取卫州。撒里塔攻高丽处仁城，中流矢卒，别将铁哥引兵还。

是年，立彰德路总元帅府，改怀州为行怀、孟州事。遣王楫使于宋，议夹攻金人。宋使邹伸之来报命。帝许以成功之后，归宋河南地。

五年癸巳春正月丙午朔，金主渡河。辛亥，金将白撒攻卫州。丁巳，撒吉思不花等败白撒于白公庙。金主奔归德府。戊辰，金京城西面元帅崔立杀留守完颜奴申等，以南京降。

二月帝幸铁列都之地。命皇子贵由及诸王按赤带将左翼兵，讨蒲鲜万奴。

夏四月癸巳，崔立以金太后王氏、皇后徒单氏、梁王从恪、荆王守纯及宗室男女五百余人，至速不台军中。甲午，速不台杀从恪、守纯，送王氏、徒单氏赴行在。忒木哥率诸军围归德。

五月，金将蒲察官奴乘夜来攻，撒吉思不花及都元帅董俊等皆战没。诏谕高丽王悔过来朝，且数其五罪。

六月壬午，速不台克中京，获金中京留守强伸。辛卯，金主自归德奔蔡州。己亥，金主入于蔡州。是月，帝命以孔子五十一世孙元措袭封衍圣公。

秋八月，帝猎于兀必思之地。以阿同葛等充宣差勘事官，括中州民户。

九月，遣王楫使于宋，且征粮。辛亥，塔察儿筑长围以困蔡州。是月，皇子贵由等获万奴，辽东平。

冬十月甲申，金将麻琮以徐州降。高丽人毕贤甫与洪福源杀高丽宣谕使郑毅，以西京降。高丽将崔瑀攻贤甫斩之，福源来奔。

十一月宋遣其都统制孟珙等来会师，并输粮三十万石。

十二月己卯，拔蔡州外城。己丑，拔其西城。

是冬，帝幸阿鲁兀忽可吾行宫。敕修孔子庙及浑天仪。赵扬据兴州叛，易州达鲁花赤赵璫讨斩之。金海、沂、莱、潍等州降。

六年甲午春正月戊申，金主传位于宗室子承麟。己酉，大兵克蔡州，金主自缢死，承麟为乱兵所杀。金亡。金息州行抹撚兀典降于宋，大兵追杀之。

是春，会诸王于斡儿寒河。

夏五月，金将武仙奔泽州，为戍兵所杀。帝幸答兰答八思之地，大会诸王百官，颁大札萨克以令于众曰：

凡当会不赴而私宴者，斩。诸出入宫禁，各有从者，男女止限十人，出入毋得相杂。军中凡十人置甲长一，听其指挥，专擅者罪之。其甲长以事来宫中，置权摄一人、甲外一人，二人不得擅自往来，违者罪之。诸公事非当言而言者，拳其耳；再犯，笞；三犯，杖；四犯，论死。诸千户越万户前行者，以木镞射之。百户、甲长、诸军有犯，其罪同。诸军甲内数不足，于近翼抽补足之。诸人或居室，或在军中，毋敢喧呼。凡来会，用善马五十匹为一羈，守者五人，饲羸马三人，守乞烈思三人。但盗马一、二者，即论死。诸人马不应绊于乞烈思内者，辄没于畜虎豹人。诸妇人制质孙燕服不如法者，及妒者，乘以驢牛徇部中，论罪，即敛财为更娶。

六月，宋将全子才率万余人自合肥趋汴京。崔立为部将李伯渊等所杀。

七月，子才入汴。己卯，宋制置使赵葵陷泗州。乙酉，宋

监军徐敏子入洛阳，都元帅塔察儿拒战于龙门北，大败之。以忽都虎为中州断事官，野里术副之。遣大达海绀卜伐宋，取四川诸路。

八月，宋将全子才等以粮尽，引还。帝幸答八思之地，议自将伐宋，国王查剌请行，允之。

冬十二月己卯，遣王穢使于宋，责宋人败盟。襟遣邹伸之、李复礼等来报谢。帝猎于斡儿寒河。

是年，东平行省严实入觐，授实东平路行军万户，偏裨赐金符者八人。改威州为邢洺路。设国子监助教官于燕京，令大臣子弟入学。

七年乙未春，城和林，作万安宫。初，太祖居怯绿连河，又徙于卢朐河。帝即位，亦居怯绿连河及卢朐河，至是始建都于和林，国语曰喀刺科鲁木。春，帝居万安宫一月，居揭揭察哈殿二月；夏，避暑于昔剌斡儿朵；秋，居于阔阔脑儿行宫；冬，大猎于汪吉河；四时临幸，率以为常。帝以钦察、斡罗斯部未定，命诸王拔都、大将速不台讨之，皇子贵由、合丹，皇弟阔列坚及诸王鄂尔达、昔班、唐古忒、贝达尔、不里、蒙哥、拨绰皆从行。帝谕拔诸曰：“闻钦察别部酋八赤蛮有胆勇，速不台可胜之。”又以金秦、巩二十余州固守不降，命皇子阔端招谕之。又命皇子曲出、大将忽都虎伐宋，诸王唐古伐高丽。

秋七月，诸王口温不花略唐州，宋将全子才、刘子澄等皆遁。金宣德、西京、平阳、太原、陕西五路人匠充军，每二十户金一人。

冬十月，曲出拔枣阳及光化军。

十一月，略襄、邓诸州，败宋制置使赵范于郢州之上闸口。再战，大兵失利，遂引还。阔端至巩昌，承制授金便宜总帅汪世显原官。初，大兵克蔡州，世显即杀金行省粘葛，至是以巩昌来降，从阔端伐宋。

十二月，阔端克沔州，唐古克高丽凤、海、洞、慈及金山、归信等州。中书省臣请契勘《大明历》，从之。

是年，置大兴府版籍。改济宁府为山东路总管府济州，改隶东平府。安次县改隶霸州，林州改行县事。

八年丙申春正月，万安宫成，诸王来会宴，帝手觞赐中书令耶律楚材曰：“朕所以推诚委卿者，先帝之命也。非卿则中原无今日，朕之安枕皆卿力也。”诏印造交钞行之，不得过万锭。

二月，命应州万户郭胜、钧州万户李术鲁久住、邓州万户赵祥从皇子曲出伐宋。

三月，复修孔子庙及司天台。宋王旻、李伯渊等以襄阳降，命游显守之。

夏四月，曲出克随、郢二州及荆门军。复诏忽都虎括中原户口，得一百一十余万，定税每户出丝一斤，以供官用，五户出丝一斤，以赐贵戚、功臣。上田亩税三升半，中田三升，下田二升半。水田亩五升。商税三十分之一。盐价银一两四十斤，以为永额。

六月，立编修所于燕京，经籍所于平阳，编集经史，以梁陟充长官，王万庆、赵著副之。

秋七月，诏燕京路民户及真定路新籍户，每二十户佾军一人，以答不也儿领之。命陈时可阅刑名、科差、课税等案，

赴和林照磨。诏以真定民户奉太后汤沐，诸王、贵戚、斡鲁朵：拔都，平阳府；茶合带，太原府；皇子古与克，大名府；孛鲁台，邢州；果鲁干，河间府；孛鲁古带，广宁府；也苦，益都、济南二府户内拨赐；按赤带，滨、棣二州；斡陈，平凉州；皇子阔端、驸马赤古、公主阿剌海、公主果真、国王查剌、茶合带、赍真、蒙古寒札、按只那颜、折那颜、火斜、术思，并于东平府户内拨赐有差。耶律楚材言其不便，乃命设达花赤，朝廷别置官吏收其租赐之，非奉诏不得征调兵赋。

八月，大兵克枣阳军及德安府。

九月，阔端攻武休关，入兴元，败宋兵于阳平关，斩其将杨云、曹友闻。时金秦、巩二十余州皆降，惟会州都总管郭蝦蟆坚守不下。

冬十月，按竺迺克会州，郭蝦蟆自焚死。丙午，阔端拔文州。按竺迺招抚吐番诸部，略定龙州，与阔端合兵攻成都府，克之，会皇子曲出卒，阔端遂班师。

十一月，口温不花遣察带围真州，不克。

十二月，中书省课绩，以知济南府张荣为第一。

是年，改濠阳军为邢洺路，置邢总管府。升涿州路。速不台讨布而嘎而部，平之。

九年丁酉春，帝猎于揭揭察哈泽。蒙哥等获钦察别部酋八赤蛮，斩之，波尔塔斯、毛而杜因、萨克孙三部来降，里海以北悉定。

夏四月，筑埽邻城，作揭揭察哈殿。

六月，皇叔斡赤斤所部讹言括民女，帝怒，因括之以赐将士，自七岁以上未嫁之女得四千余人。

秋八月，命断事官术虎乃、山西中路课税所长官刘中试诸路儒士，中选者蠲其赋役，令与本处长官同署公事，得东平杨奂等四千三十人。

冬十月，猎于野马川，驻蹕行宫，口温不花等克光州，进拔复州。攻蕲州，宋知州徐桌固守，攻安丰军，宋知军杜杲固守，俱不下，遂引还。

是年，拔都等入斡罗斯，克其勒冶赞城，进拔克罗姆讷城，皇弟阔列坚中流矢卒，遂围物拉的迷尔都城。

十年戊戌春，国王塔斯伐宋，入北峡关，宋将汪统制降。拔都等克物拉的迷尔城，分兵拔廓在尔斯科城。

二月，遣王楫使于宋。

三月己丑，宋通好使周次说来报谢。

夏四月，筑图苏湖城，作迎驾殿。襄阳裨将刘义执游显等，降于宋，宋复取襄、樊。

六月，中书令耶律楚材陈时务十策：曰信赏，正名分，给俸禄，官功臣，考殿最，均科差，选工匠，务农桑，定土贡，制漕运。帝悉行之。

秋八月，征收课税使陈时可、高庆良奏诸路旱蝗，诏免今年田租，仍停旧未输纳者。以察罕为马步军都元帅。察罕克天长县及滁、泗等州。

九月，察罕围卢州，宋知州杜杲拒战，兵失利，引还。

冬十月辛未，宋人取光州。杨惟中建太极书院于燕京。

十一月，衍圣公孔元措奏礼乐散失，亡金太常官吏及礼册、乐器尚存者，请降旨收录。从之。

十二月，高丽国遣使贡方物。

是年，改平州为兴平府，立鼓城等处军民万户府。改深州隶真定路。塔海克隆庆府。宋洋州守将以城降。绰儿马罕再入义拉克阿剌伯，败哈里发于侃匿斤城，分兵取角儿只属部之地。

十一年己亥春正月，富民刘廷玉等请以银一百四十万扑买中原课税，中书令耶律楚材奏罢之。宋孟珙复取信阳军，寻又取光化军及息、蔡二州。

是春，猎于揭揭察哈泽，皇子阔端至自西川。

夏四月，赐高丽王暎玺书，征其入朝。

六月，高丽国遣使奉表谢罪。塔海攻重庆府，不克。

秋七月，以山东诸路灾，免其田租。

冬十一月，蒙哥等围阿速部蔑怯思城。

十二月，塔海与宋兵战于归州大垓寨，失利。宋复取夔州。西域贾人奥都拉合蛮扑买中原银课二万二千锭，以四万四千锭为额，从之。初，奥都拉合蛮，窳人也。国法：春、夏浴水中者死。帝与皇兄察合台出猎，见奥都拉合蛮浴，察合台欲斩之。帝曰：“彼遗金没而求之，非浴也。”乃免死，令给事左右。后日见亲信，遂恣为奸利焉。

是年，金降将王荣执怀州达鲁花赤纯只海以叛。纯只海妻善礼伯伦夺纯只海归，讨荣诛之。升顺天军为路，置总管府，以易州、祁州、定州及雄州之三县属之。立太原路总管府。绰儿马罕分兵攻角儿只诸路，角儿只大将阿拔克迎降。

十二年庚子春正月，以奥都拉合蛮充提领诸路课税所官。蒙哥等克蔑怯思城。拔都斡斡罗斯诸部悉定，遣使来奏捷。命万户张柔等分道伐宋。

二月，按竺迓败宋舟师于夔门。

夏四月，始令制登歌乐，肄习于曲阜孔子庙。遣王楫使于宋。未几，楫以疾卒，宋人归其丧。

秋八月，宋将余玠以舟师入寇，溯河抵南京而返。

冬十二月，诏皇子贵由班师。敕州县失盗不获者，以官物赏之。

是年，敕代偿官民借回鹘金，计子母七万六千锭；仍敕凡借贷岁久者，惟子本相侔而止，著为令。籍诸王大臣所俘男女，放为良民。以曷思麦里为怀孟、河南二十八处都达鲁花赤。东平行军万户严实卒。角儿只将阿拔克及凯辣脱酋阿释阿甫妻汤姆塔入朝，帝厚抚之，诏绰儿马罕尽返角儿只侵地，又谕角儿只岁贡外，不得任意苛敛。

十三年辛丑春正月，猎于揭揭察哈泽。辛酉，帝疾甚，医言脉绝，耶律楚材请大赦天下，从之，异日而瘳。

三月，都总管万户刘疑入觐，命疑巡抚天下，察百姓利病。以刘敏行省事于燕京，赐敏手诏曰：“卿之所行，有司不得与闻。”拔都等败波兰兵于勒基逆赤城。

夏四月，高丽王暎以族子棼入质。

冬十月，以牙刺瓦赤同行省刘敏主管燕京公事。未几，牙刺瓦赤以流言诬敏，敏出手诏示之。帝闻之，按问得实，罢牙刺瓦赤。

十一月丁亥，帝出猎，耶律楚材谏，不听。庚寅，还至讹铁钵胡兰山，奥都剌合蛮进酒，帝饮醉。辛卯迟明，崩于行宫，年五十六。葬起辇谷。至元三年冬十月，追谥英文皇帝，庙号太宗。

初，帝爱拖雷子蒙哥。一日，召蒙哥抚其首曰：“是可以君天下。”异日，帝用特斡豹，皇孙失烈门在侧曰：“用特斡豹，则特将安养。”帝又曰：“是有仁心，可以君天下。”及帝崩，六皇后乃马真氏召耶律楚材问立君，楚材对曰：“此非外臣所敢与者。”后乃与诸王定议立皇子贵由为嗣。皇后临朝称制，以俟拔都等之至焉。

壬寅春，皇后乃马真氏称制元年，拔都等班师返。

夏五月，大兵攻宋遂宁、庐州，克之。

秋七月，张柔自五河口渡淮，攻扬、滁、和诸州，败宋统制王温等于天长县。

冬十月，张柔克通州。

十二月，大兵攻叙州，获宋都统制杨大全。是年，右丞相镇海罢。

癸卯春正月，高丽国遣使来贡方物。

三月，大兵克资州。汪世显卒，以其子德臣代之。

夏五月，荧惑犯房星。耶律楚材奏：“当有惊忧，然终无事。”未几，皇叔斡赤斤引兵趋和林，皇后欲西迁以避之。楚材曰：“臣观天道，无他变也。”已而，果如其言。

秋，察罕奏以张柔总诸军，屯杞县。

是年，贝住征罗马国，分兵入西里亚，罗马酋开廓苏降。

甲辰春，诸王大会于也只里河。

夏五月，中书令耶律楚材卒。察罕围宋寿春府，不克。宋寿春兵从海道寇胶、密诸州。至是，大兵突至树栅，以遏援师。宋将刘雄飞坚守，不下。

冬十月，高丽国遣使奉表来觐。

是年，并岢岚、宁化、楼烦三县入管州。

乙巳秋，察罕率步骑三万，与张柔再攻寿春，进至扬州，宋制置使赵葵请和，乃班师。

九月，宋裨将刘整陷镇平县。

是年，贝住克凯辣脱城，遵太宗遗命，以其地与汤姆塔。

史臣曰：“太宗宽平仁恕，有人君之量。常谓即位之后，有四功、四过：灭金，立站赤，设诸路探马赤，无水处使百姓凿井，朕之四功；饮酒，括叔父斡赤斤部女子，筑围墙妨兄弟之射猎，以私憾杀功臣朵豁勒，朕之四过也。然信任奥都拉合蛮，始终不悟其奸，尤为帝知人之累云。”

卷五

本纪第五

定宗

定宗简平皇帝，讳贵由，太宗长子也。母曰昭慈皇后，乃马真氏。生于太祖元年丙寅。

太宗五年，以皇子与诸王按赤带将左翼军讨蒲鲜万奴获之，辽东平。

七年，诸王拔都讨奇卜察克、斡罗斯诸部，太宗以敌据坚城不易下，命帝与诸王之长子贝达尔、不里、蒙哥等及皇弟阔列坚俱从行，所向克捷。

十一年，帝与蒙哥攻阿速部之蔑怯思都城。城险固，围三月不下，乃选敢死士十人，蹑云梯而上，始克之。帝又与不里等别将一军，与拔都大军会于杜恼河。

十二年冬，拔都渡河，取格兰城，帝驻河东，为拔都后援。

十三年春二月，太宗崩，昭慈皇后与诸王、大臣会议，立帝为嗣。皇后临朝称制，俟帝返然后归政。

明年壬寅，为皇后称制之元年，春三月，太宗凶问至军中，全军东返。拔都至浮而嘎河，散遣诸军。帝先归奔丧。

癸卯夏，诸王斡赤斤以大众趋和林，人心震骇。皇后遣斡赤斤之子往诘其父。斡赤斤闻大军东返，帝已至叶密尔河，乃曰：“吾来视丧，非有他也。”遂引众还。

甲辰，帝至和林，皇后屡召拔都。拔都与帝有隙，又以帝之立出皇后意，非太宗遗命，托足疾迁延不至。久之，遣其弟与子来会。

初，帝与拔都等宴军中。拔都自以年长，先饮酒，帝诟之。拔都遣使诉其事于太宗，太宗大怒，欲谪帝为探马赤，置于边远之地。诸王忙该及阿勒赤歹、晃豁儿台、掌吉等谏曰：“成吉思汗有训，内事只家中断，外事只野外断。此外事，请付拔都治之。”太宗从之。事得解，然拔都终与帝有隙焉。

乙巳，皇后以拔都不至，乃召诸王、诺延，会于答兰答八思之地，定议以帝嗣位。

元年丙午秋七月，帝即位于汪吉宿灭秃里之地。斡罗斯、罗姆、角儿只、法儿斯、克而漫、瓦夕斯诸国皆来朝。报达之哈里发、天主教之教王，及木刺夷、阿勒坡诸国，皆遣使

来贺。帝锡赉优渥，凡后妃、公主、诸王、大臣及其家之子弟皆有赐，将士赐及其家，朝贺者赐及从人。以车五百乘载金帛，颁赐毕，尚有羡余，使群臣夺取以为笑乐焉。帝谕报达使者法克哀丁：“哈里发遇蒙古人无礼，如不悛将兴兵讨之。”木剌夷使者亦不见礼而归。

帝诘斡赤斤称兵之事，使诸王蒙哥、鄂尔达按之，诛其官属数人，宥斡赤斤不问。命中书令杨惟中宣慰平阳。断事官斜彻横恣不法，惟中按诛之。以耶律铸领中书省事。

冬，猎黄羊于野马川。皇太后乃马真氏崩。太后摄政四年，法令废弛，诸王自以敕令征西域货财，使者络绎于道。呼拉商等处长官阿儿浑入觐，尽取前后诸王敕令奏闻，帝申令禁止之。诸王由是敛戢。

奥都拉合蛮伏诛。复以镇海为中书左丞相，以牙刺瓦赤管财赋，以其子马忽惕为突而基斯单、撒马尔干等处长官，赐金狮符。

以察罕经略江淮，赐貂裘一、镔刀十。察罕使权万户史权等伐宋，克虎头关，进至黄州。军前左右司郎中李桢表言：“襄阳乃吴、蜀之要，宋之襟喉，得之则可以为他日取宋之资。”帝嘉纳之。

是年，拔都与大将兀良合台讨孛烈儿、乃捏迷思诸部，平之。

二年春，以忙哥撒尔为断事官。张柔败宋兵于泗州。柔帐下吏夹谷显祖上变，诬柔。逮柔至和林讯之，得实，显祖伏诛。

夏，避暑于曲律淮黑哈速之地。

秋七月，帝西巡。万户郝和尚朝于行宫，帝赐银万锭，和尚固辞，遂赐其将、校刘天禄等金、银符。

八月，命野里知吉带征西域。抽诸王部众十之二，使野里知吉带领之，属国如罗姆，角儿只、毛夕耳、的牙佩壳耳、阿勒坡等皆辖之，收其贡赋以充军实，帝谕野里知吉带曰：“朕将自往，以汝为前锋耳。”诏蒙古户百选一人，充拔都鲁。

九月，取太宗宿卫之半，以也曲门答儿领之。

冬十月，括诸路户口，敢隐实者诛籍之。

是年，皇弟阔端卒。西域妇法玛特以巫蛊术厌阔端，撒马尔干人希雷发其事，阔端临卒亦遣使告于帝为法玛特所害。诏丞相镇海鞠之，法玛特辞伏，处以极刑。未几，又有人告希雷厌禳皇子忽察，希雷亦伏诛。以高丽不入贡，遣兵讨之。

三年春三月，帝不豫，西巡叶密尔河。帝在潜藩，叶密尔河为汤沐地。帝尝谓此地水土宜于朕体，遂决意西巡。未至别失八里，疾大渐，崩于横相乙儿之地。年四十有三。葬起辇谷。追谥简平皇帝，庙号定宗。

帝严重有威，在位未久，不及设拖。昭慈皇后称制时，君权下替。帝既立，政柄复归于上。然好酒色，手足有拘挛疾，尝以疾不视事，委镇海、喀达克二人裁决焉。

是年，大将速不台卒。蒙古诸部大旱，河水尽涸，野草自焚，牛羊十死八、九。万户郝和尚因岁饥，输谷千石以贍国用。

帝既崩，皇后斡兀立海迷失不发丧，先赴于拔都及拖雷妃客烈亦氏，请依乃马真氏故事，临朝称制，以俟立君。拔都许之。与诸王、大臣会于阿勒塔克山。

己酉，皇后称制元年，遣使者八拉等会拔都于阿勒塔克山。拔都欲立宪宗，使者还报。皇后与二子忽察、脑忽皆不悦。

庚戌春，诸王、大将再会于阔帖兀阿兰之地，定议，立宪宗。

是年，宋制置使余玠寇兴元、文州，汪德臣、郑鼎拒之。降将王德新据阶州以叛。以李楨为襄阳兵马万户。

史臣曰：“定宗诛奥都拉合蛮，用镇海、耶律铸，赏罚之明，非太宗所及。又乃马真皇后之弊政，皆为帝所铲革。旧史不详考其事，谓前人之业自帝而衰，诬莫甚矣。”

卷六

本纪第六

宪宗

宪宗桓肃皇帝，讳蒙哥，睿宗拖雷之长子也。母曰显懿庄圣皇后，客烈亦氏。生于太祖三年戊辰十二月三日。有晃忽答部人知天象，言帝后必大贵，故以蒙哥名之。蒙哥，译义长生也。太宗在潜邸，养以为子，使昂灰二皇后抚之。睿宗卒，始命帝归藩。

太宗七年，从拔都讨奇卜察克、斡罗思诸部。九年，入奇卜察克，其别部酋八赤蛮败遁，匿于浮而嘎河林中。帝入

林搜捕，见空营一病姬在焉。讯之，则八赤蛮已遁于宽田吉思海岛。时北风大作，海之北岸水浅，遂渡水，出其不意擒之。帝命之跪，八赤蛮曰：“我一国之主，岂图苟活。且我非驼，何以跪为？”帝囚之。八赤蛮谓守者曰：“我窜于海岛，与鱼何异。然卒见擒，天也！今水回期将至，汝等宜早还。”守者白于帝，即日班师，而水已至，后军有浮渡者。八赤蛮请受刃于帝，帝命皇弟拔绰斩之。

与拔都等进攻斡罗斯之勒冶赞城，帝躬自搏战，克之。

十一年春，又与定宗攻拔阿速之蔑怯思城。

十二年，围斡罗斯计掖甫城。帝遣使谕降，城人杀使者，帝怒，昼夜力攻，克之，尽屠其众。

太宗崩，诸军东返。定宗即位，命帝屯六盘山，控制秦陇，为伐蜀之计。

定宗崩，皇后斡兀立海迷失临朝称制，拔都与诸王、大将会于阿勒塔克山，议立君。皇后遣使者帖木儿来会。至者西方诸王忽必烈、阿里不哥、末哥，东方诸王也孙格、塔察儿、帖木迭儿、也速不花及大将兀良合台、速你带、忙哥撒儿数人。时大将野里知吉带自西域至，建议遵太宗之命，立失烈门。皇弟忽必烈作而言曰：“太宗既欲立失烈门，而汝等辅立定宗，岂太宗命耶？阿克塔隆为太祖爱女，即有罪，宜会诸王、哈屯定讞，乃不问而杀之，又岂太祖、太宗法耶？今日之事，奈何以太宗之命为辞！”闻者语塞。初，太祖分部众于子弟，睿宗以幼子，所得独多，故诸将多睿宗旧部。睿宗卒，帝兄弟尚幼，事皆决于庄圣皇后。后有才智，能御众，又与拔都善，故众皆属意于帝。时又有建议者，谓拔都最长，当

立。拔都不可。众曰：“王既不肯自立，请王审择一人，以定大计。”拔都曰：“吾国家幅员甚广，非聪明睿智、能效法太祖者，不可为主。我意在蒙哥。”众应曰：“然。”帝固让，皇弟末哥曰：“众谓拔都言是听，今奈何不从。”拔都曰：“末哥言是也。”议遂定。

皇后又遣使告于拔都，会议宜在东，不宜在西，且诸王未集，不能定议。拔都曰：“太祖、太宗大业未可轻授，今帝位已定，请屈意相从。明年再会于东方可也。”使其弟伯勒克、脱哈帖木儿将大军卫帝而东，拔都自驻于西，以备非常。

元年辛亥春，诸王、大将再会于阔帖兀阿兰之地。太宗、定宗诸子及察合台子也速蒙哥皆不至。拔都遣使者劝之，仍不纳。于是伯勒克等请于拔都，拔都乃申令于众，有梗议者以国法从事。西方诸王别儿哥、脱哈帖木儿，东方诸王也古、脱忽、也孙格、按只带、塔察儿、也速不花暨西方大将班里赤等皆至，乃谡日奉帝即位焉。

夏六月，帝即位于斡难河、克鲁伦河之间。追尊皇考拖雷为帝，尊客烈亦氏为皇太后。即位日，诸王列于右，诸哈屯、公主列于左，皇弟七人列于前，文臣以孛尔该为班首，武臣以忙哥撒儿为班首。礼成，大宴七日。既而，御者克薛杰上变，言：骡逸，自出追之，遇车马甚众。一车折辕，误以克薛杰为同行者，使助其缚辕。见车中有藏甲，讶而问之。御者曰：“尔车亦如此，何问为。更问他车御者，乃知失烈门、忽察、脑忽三王欲乘宴会作乱。帝秘其事，命忙哥撒儿以兵逆之，止三王卫士，使各从二十人，献九白之贡。翌日，帝亲诘失烈门等，皆不承。考讯失烈门从官，始吐实，而自刭

以死。复命忙哥撒儿穷治失列门等党羽太祖功臣也孙帖额、掌吉、爪难、合答、曲怜、阿里出等及野里知吉带之二子，皆坐诛，死者七十人，诸王也速蒙哥、不里后期不至，遣大将卜怜吉剌屯兵备之。

帝遂更改庶政，命皇弟忽必烈总治漠南诸路军民，开府于金莲川；以忙哥撒儿为断事官；以孛尔该为大必阁赤，掌宣发号令、朝觐贡献及内外闻奏诸事；以晃忽儿留守和林，阿兰答儿副之；以牙刺瓦赤、卜只儿、斡鲁不、睹答儿等充燕京等处行尚书省事，赛典赤、匿答马丁佐之；以讷怀、塔刺海、麻速忽等充别失八里等处行尚书省事，暗都剌兀尊，阿合马、也的沙佐之；以阿儿浑充阿母河等处行尚书省事，法合鲁丁、匿只马丁佐之。以察罕、也柳干总两淮等处蒙古、汉军，以带答儿统四川等处蒙古、汉军，以和里剌统吐番等处蒙古、汉军，皆仍前征讨。封克薛杰为答剌罕。命僧海云掌释教事，道士李真常掌道教事。

颁便宜事宜于国中：凡朝廷及诸王滥发牌印，诏命尽收之；诸王驰驱，许乘三马，远行亦不得过四马；诸王不得擅招民户；诸官属不得以朝觐为名赋敛民财；输粮者许于近仓输之。罢筑和林城夫役五千人。依太祖、太宗旧制，免耆民及释、道等教之丁税，惟犹太教不预此例。改定西域税则，牛、马百税一，不及百者免。代偿定宗及皇后、皇子亏欠商货银五十万锭。

秋，察罕入觐，命以都元帅兼领尚书省事。

冬十一月，皇弟忽必烈入觐。帝闻西夏人高智耀名，召见之。从智耀言，免海内儒士徭役，无有所与。

是冬，执野里知吉带于八脱吉斯之地，命拔都诛之。以僧那摩为国师，总领天下释教。

二年春正月，帝幸失灰之地。命皇弟旭烈兀讨木剌夷，以乃蛮人怯的不花为前锋。皇太后客烈亦氏崩。置经略司于汴，以忙哥、史天泽、杨惟中、赵璧等为经略使，屯田唐、邓诸州。

二月，察罕攻宋随、郢、安、复等州，与宋将马荣战于大脊山。

三月，命东平万户严忠济立局，制冠冕、法服、钟磬、仪仗，肄习之。

夏四月，帝驻蹕和林。定宗皇后斡兀立海迷失及失烈门母以厌禳事觉，命忙歌撒儿鞠治得实，并赐死。以忽察、脑忽、失烈门三王，皆由其母煽惑，免死。谪忽察于苏里该之地，脑忽、失烈门于没脱赤之地。禁锢和只、纳忽、孙脱等于军中。定太宗子孙分地：合丹居别失八里，蔑里居也儿帖石河，海都居海押立，别里哥居曲儿只，脱脱居叶密立，蒙哥都及太宗皇后乞里吉忽帖尼居阔端太子分地之西。仍以太宗皇后、诸妃资产分赐诸王。遣贝剌至察合台藩地，逮治违命诸臣。乞儿吉思、谦谦州等处，皆遣兵巡察。命察合台孙忽剌旭烈杀也速蒙哥，代其位。忽剌旭烈未至而卒，其妃倭耳干纳杀也速蒙哥，自为监国。以太宗子不里付海都杀之。定宗用事大臣喀达克等并伏诛。

六月，皇弟忽必烈入觐。

秋七月，命忽必烈征大理，塔塔儿台撒里、秃儿花撒征印度。诏谕宋荆南、襄阳、樊城、均州诸守将，使来附。

八月庚申，帝始以冕服拜天于日月山。癸亥，帝用孔元措言，合祭昊天、后土，作神牌，以太祖、睿宗配。是月，忽必烈次临洮，请城利州以为取蜀根本。

冬十月，汪德臣掠宋成都，薄嘉定，为宋将余玠所却。命诸王也古讨高丽。帝猎于月帖古忽兰之地，堕马，伤臂，不视朝百余日。

十二月戊午，大赦天下。以帖哥出、阔阔术等掌帑藏，孛阑合刺孙掌斡脱，阿刺忽掌祭祀、医巫、卜筮，阿刺不花副之，只儿斡带掌驿传。徙工匠五百户修行宫。是年，籍汉地户口。印度遣使入贡。

三年春正月，汪德臣城利州、阆州，分兵屯田，宋人不敢侵轶。帝猎于怯蹇察罕之地。诸王也古以怨袭诸王塔察儿营。帝遂会诸王于斡难河北。罢也古征高丽兵，以札刺儿带为征东元帅。遣必阁赤别儿哥括斡罗思户口。帝大封同姓，命皇弟忽必烈于河南、陕西自择其一，忽必烈愿有陕西，遂受京兆分地。

三月，察罕攻宋海州，败宋将王国昌于城下，获都统一人。

六月，命兀良合台从皇弟忽必烈征大理，皇弟旭烈兀征报达。又命撒里等征印度斯单、克什米尔，受旭烈兀节度。撒里等由克什米尔入印度斯单界，大掠而还。帝幸火儿忽纳要不儿之地，诸王拔都遣使乞买珠银万锭，帝以千锭赐之，仍谕曰：“太祖、太宗之财，费用如此，何以给诸王之赐，王宜详审之，此银就充岁赐之数。”

秋八月，帝幸军脑儿，以忙哥撒儿为万户，哈丹为札鲁

花赤。

九月，忽必烈次忒刺之地。分兵三道：兀良哈台由西道，诸王抄合、也只烈由东道，忽必烈由中道以进。

冬十月，忽必烈渡金沙江，摩挲蛮酋唆火鲁迎降。

十二月，忽必烈入大理。帝幸汪古部。命诸王也古与洪福源征高丽，攻拔禾山、东州、春州等城。

是年，怯的不花入苦亦斯单，进至塔密干，攻吉儿都苦堡，木剌夷酋遣兵援之。忙哥撒儿卒。忙哥撒儿莅事严，人多怨之，帝为下诏慰谕其子。

四年春二月，宋将余晦城紫金山，汪德臣大败之，夺其城。

三月，释宋使王元善南归。帝猎于怯蹇察罕之地。

夏，帝驻蹕于月儿灭怯土。札剌儿带至军中，也古罢归。

秋七月，诏官吏赴朝廷，理算钱粮者许自首不公，仍禁以后浮费。兀良哈台攻乌蛮赤押城，拔之。大理酋段智兴降。

秋八月，皇弟忽必烈至自大理，驻于桓、抚二州。

冬十一月，城光化军，帝大猎于也灭千哈理察海之地。是年，会诸王于颗颗脑儿之西，祭天于日月山。初籍新军。帝令大臣，求可以慎固封守、娴于交略者。擢史枢征行万户，配以真定、相、卫、怀、孟之兵，使屯于唐、邓二州。张柔移屯亳州，自亳筑甬道属汴堤，以通商贾之利。诏柔率山前八军城亳州。宋均州总管孙嗣宗遣人赍蜡书请降。诏权万户史权以精兵援之。宋骁将钟显、王梅、杜柔、袁师信各率所部来降。

五年春，定汉民科差包银额征四两，以半输银，半折丝

绢、颜料等物。

夏，帝驻蹕月儿灭怯土。

秋九月，张柔会都元帅察罕于符离，筑横江堡，兼立水栅，以通陈、蔡、颍、息之路。

是年，史枢败宋舟师于汉水之鸳鸯滩。兀良合台攻鲁鲁厮、阿伯等部，降之。改命札剌儿带、洪福源征高丽。马步军都元帅兼领尚书省事察罕卒。权真定等路万户史天安卒。

六年春正月，帝会诸王、百官于月儿灭怯土，大宴六十余日，赐金帛有差，仍定拟诸王岁赐之数。忽必烈奏请续金内地汉军，从之。

夏四月，驻蹕答密儿之地。

五月，幸昔剌斡鲁朵。

六月，大白昼见。幸觶亦儿阿塔之地。诸王也孙格、驸马也速儿等请伐宋，帝亦以宋人囚使者月思麻思，会议讨之。太宗末，月里麻思使于宋，宋人囚之，至是已十六年。

秋七月，诸王塔察儿、驸马帖里该率所部过东平，掠民羊豕。帝闻之，遣使按问其罪。由是诸军敛戢无犯者。冬，帝驻蹕阿塔哈帖乞儿蛮之地。以阿母河回回降户分赐诸王、大将。旭烈兀率怯的不花、布帖木儿等分三道进兵，木剌夷酋兀克乃丁请降。帝以木剌夷人凶悍，命旭烈兀悉诛之。兀克乃丁入朝，亦杀之于中途。

十二月，城枣阳军。

是年，大理酋段智兴及素丹诸部长来觐。兀良合台讨乌、白蛮三十七部，悉平之，遂自昔八儿之地还重庆，败宋将张实。赐兀良合台金缕织文衣一袭、银五千两，赉军士彩帛二

万四千匹。始建城郭、宫室于桓州东、冻水北之龙冈。

七年春，帝幸忽兰也儿吉之地。诏诸王出师伐宋。命阿蓝答儿行省事于京兆，刘太平佐之，钩考陕西诸路财赋。皇弟忽必烈固请率妃主入觐。董文蔚攻宋襄阳、樊城，与宋将高达战于白河。

夏六月，谒太祖行宫，祭旗鼓，复会诸王于怯绿怜之地，还幸月儿灭怯土。兀良合台奏请依汉故事，以西南夷悉为郡县，从之。以刘时中为宣抚使，加兀良合台大元帅，还镇大理。

秋，驻蹕于军脑儿，酹马乳祭天。

九月，以驸马纳陈之子乞觶为达鲁花赤，镇守斡罗斯，仍赐马三百匹、羊五千匹。回鹘献水精盆、珍珠伞等物，值三万余锭。帝曰：方今百姓疲敝，所急者钱耳。朕独有何为？”命却之。赛典赤以为言，帝稍偿其值，禁勿再献。诸王塔察儿率诸军伐宋，围樊城，会霖雨连月，遂班师。

冬十一月，兀良合台伐安南，入其都城。安南国王陈日熉遁入海岛，遂大享战士而还。

十二月，帝渡漠南，驻蹕于玉龙栈赤，皇弟忽必烈、阿里不哥及诸王八里土、玉龙塔失、昔烈吉、出木哈儿，公主脱灭干来迎。帝见忽必烈，相对泣下，不令有所白而止。

是冬，皇弟旭烈兀至报达，克其乞里茫沙杭城。

八年春正月朔，幸也里本朵哈之地，受朝贺。

二月，陈日熉传国于长子光昺，遣其陪臣阮学士来贡方物，兀良合台送诣行在。旭烈兀平报达，获哈里发木司塔辛，杀之，遣使来献捷。帝猎于也里海牙之地，遂自将伐宋，命

阿里不哥留守和林，阿兰答儿辅之，命张柔从忽必烈攻鄂州，以趋临安，塔察儿攻荆山以分兵力。又命兀良合台自云南进兵，会于鄂州。纽邻败宋师于灵泉山，进攻云顶山堡，克之。成都府彭、汉、怀安、绵等州及威、茂诸蕃悉降，以纽邻为都元帅。帝自东胜渡河。命参知政事刘太平括兴元户口。高丽质子王绰譖洪福源，帝召福源杀之。

夏四月，帝驻蹕六盘山，召见诸路守令，丰州千户郭燧奏请城金州，从之。是时军四万，号十万，分三道而进：帝由陇州入大散关，诸王末哥由洋州入米仓关，李里察万户由渔关入沔州。以明安答儿为太傅，守京兆。诏征益都行省李璫兵。璫奏益都南北要冲，兵不可撤，从之。

五月，皇子阿速带因猎伤民稼，帝责之，撻近侍数人。士卒有拔民葱者，斩以徇。由是大兵所至，秋毫无犯。

秋七月，留輜重于六盘山。帝自将大军出宝鸡，攻重贵山，所向克捷。

八月辛丑，李璫与宋人战于涟水，大败之。

九月，帝进驻汉中。纽邻率众渡马湖江，获宋将张实，遣实招谕苦竹隘。实入城，与宋将杨立坚守。行北京七路兵马都元帅府事史天祥卒。

冬十月壬午，帝次宝峰。癸未，幸利州，观其城堑浅恶，以汪德臣能守，赐卮酒奖谕之。遂渡嘉陵江，至白水江，命德臣造浮梁以济，进次剑门。戊子，遣史枢攻苦竹隘，裨将赵仲开门出降，诏赐仲衣帽，迁于重庆。己亥，获张实支解之。赐汪德臣玉带，留精兵五百守之。遣使招谕龙州。帝驻蹕高峰。庚子，围长宁山，守将王佐等出战，败之。

十一月，己酉，帝督诸军，先攻鹅顶堡。壬子，与宋师战于望春门，败之。宋知县王仲出降。是夜，克鹅顶堡，以彭天祥为达鲁花赤守之。诸王末哥、塔察儿等略地还，俱引兵来会。丙辰，进攻大获山，遣王仲招守将杨大渊，大渊杀之。帝怒，督诸军力攻，大渊遂以城降，授大渊为都元帅。庚午，帝驻蹕和溪口。是月，宋龙州降。

十二月，杨大渊与汪德臣分攻相如等县。纽邻攻简州不克。乙酉，帝次于运山，宋守将张大悦降。进至青居山，其裨将刘渊等杀都统段文鉴降。丁酉，隆州降。己亥，大良山守将蒲元圭降。诏诸军毋俘掠。癸卯，克雅州。石泉山守将赵顺降。甲辰，遣降人晋国宝招谕合州守将王坚，坚固守不下。

是年，兀良合台徇宋内地，连克静江府、辰、沅等州，进围潭州。皇子辩都卒。

九年春正月乙巳朔，帝驻蹕重贵山北，置酒大会，因问群臣曰：“今在敌境，天将暑，汝等谓可居否乎？”脱欢曰：“南土瘴厉，车驾宜早还，新俘户口委官吏治之可也。”八里赤曰：“脱欢怯，臣请居之。”帝称善。戊申，晋国宝还至峡口，王坚追杀之。诸王末哥进攻渠州礼义山，曳刺秃鲁雄攻巴州平梁山。丁卯，杨大渊攻合州，俘男女八万余。是月，大兵克利州。隆庆、顺庆诸府，蓬、阆、广安守将相继降。命浑都海以兵二万守六盘山，乞台不花守青居山，纽邻造浮梁于涪州之藺市，以杜援兵之路。

二月丙子，帝自鸡爪滩渡江，直抵合州城下。辛巳，攻一字城。癸未，攻镇西门。

三月，攻东新门及奇胜门、镇西门诸堡。

夏四月丙子，大雷雨，凡二十日。乙未，攻护国门。宋将吕文德以艨艟千余，溯嘉陵江而上，命史天泽击败之。六月丁巳，汪德臣选敢死士夜登外城，会大雨，梯冲尽折，后军不克进而止。是日，德臣感疾卒。帝不豫。

秋七月，留兵三千围合州，余众悉攻重庆。癸亥，帝崩于钓鱼山，年五十有二。史天泽等奉梓宫北还，葬起辇谷。庙号宪宗，追谥桓肃皇帝。

帝沈断寡言，不喜侈靡。太宗朝群臣擅权，政出多门。至是，凡诏令皆帝手书，更易数四，然后行之。御群臣甚严，尝谕左右曰：“汝辈得朕奖谕，即志气骄逸，灾祸有不立至者乎？汝辈其戒之。”然酷信巫覡卜筮之术，凡行事必谨叩之无虚日，终不自厌也。

史臣曰：“宪宗聪明果毅，内修政事，外辟土地，亲总六师，壁于坚城之下，虽天未厌宋，赍志而殂，抑亦不世之英主矣。然帝天资凉薄，猜嫌骨肉，失烈门诸王既宥之而复诛之。拉施特有言：蒙古之内乱，自此而萌，隳成吉思汗睦族固本这训。呜呼，知言哉！”

卷七

本纪第七

世祖一

世祖圣德神功文武皇帝，讳忽必烈，睿宗第四子，宪宗同母弟也。以太祖十年乙亥秋八月乙卯生。

太祖十九年春，自西域班师，至乃蛮境阿拉马克委之地，帝与皇弟旭烈兀来迎，帝射一兔，旭烈兀射一山羊。国俗：童子初猎禽兽，以血染长者拇指。旭烈兀持太祖手，用力重。太祖曰：“尔用力如此，吾为尔耻之。”帝则捧太祖之手，轻拭之。太祖甚悦。及长，仁明英睿，事庄圣皇后以孝闻。

在潜邸，征名儒窦默、姚枢、许衡等，询以治道，思大有为于天下。蒙古兴垂六十年，至帝始延揽文学之士，待以殊礼焉。

宪宗即位，诏漠南、汉地军国之事，悉听帝裁决，开府于金莲川得专封拜。邢州为帝分地，后又分二千户为功臣食邑，民不堪命，诣王府诉之。刘秉忠、张文谦言于帝曰：“邢州户本万余，军兴以来，不满数百，得良吏抚之，责以成效，使四方取法，则天下皆受王之赐矣。”帝从之，以脱兀脱、张耕为邢州安抚使，刘肃为商榷使，轻徭薄赋，期年户增数倍。自是帝益以儒者为何用。

二年，帝移驻桓、抚二州，时牙刺洼赤、布智儿等行燕

京中书省事，一日杀二十八人。其一人，已杖而释之，有献环刀者，复追还，斩其人以试刃。帝闻其事，召布智儿责之曰：“凡死罪宜详讞而后行刑，今一日杀二十八人，必多冤滥；况既杖而后斩之，此何刑也？”布智儿惶恐谢罪。帝请置经略司于汴京以图宋，置都转运司于新卫，以济军储。宪宗并从之。夏六月，觐宪宗于曲先脑儿，奉命征云南。秋七月丙午，衺牙出师。

三年，宪宗大封同姓，敕帝河南、京兆自择其一，帝愿受京兆分地。奏割河东解州盐池供军饷，令民受盐入粟，转漕嘉陵。又奏置宣抚司于京兆，以孛兰奚、杨惟中为使，关、陇大治。

秋八月帝自六盘山次临洮。

九月壬寅，帝次忒刺，分三道以进：大将兀良合台出西道，诸王抄合、也只烈出东道，帝自将大军出中道，留辎重于满陀城。

冬十月，经西番界至金沙江，乘革囊以济，摩娑二部酋，唆火脱因、塔里马迎降。

十一月辛卯，遣玉律术、王君侯、王鉴等谕大理。辛丑，白蛮酋阿塔刺降。

十二月丙辰，围大理城。初，大理酋段兴智微弱，国事皆决于高祥。是夜，祥率所部遁去。帝入城，谓左右曰：“城破，而玉律术等不出，其人必死矣。”诸将以大理杀使者，欲屠城。张文谦言于帝曰：“此高祥所为，非民之罪，请宥之。”帝乃使姚枢裂帛为旗，书止杀之令，由是一城获免。辛酉，分兵攻龙首关，次赵脸。癸亥，获高祥。祥不屈，斩之。时白

日当午，云起雷震。帝曰：“忠臣也。”命以礼葬之。帝承制以刘时中为大理金齿等处宣抚使，留兀良合台讨鲁鲁厮、阿伯诸部，自率诸将班师。

四年夏五月，帝避暑于六盘山。秋八月，驻桓、抚二州，冬，驻金莲川。

五年冬驻奉圣州。

六年春三月，命刘秉忠建城郭于桓州东、滦水北，后名为开平府。冬，移驻合剌八剌合孙之地。

七年春，宪宗命名阿蓝答儿、刘太平钩考京兆、河南财赋，推验经略，宣抚两司官吏。帝闻之，不悦，用姚枢言，率妃主以下入朝。冬十二月，觐宪宗于也可迭烈孙之地，宪宗与帝皆泣下，不令帝有所白而止。遂议分道伐宋。

八年冬十一月戊午，帝禡牙于开平。

九年春二月，会诸王于邢州。

夏五月，次小濮州，征宋子贞、李昶，访问得失。

秋七月甲寅，次汝州，以大将拔都儿为前锋，戒勿妄杀。以杨惟中、郝经宣抚江淮，乌古论贞督饷蔡州。兵有犯法者，贞缚送有司，帝即斩之。由是将士肃然，无敢违命者。

八月丙戌，渡淮。辛卯，入大胜关，分遣张柔入虎头关。壬辰，帝次黄陂。时淮民被俘者众，帝悉宥之。庚子，诸将茶忽剌得宋沿江制置司榜，有云：今夏谍者闻北兵会议，取黄陂民船，由阳逻堡济江会于鄂州。帝曰：“吾前无此意，能如其言吾所愿也。”辛丑，帝次于江北。

九月壬寅，诸王穆哥自合州遣使，以宪宗凶问告，且请北归。帝曰：“吾奉命南征，岂可无功而返。”甲辰，登香炉

山，俯大江，江北为阳逻堡，其南岸曰许黄洲，宋人严兵守之，列战船江中，军容甚盛。董文炳率死士鼓棹疾趋，诸将分三道继之，宋兵败遁。文炳麾众登南岸，使其弟文用轻舟报捷。帝问战胜状，因举鞭仰指曰：“天也。”丁未，帝济江，驻许黄洲。己酉，次鄂州。庚戌，围城。帝谓张柔曰：“吾犹猎者，不能禽圈中豕野猎以供汝食，汝破圈取之可也。”柔作鹅车洞火其城，别遣勇士先登，城垂克。会宋将高达来援，引兵入，复坚守不下。冬

十月辛未朔，帝驻龟山。

十一月丙辰，移驻牛头山。兀良合台至潭州，遣使来告。命也里蒙哥以兵援之，且加劳问。时宪宗用事大臣阿蓝答儿、浑都海、脱火思、脱里赤等惮帝英明，谋立皇弟阿里不哥。阿蓝答儿乘传发兵，去开平百余里，皇后遣使谓之曰：“发兵大事也，太祖皇帝曾孙真金在此。何故不令知之？”阿蓝答儿不能对。后又闻脱里赤已至燕京，乃遣脱欢爱莫干驰告于帝，请早还。丁卯，发牛头山，声言以大兵趋临安，留大将拔都儿围城。

闰月庚午朔，还驻青山矶。辛未，张文谦获降民二万北归。宋制置使贾似道遣使求和，请输岁币。帝令赵璧等语之曰：“汝以生灵之故，来求和好。其意甚善。然我奉命南征，岂能中止？果有事大之心，请命于朝廷可也。”是日，帝班师。及至襄阳，高丽世子僉来迎。帝曰：“唐太宗亲征高征，不能服。今其世子自来归我，此天意也。”己丑，车驾至燕京。脱里赤方括民兵，帝悉纵之，民大悦。

中统元年春三月戊辰朔，车驾至开平府，哈丹、阿只吉率西路诸王，塔察儿、也先哥、忽刺忽儿、爪都率东路诸王来会，偕文武大臣劝进。帝三让，诸王、大臣固请。辛卯，即皇帝位。遣高丽世子倂归，以兵送之，仍赦高丽境内。

夏四月戊戌朔，八春、廉希宪、商挺为陕西四川等路宣抚使，赵良弼参议司事，粘合南合、张启元为西京等处宣抚使。己亥，诏谕高丽国归其俘与逃户。辛丑，诏曰：

朕惟祖宗肇造区宇，奄有四方，武功迭兴，文治未洽，五十余年于此矣。盖时有先后，事有缓急，天下大业，非一圣一朝所能兼备也。先皇帝即位之初，风飞雷厉，将大有为。忧国爱民之心虽切于己，尊贤使能之道未得其人。方董夔门之师，遽遗鼎湖之泣。岂期遗恨，竟弗克终。

肆予冲人，渡江之后，盖将深入焉。乃闻国中重以佥军之扰，黎民惊骇，若不能一朝居者，予为此惧，驿骑驰归。目前之急虽纾，境外之兵未戢。乃会群议，以济良规。不意宗盟，辄先推戴。咸谓国家之大统不可以久旷，神人之重寄不可以暂虚。求之今日，太祖嫡孙之中，先皇母弟之列，以先以长，止予一人。虽在征伐之间，每存仁爱之念，博施济众，实可为天下主。天道助顺，人谋与能。祖训传国大典，于是乎在，孰敢不从，朕峻辞固让，至于再三，祈恳益坚，誓以死请。于是俯徇輿情，勉登大宝。自惟寡昧，属时多艰，若涉渊冰，罔知攸济。爰当临御之始，宜新宏远之规。祖述变通，正在今日，虽承平未易遽臻，而饥渴所当先务。禁约诸路管军头目人等，凡事一新，毋循旧弊。若军前立功者，速行迁赏，例从优渥。外用进奉军前克敌之物，及斡脱拜见撒

花等物，并行禁绝。今后应科敛差发，斟酌民力，期于均平安静，俾吾民共享室家之乐。鳏寡孤独不能自存者，所在官司于官仓内优加赈恤。五岳四渎、名山大川、历代帝王及忠臣烈士载于祀典者，官吏岁时致祭。

呜呼，历数攸归，钦应上天之命，勋亲斯托，敢忘列祖之规？体极建元，与民更始。朕所不逮，更赖我远近宗亲、中外文武，同心协力，献可替否之助也。诞告多方，体予至意。

丁未，遣翰林侍读学士郝经、礼部郎中刘人杰使于宋。丙辰，帖木儿、李舜钦等行部考课各路诸色工匠。乙丑，征诸道兵宿卫京师。置互市于涟水军，禁私商越境，犯者死。是月，阿里不哥僭号于和林。

五月戊辰，命燕帖木儿、忙古带节度黄河以西诸军。丙戌，建元中统，诏曰：

祖宗以神武定四方，淳德御群下。朝廷草创，未遑润色之文；政事变通，渐有纲维之目。朕获纘旧服，载扩丕图，稽列圣之洪规，讲前代之定制。建元表岁，示人君万世之传；纪时书王，见天下一家之义，法《春秋》之正始，体大《易》之乾元。炳焕皇猷，权舆治道。可自庚申年五月十九日，建元为中统元年。

惟即位体元之始，以立纲陈纪为先。朕宵衣旰食，孜孜求治。然天下之大，万事之众，岂能遍知。自今凡政令之未便，人情之未达，朝廷得失，军民利害，有上书陈言者，皆得实封呈献。若言不可采，并无罪责；如其可用，朝廷优加迁赏，以旌忠直。军人临阵而亡，及被伤而死者，仰各管头目用心照管，仍仰各路宣抚使量给衣粮优恤其家。百姓犯死

刑者，州府审问狱成，便行处断，则死者不可复生，断者不可复续，万一差误，悔将何及。今后仰所在官司推问得实，具事情始末及断定招款，申宣抚司再行审复无疑，呈省闻奏，待报处决。

甲午，以阿里不哥反，赦天下，诏曰：

朕获承丕祚，已降德音。不期同气之中，俄有阍墙之侮。顾其冲幼，敢启兹谋，皆被凶讐，相济以恶。朕惟父子兄弟之亲，宗庙社稷之重，遣使敦谕，至于再三。乱党执迷，曾无少革。以致宗族咸怒，戈甲载兴。重念兵方弭而复征，民甫休而再扰，危疑未释，反侧不安，诖误者至及于无辜，拘囚者或生于不测，非朕本意，肅然伤心。宜推旷荡之恩，普示哀矜之意。于戏，悛心或启，忍加管蔡之刑；内难既平，式续成康之治。

乙未，立十路宣抚司：赛典赤、李德辉为燕京宣抚使，徐世隆副之；宋子贞为益都济南等路宣抚使，王磐副之；河南路经略使史天泽为河南宣抚使；杨果为北京等路宣抚使，赵昉副之；张德辉为平阳太原路宣抚使，谢瑄副之；李鲁海牙、刘肃并为真定路宣抚使；姚枢为东平路宣抚使，张肃副之；张文谦为大名彰德等路宣抚使，游显副之；粘合南合为西京路宣抚使，崔巨济副之；廉希宪为京兆等路宣抚使。汪惟正为巩昌等处便宜都总帅，虎阑箕为巩昌元帅。敕：“科放差发，分三限送纳，其三限宽期展日，务令百姓易输。”

六月，戊戌，李璫为江淮大都督。刘太平等谋反，事觉，伏诛。浑都海举兵反。壬子，诏陕西四川宣抚司八春节制诸军。乙丑，信苴段实为大理国总管。是月，召真定刘郁，邢

州郝子明，彰德胡祗遒，燕京冯渭、王光益、杨恕、李彦通、赵和之，东平韩文献、张昉等，乘传至开平府。高丽王倂遣其子僖来贺即位，赐倂国王印及虎符。

秋七月癸酉，立行中书省于燕京，行六部，衒衒为中书丞相，王文统、赵璧为平章政事，张易为参知政事。王鄂为翰林学士承旨兼修国史。河南路宣抚使史天泽兼江淮诸翼军马经略使。丙子，造中统元宝交钞。立互市于颖州、涟水、光化军。帝自将讨阿里不哥。

八月丁未，诏都元帅纽璘所过毋擅捶官吏。己酉，立秦蜀行中书省。廉希宪为中书右丞、行省事。

九月丁卯，帝驻蹕转都儿哥。以阿里不哥违命，诏谕中外。己巳，高丽国遣使贺改元。阿蓝答儿举兵反，与浑都海兵合。壬午，诸王合丹、合必赤与汪良臣等合兵讨阿蓝答儿、浑都海。丙戌，阿蓝答儿、浑都海伏诛，陇右悉平。

冬十月癸丑，初行中统宝钞。

十二月丙申，遣礼部郎中孟嘉、礼部员外郎李文俊使安南。乙巳，帝至自和林，驻蹕燕京近郊。赐亲王末哥等及先朝皇后帖古伦、兀鲁忽乃妃子银币有差。自是，岁以为常。

二年春正月己丑，李璫败宋兵于涟水。

二月己亥，宋兵复攻涟水，李璫失利。诏阿术等援之。丁酉，诏行中书省丞相衒衒及平章政事王文统等率各路宣抚使赴开平。丙午，车驾幸察罕脑儿。高丽王倂遣其世子愷来朝。减民间差发。陕西借民钱，以今年税赋偿之。丁巳，李璫败宋兵于沙湖堰。己未，车驾至开平府。

三月，壬戌朔，日有食之。

夏四月己亥，祀天于旧桓州之西北郊。丙午，诏军中所俘儒士，听赎为民。金齿蛮来贡方物，遣兵部郎中刘芳赍玺书谕金齿蛮。乙卯，诏十路宣抚使量免民间课程。命宣抚司官劝农桑、抑游惰、礼高年，问民疾苦，举文学才识可以从政及茂才异等，列名上闻，以听擢用，其官职污滥及民之不孝、不悌者，量轻重议罚。丁巳，命平章政事王文统举读史一人，文统以中书详定官周止应其选。辛酉，敕大理、合剌章兵扈从北上者，还其本国。

五月乙丑，崔明道、李全义为详问官，诣宋淮东制置司访问国信使郝经等所在，仍以稽留信使、侵扰疆场诘之。丙寅，命宣抚使姚枢赴省，同议军国调度。戊辰，发浪国来贡方物，赐金币遣之。庚午，封皇弟末哥世子昌童为永宁王。乙亥，东平路管民总管严忠济罢。丙子，东平路经历邢衡坐诬告张易论死。己卯，召见前济南宣抚使宋子贞、真定宣抚使刘肃、河东宣抚使张德辉、北京宣抚使杨果。庚辰，不花、史天泽为中书右丞相，忽鲁不花、耶律铸为左丞相，塔察儿、廉希宪为平章政事，张文谦为右丞，杨果、商挺为参知政事，粘合南合为平章政事、行省北京。庚寅，李昶为翰林侍读学士。壬辰，封诸王木苑为建昌王。

六月癸巳，罢诸路拘李兰奚。禁诸王擅招民户及征民户私钱。戊戌，诏十路宣抚司并管民官定盐酒税课。己亥，高丽王倂奏请改名植，遣其世子愷来朝。癸卯，严忠范为东平路行军万户兼管民总管，仍谕达鲁花赤等官并听节制。乙卯，诏：“宣圣庙及管内书院，有司岁时致祭，月朔释奠，禁军民侵扰、褻渎，违者罪之。”丙辰，汪良臣同金巩昌路便宜都总

帅，凡军民官并听节制。戊午，诏毋收卫辉、怀孟赋税以偿官借刍粟。庚申，宋泸州安抚使刘整以城降，以整行夔府路中书省兼安抚使，佩虎符。罢金、银、铜、铁、丹粉、锡碌坑冶所役民夫及河南舞阳姜户、藤花户，还之州县。赐大理国总管段实虎符，优诏抚谕之。命李璫领益都路盐课。放工局绣女，听其婚嫁。

秋七月辛酉朔，立军储都转运使司，癸亥，立翰林国史院，王鹗为翰林学士承旨。乙丑，遣使者分祀五岳四渎及后土，凡十有九处，分五道，每岁代祀自此始。万家奴为安抚高丽军民达鲁花赤，赐虎符。丁丑，大司农左三部尚书赛典赤为中书平章政事。壬午，翰林学士阔阔为中书左丞，遣纳速刺丁、孟甲等使安南。乙酉，谕将士大伐宋。诏曰：

朕即位之后，深以戢兵为念，故遣使于宋以通和好。宋人不务远图，伺我小隙，反起边衅，东剽西掠，曾无宁日。诸大臣皆以举兵南伐为请，朕重以两国生灵之故，犹待信使北还，庶有悛心，以成和议。今留而不至者又半载矣。往来之礼遽绝，侵扰之暴不已。彼尝以衣冠礼乐之国自居，当如是乎？曲直之分，灼然可见。今遣王道贞往谕。卿等约会诸将，秋高马肥，水陆分道而进，以为问罪之举。尚赖宗庙社稷之灵，其克有助。卿等宣布朕心，明谕将士，各当自勉，毋替朕命。

八月丁酉，命开平府官释奠于宣圣庙。庚子，封王植为高丽国王。辛丑，征李冶为翰林学士。乙巳，颁中统权定条法，诏曰：

事匪前定，无以启臣民视听不惑之心；政岂徒为，必当

奉帝王坦白可行之制。我国家开建之始，禁网疏阔，虽见施行，不免阙略。或得于此，而失于彼，或轻于昔，而重于今。以兹奸猾之徒，得以上下其手。朕惟钦恤，期底宽平，乃立九章，用颁十道。据五刑之内，流罪似可删除。除犯死罪者，依条处置外，其余递减一等。决杖不得过一百七。著为令。初立劝农司：陈邃、崔斌、成仲宽、粘合从中为滨棣、平阳、济南、河间劝农使，李士勉、陈天锡、陈臂武、忙古带为邢洺、河南、东平、涿州劝农使。封万户张柔为安肃公，张荣为济南公。诏陕西四川行省存恤归附军民。诏：“自今使臣有矫称上命者，有司不得听受。诸王、后妃、公主、驸马非闻奏，不许擅取官物。”颁斗斛权衡。命刘整招谕夔府、嘉定等处军民。宥宋私商七十五人，还其货，听榷场贸易。仍檄宋边将还北人留南者。

九月丙子，谕诸王、驸马：凡部民词讼，勿擅决，听朝廷处置。癸未，遣阿沙、焦端义抚恤甘肃等路军民。置诸路提举学校官，诏曰：

诸路学校久废，无以作成人才。今拟选博洽多闻之士，以教导之。据王万庆、敬铉等三十人，可充诸路提举学校官。仍选高业儒生教授，严加训诲，务使成材，以备他日选擢之用。是月，阿里不哥袭败诸王亦孙哥，遂入和林，逾沙漠而南。

冬十月庚寅朔，帝自将讨阿里不哥。庚子，张启元为中书右丞，行中书省于平阳、太原等路。命平章政事赵璧、左三部尚书怯烈门率蒙古、汉军屯燕京近效。河南屯田万户史权为江汉大都督。壬寅，亳州张柔、归德邸浹、睢州王文干、水军解成、张荣实、东平严忠嗣、济南张宏七万户，各率所

部兵赴行在。乙巳，指挥使郑江率千人赴开平。指挥使董文炳率善射者千人由鱼儿泊赴行在。丙辰，平章政事塔察儿率万人由古北口赴行在。

十一月壬戌，诸王合丹等与阿里不哥战于昔木土脑儿，大败之，阿里不哥遁。辛未，复败阿里不哥于阿儿忒之地，其将阿速等降，阿里不哥弃和林西走。癸酉，帝驻蹕帖买和来之地。尚书怯烈门、平章政事赵璧兼大都督，率诸军从塔察儿驻北边。罢十路宣抚使，惟存开元一路。丁丑，征诸路宣抚使赴中都。帝移蹕速木合打之地。鹰坊阿里沙及其弟阿散坐擅离扈从，论死。

十二月庚寅，封皇子真金为燕王，领中书省事。甲午，帝至开平，放诸路新金军，中外解严。

三年春正月庚午，罢高丽互市。癸酉，以军兴，敕停公私逋赋毋征。丙戌，江汉大都督史权、鄂州万户张宏彦将兵八千人赴燕京。

二月己丑，李璫举兵反，以涟、海三城献于宋。庚寅，宋兵攻新蔡县。辛卯，始定中外官俸。甲午，李璫陷益都。乙未，诏诸道，以今岁民赋市马。辛丑，李璫寇蒲台。癸卯，平章政事赵璧兼大都督，统诸军讨李璫。甲辰，命水军万户解成、张荣实，大名万户王文干、东平万户严忠范会济南万户张宏、归德万户邸浹、武卫军炮手元帅薛胜，会滨、棣二州。张柔及其子宏范将二千人赴开平。丙午，命诸王合必赤总督诸军，阿只爱不干、赵璧行中书省事于山东，宋子贞参议行省事，中书左丞阔阔、尚书怯烈门、宣抚使游显行宣慰司事于大名。己酉，王文统坐于李璫同谋，伏诛，仍诏谕中外。辛

亥，都元帅阿海分兵戍平滦、海口及东京、广宁、懿州。壬子，李璫陷济南府。癸丑，宋兵攻滕州。

三月己未，括木速蛮、畏兀儿、也里可温、答失蛮等为兵。庚申，括北京鹰房等户为兵，以赵炳将之。辛酉，郑鼎、瞻思丁、答里带、三岛行宣慰司事于平阳，祆祆、廉希宪、商挺、麦肖行中书省事于陕西。壬申，撒吉思、柴桢行宣慰司事于北京。癸酉，阿术、史枢等败李璫兵于济南。乙亥，宋将夏贵寇符离。戊寅，韩世安等败李璫兵于高苑。乙酉，宋夏贵寇蕲县。

夏四月丁亥，诏博兴、高苑等处军民为李璫协从者，并释其罪。丙申，宋兵寇徐、邳二州。癸卯，宋兵寇亳州。乙巳，命诸路详谳冤狱。乙卯，诏史天泽讨李璫。诸将皆受节度。

五月戊午，宋兵陷蕲县，权万户李义、千户张好古死之。甲子，宋兵寇利津。戊辰，右丞相忽鲁不花兼中书省都断事官，赐虎符。平章政事赛典赤兼领工部及诸路工作。丁丑，徐、邳总管李景让坐宋兵前攻邳州以城降，论死。大司农姚枢与左三部尚书刘肃依前商议中书省事。

六月乙酉，宋兵寇沧州。戊子，韩世安败宋兵于滨州丁河口。丙申，高丽国遣使来贡方物。癸卯，太原总管李毅奴哥、达鲁花赤载曲薛坐受李璫伪檄，伏诛。壬子，申严军官及部卒扰民之禁。

秋七月甲戌，史天泽等克济南，获李璫诛之。戊寅，夔府行省兼安抚使刘整入觐，以整行中书省于成都、潼川两路。

八月戊申，命翰林学士王鹗纂《太祖皇帝实录》。

九月戊午，亳州万户张宏略败宋兵于蕲县，复蕲县、宿州。己未，安南国王陈光昺遣使来贡方物。壬申授陈光昺及达鲁花亦讷剌丁虎符。庚子，中翼千户久住败宋兵于虎脑山。

冬十月壬戌，以刘人杰不附李璫，擢益都路总管。乙丑，分东、西川都元帅府为二，以帖的、刘整等为都元帅。丙寅，赐高丽国新历，且责国王欺慢之罪。戊寅，诏益都路官吏军民为李璫胁从者，并赦其罪勿问。

十一月乙巳，谕左丞相史天泽：“朕或乘怒欲有诛杀。卿等宜迟留一二日，复奏行之。”

十二月丙辰，立河南、山东统军司，塔剌浑火儿赤为河南路统军使，卢升副之。茶不花为山东路统军使，武秀副之。丁巳，立十路宣慰司。癸亥，享列祖于中书省，以大礼使摄祀事。壬申，杨大渊为东川都元帅。

四年春正月乙酉，宋贾似道遣杨琳，以蜡书诱杨大渊南归，为大渊部将所执，诏诛之。丙戌，姚枢为中书左丞，改诸路监榷课税所为转运司。甲午，立十路奥鲁总管。癸卯，召商挺、赵良弼入觐。

二月甲子，车驾幸开平，遣王德素、刘公谅使于宋，致书宋主，诘其稽留郝经等之故。

三月癸卯，初建太庙。己酉，高丽王禕遣使入贡，并上表谢恩。

夏四月戊寅，召窦默、许衡赴开平，改沧、清、深三州盐提领所为转运司。

五月乙酉，初立枢密院，以皇子燕王兼判枢密院事。戊子，改开平府为上都，达鲁花赤兀良吉为上都路达鲁花赤，总

管董铨为上都路总管兼开平府尹。

六月癸酉，线真为中书右丞相，塔察儿为左丞相。
秋七月乙未，以故东平权万户吕义死事，赐谥忠节。

八月辛亥，置大理金齿等路都元帅府，以淄、莱、登三州为总管府。戊午，阿脱、商挺行枢密院于成都。壬申，车驾至自上都。九月，释宋谍王立、张达等十八人，给衣服遣还。

冬十一月丙戌，享于太庙，合丹、塔察儿、王盘、张文谦为大礼使摄祀事。高丽王禘遣使贡方物，命禘入朝。十二月丁未，四川都元帅钦察戍虎啸山。

卷八

本纪第八

世祖二

至元元年春正月丁丑朔，高丽国遣使贺正旦。戊戌，杨大渊进罗绢三百端，优诏谕之。癸卯，罢宋人互市。

二月辛亥，选儒士译写经书，并纂修国史。丙辰，罢陕西行户部。癸酉，车驾幸上都。诏总管史权等二十三人入觐。

三月己亥，命尚书宋子贞陈时务，子贞条十三策，敕中书省议行之。辛丑，立漕运司。

夏四月己卯，诏高丽国王王禘入朝。丁卯，追治李璫逆党张邦直、姜郁等二十七人之罪。

五月乙亥，唆脱颜、郭守敬行视西夏河渠。己亥，中书右丞粘合南合为平章政事。

六月乙巳，召王鹗、姚枢赴上都。戊申，高丽国遣使贡方物。

秋七月甲戌，彗星出舆鬼。癸未，以西番十八族部立安西州，行安抚司事。庚子，阿里不哥与玉龙答失、阿速带、昔里给来降，诏皆宥之，诛其部将不鲁花等五人。

八月乙巳，立山东行中书省，中书左丞相耶律铸、参知政事张惠等行省事。颁新立条格：省并州县，定官吏员数，分品从，给俸禄，授公田，考殿最；均赋役，招流亡，禁擅用官物及以官物进献、借贷官钱、擅科差役；凡军马不得停住村坊，词讼不得越诉；恤鳏寡，劝农桑，验雨泽，物价以钞为准；具贼盗囚徒起数，申省部。又颁陕西四川、西夏中兴、北京行中书省条格。定诸王使臣驿传、税赋、差发、不得擅招民户，及以银与非投下人赤斡赤。禁口传敕旨，及追呼行省官属。癸丑，僧子聪同议枢密院事。诏子聪复姓刘氏，赐名秉忠，拜太保，参领中书省事。乙卯，改燕京为中都。丁巳，以改元，赦天下，诏曰：

应天者惟以至诚，拯民者莫如实惠。朕以菲德，获承庆基，内难未勘，外兵弗戢，夫岂一日，于今五年。敕天地之畀矜，暨祖宗之垂裕，凡我同气，会于上都。虽此日之小康，敢朕心之少肆。

比者星芒示警，雨泽愆期，皆阙政之所由，顾斯民其何罪。宣布维新之令，溥施在宥之仁。据鲁不花、忽察、脱满、阿里察、脱火思等，构祸我家，依成吉思皇帝札撒克正典刑

讫。可大赦天下，改中统五年为至元元年。自至元元年八月十六日昧爽以前，除杀祖父母、父母不赦外，其优余罪无轻重，咸赦除之。敢以赦前事相告者，以其罪罪之。

九月壬申朔，立翰林国史院。辛巳，车驾至自上都。庚寅。

十月壬寅朔，高丽国王王禕来朝。庚戌，有事于太庙。丁卯，宋理宗殂，其太子禩嗣位。益都千户毛璋、刘成等谋反，伏诛。

冬十一月辛巳，讨骨嵬蛮。壬辰，罢领中书左右部阿合马为平章政事，阿里为中书右丞。十二月庚午，始罢诸万户世守，立迁转法。

二年春正月辛未朔，日有食之。己卯，邓州监战纳怀、新旧军万户董文炳并为河南副统军。甲申，申严越界贩马之禁。癸巳，八东乞儿部牙西来贡方物。丁酉，高丽国王王禕遣其弟珣来贡方物。

二月辛丑朔，都元帅按陈败宋兵于钓鱼山。戊申，封诸王兀鲁带为河间王。丁巳，车驾幸上都。癸亥，并六部为四。麦术丁为吏礼部尚书，马亨为户部尚书，严忠范为兵刑部尚书，别鲁丁为工部尚书。甲子，以蒙古人充各路达鲁花赤，汉人充总管，回回人充同知，著为令。同知东平路宣慰使宝合丁为中书平章政事，廉访使王晋为参知政事，廉希宪、商挺罢。

三月丁亥，敕边军习水战、屯田。

夏四月庚寅，敕军中犯法者勿擅戮，轻罪断，重罪上闻。诏四川、山东等路边军屯田。

闰五月癸亥，移秦蜀行省于兴元路。丁卯，分河南属州为太宗子孙采地：郑州隶合丹，钧州隶明里，睢州隶李罗赤，蔡州隶海都。平章政事赵璧行省事于南京、河南府、大名、顺德、洺磁，彰德、怀孟等路，平章政事廉希宪行省事于东平、济南、益都、淄莱等路，中书左丞姚枢行省事于西京、平阳、太原等路。诏诸路府州不满千户者，可并则并之。各投下并于所隶府州。散府州户少者，不更设录事司及司侯司。附郭县以府州兼领。括诸路未占户籍任差职者以闻。

六月戊寅，移山东统军司于沂州。万户重喜城十字路及正阳，命秃剌戍之。己卯，高丽国遣使贺圣诞节。参知政事王晋罢。

秋七月癸亥，安南国王遣使贡方物。戊寅，高丽国遣使贡方物。己卯，中书省臣皆罢。安童为中书右丞相，伯颜为中书左丞相。

八月戊子，召许衡于怀孟，杨诚于益都。车驾至自上都。

九月庚子，皇孙铁木儿生。

冬十月己卯，有事于太庙。癸未，敕顺天张柔、东平严忠济、河间马总管、济南张林、太原石抹总管等户改隶民籍。

十一月丙申，召李昶于东平。

十二月癸酉，召张德辉于真定，徙单公履于卫州。丁亥，选诸翼军万人充侍卫亲军。

三年春正月乙未，高丽国遣使贺正旦。丙午，遣朵端、赵璧扶谕四川军民。壬子，立制国用使司，以阿合马为使。

二月丙寅，廉希宪、宋子贞为中书平章政事，张文谦复为中书左丞，史天泽为枢密副使。癸酉，立安抚高丽军民总

管府，治沈州。壬午，中书右丞张易为同知制国用使司事，参知政事张惠为副使。癸未，车驾幸上都。甲申，罢夏行省，立慰司。立东京、广甯、懿州、开元、恤品、合懒、婆婆等路宣抚司。

三月己未，前参知政事王晋及近侍和哲斯、转运使王明坐隐匿盐课，并论死。

夏四月己卯，申严濒海私盐之禁。

五月乙未，遣使者虑囚。丙辰，罢益都行中书省。

六月丁卯，封皇子南木合为北平王。戊寅，申严陕西、河南竹禁。

秋七月丙申，罢息州安抚司。壬寅，诏上都路总管府遇车驾巡幸，行留守司事。

八月丁卯，兵部侍郎黑的、礼部侍郎殷宏使日本、赐玺书曰：

皇帝奉书日本国王：朕惟自古小国之君，境土相接，尚务讲信修睦；况我祖宗受天明命，奄有区夏，遐方异域畏威怀德者，不可悉数。朕即位之初，以高丽无辜之民，久罹锋镝，即令罢兵，还其疆场，反其旄倪。高丽君臣感戴来朝。计王君臣，亦已知之。高丽，朕之东藩也。日本密迩高丽，开国以来，时通中国。至于朕躬，而无一乘之使，以通和好。尚恐国王知之未审，故特遣使持书布告朕心。冀自今以往，通问结好，以相亲睦。且圣人以四海为家，不相通好，岂一家之理哉？以至用兵，夫谁所好？王其图之。

又赐高丽王禩玺书曰：

今尔国人赵彝来告，日本与尔国为近邻，典章文物有足

嘉者。汉、唐而下，亦或通使中国。故今遣黑的等往日本，欲与通和。卿其导去使，以彻彼疆，开悟东方向风慕义。兹事之责，卿宜任之。

戊子，高丽国遣使贺圣诞。

九月戊午，车驾至上都。

冬十月丁丑，徙平阳经籍所于大都。太庙成，平章政事赵璧等集群臣廷议，定太庙为八室。

十一月辛卯，初给府、州、县、司官吏俸及职田。平章政事宋子贞致仕。辛亥，忽都答儿为中书左丞相。禁天文图讖等书。

十二月，改四川行枢密院为行中书省，赛典赤、也速带儿等佥行中书省事。丁亥，张柔判行工部事，与行工部尚书段天祐等城大都。

四年春正月癸卯，修曲阜宣圣庙。乙巳，百济国遣使来朝。辛亥，赵璧为枢密副使。立诸路洞治都总管府。癸丑，封昔木土山为武定山，其神曰武定公。泉为灵渊，其神曰灵渊侯。乙卯，高丽国遣使来朝。戊午，城大都。析上都隆兴府自为一路。立开元等路转运司。

二月庚申，粘合南合复为中书平章政事，阿里复为中书右丞。丁卯，改经籍所为宏文院，以马天昭知院事。丁亥，车驾幸上都。

三月己丑，耶律铸复为中书右丞相。壬寅，右丞相忽都察儿、史天泽、耶律铸、伯颜俱罢。

五月丁亥朔，日有食之。敕上都重建宣圣庙。丙辰，析东平路博州别为一路。

六月乙丑，史天泽复为中书左丞相，忽都答儿、耶律铸为平章政事，伯颜为中书右丞，廉希宪为中书左丞，阿里、张文谦并参知政事。乙酉，罢宣徽院。黑的、殷宏奏，高丽使者不能导至日本。命仍至高丽，赍玺书，切责高丽国王，使通谕日本，期于必得要领。

秋七月戊戌，大名路达鲁花赤爱鲁、总管张宏范，坐盗用官钱，免官。

八月丙寅，复立宣徽院，以线真为院使。丁丑，封皇子忽哥赤为云南王。壬午，命怯绵讨建都蛮。高丽国遣使贺圣诞。阿术略地襄阳，败宋兵于牛岭。九月戊申，许衡为国子祭酒。安南国王遣使贡方物。庚戌，遣云南王忽哥赤镇大理、鄯阐、察罕章、赤秃哥儿，金齿等处，立大理等处行六部，阔阔带以尚书兼云南王傅，柴禔以尚书兼府尉，甯源以侍郎兼司马。诏安南国王陈光昺入朝。癸丑，车驾至自上都。

冬十月庚申，宋复陷开州。辛酉，制国用司言：“别怯赤山石绒，织为布，火不能然。”诏采之。西番酋阿奴版的哥等率众来降，授喝吾等处总管。庚辰，定品官子孙荫叙格。

十一月乙酉，有事于太庙。甲戌，立夔府路总元帅府。

十二月庚戌，立诸位斡脱总管府。

五年春正月庚子，建上都城隍庙。辛丑，高丽国王王禕遣其弟浟来贺正旦，并奏通使日本。遣北京路总管于也孙脱、礼部郎中孟甲往谕高丽。

二月辛丑，析甘州路之肃州别为一路。

三月甲寅，禁民间兵器，犯者验多寡定罪。甲子，敕怯绵招谕建都。丁丑，罢诸路女直、契丹、汉人为达鲁花赤者，

回回、畏兀儿、乃蛮、唐兀特人仍旧。

夏五月癸亥，都元帅百家奴拔宋嘉定府五花、石城、白马三寨。

六月辛巳朔，济南人王保和等妖言惑众，敕诛首恶三人，余勿论。

己酉，蔡国公张柔卒，封诸王昔里吉为河平王。

秋七月辛亥，召高鸣、刘瑜、郝谦、李天辅、韩彦文、李祐赴上都。壬子，罢各路奥鲁官，令管民官兼领之。癸丑，立御史台，右丞相塔察儿为御史大夫。诏曰：“台官职在直言，朕或有未当，其极言无隐，毋惮他人，朕为尔主。”仍谕天下知之。戊辰，罢西夏宣抚司。庚午，遣都统领脱朵儿、统领王国昌等点阅高丽兵船。立东西二川统军司，以刘整为都元帅，与阿术同议军事。

八月庚子，忙古带讨西番及建都蛮。

九月丁巳，阿术围樊城。己丑，命黑的、殷宏复赍国书使日本，仍敕高丽人导送。车驾至自上都。史天泽复为枢密副使。

冬十月戊寅朔，日有食之。己卯，敕中书省、枢密院：有事与御史台同奏。庚辰，御史中丞阿里为参知政事。立河南等路行中书省，参知政事阿里行省事。庚寅，敕秃忽思等译《毛诗》、《孟子》、《论语》。乙未，有事于太庙。以和礼霍孙、独胡剌充翰林待制，兼起居注官。

十一月庚申，宋兵自襄阳攻沿山城寨，阿术分遣诸军败之。

十二月戊寅，谕沿边屯戍军士，逃役者处死。

六年春正月癸丑，高丽国王王禕遣使来告诛权臣金俊。立四道提刑按察司。戊午，阿术略宋复州、德安府，俘万人而还。庚申，参知政事杨果罢为怀孟路总管。诏枢密副使史天泽、驸马忽刺出至襄阳视师。

二月己丑，颁新制蒙古字于天下，诏曰：

朕惟字以书言，言以纪事，此古今之通制也。我国家创业朔方，俗尚简古，未遑制作，凡文书皆用汉字及畏兀字，以达本朝之言。今文治寝兴，而字书方阙，其于一代制度，实为未备。特命国师八思巴创为蒙古新字，译写一切文字，期于顺事达言而已。自今以后，凡玺书颁发，并用蒙古新字，仍以汉字副之。其余公式文书，咸仍其旧。

三月壬子，黑的、殷宏至对马岛，为日本人所拒而还。戊午，阿术围樊城，筑堡于鹿门山。辛酉，败宋将张世杰于赤滩浦。

夏四月辛巳，制玉玺大小十纽。

六月辛巳，怯绵讨建都，失利，又擅追唆火儿玺书、金符，论死。丙申，高丽国王王禕遣其世子愷来朝。癸卯，诏董文炳率兵赴襄阳。秋七月己巳，立诸路蒙古字学。癸酉，立国子学，遣使者审理诸路冤滞，诏谕宋国军民，示以不欲用兵之意，复遣脱朵儿、王昌国等至高丽，相视耽罗等处。海道万户解汝楫、李庭等败宋将夏贵于虎尾洲，又败宋将范文虎于罐子滩。

八月己卯，立金州招讨使司。丙申，诏诸路劝课农桑，命中书省采农桑事，列为条目，相土地所宜者，颁行之。高丽权臣林衍废其王禕，立禕弟浟为王。高丽世子愷奏其事。遣

斡朵思不花、李谔等至高丽按之。

九月己未，封高丽世子愍为东安公。愍辞，授愍特进上柱国。敕率兵三千，赴其国难。辛未，敕万户宋仲义征高丽。忽剌出、史天泽并为平章政事，阿里为中书右丞，行河南中书省事赛典赤行陕西四川中书省事。车驾至自上都。斡朵思不花、李谔以高丽枢密副使金方庆至，奉王渑表，称植疾病，令渑权国事。

冬十月己卯，定朝仪服色。丁亥，遣兵部侍郎黑的、判官徐世雄，召王植、王渑及林衍俱诣阙。命国王头辇哥率大军赴高丽，赵璧行中书省于东京，仍诏谕高丽军民。

十一月癸卯，高丽龟州都领崔坦等以西京内附。庚午，安南国王遣使贡方物。高丽国王王植遣使从黑的入朝，奏植已复位。

十二月己丑，析彰德、怀孟、卫辉为三路。

七年春正月辛丑朔，高丽国遣使贺正旦。丙午，耶律铸、廉希宪罢。立尚书省，罢制国用使司。平章政事忽都答儿为中书左丞相，国子祭酒许衡为中书左丞，制国用使司阿合马平章尚书省事，同知制国用使司事张易同平章尚书省事，制国用使司副使张惠、佥制国用使司李尧咨、麦术丁并参知尚书省事。己酉，敕诸投下官隶中书省。甲寅，高丽国王王植奏请从七百人放觐，诏许从四百人。诏高丽西京内附，改为东甯府，画慈悲岭为界。丁巳，蒙哥为高丽安抚使，佩虎符。诏谕高丽臣民曰：

朕即位以来，闵尔国久罹兵乱，册定尔王，撤还兵戍。十年之间，其所以保护安全者，无所不至。不图逆臣林衍自作

不靖，擅易国王禩。立安庆公渚。诏衍赴阙，复稽延不至，岂可释而不诛。已遣行省率兵东下，惟衍一身是讨，渚本非得已，在所宽宥。自余胁从诖误，一无所问。

二月辛未朔，中书右丞伯颜为枢密副使。丙子，帝御行宫，观刘秉忠、许衡及太常卿徐世隆所起朝仪，大悦，举酒赐之。丁丑，以岁饥，罢筑宫城。壬辰，立司农司，参知政事张文谦为司农卿。设四道巡行劝农司，劝课农桑，兴修水利。乙未，万户张宏范败宋兵于万山堡。高丽国王王禩来朝，求见皇子燕王。诏曰：“汝一国主也，见朕足矣。”禩请世子愷见，从之。诏谕禩曰：“卿内附在后，故班诸王下。我太祖时亦都护先附，即令班诸王上，阿思兰后附，则班其下。卿宜知之。”未几，命蒙哥、赵良弼送禩还。诏国王头辇哥率兵戍高丽王京，脱脱朵儿、焦天翼为高丽国达鲁花赤。又诏谕高丽臣民曰：

朕惟臣之事君，有死无二。不意尔国权臣，辄敢擅易国主。彼既驱率兵众，将致尔等危扰不安，以尔黎庶之故，特遣兵护送国王愷还国，奠居旧京，命达鲁花赤同往镇抚，以靖尔邦。尔东土之人，咸当无畏，安堵如故。已别敕将帅，严戢兵士，勿令侵犯。尔或妄动，必致俘略，宜审思之。

三月庚子朔，日有食之。改诸路行中书省为行尚书省。甲寅，车驾幸上都。

夏四月壬午，设诸路蒙古字学教授，定达鲁花赤子弟荫叙格。癸未，定军官等级，以军多少为差。己丑，林衍死，衍党裴仲孙等复立王愷疏属承化侯温为王，窜于珍岛。

五月癸卯，也速带儿、严忠范等及宋兵战于嘉定、重庆，

皆败之，获其都统牛宣。甲辰，威州番酋降。丁未，同知枢密院事合答为平章政事。丙辰，括天下户口。减诸路课程十分之一，免上都粮税。管民官迁转，以六十月为一考。改宣徽院为光禄司，宣徽使线真为光禄司使。庚申，命枢密院阅实军数。

六月庚戌，敕戍军还，所过州县村坊主者给饮食、医药。丁亥，罢各路洞治总管府。丙申，立籍田于中都东南郊。禁边民擅入宋境剽掠。

秋七月庚申，初给军官俸。壬戌，金诸道回回军。乙丑，阅实诸路炮手户。也速带儿败宋兵于金刚台。八月戊辰朔，筑环城以逼襄阳。庚辰，御史大夫塔察儿同知枢密院事，御史中丞帖只为御史大夫。高丽世子愷来贺圣诞。驸马斡罗陈建城于答儿海子，赐名应昌府。

九月丙寅，括河西户口。

冬十月乙亥，宋人寇莒州。乙酉，有事于太庙。己丑，车驾至自上都。

十一月丁巳，忻都、史枢并为高丽金州等处经略使，佩虎符，屯田高丽。安南国遣使贡方物。

闰月丁卯朔，高丽世子愷还。壬辰，申明劝课农桑赏罚之法。设诸路脱脱禾孙。

十二月丙申朔，改司农司为大司农司，御史中丞博罗兼大司农卿。安童奏：“博罗以台臣兼领，前无此例。”帝曰：“司农非细事，朕深谕此，其令博罗总之。”秘书监赵良弼充国信使，使日本，赐日本玺书曰：

盖闻王者无外，高丽与朕既为一家，王国实为邻境。故尝遣

信使修好，为疆场之吏抑而弗通。所获二人，敕有司慰抚，赍牒以还。继欲通问，值高丽权臣林衍构乱，坐是弗果。岂王亦因此辍不遣使，或已遣而中道梗塞耶？不然，日本素号秉礼之国，王之君臣宁肯漫为不思之事乎？近已平林衍，高丽安辑，特令秘书监赵良弼充国信使，持书以往。如即发使，与之偕来，亲仁善邻，国之善事。其或犹豫，以至用兵，夫谁所乐为也？王其图之。

敕岁祀大社稷、风师、雨师、雷师。丁亥，金齿、骠部酋阿匿福、勒丁、阿匿爪来降献驯象三、马十九。辛酉，诸王伯忽儿为也可札鲁忽赤。

八年春正月乙丑朔，高丽国遣使贺正旦，兼贡方物。己卯，同金河南等路行中书省事阿里海牙参知尚书省事。设枢密院断事官。丙戌，高丽安抚使阿海攻珍岛失利。壬辰，敕诸路鰥寡孤独、疾病不能自存者，官给庐舍、薪米。

二月乙未朔，定民间婚娶礼币，贵贱有差。丁酉，发中都、真定、顺天、河间、平滦五路民筑宫城。己亥，罢诸路转运司。以尚书省奏定条画颁天下。移陕西四川行中书省于兴元。癸卯，东京等路行尚书省事赵璧为中书右丞。甲辰，命忽都答儿招论裴仲孙。乙巳，大理等处都元帅元宝合丁、云南王傅阔阔带毒杀云南王事觉，伏诛。戊申，以治事日程谕中外官事。庚戌，申严东川盐井之禁。庚申，奉御九住以梳栳侍太祖，奉所落须发之上，诏藏于太庙夹室。

三月乙丑，置河东山西道按察司，改河东陕西道为陕西四川道，山北东西道为山北辽东道。丙子，改盐课都转运司为都转运盐使司。辛巳，杀滨棣路万户韩世安，籍其家。甲

申，车驾幸上都。乙酉，中书丞许衡罢为集贤大学士、国子祭酒。立国子学，置司业、博士、助教等官。己丑，立西夏中兴等路行尚书省，趁海参知行尚书省事。命尚书省阅实天下户口，颁条画谕天下。敕有司留滞狱讼，以致越诉者，官民皆罪之。忻都、史枢行经略司于凤州等处。

夏四月壬寅，忻都、忽林赤、王国昌分道讨裴仲孙。平滦路昌黎县民生子，中夜有光，诏鞠养之。或谏，帝曰：“何幸生一好人，毋嫉也。”每月命给米四斗。戊午，阿术等与宋将范文虎战于湍滩，大败之，获统制朱胜等百余人。

五月乙丑，以大兵围襄阳。敕赛典赤、郑鼎率所部水陆并进，趋嘉定，汪良臣、彭天祥趋重庆，扎刺不花趋泸州，曲立吉思趋汝州，牵制宋之援兵。金省也速带儿、郑鼎为军前行尚书省事，赛典赤行省事于兴元，转给军粮。丙寅，云南落羽蛮贡方物。辛未，分金齿、白夷为东西两路安抚使。己卯，史天泽平章军国重事。辛巳，令蒙古官子弟好学者，兼习算术。癸未，史枢、沂都等讨珍岛贼，大破之，斩王温，其党金通精走死，珍岛平。高丽国遣使贡方物。

六月甲午，敕枢密院：凡军事径奏，不必由尚书省。癸卯，宋将范文虎援襄阳，阿术等大败之，己未，山东统军司塔山、董文炳坐城五河口迟，为宋兵所据，决罚有差。

秋七月壬戌朔，金女直、水达达军。丁卯，国王头辇哥行尚书省于北京、辽东等路。辛未，立左、右十三卫亲军都指挥司。乙酉，阿术败宋将来兴国于湍滩。高丽世子愼入质。

八月壬辰朔，日有食之。己亥，诏招谕宋襄阳守臣吕文焕。壬子，车驾至自上都。迁成都统军司于眉州。己未，圣

诞节，初立内外仗及云和署乐位。

九月壬戌朔，敕阿术略地汉南。癸亥，高丽世子愼归。丙寅，罢陕西四川行尚书省，也速带儿行四川尚书省事于兴元、京兆等路。甲戌，金西夏、回回军。太庙殿柱坏。丙子，敕享太庙毋用牺牛。壬午，宋兵寇胶州，千户蒋德等败之，获宋统制范广。癸未，诏四川民力困弊，免茶盐等课税，仍敕有司有言茶盐之利者以违制论。

冬十月丁酉，有事于太庙。

十一月辛酉朔，遣阿鲁忒儿等抚治大理。壬戌，罢诸路交钞都提举司。乙亥，建国号曰大元，诏曰：

诞膺景命，奄四海以宅尊；必有美名，绍百王而纪统。肇从隆古，匪独我家。唐之为言荡也，尧以之而著称；虞之为言乐也，舜因之而作号。驯至禹兴而汤造，互名夏大以殷中。世降以还，事殊非古。虽乘时而有国，不以义而制称。为秦为汉者，盖从初起之地名。日随曰唐者，又即所封之爵邑。是皆徇百姓见闻之狃习，乃一时经制之权宜，概以至公，不无少贬。

我太祖圣武皇帝握乾符而起朔土，以神武而膺帝图。四震天声，大恢土宇，舆图之广，历古所无。顷者，耆宿诣庭，奏章申请，谓既成于大业，宜早定于鸿名。在古制以当然，于朕心乎何有。可建国号曰大元，盖取《易经》乾元之义。兹大治流形于庶品，孰名资始之功，予一人底定于万邦，尤切体仁之要。嘉与敷天，共隆大号。咨尔有众，体予至怀。

丙戌，立四川行尚书省于成都。

十二月辛卯，宣徽院请以阑遗、漏籍等户淘金，帝曰：

“姑止，毋重劳吾民也。”乙巳，减百官俸。召塔出、董文炳入觐。辛亥，省太常寺入翰林院。

九年春正月庚申朔，高丽国遣使贺正旦，兼贡方物。甲子，并尚书省入中书省。平章尚书省事阿合马、同平章尚书省事张易为中书平章政事，参知尚书省事张惠为中书左丞，参知尚书省事李尧咨、麦术丁为参知中书政事。省六部为四：曰吏礼部、户部、兵刑部、工部。丙寅，遣不花、马璘谕高丽具征耽罗舟粮。敕诸路金军三万人赴河南。丁丑，皇子西平王奥鲁赤及诸王也速鲁儿、秃鲁率所部讨建都蛮。庚辰，改北京、中兴、四川、河南四路行尚书省，复立京兆中书行省。辛巳，敕军民讼田者，民田有余分之军，军田有余亦分之民。其军驱入民籍者，还正之。壬午，改山东东路都元帅府统军司为行枢密院，也速带儿、塔出并行枢密院副使。乙酉，诏元帅府统军司、总管万户府阅实军籍。

二月庚寅朔，国信使赵良弼遣书状官张铎同日本十二人至京师请觐，帝不许。辛卯，诏扎鲁忽赤乃太祖开创，所置位百司右，并立左右司。壬辰，高丽国遣使贺建国号。改中都为大都。甲午，命阿术统蒙古军，刘整、阿城海牙统汉军。戊申，始祭先农于东郊。车驾幸上都。

三月甲戌，括民间四教经，焚之。阿术等克樊城外城，筑重围守之。

五月戊午朔，立和林转运司，小云失别为使，兼提举交钞使。辛酉，罢金回回军。癸亥，敕拔都军屯田于怯鹿难之地。丙寅，金徐、邳二州军，戍邳州。庚午，罢西番秃鲁千等处金银矿户为民。乙酉，诏安集答里伯所部流民。

六月壬辰，京师大雨，坏墙屋，压死者众。己亥，塔出略地涟州，拔白头河诸堡。

秋七月丁巳朔，禁私鬻回回历。壬午，诏官府文移并用蒙古字，仍遣百官子弟入蒙古学。

八月丙戌朔，日有食之。癸卯，阿术等大败宋襄阳援兵，获其都统张顺。乙巳，车驾至自上都。

九月甲子，阿术等败宋兵于柜门关，获其都统张贵及将士二千余人。癸酉，河南行中书省阿里坐奏军数不实，免官，并杖之。甲戌，罢水军总管府。

冬十月丙戌朔，封皇子忙哥剌为安西王。遣使招谕扮卜、忻都蛮。壬辰，有事于太庙。癸巳，赵璧为平章政事。张易为枢密副使。癸卯，初立会同馆。

十一月壬戌，诸王只必帖木儿、伯待穆尔筑新城成，赐名永昌府。己巳，征高丽兵讨耽罗。辛未，召高平儒者杨恭懿，不至。

十二月乙酉朔，诏诸路达鲁花赤、管民长官，兼管诸军奥鲁。辛丑，诸王忽剌出括逃民高丽界。高丽达鲁花赤上其事，诏：“高丽之民犹未安集，禁之。”辛亥，宋将咎万寿寇成都，严忠范失利，遣使逮忠范至京师。癸丑，改拱卫司为拱卫直都指挥使司。

卷九

本纪第九

世祖三

十年春正月乙卯朔，高丽国王王禕遣其世子愷来朝。戊午，忻都、郑温、洪茶邱讨耽罗。宿州万户也先不花请筑堡牛头山，以扼两淮粮运，不允。也先不花因言：“前宋人城五河，统军司皆得罪。今不筑，恐宋人先之。”帝曰：“汝言虽是，若坐视宋人戍之，罪亦不免也。”己未，禁阴阳图讖等书。癸亥，阿里海牙等克樊城。丁卯，立秘书监。庚午，金陕西探马赤军。己卯，宋将咎万寿寇成都，金京兆等路新军援之。命诸王阿不合市药于师子国。壬午，东川统军司合剌乞益兵戍云门山及虎头山，以京兆新金军益之。

二月丙戌，皇后、皇太子受册、宝，遣太常卿合丹告太庙。丙申，云南落羽蛮酋阿旭叛。遣断事官麦肖勾校四川陕西行省钱谷。遣勘马刺失里、乞带脱因、卜云失等使缅甸，赐缅甸王玺书曰：

间者大理鄯阐等路宣慰司都元帅府差乞带脱因导王国使诣京师，且言向至王国，但见臣下，未尝见王，又欲观吾大国舍利。朕矜闵远来，命其觐见。又使纵观舍利，询其所来，乃知王有内附之意。朕一视同仁，今再遣勘马刺失里及礼部郎中、国信使乞带脱因，工部郎中、国信副使卜云失往谕王国。

诚能谨事大之礼，遣其子弟若贵臣一来，以彰我国家无外之义，用敦永好，时乃之休。至于用兵，夫谁所好？王其思之。丁未，宋京西安抚使、知襄阳府吕文焕以城降。

三月甲寅朔，敕大司农司遣使巡行劝课，令农事有成。其探马赤等户，并行入社，一体开兴水利。乙丑，罢宋京湖安抚司，立河南等路行中书省。丙寅，摄太尉、中书右丞相安童授皇后宏吉刺氏册宝、摄太尉、同知枢密院事伯颜授皇太子真金册宝。壬申，前中书左丞相耶律铸平章军国重事，中书左丞张惠为中书右丞。车驾幸上都。罢中兴等处行中书省。

夏四月癸未朔，吕文焕入觐，授文焕侍卫亲军都指挥使、襄汉大都督。罢河南等路行中书省，以平章军国重事史天泽、湖广行中书省平章政事阿术、参知行中书省事阿里海牙行荆湖等路枢密院事，镇襄阳。淮西行中书省左丞相合丹，参知行中书省事刘整，山东都元帅塔出、董文炳行淮西等路枢密院事，守正阳。丁酉，赎江南儒士为人掠卖者。辛丑，罢四川行中书省。以巩昌二十四处便宜总师汪良臣行西川枢密院事，东川阆、蓬、广安、顺庆、夔府、利州等路统军使合剌行东川枢密院事，东川副统军王仲仁同佥行枢密院事。

五月壬子朔，诏狱囚除杀人者待报，余一概疏放，限八月内自至大都。乙亥，免代输金军户丝银及伐木夫户税。负前朝官钱不能偿者毋征。主守失陷官钱者，杖释之。阵亡军及工匠无丁产者，量加廩给。

六月丁亥，免大都、南京两路赋役。丁酉，立光州等处招讨司。戊申，耽罗平，失里伯为耽罗国招讨使，尹邦宝副之。赵良弼自日本返。

闰月己巳，罢东西两川统军司。丙子，平章政事赛典赤行省云南，统合刺章、鸭赤、赤科、金齿、茶罕章诸蛮。

秋七月戊申，高丽国遣使贺皇后、皇太子受册。国子祭酒许衡谢病归。

八月庚戌朔，前所释狱囚自至大都者二十二人，并赦之。丁丑，高丽国遣使贺圣诞节。

九月辛巳，合伯为中书平章政事。壬午，立河南宣慰司。丙戌，立东宫宫师府。己丑，敕秋猎鹿豕，先荐太庙。丙午，车驾至自上都。

冬十月乙卯，有事于太庙。庚申，有司断死罪五十人，诏审覆宥十三人，余令有司再加审覆以闻。合答带为御史大夫。也速答儿与皇子西平王合兵攻建都，获其酋卜济，建都蛮降。

十一月癸未，命布只儿修起居注。

十二月甲寅，宋夏贵寇正阳，合丹等击败之。壬戌，召阿术同吕文焕入觐。安南国遣使贡方物。

十一年春正月己卯朔，宫阙告成，帝始御正殿受皇太子、诸王、百官朝贺。高丽国遣使贺正旦，兼贡方物。庚寅，初立军官以功升散官格。忙古带等以兵戍建都，立建都宁远都护府，兼互市监。壬辰，立四川屯田经略司。丙午，彰德人赵当道等谋叛，事觉，伏诛。免于闾采玉工差役。诏中书省佥军十万人伐宋。

二月壬申，廉希宪为中书右丞，北京等处行中书省事。车驾幸上都。

三月庚寅，凤州经略使忻都、高丽军民总管洪茶邱等征

日本。辛卯，改荆湖、淮西行枢密院为行中书省，伯颜、史天泽并为左丞相，阿术为平章政事，阿里海牙为右丞，吕文焕为参知政事，行中书省于荆湖；合答为左丞相，刘整为左丞，塔出、董文炳为参知政事，行中书省于淮西。癸巳，获嘉县尹常德课最诸县，优诏赏之。遣要速木、咱兴憨失招谕八鲁酋。

夏四月辛亥，分陕西、陇右诸州置提刑按察司，治巩昌。癸丑，初建东宫。乙亥，也速带儿同撒吉思所部戍益都。

五月丙申，皇女忽都鲁揭里迷失公主下嫁高丽世子王愷。辛丑，敕新金军户银丝均配于民者，并除之。

六月癸丑，敕合答选蒙古军与汉军分戍沿江堡隘，古不来拔都、翟文彬等略地荆南，以缀宋之西兵。丙辰，免上都、隆兴两路金军。庚申，大举伐宋，诏曰：

自太祖皇帝以来，宋与使介交通，殆非一次。彼此曲直之事，亦所共知，不必历举。逮我宪宗之世，朕奉命南伐，师次鄂渚，贾似道复遣宋京诣我近臣博都欢、前河南路经略使赵璧请罢兵息民，愿奉岁币于我。朕以国之大事，必须入计，用报而还。即位之始，追忆是言，乃命翰林侍讲学士郝经等奉书往聘，盖为生灵计也。古者兵交，使在其间，惟和与战，宜俟报音，其何与于使哉？而乃执之，卒不复命。至如留此一介行李，于此何损，在彼何益？以致师出连年，边境之间，死伤相籍，系累相属，皆彼宋自祸其民也。襄阳被围五年，屡拒王师，义当不贷。朕先有成命，果能出降，许以不死，既降之后，朕不食言，悉全其命，冀宋悔过，或启令图。而乃执迷，罔有悛心，所以问罪之师，有不能已者。

今遣尔等水陆并进，布告遐迩，使咸知之。夫以天下为事，爰及干戈，自古有之。无辜之民，初无与焉。若彼界军民官吏人等，去逆效顺，与众来附，或别立奇功者，验等第官资迁擢。其所附军民，宜严敕将士毋得妄行杀掠，杀母妻孥毋致分散，仍加振给，令得存济。其或固拒不从，及迎敌者，俘戮何疑！

甲子，忙古带、八都、百家奴分率武卫军南征。丙寅，合剌合孙为中书左丞，崔斌参知政事，仍行河南道宣慰司。

秋七月乙亥朔，山北辽东道提刑按察使兀鲁失不花同廉希宪行省北京，国王头辇哥母署事。癸未，宋度宗殂，其太子显嗣位。癸巳，高丽国王王禕卒。同知上都留守司事张焕册世子愷为高丽国王。

八月甲辰朔，诸路立社稷坛。丁未，复改淮西行中书省为行枢密院。辛未，高丽国王王愷遣使贺圣诞节。是月，都元帅忽敦、右副元帅洪茶邱、左副元帅刘复亨与高丽将金方庆等征日本。太保刘秉忠卒。

九月甲戌朔，伯颜、史天泽视师于襄阳，分三道伐宋。伯颜自率大军趋鄂州。癸巳，车驾至自上都。

冬十月丁未，忽敦等克日木对马岛。己酉，有事于太庙。庚申，长河西千户必刺冲反，副无帅覃澄率所部讨之。帝曰：“澄勿独往，趣益兵三千，付火你赤助澄。”壬戌，忽敦等败日本兵于博多。甲子，引兵还。乙丑，伯颜克沙洋堡。宋新城总制黄顺来降。己巳，克新城。十一月壬午，西川行枢密院也速带儿攻嘉定府。乙酉，宋复州安抚使翟贵以城降。丁亥，诏宋安抚使咎万寿，及凡守城将校纳款来降，与避罪及

叛亡者，悉从原免。癸巳，东川元帅杨文安等败宋兵于马湖江。召征日本诸将忽敦、刘复亨等入觐。

十二月丙辰，伯颜克阳逻堡，宋制罢使夏贵败遁。己未，宋知鄂州张晏然、权知汉阳军王仪并以城降。都统程鹏飞以本军降。阿里海牙镇鄂州，伯颜、阿术将大军水陆东下。襄阳路总官贾居贞为宣抚使、商议行中书省事。

十二年春正月癸酉朔，高丽国遣使贺正旦，兼贡方物。甲戌，宋知黄州陈奕以城降。乙亥，东川副都元帅张德润拔渠州礼义城，获宋安抚使张资。丁丑，宋蕲州安抚使管景模遣使请降。丙戌，宋知江州钱真孙及知六安军曹明俱以城降。丁亥，宋知南康军叶闾以城降。戊子，知德安府来兴国以城降。己丑，伯术、唐永坚赍玺书招谕郢州。选蒙古、畏兀、汉人十四人赴行中书省，为新附州郡民官。庚寅，左卫指挥副使郑温、唐古、帖木儿率卫军同札失的、囊力带戍黄州。诏谕宋重庆府官吏军民归附。壬辰，宣抚使贾居贞金书行中书省事，戍鄂州。乙未，兵部尚书廉希贤、工部侍郎严忠范、秘书监丞柴紫芝奉国书使于宋。合刺章舍里威叛。己亥，大理总管信苴日刺杀其酋，合刺章平，置合刺章民官，选廉能者任之。追诸王海都、八刺金银符。

二月癸卯，宋知安庆府范文虎以城降。甲辰，中书右丞博鲁欢为淮南都元帅，中书右丞阿里为左副都元帅，仍命阿里、撒吉思等各部蒙古、汉军会邳州。丙午，宋都统制张林以池州降。罢西夏中兴都转运司。戊申，诏谕江、黄、鄂、岳、汉阳、安庆等处归附官吏军民，令农者就耒，商者就涂，士庶缁黄各安本业，如官吏妄有骚扰，诣行中书省陈告。平章

军国重事史天泽卒。庚戌，礼部侍郎杜世忠、兵部郎中何文著、计议官撒鲁都丁等使日本国。辛亥，同知济南府事张汉英赍玺书，招谕宋淮东制置使李庭芝。庚申，召降臣张晏然等赴阙，仍谕之曰：“朕省卿所奏云，宋之权臣不践旧约，拘留使者，实非宋主之罪，倘蒙圣慈，止罪擅命之臣，不令赵氏乏祀者。卿言良是。卿既不忘旧主，必能辅翼我家。比卿奏上，已遣伯颜按兵不进，仍遣兵部尚书廉希贤等持书往使，果能悔过来附，既往之愆，朕复何究。至于权臣贾似道，尚无罪之之心，况肯令赵氏乏祀乎？若其执迷罔悛，未然之事，朕将何言，天其鉴之！”辛酉，命阔阔出安辑湖南降附州县。阿失罕、唐永坚、綦公直等赍玺书招谕郢州。伯颜等与宋都督贾似道、淮西制置使夏贵战于鲁港，大败之。甲子，宋知太平州孟之縉、无为军刘权俱以城降。乙丑，遣使赍玺书招谕宋江陵府官吏军民。宋福州团练使、知特摩道事农士贵率州县三十有七、户十万，诣云南行中书省请降。戊辰，宋知和州王善、知安东州孙嗣武俱以城降。己巳，复遣拜术、唐永坚等宣谕郢州官民。庚午，宋都统权兵马司事徐玉荣等以建康府降。宋贾似道送国信使郝经、刘人杰等来归。诏安南国王陈光炳以旧制六事谕之，趣其来朝。车驾幸上都。

三月壬申朔，宋镇江府总管石祖忠以城降。甲戌，宋江阴军僉叛李世修以城降。乙亥，安西王忙兀刺、诸王只必帖不儿、驸马昌吉等从西平王奥鲁赤征吐蕃。丙子，国信使廉希贤等至建康。谕诸将毋妄有侵掠。宋知滁州王文虎以城降。庚辰，宋知甯国府颜绍卿以城降。甲申，宋知西海州丁顺以城降。乙酉，知东海州施居文、知平江府潜说友并以城降。江

东路得府二、州五、军二、县四十三，户八十三万一千八百五十二，口一百九十一万九千一百六。丙戌，宋常州安抚使戴之泰以城降。廉希贤、严忠范等至独松关，宋将张濡杀忠范，执希贤送临安，创甚卒。辛卯，宋将高世杰据岳州，未几复降，诛之。丙申，侧布番尊酋税昔、确州番酋庄寮男车甲等率四十三族，诣四川行枢密院降。辛丑，阿术分兵攻扬州。

夏四月乙巳，改西夏中兴道按察司为陇右河西道。丙午，宋知荆门军刘懋以城降。丁未，阿里海牙遣郎中张鼎赍玺书入江陵，宋荆湖制置使朱祀孙、副使高达等出降。知陕州赵真知、归州赵仔权、澧州毛浚、常德府新城总制鲁希文、权知府事周明等先后悉以城降。辛亥，遣使招谕宋镇抚使吕文福。甲寅，立登闻鼓。辛酉，宋郢州安抚使赵孟柱以城降。丁卯，大司农、御史中丞李罗为御史大夫。罢随路巡行劝农官，以其事隶提刑按察司。庚午，高达为行省参知政事。

五月辛未朔，中书右丞廉希宪、参知政事脱博忽鲁秃花行中书省于江陵府。丁丑，阿术立木栅于杨子桥，断淮东粮道。庚辰，谕参知政事高达曰：“昔我国家出征，所获城邑即委而去之，未尝置兵戍守，以此连年征伐不息。夫争国家者，收其土地、人民而已。得土地而无人民，其谁与居。今欲保守新附城邑，使百姓安业，蒙古人未之知也。尔熟知其事，宜加勉旃。”辛巳，宋知辰州吕文兴、知沅州文用圭、知靖州康玉、知房州李鉴等皆以城降。荆南湖北路得府三、州十一、军四、县五十七，户八十万三千四百一十五，口一百一十四万三千八百六十。丁亥，召伯颜赴阙，蒙古万户阿剌罕权行中

书省事。庚寅，宋镇抚使吕文福降。壬辰，宋都统制刘师勇复陷常州。

六月庚子朔，日有食之。宋嘉定安抚使咎万寿以城降，赐名顺。癸卯，范文虎招谕安丰、寿州等处官民。甲辰，万户阿剌罕为行中书省参知政事。敕失里伯、史枢同范文虎招谕安丰军。乙卯，宋知叙州郭汉杰以城降。辛酉，宋潼川安抚使、知江安州梅应春以城降。丙寅，宋扬州都统姜才攻杨子桥木栅，阿术大败之。戊辰，罢山东经略司。

秋七月辛未，阿术率阿塔海、董文炳等大败宋舟师于焦山，宋将张世杰、孙虎臣等皆遁，宋人自是不复能军。壬申，阿塔海败宋将刘师勇、张彦于吕城。己卯，立燕南河北道提刑按察司。癸未，敕左丞相伯颜率诸将直趣临军，右丞阿里海牙取湖南，蒙古万户宋都带，汉军万户武秀、张荣实、李恒，兵部尚书吕师夔行都元帅府，取江西。罢淮西行枢密院，右丞阿塔海、参知政事董文炳同署行中书省事。甲午，遣使招谕宋李庭芝及夏贵。伯颜为河南行中书省右丞相，阿术为左丞相。

八月辛酉，车驾至自上都。丙寅，高丽国遣使驾圣诞节。

九月甲戌，杜世忠等为日本人所杀。壬午，阿术筑湾头堡，乙酉，罢襄阳统军司。甲午，宋扬州都统姜才攻湾头堡，阿术、阿塔海等败之。丙申，玉昔帖木儿为御史大夫。括江南诸郡书版及临安秘书省《乾坤宝典》等书。

冬十月戊戌朔，有事于太庙。

十一月丁卯，阿里海牙围潭州。乙亥，伯颜等分军趣临安。丙子，宋权融、宜钦三州总管岑从毅，沿边巡检使李维

屏等诣云南行省降。丁丑，立诸路都转运司。己卯，宋江西转运使判官刘槃以隆兴府降。江西路得府州六、军四、县五十六，户一百五万一千八百二十九，口二百七万六千四百。壬午，伯颜克常州。改顺天路为保定路。

十二月己亥，宋主显遣柳岳奉书诣军中，请班师修好，辛丑，宋都统制祁安以许浦降。甲辰，伯颜次平江府，都统王世杰以城降。戊申，中书右丞相忽都带儿率内外文武官及缙黄耆庶，请上帝尊号曰宪天述德仁文义武大光孝皇帝，皇后曰贞懿顺圣昭天睿文光应皇后，帝不允。癸丑，宋主再使陆秀夫、夏士材、吕师孟诣军前请和。庚申，宋知随州朱端履以城降。丙寅，宋安抚使赵兴可以吉安州降。

十三年春正月丁卯朔，阿里海牙克潭州。湖南平。得府一、州六、军二、县四十，户五十六万一千一百一十二，口百五十三万七千七百四十。宋主显遣其宗正少卿陆秀夫等至军前求称侄纳币，或称侄孙，伯颜却之。己巳，宋安抚使刘汉杰以嘉兴府降。辛未，宋乍浦镇统制刘英以本军降。辛未，宋澈浦镇统制胡全、福建路马步军总管沈世隆来降。宋主显遣其监察御史刘岳奉表称臣，乞存境土以奉蒸尝。甲戌，宋都带克瑞州。乙亥，敕四川制置使赵定应入觐。甲申，宋主显遣其知临安府事贾余庆等赍传国玺及降表至伯颜军前。

乙酉，宋陈宜中、张世杰等以益、广二王遁。丁亥，云南行省赛典赤以改定云南诸路名来上。戊子，大名路达鲁花赤小铃部坐奸赃论死，没其家。己丑，伯颜遣囊嘉特赍传国玺赴阙。甲午，真定总管昔班为中书右丞。

二月戊子，宋知建德军方回、知婺州刘怡、知卢州梁椅、

知台州杨必大皆以城降。丁酉，诏刘颀、程德辉谕淮西制置使夏贵降。己亥，克临江军。庚子，宋主显率文武百僚诣祥曦殿望阙上表，谕各路郡县归附，遣其右丞相兼枢密使贾余庆、枢密使谢堂、端明殿学士签枢密院事家铉翁、端明殿学士同签枢密院事早刘岳等充祈请使。辛丑，伯颜入临安，得两浙路府八、州六、军一、县八十一，户二百九十八万三千六百七十二，口五百六十九万二千六百五十。丁未，诏曰：间者，行中书省右丞相伯颜遣使来奏，宋母后、幼主暨诸大臣百官，已于正月十八日赍玺绶奉表降附。朕惟自古降王必有朝觐之礼，已遣使往迎。尔等各守职业，其勿妄生疑畏。凡归附前犯罪，悉从原免。公私逋欠，不得征理。归附州城官吏，非奉朝廷谕敕不得擅自科取差发，骚扰百姓。应抗拒王师及逃亡啸聚者，并赦其罪。百官有司、诸王邸第、三学、寺、监、秘省、史馆及禁卫诸司，各宜安居。所在山林河泊出产，权免征税，许贫民任便采取货卖。秘书省图书，太常司祭器、乐器、法服、乐工、卤簿、仪卫，宗正谱牒，天文地理图册，凡典故文字，并户口版籍，尽仰收拾。前代圣贤之后，高尚儒、医、僧、道、卜筮，通晓天文历算，并山林隐逸名士，仰所在官司，具以名闻。鳏寡孤独，不能自存者，量加瞻给。戊申，立浙东西宣慰司于临安，户部尚书麦归、秘书监焦友直为宣慰使，吏部侍郎杨居宽同知宣慰司事，并兼知临安府事。乙卯，谕宋淮东制置使李庭芝、淮西制置使夏贵归附。丁巳，命焦友直括宋秘书省禁书图籍。戊午，祀先农东郊。宋淮西制置夏贵降，淮西路得府二、州六、军四、县三十四，户五十一万三千八百二十七，口一百二万一千三百四十九。庚

申，召伯颜以宋主显入觐。辛酉，车驾幸上都。甲子，董文炳、唆都发三学诸生赴京师，太学生徐应鑣与子琦、崧，女元娘同赴井死。

三月丁卯，伯颜籍宋太庙景灵宫礼乐器、册宝、郊天仪仗，秘书省、国子监、国史院、学士院、太常寺图书、祭器、乐器送京师。戊寅，免诸路儒户徭役。置部官万户府于廉州，中书右丞、河南等路宣使合剌合孙，襄阳管军万户邸浹并行府事。庚辰，囊家特以宋玉玺来上。乙酉，宋赣、吉、袁三州及南安军俱来降。中书右丞音班罢为户部尚书。

闰月丙申，置宣慰司于济甯路。丁酉，诏阿里海牙、忽都帖木儿入觐，脱拔忽鲁秃儿、崔斌并留后鄂州。辛亥，枢密院副使张易以宋降臣吴坚、夏忠等赴上都。甲子，中书省左右司郎中郝禎为参知政事。

夏四月丙子，省东川行枢密院及成都经略司。庚辰，修太庙。乙酉，召昭文馆大学士姚枢、翰林学士王磐、翰林侍讲学士徒单公履赴上都。

五月乙未朔，伯颜以宋主显至上都。丙申，召见显于大安殿，授开府仪同三司、检校大司徒，封瀛国公。以宋平，告天地、祖宗于上都之近郊。己亥，以伯颜同知枢密院事。癸卯，放沂、莒、胶、密、甯海五州防军为民。丁未，宋都统姜才攻湾头堡，千户董土元死之。戊申，昔里罕、阿塔赤败宋兵于瓜州。改博州为东昌路。乙卯，宋江西制置使黄万石以所部来降。是月，宋陈宜中、张世杰等立益王昀于福州，改元景炎。

六月己巳，置行户部于大名府。壬申，改两浙大都督府

为安抚司。设诸路宣慰司，并带相衔。甲戌，以《大明历》浸差，命太子赞善王恂与亡宋日官更造新历，枢密副使张易领之。史弼等败姜才于丁村堡。壬辰，谕陈宜中、张世杰、刘师勇等归附。户部尚书张澍为中书参知政事，行中书省事于北京。

七月乙巳，宋制置使朱焕以扬州降。丁未，谕广西路官民归附，乙卯，宋泰州守将孙良臣以城降，获李庭芝、姜才。通、滁、高邮等州相继来降。得州十六、县三十三，户五十四万二千六百二十四，口一百八万三千二百十七。淮东行省右丞阿里海牙为行省平章政事，金书枢密院事、淮东行枢密院别乞里迷失为行省右丞，参知政事董文炳为左丞，淮东左副元帅塔失、两浙大都督文虎、江东江西大都督吕师夔、淮东淮西左副都元帅陈岩并参知政事。

八月己巳，汉军都元帅阔阔带、李庭讨海都、笃哇，诏谕庭曰：“汝从平江南，多出死力。男子立功，要在西北。今有违我太祖成宪者，汝往征之。”乙亥，杀宋淮东制置使李庭芝、都统姜才。庚辰，罢襄阳统军司。车驾至自上都。奥鲁赤为荆湖行省参知政事。

九月己亥，有事于太庙。庚子，命姚枢、王磐选宋三学生有实学者留京师，余听还家。癸卯，以宋平，大赦天下。丙午，敕常德府岁贡包茅。丁未，谕西川行枢密院檄重庆官内附。乙卯，以吐番合答城为甯远府。辛酉，阿术入觐。

冬十月戊子，淮东左副都元帅阿里为平章政事，河南等路宣慰使合剌合孙为中书右丞，兵部尚书王仪、吏部尚书兼临安府安抚使杨镇、河南河北提刑按察使迷里忽辛并参知政

事，与参知政事陈岩行中书省事于淮东。

十一月，宋知处州李珣以城降。甲辰，阿剌罕败宋秀王与罕于瑞安，获之。癸丑，宋知福州王刚中以城降。庚申，敕管民及理财官由中书省调，军官由枢密院定义。高丽国王王愷遣使来告更名晷。

十二月甲子，宋益王昷奔惠州，遣使奉表请降。丁卯，置元江府，以羁縻麻阿樊诸蛮。戊辰，宋泉州提举市舶司蒲寿庚及知泉州田真子以城降。壬申，有告转运使姜毅所言悖妄，指毅妻、子为证，帝曰：“妻、子岂为证者耶！”诏勿问。庚寅，诏：“管军将校及亡宋官吏有夺民田庐产业者，俾各归其主；无主则分给附近贫民。凡亡宋繁冗科差、圣节上供、经总制钱等百有余件，翻蠲免之。”

十四年春正月，阿罕入汀关。癸巳，宋知循州刘兴以城降。壬寅，宋知汀州黄去疾、监军吴浚以城降。癸卯，复立诸道提刑按察司。戊申，宋知潮州马发以城降，丁巳，宋权知梅州钱劳之以城降。甲寅，敕宋福王赵与芮家赀在杭州者，有司辇至京师付其家。己未，置江淮等路都转运盐使司及江淮榷茶都转运使司。

二月壬戌，宋瑞州安抚使姚文龙以城降。癸亥，彗星出东北。戊辰，祀先农于东郊。甲戌，车驾幸上都。丙戌，宋知连州过元龙已降复叛，塔海将兵讨之，元龙弃城遁。丁亥，宋知南恩州陈尧道、佷判林叔虎以城降。御史大夫李罗为枢密副使兼宣徽使。

三月庚寅朔，以冬无雨雪，遣使部便民之政于耶律铸、姚枢、王磐、窦默等，对曰：“足民之道，唯节浮费。靡谷之多，

无喻醪醴曲蘖。祈赛神社，费亦不贲。宜一切止。”从之。辛卯，复立行中书省于潭州，立广南西路宣抚司于静江。壬寅，宋肇庆府新封等州来降。癸卯，知寿昌府张之纲坐附叛逆伏诛。庚戌，宋建甯府通判郭纘以城降。四川都掌蛮、罗讷蛮及凤凰、中垆、罗韦、高崖等四砦，播州蛮酋杨邦宪、思州蛮酋田景贤皆降。癸丑，广南西路庆远、郁林、昭、贺、藤、梧、融、宾、柳、象、邕、廉、容、贵、浔等府州皆降。浙西宣慰使阿塔海为平章政事，行中书省事于江淮。郡王合答为平章政事，行中书省于北京。是月，宋文天祥陷梅州。

夏四月癸酉，罢各路转运司。丙戌，禁江南用铜钱。宋张世杰陷潮州。

五月癸巳，淮西民张德兴起兵陷黄州及寿昌军。丁巳，宣慰使郑鼎与德兴战于樊口，兵败，死之。癸卯，改广南路宣抚司为宣慰司。立安抚司于钦州。西番酋阿立丁甯占等来降。丙子，融州安抚使谭昌谋反，伏诛。谕泸州阿永蛮及筠连州蛮归附。

六月辛酉，宋文天祥陷雩都、兴国等县。丙寅，宋涪州安抚使杨立降。丁亥，行省参知政事、行江东道宣慰使奥鲁赤为参知政事、行湖北宣慰使。

秋七月癸卯，诸王昔里吉执北平王那木罕、右丞相安童以叛，诏伯颜讨之。诸王忽鲁带所部来归。丙午，立行御史台于扬州，都元帅相威为御史大夫。罢八道提刑按察司。戊申，立行中书省于江西，参知政事、行江西宣慰使塔出为右丞，参知政事、行江西宣慰使麦术丁为左丞，淮东宣慰使撒里帖木儿、江东宣慰使张荣实、江西宣慰使李恒、招讨使也

的迷失、万户昔里门、荆湖路宣抚使程鹏飞、兵马招讨使蒲寿庚并参知政事、行江西省事。壬子，宋文天祥围赣州。丁巳，湖广行省参知政事、行江东道宣慰使吕文焕为行省左丞。

八月戊午朔，建太庙于大都。不花行西川枢密院事。辛未，常德府总管鲁希文谋反，伏诛。车驾猎于上都之北。己卯，昂吉儿、忻都等获张德兴。甲申，李恒败文天祥于兴国，天祥走循州。

九月丙申，广南东路广、连、韶、德庆、惠、潮、南雄、英德等州府皆降。壬子，福建路宣慰使唆都克建甯府及南剑州。

冬十月丙辰朔，日有食之。己未，有事于太庙。庚寅，塔出国广州，宋制置使张镇孙以城降。壬午，立宣慰司于黄州。甲申，湖广行省参知政事忽都帖木儿、脱搏忽鲁秃花、崔斌并为中书左丞，鄂州总官府达鲁花赤张鼎、湖北道宣慰使贾居贞并参知政事。

十一月庚子，吏部尚书别都鲁丁为中书参知政事。

十二月庚午，宋梁山防御使彭世安以城降。乙亥，都元帅杨文安克咸淳府。参议中书省事耿仁为中书参知政事。

卷十

本纪第十

世祖四

十五年春正月辛卯，阿老瓦丁率所部戍斡端城。己亥，以诸路州县管民官兼领收括阑遗，若官吏隐匿及擅易马匹、私配妇人者，没其家。禁买卖江南良家子女。丙午，万户秃满答儿、郝札刺不花等克泸州。庚戌，东川副都元帅张德润克涪州。

二月戊午，祀先农，蒙古胄子代耕藉田。癸亥，命淮南行省平章政事阿塔海、阿里选择江南廉能官吏，汰冗员与不胜任者。壬午，福建路宣慰使唆都克潮州。立太史院。淮南行省参知政事夏贵、范文虎、陈岩并为行省左丞，黄州路宣慰使唐兀带、史弼并行省参知政事。

三月乙酉，忙古带、唆都、蒲寿庚行中书省事于福州。合刺带以舟师讨广南。甲午，西川行枢密院招降重庆路。庚子，都元帅李庭自请讨张世杰，从之。壬寅，以诸路岁比不登，免今岁田租、丝银。癸卯，都元帅杨文安克绍庆府。乙巳，广南西道宣慰司招降雷、化、高三州。宋张世杰以宋主昀奔碇洲。参知政事密立忽辛、张守智并行大司农司事。

夏四月乙卯，都元帅刘国杰以兵戍北边。丙辰，金军讨云南蛮。戊午，江南行省左丞夏贵等分道检核钱谷，察郡县

被旱甚者，吏廉能者举以闻，其贫残不职者罢之。甲子，宋主昀殂于礪洲。庚午，张世杰等立其弟卫王昺。丁丑，云南临安、白衣、和泥城寨一百九，威楚、金齿、落落军民三万二千二百，秃老蛮、高州、筠连州城寨十九俱来降。壬午，立行中书省于建康府。改北京行中书省为宣慰司。

五月癸未朔，诏翰林学士和礼霍孙今后用宰执及将兵重臣，与儒臣年老者同议。乙酉，福建宣慰使史格以兵讨张世杰。己亥，江东道按察使阿八赤诬奏宣慰使吕文焕私匿兵仗，诏行台御史大夫相威按之。事白，免阿八赤官。

六月辛酉，高丽国王王晫来朝。丙寅，选军、民官廉能者各一人，分领江南防拓关隘。甲戌，汰江南冗官，其宣慰司除额设官员外余并罢去，仍削各官旧带相衔。罢茶运司及营田司，以其事隶宣慰司。罢漕运司，以其事隶行中书省。各路总管府依验户数多寡，以上中下三等设官。亡宋官吏人仕者，付吏部录用。罢江淮行中书省参知政事史弼、唐兀带，湖广行中书省参知政事张鼎，无为军达鲁花赤忙古带。己未，宋张世杰等以宋主昺徙于厓山。戊寅，全州洞徭降。己卯，张宏范为蒙古、汉军都元帅，从海道攻厓山。庚辰，处州贼张三八、章焱作乱，宣慰使谒只里讨平之。辛巳，安南国遣使贡方物。

秋七月壬午朔，宋湖南制置使张烈良、提刑刘应龙等起兵，阿里海牙讨获之。甲申，诸王爱牙赤率所部戍建都，立江南湖北道、岭南广西道、福建广东道提刑按察司。丙戌，湖广行省左丞崔斌为江淮行省左丞，参知政事张守智为湖广行省左丞。丁亥，水军万户张荣实率所部防江口。丙申，右丞

塔出、吕师夔，参知政事贾居贞行中书省事于赣州。丁酉，江西行省参知政事李恒为都元帅，以蒙古、汉军攻厓山。丙午，改开元宣抚司为宣慰司。定江南官禄职田。禁江南、浙西等处非理征科扰民。

八月壬子朔，礼部尚书柴椿等使安南国，征陈光昉入朝。壬戌，漳州安抚使沈世隆斩受张世杰伪檄者，坐擅杀，籍家赀。帝曰：“世隆何罪，其还之。”擢本路管民总管。乙丑，济南总管张宏代输民赋，贷阿里、阿塔赤等银不能偿，诏依例停征。封泉州神女为护国明著灵惠协正善庆显济天妃。己卯，初立提刑按察司于畏兀儿。辛巳，诏行省唆都、蒲寿庚等曰：“诸番居东南海岛者，皆有慕义之心，可因番舶商人，宣布朕意。诚能来朝，朕将宠礼之。其往来互市，各从所欲。”福州行省左丞董文炳，枢密院事、参知政事唆都、蒲寿庚并为左丞。

九月癸未，省东西川行枢密院，分设宣慰司。

冬十月己未，有事于太庙。庚申，车驾至自上都。丁卯，弛山场樵采之禁。

十一月丁亥，立荆湖北道宣慰司。壬辰，征宋丞相马廷鸾、章鉴赴阙，不至。丁酉，召南淮行省左丞陈岩入觐。丁未，移江南行御史台治杭州。立淮东道宣慰司于扬州。诏沿海通日本国市舶。是月，皇子西安王忙哥剌卒。

闰月庚戌朔，罗氏蛮酋阿榨、西南番酋韦昌盛并来降。甲寅，车驾幸光禄寺。甲子，都元帅张宏范克漳州。壬寅，张宏范获宋丞相文天祥于潮州五坡岭。

十二月己卯朔，大霸都掌蛮降。戊申，叙州秃老蛮杀使

臣撒里蛮，四川行省以兵讨之。封伯夷为昭仪清惠公，叔齐为崇让仁惠公。罢开成路屯田总管府。

十六年春正月己酉朔，高丽国遣使贺正旦，兼贡方物。癸丑，以琼崖、儋、万诸州俱平，诏阿里海牙入觐。甲寅，移赣州行中书省于隆兴。辛酉，宋合州安抚使王立以城降，诏诛立，籍其家，既而赦之，以为潼川路安抚使、知合州事。壬戌，立成都等路四道宣慰司。丙子，叉巴、散毛等四洞蛮降。中书左丞别乞里迷失同知枢密院事。甲申，张宏范大败宋张世杰于崖山，宋丞相陆秀夫负宋主昀蹈海死，世杰夺港遁去，遇飓风溺死。是月，高丽国王王晳来朝。

二月戊寅朔，祭先农于籍田。壬午，访求通皇极数番阳祝泌子孙，其甥傅立以泌书来上。癸未，置五卫指挥司。甲申，敕江淮、湖南、江西、福建造战船六百艘以征日本。禁诸奥鲁及汉人执弓矢，出征还，甲仗即输之官库。癸卯，遣嘉定新附军屯田脱里伯之地。甲辰，车驾幸上都。乙巳，立四川道提刑按察司。

三月戊申朔，诏：“大兵渡江以来，农民失业。今已安集，务宜敦本力田，各管民官以时劝课，如无成效者罪之。”壬子，囊嘉带括两淮造回回炮军匠六百人及各路军匠能造炮者俱至京师。甲戌，顺元、八番蛮降，以其酋龙方零等为安抚使。太常寺纂《至元州县社稷通礼》，上之。

夏四月己卯，立江西榷茶运司及诸路转运盐司。癸巳，以给事中兼起居注掌诸司闻奏事。扬州行省选南军二万人充侍卫军。

五月辛亥，诏漳、泉、汀、邵武等处暨八十四畬官民，若举众来降，官迁擢，军民安堵如故。癸酉，兀里养合带言：“赋北京、西京车牛俱至，可运军粮。”帝曰：“民之艰苦，汝等不问，但知役民。若今年尽取之，来岁禾稼何由得种。其止之。”甲申，宋张世杰所部将校百五十八人诣雷、琼等州降。命高丽国造战船以征日本。壬辰，参知政事、行河南等路宣慰使忽辛为中书左丞、行中书省。癸巳，不花行西川枢密院事，以兵讨未降城寨。云南都元帅爱鲁、纳速剌丁分定亦乞不薛及忙木、巨木秃等三百寨，军还，献驯象十二。

六月甲辰，免四川今年差税。参知政事、行中书省事别都鲁丁为河南等路宣慰使，忽辛为湖南行省左丞。占城、马八儿诸国遣使贡方物及犀、象各一。

秋七月戊申，甯国路新军百户詹福谋反，伏诛。罢西川行枢密院。丁巳，安南国遣使贡驯象。癸酉，八番、罗氏诸蛮降。

八月丁丑，车驾至自上都。庚寅，沅州路蒙古军总管乞答合以兵讨桐木笼、猺獠、伯诸蛮。

九月乙巳朔，范文虎荐可为守令者三十人。诏曰：“今后所荐，朕自择之。有不勤于官守者，勿问汉人、回回皆论死，且没其家。”女直、水达达军不出征者，隶民籍输赋。戊午，遣使谕西南蛮酋，能率所部归附者，官不失职，民不失业。乙丑，忽必来、别速台为都元帅，率所部戍斡端城。己巳，麻阳县达鲁花赤武伯不花导军官唐兀带劫掠辰溪、沅等州，并伏诛。

冬十月己卯，有事于太庙。丁酉，诏皇丘太子参预朝政。

十一月壬子，礼部尚书柴椿偕安南国使杜中赞赍玺书谕安南世子陈日烜来朝。乙卯，西安王相赵炳劾运使郭琮、郎中令郭叔云盗用官钱，命尚书秃速忽、侍御史郭佑按之。

十二月庚辰，安南国遣使贡药材。甲申，诏谕占城国王来朝。

十七年春正月癸卯朔，高丽国遣使贺正旦兼贡方物。丙午，万户纂公直率所部戍别失八里。丙辰，定迁转官员法及诸路差税课程。辛酉，廉州海贼霍公明等伏诛。丁卯，畋于近效。戊辰，释宋俘三万余人为民。立行中书省于福州。都元帅张宏范卒。

二月乙亥，中书右丞张易言高和尚有秘术，能役鬼为兵；命和礼和孙与高和尚同赴北边。丁丑，答里不罕平罗罗斯，获蛮酋谷纳。诏答里不罕还，以阿答代之。纳速刺丁以兵征缅甸。己丑，杀宋制置使张珩。辛丑，以广东民不聊生，召行省右丞塔出、左丞吕师夔廷诘之，也的迷失、贾居贞行宣司，往抚其民。

三月甲辰，车驾幸上都。己未，阿里海牙等以兵讨罗氏鬼国。辛未，陕西运使郭琮等杀西安王相赵炳，诏械琮等至京师廷鞠之，并伏诛。

夏四月癸酉，南康贼杜可用伪称万乘元年，伏诛。庚子，权停百官俸。

五月甲辰，作行宫于察罕诺尔。癸丑，药刺海以四川兵与纳速刺丁同征缅甸。移福州行省于泉州。甲寅，汀州贼廖得胜等作乱伏诛。

六月辛未朔，忽都带儿括兰遗户垦江北田。壬申，招谕

占城国。丁丑，招谕罗氏鬼国。戊戌，高丽国遣使贡方物。敕江淮等处行钞法，废宋铜钱。《授时历》成，诏曰：

自古有国牧民之君，必以钦天授时为立治之本。黄帝、尧、舜以至三代，莫不皆然。为日官者，皆世守其业，随时考验，以与天合。故历法无数更之弊。及秦灭先圣之术，每置闰于岁终，古法盖殄废矣。由两汉两下，立积年日法以为推步之准，因仍沿袭以迄于今。夫天运流行不息，而欲以一定之法拘之，未有久而不差之理。差而必改，其势有不得不然者。太史院作灵台，制仪象，日测月验，以考其度数之真。积年日法皆所不取，庶几吻合天运，而永终无弊。乃者新历告成，赐名《授时历》，自至元十八年正月一日颁行。布告遐迩，咸使闻知。

秋七月己酉，立行中书省于安西府，李德辉为行省参知政事，兼领钱谷事。徙泉州行省于隆兴。戊午，中书参知政事郝禔、耿仁并为左丞。开胶莱河。甲子，遣安南国王子陈倪还。乙丑，罢江南财赋总管府。己巳，中使咬难至江南访求高士。

八月乙卯，改蒙古侍卫总管为亲军都指挥使司。戊寅，占城、马八儿国皆遣使奉表贡方物。唆都请招谕三佛齐等八国，不从。丁亥，集贤大学士兼国子祭酒许衡致仕。戊戌，高丽国王王晷来朝。范文虎、忻都、洪茶邱为中书右丞，李庭、张拔突为参知政事，并行中书省事。

九月壬子，车驾至自上都。壬戌，也罕的斤率所部戍斡端。丁卯，罗氏酋阿察等降。癸酉，高丽国王王晷加开府仪同三司、中书左丞相、行中书省事。丁丑，命湖南行省讨亦

奚不薛。壬午，立陕西四川等处行中书省，不花为右丞，李德辉、汪惟正并为左丞。己丑，命招讨使都实穷河源。壬辰，亦奚不薛酋遣从子入朝，帝曰：“亦奚不薛不稟命，辄以官授其从子，无人臣礼。俟其酋出，乃罢兵。”丙申，招谕爪哇国。

十一月己亥朔，俱蓝、马八儿，阁婆等国俱遣使来朝。丁卯，复遣教化、孟庆元等赍书谕占城国。

十二月庚午，杀江淮行省平章政事阿里伯、右丞崔斌。辛未，高丽国王王晳率所部水军征日本。谕诸将征日本取道高丽，毋扰其民。以高丽藩臣金方庆为征日本都元帅，朴球、金周鼎为管高丽国征日本军万户，并赐虎符。癸酉，高丽国王王晳为行省中书右丞相。丁亥，复诏管民官兼管诸军奥鲁。戊子，征亦奚不薛军戍罗葡甸。壬辰，陈桂龙据漳州叛。甲午，新建太庙成，自旧庙奉迁神主于祐室，行大享礼。改畏兀儿断事官为北庭都护府。丙申，辽东路新军以妻子易马，敕以今年所输赋税赎之。安南国来贡驯象。是月，左丞相阿术卒于别失八里军中。

十八年春正月戊戌朔，颁《授时历》。高丽国遣使贺正旦兼贡方物。辛丑，召阿剌罕、范文虎、囊家带入觐。丁未，畋于近郊。敕江南州县官兼用蒙古、回回人。命忻都、洪茶邱率所部由高丽泛海至日本，范文虎率所部由庆元路泛海至日本，以张瑄、李庭留后。丙辰，车驾幸濠州。

二月辛未，车驾幸柳林。乙亥，立上都留守司。移荆湖行省于鄂州，湖南宣慰司于潭州。己丑，诏谕乌琐纳等毋侵罗氏蛮，违者许罗氏酋阿利奏闻。乙未，皇后宏吉刺氏崩。丙申，车驾至自柳林。中书右丞、行江东道宣慰使阿剌罕为中

书左丞相、行中书省事，江西道宣慰使兼招讨使也的迷失为参知政事、行中书省事。

三月戊戌，国子祭酒致仕许衡卒。丙午，车驾幸上都。辛酉，立癸闻鼓院。

夏四月辛未，命云南行省讨哈喇章。癸酉，复中外官吏俸。

五月戊申，罢畏兀儿提刑按察使司。

六月丙寅，谦州织工贫、鬻妻、子，敕官与赎还，赐粟赈之。己巳，忻都、洪茶邱等与日本兵战于鹿岛，失利。庚寅，阿剌罕有疾，以阿塔海代之。中书左丞忽都帖木儿为中书右丞、行中书省事，御史中丞、行御史台事忽刺出为中书左丞、行尚书省事。

秋七月丁酉，分置安西行中书省于河西。己亥，阿剌罕卒。辛酉，赐唆都驼蓬以辟瘴毒。占城国来贡象、犀。

八月庚午，忙古带为中书右丞、行中书省事。申严大都总管府兵马司、左右警巡院敛民之禁。庚寅，高丽国遣使贺圣诞。壬辰，范文虎等遇飓风败舟，弃其全军而返，左副都元帅阿剌帖木儿等皆溺死。

闰月丙午，车驾至自上都。丁巳，改思州宣抚司为宣慰司，兼管内安抚使。汰中书省及诸司冗员。括江南户口税课。庚申，安南国遣使贡方物。

九月癸亥朔，畋于近郊。壬辰，占城国遣使贡方物。

冬十月乙未，有事于太庙，祔贞懿昭圣顺天睿文光应皇后。己亥，立陈日烜叔父遗爱为安南国王。庚子，镇安州蛮酋岑从毅杀知州李显，召从颜入朝。丁未，置安南国宣慰司，

以孛颜帖木儿为参知政事，行安南国宣慰使，都元帅柴椿、忽哥儿副之。壬子，集百官于悯忠寺，焚《道藏》伪经，有隐匿者罪之。封失里咱牙信合八刺麻合迭瓦为占城国王，立行中书省于占城，唆都为右丞，刘深为左丞，也里迷失为参知政事。庚戌，纳陈遗爱于安南。招谕干不昔国。壬子，改大都、南阳等处屯田孛兰奚总管府为农政院。癸丑，皇太子至自北边。辛酉，邵武贼高日新降。

十一月癸亥朔，招谕探马礼蛮酋。甲子，漳州贼陈吊眼伏诛。壬午，召瓜哇国王入觐。

十二月甲午，瓮吉利岱为中书右丞相。己亥，罢日本行中书省。癸丑，免益都、淄莱等路开河夫今年租赋，仍给佣直。丙辰，福州贼林天成伏诛。

卷十一

本纪第十一

世祖五

十九年春正月壬戌朔，高丽国遣使贺正旦。丙寅，罢征东行中书省。撒里蛮执叛王昔里吉等以献，皇子北平王遣诸王札刺忽奏闻。丁卯，札刺忽入觐。立太仆院。丙子，畋于近郊。丁丑，高丽国贡紬布。

二月辛卯朔，车驾幸柳林。修太庙及司天台。甲午，诸王相吾答儿、行中书省右丞太卜、参知政事也罕的斤征缅甸。

壬寅，命军官陈亡者其子袭职，以疾卒降一等授官，著为令。乙巳，立广东道提刑按察司。戊申，车驾至自柳林。己酉，汰省部冗官。徙浙东宣慰司于温州。金都掌、阿永等部军，征答马刺。都掌酋乞免金军，以牛马运饷，允之。庚戌，以参知政事唐兀带等分屯建康、江陵、池州等路。壬子，金亦奚不薛及播思、叙三州军征缅甸，亦奚不薛酋阿峻不从命。

三月辛酉，朔乌蒙蛮叛，那海、火鲁思迷同讨之。戊寅，益都千户王著与妖僧高和尚杀阿合马、郝禎。壬午，王著、高和尚伏诛。杀枢密副使张易。戊子，领北庭都护府阿必失哈为御史大夫、行御史台事。

夏四月辛卯，敕和礼霍孙集中书省、御史台、枢密院、翰林院等官，议阿合马所管财赋。丁酉，和礼霍孙为中书右丞相。降右丞相瓮吉剌带为大都留守，仍同金枢密院事。壬寅，敕滦州造官车，勿赋于民。乙巳，汰仓库官，考核诸路平淮库。丙午，收诸王别帖木儿总军银印。庚戌，以用兵海外，供亿繁重，诏慰谕军民，应有逋欠钱粮及官吏侵盗，并权停罢。括江南隐匿逃军。壬子，定民间贷钱取息法，以三分为准。定内外官三年考满法。

五月己未朔，黜省、部官党附阿合马者七百十四人。泸州管军总管李从受贿，纵军士私还，致贼杀万户爪难等，伏诛。追治阿合马罪。戮其尸于通元门外。罢南京宣慰司。戊辰，并江西、福建行中书省为一。壬申，逮参知政事耿仁至大都，命中书鞠之。中书右丞张惠罢。甘肃行省左丞麦术丁为中书右丞，行御史台御史中丞张雄飞为参知政事。

六月甲午，诏阿合马滥设官府二百四，留三十三，余悉

罢之，戊戌，占城复叛，行省平章政事唆都以兵讨之。己亥，管军万户何子志使暹国。壬子，敕中外官立限决事。癸丑，罢大司徒及农政院。丁巳，亦奚不薛降。

秋七月戊午朔，日有食之。分立行枢密院于扬州、岳州。辛酉，追治郝禎罪。戮其尸。壬申，敕百官奏事同御史台奏闻。癸酉，赐高丽王王睿金印。丁丑，巩昌总帅汪札刺儿带罢，以别速帖木儿代之。乙酉，阁婆国献金佛塔。

八月癸巳，金罗斯等军征缅甸。辛亥，车驾驻龙虎台。甲寅，圣诞节，是日还宫。乙卯，御正殿受贺。

九月丁巳朔，敕中书省穷治阿合马党与。戊午，阿合马子阿散伏诛。庚申，罢涟、海州屯田。游显为平章政事，行省扬州。辛酉，耿仁、撒都鲁丁及阿合马子忻都俱伏诛。俱蓝国、苏木都速国及也里可温教主并遣使奉表贡方物。壬戌，敕：“官吏受贿及仓库官侵盗，御史知而不纠者，罪之。”乙丑，金亦奚不薛军。丁卯，安南国世子陈日烜遣使贡方物。己巳，罢云南宣慰司。壬申，蛮洞向世雄兄弟及散毛诸洞叛，敕四川行省招抚之。辛巳，厘正选法，定诸路岁贡儒吏额。

冬十月丁亥朔，整治钞法。辛卯，平章军国重事耶律铸为中书左丞相。壬辰，有事于太庙。罢西京宣慰司。丙申，立詹事院。甲辰，占城国降。乙巳，招谕法里郎、阿鲁、乾伯等国。罢屯田总管府。丁未，女真人六十，自请造船运粮，赴鬼国赡军，从之。庚戌，移成都宣慰司于碉门。罢广无路及顺庆府宣慰司。诏两广、福建五品以下官，从行省铨注。乙卯，阿合马子忽辛，秣速忽俱伏诛于扬州。

十一月戊午，宋衍圣公孔洙为国子祭酒兼提举浙东道学

校事。颁示阿合马罪状。甲戌，敕天下重囚，除谋反大逆，杀祖父母、父母，妻杀夫、奴杀主外，其余犯死罪者赦之，充军征日本、占城、缅甸。丙子，大盘洞酋向臭友等来朝。戊寅，马八儿国遣使贡金叶书及方物。

十二月壬辰，昭文馆大学士张文谦为枢密副使。乙未，徙瀛国公赵显于上都。杀宋丞相文天祥。癸卯，定御史台选择台臣格。征处士刘因为右赞善大夫，因以母老辞归。中书右丞扎萨克为平章政事。罢南京屯田总管府。

二十年春正月丙辰朔，高丽国遣使贺正旦。己未，立皇后宏吉刺氏。癸亥，药刺海以兵讨亦奚不薛。乙丑，高丽国遣使贡方物。阿塔海复为征东行中书省左丞相。丙寅，发五卫军征日本，以去岁河北、山东诸路旱，权停租税勿征。仍谕管民官，水旱逾时不报，及按察司随时检察，皆罪之。壬申，移巩昌按察司治甘州。行省右丞阔里帖木儿率三十五万户征日本。丁丑，杨廷璧为宣慰使，招谕俱蓝等国。壬午，畋于近郊。改广东提刑按察司为海北广东道，广西按察司为海北广西道，福建按察司为福建闽海道，巩昌按察司为河西陇北道。

二月戊子，赐俱蓝国王瓦你金符。癸巳，敕斡脱钱仍其旧。亦奚不薛降。庚子，省西川东西北三道宣慰司及潼川等路镇守万户府，新军总管府，威、灌、茂等州安抚司。辛丑，定军官选格及官吏赃罪法。癸丑，谕中书省大事奏闻，小事便宜行之，毋稽缓。

三月丁巳，罢河西行御史台。立巩昌等处行工部。罢泉州行中书省及福建市舶总管府。己未，罢安西行中书省，立

行工部。乙丑，兀奴忽鲁带鲁扬州罪囚。立云南道提刑按察司。丙寅，车驾幸上都。丁卯，新会县民林桂芳等作乱，伪号罗平国，伏诛。乙亥，阿塔海戍曲先，汉都鲁迷失戍斡端。壬午，罢福建道宣慰司，复立行中书省于漳州。中书右丞张惠为平章政事，御史中丞也先帖木儿为中书左丞，并行中书省事。

夏四月丙戌，立别失八里、和林等处宣慰司。庚寅，药刺海戍亦奚不薛。召也速答儿还成都。壬辰，都元帅张林、招讨使张瑄、总管朱清等从征日本。高丽国王王晙领征东行省，规画日本事宜。癸卯，王晙为征东行中书省左丞相。庚戌，也速带讨山都掌蛮，平之，获其酋得兰纽，辛亥，麦术丁等检核万亿库，请使蒙古人鞠其获罪者。诏曰：“蒙古人为利所汨，亦异往日矣。其择可任者使之。”

五月己未，罢五卫军征日本。庚申，定江南民官及转运司公田。丙寅，免江南租税三之二。辛未，唆都等入占城，其王孛由补刺者吾遁，降玺书招谕之。甲戌，并江淮、云南州县。耶律老哥为中书参知政事。颁行宋文思院小口斛。立海西辽东道提刑按察司。己卯，宣慰使朱国宝率阿里海牙旧部讨占城。

六月丙戌，甘州行省参知政事王椅为中书参知政事。己丑，增官吏俸。庚寅，定市舶抽分法。丙申，修大都城。辛亥，四川行省参知政事曲立吉等讨平九溪十八洞，以其酋长入朝。

秋七月丙辰，免骨嵬军赋役。丙寅，立亦奚不薛宣慰司。壬申，亦奚不薛军民千户宋添富及顺元路军民总管阿里等降，

立亦奚不薛总管府，以阿里为总管。丁丑，立铺军，捕淮西盗贼。

八月癸未，以明里察平章军国重事。甲午，安南国遣使贡方物。济州新开河成。立都漕运司。戊午，象山县海贼尤宗祖降。丙寅，古答奴国因商人阿剌畏等内附。罢占城行中书省。辛未，广东盗起。

冬十月壬辰，车驾至自上都。甲午，平章政事扎散为枢密副使。乙未，有事于太庙。庚子，建宁路总管黄华叛，伪称宋祥兴五年，卜邻吉带、史弼等合讨之。耶律铸罢。癸卯，造船于新开河，以分海运。己酉，金河西质子充军。癸丑，总管陈义自备海船三十艘征日本，授义万户，佩虎符。壬戌，复立南京宣慰司。戊寅，禁云南军官没良民为奴及黥其面。

十二月壬辰，以中书参知政事温迪罕、中书参议秃鲁花廉贫，赐钞旌之。丙午，罢都云南都元帅府。敕大官质子赴京师，著为令。北胜州洞蛮叛，云南行省阿合八失讨平之。

二十一年春正月乙卯，右丞相和礼霍孙率百官上尊号曰宪天述道仁文义武大光孝皇帝，诸王百官朝贺如朔旦仪。昭曰：

惟我祖宗创业垂统，区宇之广，众所悉知。其御下也为善，而用功者必赏，为恶而罪者必罚，此我祖宗之定制也。比者，公卿耆旧诣阙拜章，谓朕寿祉方隆，请上尊号。属兹大庆，宣布宽条。兹用播告中外，凡尔有众，自今以始，各务维新，无替朕命。

己未，罢云南都元帅府。甲子，罢扬州等处理算官。丁卯，建都蛮及金齿诸蛮俱降。庚午，立江淮、荆湖、江西、四

川行枢密院及耽罗国安抚司。甲戌，王积翁赍玺书使日本，未至，为舟人所杀。己卯，马八儿国遣使贡方物。

二月辛巳，管如德为行省参知政事，征缅甸。丁亥，翰林学士承旨撒里蛮祀先农于藉田。壬辰，邕、宾、梧、韶、衡等州盗并起，湖南宣慰使撒里蛮讨平之。丁未，阿塔海以水军征占城。戊申，徙江淮行省于杭州，浙西宣慰司于平江，省黄州宣慰司。漳州盗起，江浙行省讨平之。秦州总管刘发谋反，事觉伏诛。

三月丁巳，皇子北平王诺木罕及安童至自北边。唆都攻占城不克，引兵还。丙寅，车驾幸上都。丁卯，太庙正殿成。乙亥，高丽国王王晷遣使贺上尊号。

夏四月乙酉，置大都留守司及大都路总管府。戊申，高丽国王王晷及太公主以其世子源来朝。发思、播二州蛮军征缅甸。

五月癸丑，敕收集唆都及江淮、江西两省溃军，凡至者给粮、舟楫损者修之。戊午，敕中书省奏目及文书皆不用畏兀儿字。己未，占城国王请降，遣其孙路司理勒蛰等奉表来朝。庚午，鄂州达鲁花赤赵翥等赍玺书谕安南国。括天下私藏天文图讖《太乙雷公式》、《七曜历》、《推背图》、《苗太监历》，有私习及收匿者罪之。丁丑，以征占城兵溃，追忽都虎、乌马儿、刘君庆等敕命、虎符，以孛鲁合答儿等代之，仍听阿里海牙节制。

闰月己卯，封怯里刺王为郡王，罢西南番安抚司四总管府。丙戌，迁扬州行御史台于杭州。庚寅，赐归附蛮酋十八人冠带。理算江南造船隐弊，诏按察司毋得沮挠。癸巳，改

封皇子北平王那木罕为北安王。甲辰，安南国世子陈日烜使贡方物。

六月壬子，增官吏俸。甲寅，封皇子托欢为镇南王，镇扬州。庚申，改蒙古都元帅府为都万户府，炮手元帅府为万户府，炮手都元帅府为回回炮手军匠万户府。甲子，移阿剌带和林屯田军与憨答孙所部合屯五河。

秋七月丁丑朔，荆湖、四川合兵讨义巴、散毛洞蛮。诏军官勿带相衔。丁亥，江淮行省以占城使者大半达连扎入朝，及其地图来上。戊子，镇南王托欢以兵征占城，假道安南。安南国世子陈日烜遣使贡方物。释安南国前使黎英等还。

八月丁未，华帖、白水江、盐井三部蛮叛，云南行省讨平之。占城国王乞岁修职贡，遣使献三象。庚午，车驾至自上都。甲戌，建都女子沙智有功，授建昌路总管，佩虎符。

九月甲申，京师地震。置福建盐课市舶都转运司。并福建、江淮两行省为一，中书右丞、行省事忙兀带为江淮等处行中书省平章政事，左丞呼刺出、蒲寿庚参知政事，管如德分省泉州。

冬十月丁未，有事于太庙。戊申，药刺海率探马赤讨金齿蛮。己酉，敕管军万户为行省宣使者，毋兼管军事；仍为万户者，毋兼管民政。辛酉，征东招讨司征骨崑夷。定处断军人逃亡例，为首起意者处死。张万为征缅招讨使，佩三珠虎符。戊辰，立常平仓。甲戌，诏行中书省，凡征日本船并增价募之。

十一月甲申，封南木里、忙哥赤为郡王。己丑，海盗黎德伏诛。庚寅，占城国王遣使贺圣诞，献礼币及二象。占城

旧州酋宝嘉娄亦奉表内附。庚子，范文虎为中书左丞，商量枢密院事。辛丑，和礼霍孙、麦术丁、张雄飞、温迪罕皆罢。前右丞相安童复为右丞相，卢世荣为中书右丞，史枢为中书左丞，不鲁迷失海牙、撒的迷失并参知政事，拜降参议中书省事。壬寅，敕中书省整钞法。南巫里、别里刺、理伦、大力等国各遣使奉表贡方物。

十二月甲辰，置常平盐局。乙巳，御史中丞崔戣罢。丙寅，八番酋龙昌宁、龙诞万等入朝。置八番宣慰司，招抚西南诸番。乙酉，镇南王至安南境，陈日烜拒命，分六道攻之。

二十二年春正月戊寅，遣使虑诸路狱囚。壬午，置上都等路群牧都转运司、诸常平盐铁坑冶都转运司。戊子，封驸马唆都哥为甯昌郡王。蜀人赵和尚冒称宋广王，伏诛。移五条河屯田军于兀失蛮、扎失蛮之地。乙未，罢江南行御史台。改提刑按察司为提刑转运司。立江西行枢密院。罢福建行中书省，置宣慰司。丙申，畋于近郊。阿必赤合为中书平章政事。荆湖占城行省平叛蛮百六十六洞。辛丑，扬兀鲁带为征骨嵬招讨使。丙戌，乌马儿败陈日烜于富良江，日烜遁，镇南王入安南都城。

二月乙巳，帝驻蹕柳林。改江淮、江西元帅招讨司为上、中、下三万户府。辛亥，广东宣慰使月的迷失讨潮、惠二州盗郭逢贵等，平之。丙辰，罢开胶、莱新河。壬戌，诏大都旧城居民迁新城者，以贵高及居官者为先，定制以八亩为一分，其地过八亩及贫下不能作室者，皆不得冒据。收天下铜钱。戊辰，车驾幸上都。复立江南行御史台，徙治江州。置真定、济南、太原、甘肃、江西、江淮、湖广等处宣慰司兼

都转运使司。瓮吉刺带为中书左丞相。己巳，复立提刑按察使司。忽都鲁为中书平章政事。诏各道提刑按察司，能遵奉条画、莅事有成者，任满升职；赃污不称任者，除名。罢融州总管府。

三月丙子，张公礼、彭质等往占城测候日晷。癸未，罢甘州行中书省，立宣慰司。

夏四月癸卯，立行枢密院都镇抚司。庚戌，监察御史陈天祥劾中书右丞卢世荣，诏世荣、天祚俱赴上都。癸丑，诏追捕宋广王及陈宜中。中书省、枢密院、御史台官虑大都及诸路罪囚。壬戌，御史中丞阿剌帖木儿、郭佑，侍御史白秃帖木儿等以卢世荣等罪状奏，阿剌帖木儿等与世荣质于帝前，世荣款服下狱。癸亥，敕麦术丁与安童治中书省事。

五月甲戌，御史中丞郭佑为中书参知政事。壬午，忻都为踢里玉诏讨使。诏近地不服者讨之，毋兴兵远攻。右巴等洞蛮平。丁亥，汰六部冗官，择廉洁有干局者存之。戊子，复徙行御史台于杭州。戊戌，镇南王引大军北还，大将唆都、李恒俱战歿。庚戌，高丽国遣使贡方物。

秋七月戊寅，分甘州屯田新军屯于亦集乃路。壬午，陕西四川行省左丞汪惟正入觐。以降酋郭逢贵等至京师。庚寅，唐兀带复为荆湖占城行省左丞。

八月丙辰，车驾至自上都。

九月戊辰，并哈喇章、金齿二宣抚司为一，置临安广西道宣抚司。罢榷酤，听民自造。乙亥，听民自实两淮荒地，免税三年。敕贡物惟地所产，非所产者，毋辄上。丙子，真腊、占城二国遣使贡方物及乐工十人。丙戌，速木都刺、马答二

国遣使贡朝。癸巳，乌蒙蛮叛，也速带儿以兵讨之。

冬十月己亥，合撒儿海牙使安南国。庚子，有事于太庙。乙巳，征东招讨使朵儿台、杨兀鲁克台征骨嵬、赐杨兀鲁克台三珠虎符，为征东宣慰使都元帅。癸丑，哈塔海为征东行省左丞相，刘国杰、陈岩并为左丞，洪茶邱为右丞，同征日本。赐脱里安、答即古阿散等印，考覆中书省，其制如三品。丙辰，中书参议帖木儿为参知政事，位郭佑上，且命之曰：“自今之事，皆责于汝。”马法国遣使贡方物，戊午，江淮行省平章忙古岱为江浙行省左丞相。复置叙州宣抚司。癸亥，答即古阿散理算江南钱谷。丁卯，乌蒙宣抚司使阿蒙叛，云南行省以征罗必丹兵讨之。壬申，以讨日本，遣阿八剌督江淮军需，察忽督辽东军需。戊寅，征高丽兵万人、船六百五十艘征日本。癸巳，漕江淮米百万石，贮于高丽合浦，征东行省及高丽各贮米十万石，以备军需。乙未，秃鲁欢为参知政事。卢世荣伏诛。

十二月己亥，减天下罪囚。丁未，皇太子卒。己未，丹太庙楹。辛酉，立集贤院。甲子，罢哈喇章都元帅，命哈喇酋长子入质京师，千户、百户子留质云南。丙寅，停迁转工匠官。

是岁，占城行省参知政事亦里迷失等引军还。

二十三年春正月戊辰朔，以皇太子哀，罢朝贺。庚辰，马八儿国来献铜盾。丁亥，禁阴阳伪书《显明历》。丁酉，畋于近郊。

二月甲辰，雪雪的斤为缅中行省左丞相，阿台董阿参知政事，兀都迷失监行中书省事；阿海牙为安南行省左丞相，奥

鲁赤平章政事，乌马儿、亦里迷失、阿里、咎顺、樊辑并参知政事。乙巳，罢山北辽东道宣慰司，立东京等处行中书省，阔阔你敦为左丞相，塔出行省右丞，扬仁风、亦而撒合并参知政事。戊午，罢江南行枢密院。荆湖占城行省以兵征安南。封陈益稷为安南国王，陈秀爰为辅义公。甲子，立甘州行中书省。

三月乙亥，麦术丁复为中书右丞。立钦察卫亲军都指挥使。丙子，车驾幸上都。丁丑，徙东京行中书省于咸平府。

夏四月庚子，立燕南、河东、山东等路宣慰司。甲辰，徙江南行御史台于建康路。己未，遣要束木钩考荆湖行省钱谷。

五月己巳，以阿里海牙言，遣参知政事秃鲁欢等按治要束木赃罪。甲戌，徙江东道按察司于宣州。辛卯，安南国遣使贡方物。湖广行省左丞相阿里海涯自杀于京师。

六月乙巳，立大司农司。辛亥，亦马刺丹忒忽里使安南。丁巳，薛阁干为中书平章政事。辛酉，高丽国遣使贡方物。

秋七月丙寅朔，必速蛮等使爪哇国。己巳，罢辽阳行中书省，复置三道宣慰司。壬申，拜答儿以兵讨阿蒙，斩之。壬午，铁木儿为中书左丞。癸巳，铨定中书省、行省、枢密院、御史台、行台、六部官，诏谕中外。

八月丙申，敕枢密院选侍卫军千人扈从北征。罢淮东、蕲黄宣慰司。辛酉，永康县民陈巽四等谋反，伏诛。

九月乙丑朔，马八儿、须门那、僧急里、南巫力、马兰丹、那旺、丁呵儿、来来、急阑亦带、苏木都刺十国，各遣子弟上表贡方物。壬辰，高丽国来献日本俘。

冬十月丁酉，有事于太庙。己亥，车驾至自上都。己酉，

塔塔儿、杨兀鲁带以兵征骨嵬。辛亥，河决开封路祥符、陈留等州县十五处。壬戌，马八儿国来献鞍勒、毡甲。

十一月乙丑，张瑄、来阿八赤为海道运粮万户，佩虎符。丁丑，塔察儿、忽难使于诸王阿儿浑。

十二月癸卯，籍阿里海牙贗产。

是岁，大都饥。

二十四年春正月癸酉，俱蓝国遣使来朝。丙戌，程鹏飞为中书右丞，阿里为中书左丞。丁亥，不颜里海牙为中书参知政事。复改江浙行省为江淮行省。辛卯，发江淮、江西、湖广三行省蒙古及汉券军、云南行省军及海外黎兵，分道讨安南。立征交趾行尚书省。

二月甲午，畋于近郊。乙未，麦术丁为中书平章政事。庚子，范文虎为中书右丞、商议枢密院事。壬子，封驸马昌吉为甯濮郡王。丙辰，马八儿国来贡方物。

闰月乙丑，畋于近效。立尚书省，桑哥、铁木儿为尚书省平章政事，阿鲁浑撒里为尚书右丞。叶李为左丞，马绍为参知政事。甲申，镇南王脱欢徙镇南京。范文虎改尚书右丞、商议枢密院事。改行中书省为行尚书省。吏部尚书忻都为尚书省参知政事。庚寅，车驾幸上都。

三月甲午，造至元宝钞。乙卯，车驾驻凉陞。丙辰，马八儿国来献异兽。河决汴梁。

夏四月，诸王乃颜反。

五月庚子，高丽国王王晫授行尚书省平章政事。是月，车驾亲征乃颜。

六月，车驾次撒儿都鲁之地。前军获乃颜，诛之。乙亥，

车驾驻于大利斡鲁脱之地。尽得乃颜輜重。

秋七月癸巳。皇子爱牙赤等败叛王失都儿于咸平。

八月乙丑，车驾还京师。李海刺孙为征东行省参知政事。脱满答儿为都元帅，分道讨缅国。己巳，谪从逆诸王从军自效。癸酉，朵儿朵海获叛王阿赤思，赦之。甲申，女国来贡方物。

九月辛卯，安南国遣使贡方物。壬子，高丽国王王晫来朝。

冬十月朔，日有食之。甲子，有事于太庙。丙子，杀中书参知政事郭佑、杨居宽。乙酉，罗葡甸蛮酋火者阿禾等来降。丙戌，立辽阳行尚书省，薛阁干、阁里帖木儿并为行省平章政事，洪茶邱为右丞，亦儿撒合为左丞，杨仁风、阿老瓦丁并为参知政事。

十一月壬辰，云南行省右丞爱鲁败安南兵于木兀门。桑哥为尚书省右丞相，帖木儿为左丞相，阿里浑撒里为平章政事，叶李为右丞，马绍为左丞。丙午，镇南王脱欢败安南兵于界河。己酉，封驸马帖木儿为济宁郡王。

十二月癸亥，金竹寨蛮酋搔驴等来降。乙酉，镇南王脱欢以诸军入安南，陈日烜奔敢喃堡。

卷十二

本纪第十二

世祖六

二十五年春正月辛卯，忙古带为江淮行尚书省右丞相。戊戌，大赦。壬寅，高丽国遣使贡方物。癸卯，海都寇北边，诸王术伯、驸马昌吉等以兵讨之。丙午，畋于近郊。癸丑，立江南行大司农司及淮东、西两道劝农营田司。

二月丁巳，改济州漕运司为都漕运司，南北漕运。戊午，诸王哈丹秃鲁干叛，李庭等以兵讨之。庚申，大司徒撒里蛮等进读祖宗《实录》，帝曰：“太宗事则然，睿宗少有可易者，定宗固日不暇给。宪宗事汝不能忆之，犹当询知者。”壬戌，罢辽东海西道提刑按察司。改南京路为汴梁路，北京路为武平路，西京路为大同路，东京路为辽阳路，中兴府为宁夏府路。己卯，高丽国王王晙为征东行尚书省左丞相。壬午，皇孙云南王也先铁木儿出镇大理。

三月丁亥，松江民曹梦炎岁以米万石输官，遥授梦炎浙东道宣慰副使。改曲靖路总管府为宣抚司。庚寅，车驾幸上都。李庭为征东行省左丞、商议枢密院事。辛卯，镇南王自安南班师。丁酉，车驾驻野狐岭。阿朮、塔不带总京师禁卫诸军。己亥，陈日烜遣使进金人代罪。

夏四月乙丑，循州贼钟明亮作乱，江淮行省左丞相忙古

带、行枢密院副使也的迷失以兵讨之。庚辰，安南国遣使贡方物。甲申，皇孙铁木儿率诸军讨叛王火鲁火孙、哈丹秃鲁干。

五月戊子，诸王察合子阔阔带叛应哈丹，床兀儿讨获之。己丑，河决襄邑。丁酉，改云南乌撒宣抚司为宣慰司，兼管军万户府。戊戌，汪家奴、火鲁忽带、察罕等复叛。壬寅，浑天仪成。癸丑，移四川行中书省于重庆。高丽国遣使贡方物。河决开封。

六月辛酉，定御史任满，验所言事大小、多寡为升降。乙丑，诏蒙古人总汉军，习水战。戊辰，管军元帅阿里带败海都兵于业里干脑儿。癸未，处州贼柳世英作乱，宣慰副使史耀讨平之。

秋七月戊戌，车驾幸许泥百牙之地。乙巳，保定路唐县野蚕成茧，可为帛。

八月丙辰，安童率本部怯薛蒙古军巡北边。庚辰，车驾次孛罗孩脑儿。

九月壬辰，车驾至大都。乙未，笃哇入寇。庚子，鬼国及建都蛮贡方物。癸卯，置征理司，专治合追钱谷，秃烈羊阿、吴诚并为征理使。江南行台御史中丞刘宣自杀。

冬十月己未，有事于太庙。庚申，参知政事忻都等十二人理算江淮、江西、福建、四川、甘肃、陕西六行省钱谷。丙寅，大同民李伯祥、苏永福谋反，伏诛。庚午，海都入寇。丙子，瀛国公赵显学佛法于土蕃。己卯，也不干入寇，不都马失等败之。免儒户杂徭。高丽国遣使贡方物。是日，用寿张县尹韩仲晖议，自安山开河至临清以济运。

十一月丁亥，金齿蛮来贡方物。山东东西道提刑按察使何荣祖为中书参知政事。柳州贼黄德清、潮州贼蔡猛等作乱，俱伏诛。庚寅，床哥里合寇建州。癸巳，也速带儿、牙林海刺孙执叛王捏坤、忽都答儿来降。己亥，礼部侍郎李思衍等使安南国，谕陈日烜入朝。辛丑，马八儿国遣使来明。叛王帖列涅入寇。

十二月丁巳，海都入寇，诸王阔阔出等败之。丙子，也速不花以昔烈门叛，诸王八八、拜答罕，驸马昌吉等以兵讨之。也速不花降，昔烈门遁至朵郎不带之地，获之。庚辰，高丽国遣使贡方物。

二十六年春正月丙戌，京师地震。辛卯，哈丹入寇。戊戌，蒙古都万户按的忽都合、荆湖行省左丞唐兀带与月的迷失等讨江西群盗。立武卫亲军都指挥司。癸卯，罢胶莱海道运粮万户府。高丽国遣使贡方物。钟明亮寇赣州。畚民卯大老等作乱，伏诛。戊申，湖广行省参知政事张守智、翰林直士李天英征粮运于高丽。移广州按察司于韶州。

二月辛亥朔，籍江南户口。癸亥，移江淮行尚书省于杭州。改浙西道宣慰司为淮东道，治扬州。丙寅，福建行省拜降、江西行院月的迷失、江淮行省忙古带合兵讨江西群盗。丁卯，车驾幸上都。伯颜知枢密院事，总北边诸军。伯答儿中书平章政事。哈丹入寇开元路，治中兀颜牙兀格败之。己巳，立左右翼屯田万户府。甲戌，巩昌总帅汪惟和率所部北征，敕入都受命。

三月庚辰朔，日有食之。台州贼杨镇龙僭称大兴国，宣慰使史弼讨斩之。癸巳，金齿蛮酋赛完降。

夏四月乙酉朔，福建行省参知政事魏天佑执宋江西提刑谢枋得送京师，枋得不食卒。戊辰，安南国遣使贡方物。甲戌，御史大夫玉鲁吕为太傅，加开府仪同三司。召江淮行省知政事忻都至京师，户部尚书王巨济理算江淮钱谷，左丞相忙古带总之。丁丑，徙乃颜降众于江南充水军。

五月丙申，钟明亮降。复徙行御史台于杭州，浙西按察司于平江。参知政事忻都为尚书左丞，中书参知政事何荣祖为尚书参知政事，参议尚书省事张天佑为中书参知政事。己亥，置回回国子学。辛丑，青山徭降。

六月辛亥，安山渠成，赐名会通河。庚申诸王乃蛮台败哈丹于托吾儿河。丙寅，要忽儿入寇。辛巳，尚书省断事官秃烈羊阿理算云南钱谷。复立云南提刑按察司。海都寇和林，宣慰使怯伯、同知乃蛮台、副使八黑铁儿并叛降海都。宣慰使刘哈剌拔都脱归，赐名察斡脱赤。甲戌，云南中下烂土洞蛮酋忽带等降。乙亥，乃颜余常金刚奴寇折连怯儿。

秋七月戊寅朔，海都入寇，帝下诏亲征。辛卯，敕和林屯田乞儿吉思等军讨海都。戊戌，信州贼鲍惠日等作乱，伏诛。李庭等率所部北征。壬寅，赋百官家，制军人衣袄。

九月丁亥，罢斡端宣慰使元帅府。

冬十月甲子，有事于太庙。

闰月戊寅，车驾至自上都。庚辰，月的迷失获贼首邱应祥、董贤举送京师。乙酉，命自今所授宣敕并付尚书省。丙戌，四川生番心楞等来降。钟明亮复叛，寇梅州，月的迷失与福建、江西行省合兵讨之。丁亥，安南国遣使贡方物。己丑，籍江南、四川户口。婺州贼叶万文作乱，江淮行省平章

政事不怜吉歹讨平之。庚子，取泗滨石为磬，以补宫悬之乐。辛丑，罗斛国、女国俱来贡方物。乙巳，缅甸来贡方物。壬子，漳州贼陈机容、邱大老、张顺等降。癸丑，建宁贼黄福等谋反，伏诛。

十二月丁丑，诸王小薛与哈丹秃鲁干通谋，伏诛。丁亥，封皇子阔阔出为宁远王。甲午，管军万户汪惟能为征西都元帅，屯漠北。

是岁，马八儿国来献花驴。

二十七年春正月戊申，改大都路总管府为都总管府。庚戌，河东山西宣慰使阿里火者为尚书右丞，宣慰使如故。癸丑，安南国遣使贡方物。乙卯，制祀天幄殿。高丽国遣使贡方物。己未，掌吉寇甘木里，诸王术伯、拜答罕、亦怜真等败之。乙丑，伸思、八儿等谋作乱，事觉伏诛。丙寅，敕高丽国发耽罗戍兵，讨哈丹。辛未，高丽国王王晙来朝。

二月乙亥朔，立全罗道万户府。癸未，泉州地震，己丑，钟明亮降。癸巳，江西贼华大老等作乱，伏诛。

三月己未，立云南蒙怜、蒙莱二路军民总管府。放福建猎户、沙鱼皮户为民。庚申，罢行大司农司及各道劝农营田司。复移四川行中书省于成都。诏风宪之先归御史台，如旧制。癸亥，建昌县贼邱大老等作乱，伏诛。辛未，太平县贼叶大五等作乱，伏诛。

夏四月癸酉朔，车驾幸上都。癸未，罢海道运粮万户府，置临清漕河运粮上万户府。庚子，哈丹寇海阳。

五月乙巳，哈丹寇开元。戊申，钟明亮叛，江西行省左丞管如德、行枢密副使也的迷失合兵讨之。罢江西行枢密院。

戊午，移江西行中书省于吉州。癸亥，绩溪县贼胡发等作乱，伏诛。己巳，立云南行御史台。庚午，婺州贼吕重二、泉州贼陈七师作乱，并伏诛。

六月壬申朔，河决太康。甲戌，桑州蛮酋黄蓬等来降。庚辰，杭州贼唐珍等作乱，伏诛。丁酉，大司徒撒里蛮等进《定宗实录》。

秋七月癸丑，罢缅中行尚书省。江淮行省平章政事沙不丁以仓库吏欺盗，请依宋法黥面、断腕，帝曰：“此回回法也。”不允。高丽国遣使贺圣诞。戊午，建平贼王静照作乱，伏诛。壬午，车驾驻老鼠山西。乙丑，芜湖贼徐汝安等作乱，伏诛。丙寅，云南阁力白衣甸等蛮酋来降。

八月辛未朔，日有食之。丁亥，复移四川南道宣慰司于重庆。癸巳，武平路地大震，压死官民七千二百二十人。己亥，中书平章政事帖木儿等以兵赴武平路。

九月乙巳，辽东行省平章政事阁里帖木儿帐哈丹于瓦法。戊申，武平地复震。丙辰，大赦。

冬十月壬申，封皇孙甘刺麻为梁王，出镇云南。癸酉，有事于太庙。己卯，佉甘肃民兵。乙酉，梁洞吴汤暖等二十四洞蛮来降。己丑，新作太庙登歌、宫悬乐。罢成都路岁贡鸛鹑。

十一月戊申，立扬州、建康、镇江七万户府，杭州四万户府。壬戌，大司徒撒里蛮等进《太宗实录》。癸亥，河决祥符义唐湾。甲子，移河北河南道提刑按察司于许州。

十二月丙戌，兴化县贼朱三十五作乱，伏诛。乙未，诸王乃蛮台、辽阳行省平章政事薛阁干、右丞洪察忽分屯双城

及婆娑府诸城，以御哈丹。己亥，青田贼刘甲乙等寇温州。

二十八年春正月癸丑，高丽国遣使贡方物。甲寅，有虎入于南城。辛酉，复行海运，置都粮运万户府，以督岁运。壬戌，尚书右丞相桑哥有罪免。

二月癸酉，罢福建行中书省，立宣慰司。丙子，罢征理司。丁丑，太子右詹事完泽为尚书右丞相，翰林学士承旨不忽木为平章政事。己卯，立金齿等处宣慰司都元帅府、曲靖等处宣慰司管军万户府。壬午，以桑哥答监察御史，命御史大夫月儿鲁与桑哥廷辩。癸未，车驾幸上都，驻大口。召御史台及中书、尚书两省官议桑哥罪。乙酉，立江淮、湖广、江西、四川等处行枢密院。丙戌，改提刑按察司为肃政廉访司。集贤大学士何荣祖为尚书右丞，集贤学士驾胜为尚书参知政事。皇子镇南王脱欢出镇扬州。丁亥，逮湖广行省平章政事要束木，籍其家。辛卯，封诸王帖木儿不花为肃远王。癸巳，籍桑哥家。

三月乙卯，乃颜余党牙儿马赤等作乱，塔海讨平之。壬戌，中书右丞崔彧罢为御史中丞。南丹州蛮酋莫国麟入觐，授安抚使，赐三珠虎符。

夏四月乙未，徙湖广行枢密院于鄂州。

五月丁酉朔，薛彧干等及高丽兵与哈丹战，大败之。戊戌，脱脱、塔刺海等至杭州，鞠僧官杨琏真伽赃罪。参知政事廉希恕为湖广行省右丞，与海北海南宣慰使都元帅陈仲达合讨琼州黎蛮。立左右两江宣慰司都元帅府。移江淮行枢密院于建康。甲辰，要束木伏诛。辛亥，征前太子赞善刘因为集贤学士，不至。癸丑，罢尚书省，尚书右丞相完泽为中书

右丞相，平章政事麦术丁、不忽木并中书平章政事，尚书右丞何荣祖为中书右丞，左丞马绍为中书左丞，参知政事贺胜、高翥并参知中书政事。征东行尚书省左丞相、驸马高丽国王王晙为行中书省左丞相。丁巳，颁《至元新格》。己未，门答占为御史大夫，行御史台事。

六月乙酉，彬州、桂阳、宝庆、武冈盗起，江淮行枢密院以兵讨之。

七月丙申朔，高丽国遣使驾圣诞。己亥，尚州蛮降。庚子，移江西行枢密院于赣州。戊申，扬州学正李淦劾尚书右丞叶李妄举桑哥，请斩李以谢天下，驿召金淦至京师。丁巳，桑哥伏诛。

八月乙丑朔，平阳地震。丙寅，马八儿国来贡方物。己卯，谕思州溪洞官杨都要招抚叛蛮。戊子，咀喃番遣使进金书宝塔及黑狮子。

九月辛丑，平章政事麦术丁商议中书省事，咱喜鲁丁为中书平章政事。丙午，立行宣政院于杭州。辛亥，安南国世子陈日烜遣使贡方物，且谢不朝之罪。壬子，宣抚使扬祥等赍玺书谕流求国。乙卯，复置四川行枢密院，治成都。庚申，礼部尚书铁里，礼部侍郎阿老瓦丁、不剌同使俱蓝，礼部侍郎别帖木儿、亦列失金同使马八儿，礼部侍郎脱西使于马都。

冬十月己巳，修真定路玉华宫孝思殿。癸酉，有事于太庙。辛巳，塔刺海、张忽辛等坐理算钱谷受赃，并伏诛。召高丽王王晙及忽都鲁揭里迷失公主入朝。癸未，罗斛国来进金字表及方物。罢行枢密院。己丑，召诸路转运司至京师议税法。癸巳，礼部尚书张立道使安南。免卫辉路种仙茅户徭

役。

十一月壬寅，左吉使新合刺的音。丁亥，耽罗国来贡方物。乙卯，新添葛蛮酋来贡方物。增中外官吏俸。戊午，金齿蛮酋阿腮入觐。

十二月己巳，立新添葛蛮安抚司。辛未，兵部尚书帖灭、兵部侍郎明思昔答思使于罗孛卜儿。壬申，立河南江北行中书省。甲戌，罗钩考钱谷。庚辰，改江淮行中书省为江浙行中书省。癸未，别都儿丁为中书左丞。丙戌，八番洞蛮来贡方物。戊子，敕罪囚非杀人抵死者，悉释之。

二十九年春正月甲午朔，日有食之。免朝驾。己亥，太史令郭守敬兼领都水监事。丙午，敕用蒙古语谕河南官吏，用汉语谕江浙官吏，著为令。罢河南道宣慰司。谕平伐、木瓮眼等蛮酋归附。癸丑，立陈蒙、烂土军民安抚司。

二月甲子朔，金竹蛮来贡方物，减所部贡马，赐衣袄遣还。丁卯，畋于近郊。己巳，敕罪人勿鞭背。庚午，谕百眼、左阿、吉谷、各当、各迪等蛮酋归附。壬申，遣使分行诸路，释死罪以下囚。乙亥，复立福建行中书省，亦黑迷失、史弼、高兴并为福建行省平章政事，征爪哇。戊寅，立征行左右军都元帅府。加高丽王睿太保。赐号推忠宣力定远功臣。诏诸王叛附合丹者纳答儿从镇南王，聂怯来从合刺合孙，阿秃从云南王，朵列秃从阿里，八里带从月的迷失自效。丁亥，乞台不花等使缅甸。

三月甲午，脱忽思等至合敦奴孙之地，与驸马阔里吉思议屯田。己亥，以讨女直纳里哥，立征东招讨司。丁未，桑哥党纳速刺丁灭里、忻都、王巨济并伏诛。定赃罪十三等，枉

法者五、不枉者七、罪入死者以闻。己酉，同知宣徽院事帖哥、通政院使刺真并为中书平章政事，兼领旧职。阿里为中书右丞，梁诣都刺为参知政事，麦术丁、何荣祖并参议中书省事。罢八番、罗甸宣慰司，改顺元等处宣慰司为八番、顺元等宣慰司，兼都元帅府。遥授安南国王陈益稷湖广行省平章政事，居鄂州。庚戌，车驾幸上都。赐蛮酋五十六人绫绢及鞍辔弓矢。

夏四月辛卯，立云南诸路庙学。

五月丁未，雪杨居宽、郭佑冤，给还家赀。

六月己巳，察昔折乙烈番酋率其部众来降。

闰月壬寅，罢福建岁造象齿鞶带。回回人献大珠，却之。辛亥，上思州蛮酋黄胜许作乱，行枢密副使刘国杰以兵讨之。高丽饥，来请粟，赐米十万石以赈之。戊寅，岑从毅降。乙卯，张立道以安南使者入觐，奉陈日烜表贡方物。

秋七月庚申朔，高丽国王遣其世子源来贺圣诞。辛酉，移河北河南道廉访司于汴梁。壬申，建社稷坛。戊寅，黎兵百户邓志愿谋反，伏诛。

八月壬寅，括唐兀秃鲁花所部阔彖赤及河西逃户。甲辰，车驾幸上都。丙午，开新河，自通州至大都，以郭守敬董其役。诏丞相以下皆操畚鍤，听守敬指撝。壬子，都元帅塔刺赤、行枢密副使程鹏飞以兵讨黄胜许，胜许遁入安南。戊午，移燕南河北廉访司于真定。不敦、忙兀鲁迷失以兵征八百媳妇蛮。

九月辛酉，吏部尚书梁曾、礼部郎中陈孚使安南，谕陈日烜入朝。丁丑，罢云南行御史台。丁亥，立乌斯藏纳里速

古儿孙三路宣慰使司。

冬十月戊子朔，日本人至四明、求互市。丙申，四川行省以蛮酋向思聪等入觐。甲辰，信合纳帖音国遣使来朝。广东道宣使进暹国所上金字表。乙卯，诸王明里帖木儿叛附海都。

十一月丙子，思州蛮酋杨秀朝等来贡方物。

十二月庚寅，改封皇孙梁王甘刺麻为晋王，镇北边。己酉，金齿蛮酋忽鲁马使其子阿鲁来贡方物。

三十年春正月壬戌，谕漆头、金齿蛮归附。乙丑，省内外官司二百五十五，汰冗官六百六十九员。庚午，验洞蛮酋杨总国等来朝。乙亥，谥皇太子真金曰明孝太子。丙子，西番一甸酉来朝。是月，前右丞相安童卒。

二月己丑，高丽王王晳奏易名曰昞。丙申，江淮行枢密院不怜吉歹进鹰，却之。敕军官勿从禽扰民。丁酉，回鹘人献答纳珠，直钞数万锭，帝曰：“珠何用，宜留吾钞以周贫者。”却之。丁未，车驾幸上都。辛亥，敕巩昌便宜总帅汪惟和以兵讨土番，行枢密院明安答儿以兵讨西番。复立云南行御史台。

三月庚申，同知枢密院事札散知枢密院事。己巳，复立行大司农司。

夏四月己亥，移江南行大司农司于扬州。甲寅，授光州，邦厓、金竹府、大龙番、师壁散毛洞诸酋军民长官。赐以玺书。

五月壬戌，定云洞蛮酋来降。以江南民怨杨璘真珈，罢其子江浙行省左丞暗普。

六月丙戌，选河西质子军从皇孙阿南达讨西番。乙巳，授皇孙帖木儿皇太子宝，抚军北边。

秋七月，免福建贡沙鱼皮及泉州织作纁丝。壬申，月失察儿知枢密院事。丁丑，新河成，赐名通惠河。庚寅，梁曾、陈孚以安南使者陶子奇、梁文藻入觐。

九月癸丑朔，车驾至自上都。

冬十月癸未朔，祔明孝太子于太庙。安置陶子奇等江陵，赐以冬衣。己丑，兵部侍郎秃鲁秃花等使阇蓝、可儿纳答、信合纳帖音三国。庚寅，有事于太庙。慧星见。甲辰，大赦天下。

十一月丁巳，立海北海南道肃政廉访司。己卯，河南行省平章政事伯颜为中书平章政事，位帖哥、刺真、不忽木上。

十二月壬辰，中书左丞马绍以病免，詹事丞张九思为中书左丞。庚子，亦里迷失、史弼坐纵爪哇酋，师还，各杖七十。没家资三之一。辛丑，高丽国王王暉及鲁国公主来朝。

三十一年春正月壬子朔，帝不豫，免朝贺。癸亥，知枢密院事伯颜至自北边。庚午，帝大渐。癸酉，崩于紫檀殿。在位三十五年，年八十。乙亥，葬起辇谷。

夏五月戊午，上尊谥曰圣德神功文武皇帝，庙号世祖，国语曰薛禅皇帝。

史臣曰：“唐太宗承隋季之乱，魏徵劝以行王道、敦教化。封德彝驳之曰：‘书生不知时务，听其虚论，必误国家。’太宗黜德彝而用徵，卒致贞观之治。蒙古之兴，无异于匈奴、突厥。至世祖独崇儒向学，召姚枢、许衡、窦默等敷陈仁义道

德之说，岂非所谓书生之虚论者哉？然践阼之后，混壹南北，纪纲法度灿然明备，致治之隆，庶几贞观。由此言之，时无今古，治无夷夏，未有舍先王之道，而能保世长民者也。至于日本之役，弃师十万犹图再举；阿合马已败，复用桑哥；以世祖之仁明，而吝于改过。如此，不能不为之叹息焉。”

卷十三

本纪第十三

成宗上

成宗钦明广孝皇帝，讳铁木耳，是孝太子真金第三子也。母为太子元妃宏吉刺氏。至元二年九月庚子生。二十五年，诸王哈丹等叛，世祖遣帝率诸将讨平之。命帝抚军北边。三十年六月乙巳，受皇太子宝。

三十一年春正月癸酉，世祖崩，诸王大臣遣使赴于北边。

夏四月壬午，帝至上都。先是，御史中丞崔彧得传国玉玺上之。元妃遣中书右丞张九思赍至上都授于帝。晋王甘剌麻率诸王劝进。甲午，即皇帝位于上都之大安阁。知枢密院事伯颜宣扬顾命诏曰：

朕惟太祖圣武皇帝受天明命，肇造区夏，圣圣相承，光昭兹绪。迨我先皇帝体元居正以来，然后典章文物大备。临御三十五年，薄海内外，罔不臣属。宏规远略，厚泽深仁，有以衍皇元万世无疆之祚。

我昭考早正储位，德盛功隆。天不假年，四海缺望。顾唯眇质，仰荷先皇帝殊眷，亲授皇太子宝，副以抚军之任。今春宫车远驭，奄弃臣民，乃有宗藩昆弟之贤，戚畹官僚之旧，谓祖训不可以违，神器不可以旷，合词推戴，诚切意坚。朕勉徇所请，于四月十四日即皇帝位。

可大赦天下。除杀祖父母、父母，妻妾杀夫，奴杀主，不赦外，其余一切罪犯，咸赦除之。议行贡举法，无学田处量拨闲田以贍生徒。劝课农桑，停罢一切不急之役。军官奥鲁官抚养军人，不得妄行科配，阵亡及病死者依例优恤。江淮以南夏税特史一年，已纳者准充来年数目。各处酒税等课，定额三十分取一，若额外办出增余，额自作额，增自作增。禁诸人扑买。名山大川、圣帝明王、贤臣烈士载于祀典者，除常礼外，择日遣官致祭。其不尽事件，仰中书省续议奏闻。

是日，追尊皇考明孝太子曰皇帝，尊太子元妃曰皇太后。庚子，忽笃海、明哥颁即位诏于高丽，李衍、萧泰登颁即位诏呈安南。丁未，湖广盗起，刘国杰等以兵讨之。己酉，金齿蛮西阿鲁为孟定路总管，赐虎符。

五月戊午，上大行皇帝尊谥曰圣德神功文武后皇帝，庙号世祖，皇后尊谥曰睿顺圣皇后，皇考尊谥曰文惠明孝皇帝，庙号裕宗。庚申，云南蛮酋适习、四川散毛洞蛮酋覃顺等来献方物。壬申，议增官吏俸。乙亥，札珊知枢密院事。戊寅，封皇姑高丽王妃为安平公主。加御史大夫月鲁吕太师，知枢密院事伯颜太傅，月赤察儿太保。赐月鲁吕上方玉带宝服，还镇北边。

六月庚辰朔，日有食之。壬辰，帖木儿复为中书平章政

事。乙未，以上世祖、裕宗尊谥，诏天下，免本年包银、俸钞及中原地税、江淮以南夏税之半。辛丑，赐宋使签书枢密院事家铉翁号处士，放还田里。癸卯，封驸马阔里吉思为高唐王。甲辰，修《世祖实录》。

秋七月壬子，诏御史大夫月鲁吕振台纲。壬戌，诏曰：

孔子之道，垂宪万世。有国家者，所当崇奉。诸路应设庙学、书院，禁官民褻渎。学田勿得侵夺。作养后进，严加训诲。若文行可观者，有司保举，肃政廉访司体覆，以备擢用。

癸亥，省肇州宣慰司入辽东道。癸酉，陕西行省平章政事不忽木为中书平章政事。甲戌，诏谕暹国王敢木丁来朝。

八月戊子，初祀社稷，用堂上乐。己丑，大都留守段贞、平章政事范文虎监浚通惠河。

九月壬子，驻蹕三部落，受诸王百官贺圣诞。辛未，秃古帖木耳使阁蓝国。

冬十月戊寅，车驾至自上都。乙未，金齿孟爱甸蛮酋遣其子来朝，立孟爱甸军民总管府。壬寅，缅甸来贡驯象。乙巳，遣南巫里、速木答刺等国使者还，赐三珠虎符及金币有差。

十一月丁未朔，朝皇太后于隆福宫。上玉册、玉宝。壬子，罢湖广、江西行枢密院。丁巳，伯颜察儿参议中书省书，其兄平章政事伯颜奏曰：“兄弟宜相嫌避。”辞职。帝曰：“兄平章于上，弟参议于下，何所嫌耶？”不允。甲子，湖南道宣慰使何玮为中书参知政事。癸酉诏改明年为元贞元年。

十二月庚子，孛罗曷答儿将禁卫兵戍和林。从帝师请，释

京师死囚三十人、杖以下百人。曲靖、澄江等路蛮酋来献方物。太傅、知枢密院事伯颜卒。

元贞元年春正月戊申，诸王阿失罕来朝。癸丑，太仆卿只而合朗为御史大夫。癸亥，云南行省左丞杨炎龙为中书左丞。庚午，江浙行省平章政事阿老瓦丁为中书参知政事。壬申，立北庭都元帅府，中书平章政事合伯为都元帅，江浙行省右丞撒里蛮副之，皆佩虎符。立曲先塔林都元帅府，衅都察为都元帅，佩虎符。甲戌，有飞书告朱清、张瑄谋反，诏慰勉之。乙亥，封皇姑囊家真公主为鲁国大长公主，驸马蛮子台为济宁王。

二月丁丑，合伯、撒里蛮、孛来将探马赤军万人戍北边。壬午，罢江南茶税。戊子，思州蛮酋田哈刺不花等来朝。缅甸阿刺札高微班的来献舍利。丁酉，车驾幸上都。癸卯，工部尚书吕天麟为中书参知政事。罢河西军，听各还所属。

三月己巳朔，安南国世子陈日燾遣使来慰国哀，并谢罪。丙辰，金齿蛮酋来朝。

夏四月辛巳，妖人蒙虫僭似乘舆，伏诛。癸巳，牙那木假兵部尚书，佩虎符，使马答儿的音国。敕官吏不得擅离职任。

闰月甲寅，立梭厘招讨使司，塔儿忽带为招讨使，佩虎符。壬戌，塔即古阿散坐不法伏诛。戊辰，遣爱牙赤核实高丽储粮，是月，兰州上下三百余里河清三日。

五月戊寅，命麦术丁、何荣祖厘正选法。己卯，流别阁于江西，从月的迷失讨贼自效，辛巳，罢行大司农司。平章

政事麦术丁加平章军国重事。中书丞、商议中书省事何荣祖罢为昭文馆大学士，与中书省事。丙申，前太傅伯颜子买的为金书枢密院事。

六月甲寅，翰林学士承旨董文用等进《世祖实录》。乙卯，省左右两江宣司都元帅府、宣抚司为广西两江道宣慰司都元帅府。敕上封事者，命中书省检视再闻奏。癸亥，立蒙古都元帅府于西川。阿拉帖木儿、岳乐罕并为都元帅，佩虎符。

秋七月己卯，诏诸路有儒知吏事、吏通经术者，廉访使岁贡二人，委省台官考试，中程者用之，所举非人，罪坐选举官。壬午，立肇州屯田万户府，以辽阳行省左丞阿散领之。戊戌，管军万户朱永福、边珍裕坐妖言惑从伏诛。

八月辛酉，缅甸进驯象。己巳，驸马阿海知枢密院事。

九月甲戌，帝至自上都。乙亥，从帝师请，释死罪三人、杖以下四十七人。己卯，罢四川淘金户，还其原籍，追论建言者之罪。庚辰，罢宁夏路行中书省。丁亥，爪哇国来贡方物。

冬十月癸卯，有事于大庙。帝曰：“亲享之礼，祖宗未行，今玉册、玉宝成，朕其躬蒞之。”癸丑，平章军国重事答失蛮以兵讨西北叛王。戊辰，遣安南贡使还，仍诏谕陈日燿来朝。

十一月丙戌，毡阳佐、法儿刺、阿鲁等国，各遣使奉金字表来朝。戊戌，诏江浙行省括隐漏官田及检劾避役户。是月，戒饬御史台、廉访司，凡纠察官吏不公，及不知百姓疾苦者，罪之。敕各投下及影占户计者，均当杂泛差徭。

十二月甲子，徙缙山乞里乞思等部众于山东。

二年春正月丙子，蠲两都站户和雇、和市。己丑，御史

中丞秃赤为御史大夫。乙未，禁诸王、公主、驸马擅罪官吏。

二月丙午，禁军官擅以家奴代役。括蒙古渐丁充行伍。庚戌，诏军人擅更代，及逃归者死。庚申，自六盘山至黄河置屯田。丙寅，大都留守司达鲁花赤段贞为中书平章政事。

三月壬申，中书平章政事不忽木罢为昭文馆大学士、平章军国事。癸酉，忻都劾晋王甘刺麻，朵罗台劾太师月鲁吕，皆有异志。诏枢密院鞠之，事不实。忻都论死，朵罗台谪从军自效。丙子，车驾幸上都。

夏四月己亥朔，命撒的迷失招集忙古歹部流民。

五月戊辰朔，免两都徭役。甲戌，诏蒙古马牛羊百取一，羊不满百者亦承之，色目人羊满百，乃取其一，著为令。庚辰，土番寇阶州，诸王帖木儿不花、只列等以兵讨之。庚寅，罢四川马湖进独本葱。是月，野蚕成茧。

六月丙午，上思州叛蛮黄胜许遁入安南。

秋七月庚午，肇州万户府置屯田。壬午，括伯颜、阿术、阿里海牙等占江南民田，及权豪隐匿者，令输租增江西、河南行省参知政事各一员，朱清为河南行省参知政事，张瑄为江西行省参知政事。授高丽世子王谔为仪同三司，领都佾议司事。丙戌，岳乐也奴等使马八儿国。己丑，广西贼陈飞等寇昭、梧、藤、容等州，湖广行省左丞八都马辛讨平之。

八月丁酉朔，禁舶商以金银渡海。

九月辛未，车驾幸安同泊，受诸王、百官贺圣诞。戊寅，临安路舍资蛮叛，梁王松山讨降之。甲申，也先不花讨乞蓝蛮，其别部酋答刺率诸蛮降，以其地为云远路军民总管府。是月，河决杞、封邱、祥符、宁陵、襄邑五县。

冬十月丁酉，有事于太庙。壬子，车驾至自上都。赣州贼刘六十作乱，江西行省左丞董士选讨平之。

十一月丁卯，答马刺国来进驯象。己巳，兀都带等所译太宗、宪宗、世祖《实录》，帝曰：“忽都鲁迷失非昭睿顺圣皇后所生，何为称公主？顺圣太后崩时，裕宗已还自军中，所纪日月先后差错。又别马里思丹炮手亦思马音及泉府司皆小事，不足书也。”辛未，遣枢密院官整饬江南镇戍诸军，列将校勤惰以闻。壬辰，缅王遣其子僧伽巴叔撒邦巴来贡方物。

十二月戊戌，立彻里军民总管府。癸亥，释大都狱囚百人。金齿、罗斛蛮酋来朝。

大德元年春正月辛未，诸王亦怜真来朝，卒于道，赐币、帛五百匹。己丑，分和林汉军屯田于五条河。辛卯，张斯立为中书参知政事。

二月丙申，蒙阳甸蛮酋缅吉遣其弟阿不刺等来献方物，以其地立通西军民总管府。戊午，罗罗斯蛮酋来朝。己未，改福建行省为福建平海等处行中书省，徙治泉州。封的立普哇拿阿迪提牙为缅国王。庚申，行徵政院副使王庆端为中书右丞。改元贞三年为大德元年，赦天下，免上都、隆兴差税三年，诏曰：

朕荷天地之洪禧，承祖宗之丕祚，仰遵成宪，庶务和平。比者，药木忽儿、兀鲁速不花、朵儿朵怀等去逆效顺，率众来附。毕会宗亲，释其罪戾。适星芒之垂象，岂天意之微予。宜推一视之仁，诞布更新之化。可改元贞三年为大德元年。

于戏！侧身修行，咸摅奉若之诚，革故鼎新，幸底雍熙

之治。咨尔臣庶，体予至怀。

是月，敕自正月一日至七月二十日，禁捕打禽兽，著为令。

三月庚午，陕西行省平章政事也先帖木儿为中书平章政事，中书左丞梁德珪为中书右丞。癸酉，畋于柳林。甲戌，西番寇阶州，陕西行省平章政事脱列伯讨平之。丙子，车驾幸上都。丁丑，封诸王帖木儿不花为镇西武靖王，江西行省左丞八都马辛为中书左丞。庚辰，札忽鲁赤脱而速坐受贿，为奴所告，毒杀其奴，论死。庚寅，立江淮等处财赋总管府。

夏四月癸巳朔，日有食之。壬寅，赐暹国及罗斛蛮来朝者，衣币有差。诏佐恤江南茶户。

五月丙寅，河决开封。戊辰，安南国遣使来朝。庚寅，平伐蛮酋来降，乞隶于亦奚不薛，从之。上思州叛蛮黄胜许遣其子来降。

六月甲午，湖广行省参知政事崔良知廉贫，赐盐课钞千锭旌之。戊戌，平伐九寨蛮来降。甲寅，罢亦奚不薛岁贡马及毡衣。是月，和州历阳县江涨，漂没民居一万八千余家。诏江浙、湖广、江西秋粮折轻赏钞。

秋七月辛未，省蒙古军万户府入曲先塔林都元帅府。丁亥，河决杞县蒲口。衡州路酃县大水山崩。

八月丁巳，妖星出于奎。

九月甲子，八百媳妇蛮寇彻里，也先不花以兵讨之。丙寅，罢括两淮民田。壬午，车驾至自上都。己丑，罢南丹州安抚司，立庆远南丹溪洞等处军民安抚司。平珠六洞蛮及十部蛮皆来降。

冬十月丁酉，有事于太庙。辛丑，温州妖人陈空崖伪称罗平国正治元年，伏诛。乙卯，爪哇国遣使奉表来降。

十一月癸亥，高丽国王王晁告老，乞以爵传其子源。丁丑，以源为征东行中书省左丞相、高丽国王，仍封晁逸寿王，赐号推忠宣力定远保节功臣。

十二月戊戌，禁诸王、驸马夺民田，其献田者罪之。壬寅，朝洞蛮来降。丁未，旌表烈妇漳州万户府知事阚文兴妻王氏。

闰月甲子，福建行省平章政事高兴奏，漳浦县产水晶，乞采之。帝曰：“不劳民，则可；劳民勿取。”己卯，播州宣抚使杨汉英请讨平伐叛蛮，命湖广行省平章政事哈剌哈孙从宜收抚。

二年春正月壬辰，以水旱，免郡县田粮十之三，灾甚者尽免之。老病单弱免差税三年。己酉，释流求俘归。谕其国王效顺。省土番碉门安抚司、运司、立碉门、鱼通、黎、雅、长河西、宁远安抚司。

二月壬戌，徙重庆宣慰司都元帅府于成都。立福建军民宣慰司都元帅府。乙丑，中书右丞张九思为平章政事，与中书省事，己巳，畋于灋州。丙子，罢中外土木之役。乙酉，车驾幸上都。诏民播种。怠惰及有司劝课不至者，各道廉访司治之。丙戌，梁德珪为中书平章政事。

三月戊子，诏僧人犯罪，听有司专决，轻者与僧官约断，不至者罪之。壬子，封东镇沂山为元德东安王，南镇会稽山为昭德顺应王，西镇吴山为成德永靖王，北镇医巫闾山为贞德广宁王，与岳渎同祀，著为令。

夏四月庚申，也速带儿擅调甘州戍军，遣伯颜等笞之。

五月辛卯，罢海南黎兵万户府及屯田万户府。壬辰，昭文馆大学士何荣祖加平章政事，与中书省事。中书左丞八都马辛为中书右丞。己酉，耽罗国来贡方物。

六月庚申，罢江南门摊，复行两税法。

秋七月癸巳，河复决蒲口，遣尚书阿海、御史刘赓等塞之。壬寅，诏高丽国王王谔入侍，复以其父暉为国王。

九月己丑，车驾幸阻妨之地，受诸王、百官贺圣诞。安南、爪哇及金齿蛮各来贡方物。丙申，帝至自上都。癸卯，命御史台鞠枢密副使塔刺忽带赃罪。庚戌，汰中外冗员。

冬十月壬戌，立蒙古万户府于凤翔路。

十一月庚寅，安南国来贡方物。丙申，罢云南行御史台，置肃政廉访司。壬寅，中书右丞王庆端为中书平章政事。

十二月庚午，湖广行省平章政事哈刺合孙为江浙行省左丞相。甲戌，彗星见。

卷十四

本纪第十四

成宗下

三年春正月癸未朔，暹国、罗斛国及没刺由诸番来贡方物。赐暹世子虎符。庚寅，遣使问民疾苦。除本年内郡包银、俸钞。免江南夏税十之三。增小吏俸。置各路惠民局。封药

木忽儿为定远王。辛卯，命御史台鞠浙西廉访使王遇赃罪。壬辰，杖流高丽藩臣赵仁规于安西，崔冲绍于巩昌。工部尚书也先帖木儿、翰林待制贾汝舟赍诏谕高丽王王暉，自今命官有罪，毋辄行杀戮。癸巳，哈刺哈孙为中央左丞相。是月，诏中外军官奥鲁官抚养军人，不得妄有科配。置各路管民官，招诱新附军人逃窜者，限百日内出首免罪。

二月癸丑朔，车驾幸柳林。丁巳，罢四川、福建等处行中书省，陕西行御史台，江东、荆南、淮西三道宣慰司，立四川、福建宣慰司都元帅府，陕西汉中道肃政廉访司。壬申，加号解州盐池神惠康王曰广济，资宝王曰永泽，泉州海神曰护国民明著天妃，盐官州海神曰灵感宏祐公，吴大夫伍员曰忠孝威惠显圣王。金齿蛮来贡方物。庚辰，车驾幸上都。

三月癸巳，缅甸世子信合八的奉表来谢，赐衣遣之。补陀僧一山赍诏使日本，谕以通好息民之意。日本人不报。甲午，命何荣祖等更定律令。

夏四月庚午，申严江浙、两淮私盐之禁。己卯，礼部尚书月古不花为中书左丞。

五月丙申，海南速古台诸番来贡方物。庚子，复立征东行中书省，阔里吉思为平章政事，耶律希逸为左丞。

六月癸丑，罢大名路黄河故道田租。

秋七月丙申，淮安等县蝗，在地者为鹯啄食，飞者鹯击杀之。诏禁捕鹯，著为令。

八月己酉朔，日应食，不食。

九月癸未，车驾幸古柵，受诸王、百官贺圣诞。癸巳，罢括江南手号军。己亥，车驾至自上都。

冬十月戊申朔，有事于太庙。壬子，册立伯牙吾氏为皇后。甲寅，复立海北海南道肃政廉访司。

十一月戊子，释罪囚二十人。

十二月癸酉，禁捕天鹅、鹳鹤。

四年春正月辛丑，诏蒙古都元帅也速带儿勿擅决重刑。癸卯，复淮东漕渠。

二月丁未朔，日有食之。丙辰，皇太后崩。甲戌，罢称海屯田，改置于阿札之地。乙亥，车驾幸上都。置西京太和岭屯田。丙子，命李庭提调诸卫屯田。

夏四月丙辰，置五条河屯田。丁巳，缅甸遣使进白象。戊午，中书省断事官不兰奚为中书平章政事。

五月癸未，谕集贤大学士阿鲁浑撒里等曰：“集贤、翰林乃养老之地，自今满秩者迁官，勿令辄去。”

六月己酉，立缅甸王子窟麻刺哥撒八为缅甸王。壬子，高丽国王王晬来朝。丙辰，太傅月赤察儿为太师，中书右丞相完泽为太傅。丁巳，御史中丞不忽木卒，贫无以葬。赐银五百锭。甲子，立耽罗总管府。暹、爪哇、吊吉而、蘸八等国遣使来朝。

秋七月甲戌朔，上皇太后尊谥曰徽仁裕圣皇后。乙酉，缅甸阿散哥也遣其弟者苏等九十一人来贡方物。诏者苏赴上都，余留安庆。

八月癸卯朔，阿鲁浑萨里为中书平章政事。

闰月庚子，车驾至自上都，中书右丞驾仁杰为平章政事。

九月甲子，改中御府为中政院。

冬十月癸酉朔，有事于太庙。

十一月壬寅朔，诏免两都、隆兴路大德五年丝银、税粮，附近养驼马诸郡免税粮十之三，其余免十之二，徒罪减半，杖以下释之，江北荒田，耕种者收税展限一年，著为令。敕中书省定盐法条画。

十二月癸巳，刘深、合刺带等将兵三万讨八百媳妇蛮。

五年春正月壬子，罢檀、景两州探金铁冶提举司。

二月己卯，刘深、合刺带并为湖广行省中书右丞，祐郑祐为参知政事，皆佩虎符。丁亥，立征八百媳妇二万户符。丁酉，车驾幸上都。敕云南行省汰冗官千五百一十四员。己亥，永宁路阿永蛮酋雄挫来朝，赐币帛有差。

三月戊进午，马来忽等国遣使来朝。己巳，戒飭中外官吏。己未，也速忽都为湖广行省参知政事，与刘国杰等讨四川叛蛮。是月，征东行省平章政事阔里吉思以不能和辑高丽，召还。薛超兀儿、忙兀都鲁迷失等自缅甸阿占城班师。

夏四月壬午，调云南军讨八百媳妇。癸巳，宣慰使塔察儿、刑部尚书王为亨使高丽，诏谕高丽王曰：

向以尔国自作不靖，遣平章政事阔里吉思等与王镇抚之，非欲久任于彼。今已召远。然闻尔国越礼滥罚、官冗民弊，王其勉思累朝覆育之恩，以本国生灵为念。威福予夺，当自己出。事体有未便，民情有未安者，其审图之。

五月辛亥，怯烈亦带脱脱以兵讨土番。丙辰，曲靖等路宣慰使忽林失入觐。壬戌，雍真葛蛮宋隆济叛。

六月丙戌，宋隆济陷杨黄寨，雍真总管府连鲁花赤也里干遁。己丑，缅甸遣使贡驯象九。壬辰，宋隆济寇贵州，知

州张怀德战败，死之。

秋七月丁未，命御史大夫秃忽赤整饬台纲。军官受赃者，与民官同例，量罪殿黜。戊申，立耽罢军民万户府，癸亥，叛王哈丹孙脱欢来降，暗伯、阿忽台并知枢密院事。河南妖人段丑厮等诈称神异诳众，伏诛。

八月甲戌，云南行省平章政事薛超兀儿等以兵讨金齿蛮。水西土官妻蛇节叛应宋隆济。

九月庚辰，彗星出东井。征缅万户曳刺福山等进驯象六。河南行省平章政事二哥等赴云南讯诸王阔阔，平章政事薛超兀儿、忙兀都鲁迷失，左丞刘得禄，参知政事高阿康受贿旋师之罪。

冬十月丙寅朔，以畿内饥，增明年海运粮为百二十万石。己巳，缅甸遣使来贡方物，戊寅，云南武定路蛮酋群则来贡方物。壬午，车驾至自上都。丙戌，以岁饥禁酿酒。弛山泽之禁。

十一月丁未，刘国杰、也先忽都将万人，八刺、阿塔赤将五千人，讨宋国济、蛇节、罗儿酋阿女等。戊申，徭人蓝赖率丹阳三十六洞来降。

十二月甲戌，定强窃盗条格。

六年春正月乙巳，晋王甘刺麻卒。丁未，命江浙行省平章政事阿里专领江浙财赋。庚戌，江南僧石祖进告朱清、张瑄不法十事，命御史台鞠之。帝问台臣曰：“朕闻江南富民侵占民田，致贫者流离转徙，卿等闻之否？”对曰：“富民乞护持玺书，依倚以欺贫民，官府不能诘治，宜悉追之。”帝即命行之，毋越三日。己未，诸王真童坐诬告济南王也里只，谪

刘国杰军中自效。

二月庚午，谪诸王孛罗于四川从军自效。丙戌，陕西行省平章政事也速带而、参知政事汪维勤，湖广行省平章政事刘国杰同讨亦奚不薛，一切听也速带而、刘国杰节制。罢讨八百媳妇，免右丞刘深等官。癸巳，帝不豫，释京师重囚三十八人。是月，遣乾讨虏军征亦奚不薛，依例给军械粮饷。

三月丁酉，以水旱灾，大赦天下。甲寅，合祭昊天上帝、皇地祇于南郊，中书左丞相哈刺哈孙摄祭事。

夏四月丁卯，曲赦云南诸部蛮夷。释大都轻重囚三十八人。庚辰，上都大水。戊子，车驾幸上都。

五月戊申，太庙寝殿灾。

六月癸亥朔，日有食之，太史院失于推验，诏中书省议罪以闻。甲子，建孔子庙于京师。辛未，有事于太庙。乙亥，安南国遣使贡方物及驯象二。

秋七月辛酉，江浙行省参知政事忽都不丁为中书右丞。

九月己酉，龙兴路讹言括民间童男女，至有杀其子者，命诛为首者三人。

冬十月甲子，改浙东宣慰司为宣慰司都元帅府，徙治庆元。罢军储所，立屯储军民总管万户府。浙西人林都邻告廉访使张珪藏禁书及推算帝五行，运使合只亦劾珪沮挠盐法，敕台省官同鞠之。丙子，车驾至自上都。

十一月甲午，刘国杰裨将宋光与蛇节等战，大败之。辛亥，同知枢密院事合答知枢密院事。

十二月庚申朔，云南地震。戊辰，又震。甲子，衡州贼袁舜一等伏诛。高丽国王王晁来朝。

七年春正月乙卯，籍朱清、张瑄家资。戊午，定民官阵亡子孙，降祖父秩二等荫叙格。

二月壬戌，诏中书省汰诸司冗员。辛未，平章政事、行上都留守木八刺沙，陕西行省平章政事阿老瓦丁并为中书平章政事；江南行台御史中丞尚文为中书左丞；江浙行省参知政事董士珍为中书参知政事。丁丑，定中书省自左、右丞相以下，平章政事二员，左、右丞各一员，参知政事二员，为八府。己卯，侍御史朵台为中书参知政事。庚辰，监察御史杜肯构等劾太傅完泽受朱清、张瑄贿，不报。壬午，谕中书省曰：“比有以岁课增羨希求爵赏者，此非培克于民，何从而出？自今除元额外，勿以增羨为正数。”罢江南财赋总管府及都水庸田司、行通政院。

三月庚寅，遣郝天挺、塔出等十四人宣抚循行诸道，仍下诏戒饬之。都城火。徙甘肃肃政廉访司治甘州。乙未，中书平章政事伯颜、梁德珪、段贞、阿里浑萨里，右丞八都马辛，左丞月古不花，参知政事迷而火者、张斯立并坐受朱清、张瑄贿免官，洪君祥为中书右丞。甲辰，诏曰：

庆赏刑罚，国之大柄，二者不可偏废。朕自即位以来，恪尊圣祖成宪，优遇臣下。品爵以荣其身，禄赐以厚其家。期于履正奉公，有裨国政，百姓又安，以称朕怀，不务出此。若平章伯颜、暗都刺，右丞八都马辛等，营私网贿，蒙蔽上下，以致政失其平，民受其弊。今已籍没家资，投戍边远，明正其罪。用是更张，以清庶务。遣使巡行郡邑，问民疾苦，分别淑慝。以近年所定赃罪条例，互有轻重，特敕中书集议，酌古准今为十二章。又以官吏俸薄，不能养廉，京朝百司，月

俸之外，增给禄米；外任官无公田，官标拨公田，无田则量支禄米。自今已始，凡在内外有官守者，洗心涤虑，公勤奉职，治民均平，无俾吾民重困，式符委任责成之意。

乙巳，杀前云南行省右丞刘深。罢云南征缅分省。戊申，卜兰奚、岳铉等进《大一统志》，赐赉有差。己酉，诸王脱欢坐诬告诸王脱脱，谪湖广军前自效。甲寅，车驾幸上都。

夏四月癸亥，征陈天祥、张孔孙、郭筠至京师，天祥、孔孙为集贤大学士，筠为昭文馆大学士，皆商议中书省事。庚辰，蛇节降。丁亥，蛇节伏诛。禁管民官打量军人地亩。

五月丁未，诸王床兀儿入觐。乙卯，立和林宣司都元帅府，忽刺出遥授中书左丞，为宣慰使都元帅。

闰月戊午朔，日有食之。壬戌，禁军民犯曲阜林庙。己巳，征诸王孛罗、真童入觐。右丞相完泽卒。庚辰，云南行省平章也速带而入觐，献金五百两。帝曰：“此卿等效死所获者。”赐钞偿之。

六月癸巳，叛蛮雄挫降。乙未，命可伯、阿忽台等整饬河西军事。

秋七月丙寅，哈刺哈孙为中书右丞相、知枢密院事。丙子，敕集贤、翰林院老臣预议朝政，其余三品以下年七十者，皆升散官一等致仕。罢辽东宣慰司。丁丑，叛王笃哇、察八而、来里帖木儿等皆请降，诏安西王置驲传以俟其来。戊寅，叛蛮麻刺降，献童男女二百人，金五百两，及马牛羊，却之。是月，断事官帖木儿不花等使高丽，执其蕃臣石冑及冑子天补赴京师。

八月辛卯，地震，平阳、太原尤甚。庚戌，缅甸献驯象

四。

九月戊午，车驾至自上都。兵部尚书脱脱帖木儿使高丽，执其国相吴祈赴京师。是月，高丽国王王暉入朝，诏止之。

冬十月辛卯，复立陕西行御史台。刑部尚书塔察儿、翰林直学士王约使高丽。癸巳，只而合忽知枢密院事。庚子，改普定府为普定路，以蛮酋容苴妻适姑为总管，佩虎符。改叙州路为叙南等处诸部蛮夷宣抚司。庚戌，翰林国史院进太祖、太宗、定宗、睿宗、宪宗五朝《实录》。

十一月甲寅，并海道运粮万户府为海道都漕运万户府。亦乞不薛贼党魏杰等降十二月甲申朔，诏内郡岁比不登，其民已免差徭者，并免其田租。乙酉，弛京师酒课。辛丑，免顺元等路本年逋税。丁未，以转运劳，免思、播二州，辰、沅等路税粮一年，常、澧三分之一，淘金站户无种佃者免其杂役。

是年，诸道奉使宣抚，罢赃吏一万八千四百七十三人，征赃四万五千八百六十五錠，审冤狱五千一百七十六事。

八年春正月甲寅，彗星出于奎。己未，以灾异迭见，诏恤民隐，省刑罚。除色目人外，原为僧道者，若平户丁多差役不缺，及有昆仲侍养父母者，方许簪剃。凡妄献田土、山场、窑冶、希图微名贪利者，悉禁之。平阳、太原两路免差税三年，上都、隆兴、延安、大同、怀孟、卫辉、彰德、真定、河南、安西等路免二年，保定、河间两路免一年。江南佃户私租太重，以十分为率，减二分，著为令。仍弛山场、河泊之禁。其田宅之讼，除契约分明，依例赐给外，其余尽行革拨诸路。罪囚廉访司分别审录，轻者决之，有疑者分具始

事，申台详谏。庚申，云南顺元同知宣抚事宋阿重执其叔父隆济来献。癸亥，禁锢朱清、张瑄族属。丙寅，御史中丞、太仆卿塔思不花为中书右丞，江南行台御史中丞赵仁荣为中书参知政事。是月，平阳地震。

二月甲午，徙建康道廉访司治宁国。甲辰，翰林学士承旨撒里蛮进金书《世祖实录节文》一册，汉文《宝录》八十册。丙午，车驾幸上都。

三月戊辰，中书左丞尚文乞致仕，不允。诏受宣敕不赴任者，永不叙用。

夏四月丁未，分教国子生于上都。丙寅，禁纳鹰鹞人滥给铺马。

五月癸未朔，日有食之。壬申，罢福建都转运盐使司。是月，霖雨，河决祥符、太康、获嘉、阳武等县。

六月丁酉，汝宁县妖人李曹驴等妄言得天书惑众，伏诛。

秋七月辛酉，罢江淮等处财赋总管。癸亥，诸王合赞遣使入贡。

八月，杭州火。

九月癸丑，车驾至自上都。庚申，伯颜、梁德珪复为中书平章政事，八都马辛为中书右丞，迷而火者为中书参各政事，江浙行省平章阿里为中书平章政事。庚午，户部尚书张祐为中书参知政事。癸酉，叛王察八而、朵瓦等来降。

冬十月辛卯，有事于太庙。辛巳，宣徽使、大都护长寿为中书右丞，陕西行省右丞脱欢为中书参知政事。丁亥，安南国遣使入贡。庚寅，封皇侄海山为怀宁王。戊戌，杖流吴祈、石天补等于安西。

十一月壬子，制用院使忽邻、翰林直学士林元抚慰高丽。戊辰，武备卿铁古迭而为御史大夫。

十二月辛丑，封诸王出伯为威武西宁王。

九年春正月壬申，弛京师酒禁。

二月丁酉，封诸王完泽为卫安王，定远王岳木忽而为威定王。辛丑，大赦天下。诏御史台、翰林院、国史院、集贤院、六部举五品以上廉能识治体者三人，行省、行台、各路宣慰司举五人。大都、上都、隆兴三路免本年差发、税粮，腹里各路免包银俸钞，江南佃种官田免租税三分，前年拖欠差税课程并行蠲免。敕有司非急之务，毋生事烦扰，小罪即与疏决，勿禁系。鳏寡孤独常年养济外，每人赐中钞十两，官司常加存问，年八十以上存侍丁一名，九十以上存二名，免其差役。流民不能复业者，官司常加优恤，愿种官田者，免差税五年。是月，忽邻卒于高丽。

三月丁未朔，车驾幸上都。戊午，枢密副使高兴为中书平章政事，仍枢密院副使。

夏四月乙酉，大同路地震，壤庐舍无算，压死二千余人。怀仁县地裂，涌黑水。己丑，东川路蛮酋阿葵来献方物。

五月戊申，征陕西儒提举萧𣒎、赴阙，命有司给以安车。戊午，改各道肃政廉访司为详刑观察司。以地震，改平阳为晋宁路，太原为冀宁路。

六月丙子朔，以立皇太子，遣中书右丞相哈刺哈孙告昊天上帝，御史铁古迭而告太庙。庚辰，立皇子德寿为太子。赐高年帛有差。孝子、顺孙量材任用。亲年七十别无侍丁者，从近迁除。外任五品官以下，并减一资致仕。官止一子承荫者，

免僇使。家贫给终身半俸，其精力未衰者录用之。罪囚五年以上，除恶逆外，疑不能决者释之。流人量移内地。

秋七月辛亥，始立郊坛。丁卯，大司徒段贞、中书右丞八都马辛并为中书平章政事，参知政事合刺蛮子为右丞，参知政事迷而火者为中书左丞，参议中书省事也先伯忽为参知政事。

八月丁丑，给曲阜庙洒扫户，以尚珍署田五千顷供祭祀。是月，归德、陈州河决。

九月戊申，帝御寿宁宫，受诸王、百官贺圣诞。庚申，车驾至自上都。

冬十月辛巳，有事于太庙。庚寅，驸马按替不花自笃哇来归。乙未，谕中书省、枢密院、御史台曰：“省中事听右丞相哈刺哈孙总裁，自后用人，非与哈刺哈孙共议者，悉罢之。”辛丑，复以详刑观察司为廉访司。

十一月丁未，罢南城警巡院。庚午，祀昊天上帝于南郊，摄太尉右丞相哈刺哈孙，左丞相阿忽台，御史大夫铁古迭而为三献官。

十二月丙子，京师地震。庚寅，皇太子卒。

十年春正月壬寅朔，高丽国遣使贡方物。甲辰，诏访庄圣皇后、昭睿顺圣皇后、徽仁裕圣皇后仪范中外之政，以备纪录。丁卯，封驸马合伯为昭武郡王。营国子学。

闰月甲午，前中书平章政事铁哥、江浙行省平章政事闾里、河南行省平章政事阿散并为中书平章政事，行宣政院使张闾、四川行省左丞杜思敬并为中书左丞，参议中书省事刘源为中书参知政事。

二月丙辰，封孛罗为镇宁王。是月晋宁、冀宁二路地震。笃哇遣使来朝。丁卯，月古不花为中书左丞。戊辰，车驾幸上都。三月己卯，崆古国遣使来贡方物。乙未，虑大都囚释上都死罪三人。

夏四月庚子朔，诏匿鹰犬者没家货之半。壬戌，云南行省平章政事也速带而讨罗雄州叛蛮，获其酋阿邦龙，斩之。癸亥，立昆山、嘉定等处水军上万户符。

五月辛未，京师旱。乙酉，同知枢密院事塔哥忽台、塔刺海并知枢密院事。封驸马铁木而为濮阳王，公主忙歌台为鄯国大长公主。丁亥，诏右丞相哈刺哈孙、左丞相阿忽台等整饬庶政百司勤惰，悉以名闻。

六月壬戌，来安路总管岑雄叛，未几遣其子来降。复立淮西道肃政廉访司。

秋七月辛巳，释诸路罪囚，凡常赦所不原者皆赦之。

八月壬寅，开成路地震，坏官民庐舍无算，压死故秦王妃也里完等五千余人。丁巳，重修文宣王庙成，行释奠礼。

九月壬申，诸王笃哇遣使贺圣诞。是月，高丽国王王晬入朝。

冬十月丁未，有事于太庙。丁卯，安南国遣使贡方物。

十一月己巳，车驾至自上都。丁亥，武昌路火。

十二月乙卯，帝不豫。丙寅，宣政使沙的等祷于太庙。癸亥，琼州那蓬洞蛮酋王文何等作乱，伏诛。

十一年春正月丙寅朔，帝大渐。癸酉，崩于玉德殿。在位十有三年，年四十有二。乙亥，葬起辇谷。九月壬申，上尊谥曰钦明广孝皇帝，庙号成宗，国语曰完泽笃皇帝。

史臣曰：“成宗席前人之业，因其成法而损益之，析薪克荷，帝无愧焉。晚年寝疾，不早决计传位武宗，使易世之后，亲贵相夷，祸延母后。悲夫！以天子之尊，而不能保其妃匹，岂非后世之殷鉴哉。”

卷十五

本纪第十五

武宗

武宗仁惠宣孝皇帝，讳海山，顺宗答剌麻八拉第二子也。顺宗三子：长曰魏王阿木哥，其母微；帝与仁宗皆昭献元圣皇后宏吉剌氏所出，所谓兴圣皇太后也。帝以至元十八年七月十九日生。

成宗大德三年，命帝代宁远王阔阔出镇北边，御叛王海都。四年八月，败海都于阔别列之地。五年，海都率笃哇等大举入寇。八月朔，与海都战于铁坚古山，败之。越二日，海都悉众来攻，大战于合剌合塔。王师失利，帝亲昌矢石，援诸王、驸马以出。明日复战，王师分五队，为海都所乘，帝突出敌阵之后，全师而返。海都遁去，旋病死。

八年十月，封怀宁王，赐金印，食瑞州六万五千户，岁给五户丝及币帛千匹。九年七月，置王府官。时海都子察八儿拥其父众，虽纳款，不肯入朝。十年七月，帝自脱忽思圈

之地追察八儿弟斡罗思，获其妻孥辎重。八月，袭察八儿于也儿的石河，尽俘其众。察八儿奔于笃哇。诸王明里铁木儿、阿鲁灰等悉降。冬，驻于按台山，击察八儿弟秃曲灭，走之，北边悉平。

十一年春正月，成宗崩，左丞相阿忽台等潜谋推成宗皇后伯牙吾氏称制，以安西王阿难答辅之。皇弟爱育黎拔力八达奉兴圣太后入定内难，执阿忽台等杀之，遣使迎帝于北边。既而太后意犹豫，使日者推帝及皇弟之星命，问所宜立。曰：“重光大荒落有灾，旃蒙作噩祚久。”重光，帝年干；旃蒙，皇弟年干也。太后惑其言，遣近侍托尔谕帝：日者所言运祚修短，不可不思。是时，帝已至和林，谓康里脱脱曰：“我捍御边陲，勤劳十年，又位居嫡长，神器应归于我。今太后以星命休咎为言，天道茫昧，安能豫知此。殆任事之臣，造奸谋以惑圣听耳。汝为我往察之。”康里脱脱既行，帝率大军由西道，使诸王昂哈由中道，床兀儿由东道，分趋上都。康里脱脱入见太后，述帝意。太后愕然曰：“此我为太子远虑耳。今诸王、大臣议已定太子，不速来何为？”

五月，帝至上都。皇弟奉太后来会，左右部诸王毕至。乃废成宗皇后伯牙吾氏出居东安州，执安西王阿难答至上都，俱赐死。甲申，帝即位，受诸王百官朝贺于大安阁。诏曰：

昔我太祖皇帝以武功定天下，世祖皇帝以文德洽海内，列圣相承，丕衍无疆之祚。朕自先朝，抚军朔方，殆将十年，亲御甲冑，力战却敌者屡矣。方诸藩内附，边事以宁，遽闻宫车宴驾，乃有宗室诸王、贵戚元勋，相与定策于和林，咸以朕为世祖曾孙之嫡，以功以贤，宜登太宝。朕廉让未遑，至

于再三。还至上都，宗王、大臣复请于朕。间者，奸臣乘隙，谋为不轨，赖祖宗之灵，母弟爱育黎拔力八达稟命太后，恭行天罚。内难既平，神器不可久虚，合词劝进，诚意益坚。朕勉徇輿情，于五月二十一日即皇帝位。任大守重，若涉渊冰。属嗣服之云初，其与民而更始，可大赦天下。

教育学校人才，以备擢用，系籍儒户蠲免杂徭差役。优恤北庭战士，仍禁管军官、奥鲁官非理科扰。经过军马，牧养驼马人等，毋得扰民。诸色人等勿得别投户名，影避差徭，亦不得将土地妄词呈献。优恤蒙古站赤，仍禁各投下滥给铺马。义夫节妇、孝子顺孙，具实以闻，别加恩赐。上都、大都、隆兴三路免差税三年。其余路分，量轻重蠲免。云南八番田场地面，免差发一年，并免积年逋欠。鰥寡孤独不能自存者，常加存问。逃户复业者，免差税三年。被灾之处，山场湖泊课税权行停罢，听贫民采取。各处铁冶。听人煽办。名山大川、圣帝明王、忠臣烈士载在祀典者，官吏择日致祭。其余民间利害，有合兴修者，中书省核议奏闻。

是日，追尊皇考答剌麻八拉为皇帝，尊皇考元妃宏吉刺氏为皇太后。诏曰：

盖闻孝治天下者，王政所选，养以天下者，尊称为大。恭承先德，寅绍丕基；愴昭考之长违，赖慈闈之笃祐；方衍无疆之庆，曷胜报本之情。谨依先朝成宪，追尊皇考曰皇帝，尊太母元妃曰皇太后，其应行典礼，以次举行。

壬辰，加知枢密院事朵儿朵海太傅，中书右丞相哈刺哈孙答刺罕太保，并录军国重事。知枢密院事塔刺海为中书左丞相，预枢密院、宣徽院事。同知徽政院事床兀儿、也可札

鲁忽赤阿沙不花、江浙行省平章政事明里不花并为中书平章政事。江浙行省左丞刘正为中书左丞，遥授中书左丞钦察、福建道宣慰使也先帖木儿并为中书参知政事。中书右丞、行御史中丞塔思不花为御史大夫。平章政事床兀儿旋改知枢密院院事。特授乞台普济中书平章政事。延废使抄儿赤、同知和林等处宣慰司事塔海并为中书右丞。阿里为中书左丞。脱脱为御史大夫。是月，敕高丽王王暉归国。平章政事撒勒帖木儿、翰林学士郭贯镇抚高丽。中书平章政事合散出为辽阳行省平章政事。

六月癸巳朔，立皇弟爱育黎拔力八达为皇太子，受金宝，诏曰：

朕承列圣之贻谋，协宗王之翌戴，必谨亲贤之托，共成继述之功。母弟爱育黎拔力八达性禀温文，行全孝敬，夙著忠勤之节，素明治理之方，载惟靖乱之殊勋，式符元良之渥命，乃遵裕皇居东宫旧制，于六月朔旦授以皇太子宝，俾领中书之务，仍兼宿密之司，匪特笃兄弟友爱之情，实以衍宗社隆昌之福。

甲午，建行宫于旺兀察都之地，立为中都。丁酉，上皇考尊谥曰昭圣衍孝皇帝，庙号顺宗，大行皇帝尊谥曰钦明广孝皇帝，庙号成宗，元妃宏吉刺氏失怜答里尊谥曰贞慈静懿皇后。祔庙跻顺宗于成宗之上。己亥，罗罗斯宣慰使斡罗思为中书左丞。诸司听皇太子各置一人。拱卫直都指挥使马谋沙角觝屡胜，遥授平章政事。壬寅，左丞相塔刺海加太保、录军国重事，兼太子太师。癸卯，立詹事院。甲辰，平章政事、行和林宣慰使都元帅憨刺合儿，通政使、武备院卿帖木儿不

花，并知枢密院事。戊申，特授尚乘卿索兰奚、床兀儿并为平章政事。大同屯储军民总管府达鲁花赤怯里术丁为中书右丞。辛卯，中书平章政事脱虎脱出为江西行省平章政事。壬子，封皇妹祥哥刺吉为鲁国大长公主，驸马璘阿不刺为鲁王。敕枢密院铨调军官遵世祖定制。近侍勿辄有请。军官许父子兄弟袭职，近侍不得援以为例。丙辰，御史大夫塔思不花、脱脱并遥授左丞相。戊午，高丽前王王谏进封沈阳王，加开府仪同三司、太子太傅、上柱国、驸马都尉，入中书省参议政事。己未，宁远王阔阔出进封宁王。庚申，遥授左丞相塔思不花为右丞相。

七月癸亥朔，封诸王秃剌为越王。甲子，御史大夫铁古迭儿等以即位告天地于南郊。丙寅，前中书参知政事赵仁荣为太子詹事。太傅右丞相哈剌哈孙、左丞相塔剌海综理中书庶务。己巳，立宫师府。壬申，御史大夫铁古迭儿等以即位告太庙。癸酉，立和林行中书省，太师月赤察儿为行省右丞相，中书右丞相哈剌哈孙为左丞相，依前太保、录军国重事。丙子，江浙行省平章政事塔失海牙、知枢密院事床兀儿为中书平章政事。丁丑，封诸王八不沙为齐王，朵列纳为济王，迭里哥儿不花为北宁王，太师月赤察为淇阳王。加平章政事脱虎脱太尉。中书左丞相塔剌海为中书右丞相，御史大夫塔思不花为中书左丞相，浙江行省平章政事教化、河南江北行省平章政事法忽鲁丁并为中书平章政事。平章政事铁木迭儿出为江西行省平章政事。己卯，集贤院使别不花为中书平章政事。庚辰，御史中丞只儿合郎为御史大夫。辛巳，加至圣文宣王尊号为大成至圣文宣王。置行工部于中都。同知枢密院

事也儿吉尼知枢密院事。御史中丞王寿、浙江行省左丞郝天挺并为中书右丞。壬午，御史大夫铁古迭儿等，以即位告社稷。甲申，瞻思丁使西域。丙戌，同知宣徽院事孛罗答失为中书左丞。中书参知政事钦察出为四川行省左丞。辛卯，敕唐兀秃鲁花户籍已定，其入诸王、驸马部下避役及冒匿者，皆罪之。

八月甲午，敕不由中书奏者，勿与官，外任官勿带相衔。乙未，治书侍御史兀伯都刺为中书参知政事。戊戌，封御史大夫脱脱秦国公。辛亥，中书左丞孛罗帖木儿以国文译《孝经》进，诏曰：“此乃孔子之微言，自王公至于庶人皆当由是而行。其命中书省刊印，诸王以下皆赐之。”丁巳，中书左丞王寿罢为御史中丞。戊午，中书平章政事乞台普济、床兀儿、别不花等并加太尉。中书右丞塔海加太尉、平章政事。中书左丞孛罗帖木儿为中书右丞。禁诸色人带金翅雕帽顶。

九月甲子，车驾至自上都。时巡狩三不刺，翰林学士王文用谏曰：“先帝新弃天下，陛下巡狩不能时，无以慰臣民望，宜早还。”帝即日还大都。乙丑，中书右丞相塔刺海摄太尉，请皇考皇帝、大行皇帝尊谥于南郊。辛未，加塔刺海、塔思不花太尉。壬申，塔刺海奉册宝，上皇考极大行皇帝尊谥、庙号，又上大行皇帝元妃宏吉刺氏尊谥，祔于太庙。甲戌，改太常寺为太常礼仪院。丁丑，定中书省官为十二员：右丞相塔刺海，左丞相塔思不花，平章政事床兀儿、乞台普济如故，阿沙不花、塔失海牙为平章政事，孛罗答失、刘正为右丞，郝天挺、也先帖木儿为左丞，于璋、兀伯都刺为参知政事。甲申，立尚书省。塔刺海、塔思不花仍领中书省，脱虎脱、教

化、法鲁忽丁任尚书省。命自举官属。丙戌，中书平章政事别不花出为江浙行省平章政事。辛卯，御史台臣谏立尚书省，帝曰：“卿言良是，脱虎脱、教化、法鲁忽丁此三臣原任其事，姑听之。”

冬十月壬寅，封知枢密院事床兀儿为容国公。乙巳，敕阴阳法师勿谒诸王、驸马之门。丙午，诏整饬台纲。封御史大夫铁古迭儿为郅国公。中卫亲军都指挥使买奴为知枢密院事。

十一月癸亥，镇远王牙忽都进封楚王。丙寅，朝皇太后于隆福宫，上册宝。己巳，诏中书省官十二员。脱虎脱仍为宣政院，教化留京师，其余各授任职。戊寅，授皇太子玉册。己卯，帝御大明殿，受诸王、百官驾。

十二月辛丑，幸大圣寿万安寺。吏部尚书察乃授平章政事，领工部事。禁汉人挟弓箭、弹弓。庚申，诏曰：仰惟祖宗应天顺人，肇启疆宇，华夏一统，罔不率从。逮朕嗣服丕图，纘膺景命，遵承遣训，恪慕洪规，祇惕畏敬，未知攸济。永思创业艰难，茆然軫念。万事之统，在予一人。间者，岁比不登，流民未还。是以责任股肱耳目大臣，赞襄嘉猷，朝夕入告，乐与率土之民，共享治安之化，迓宁远肃，顾不韪欤。可改大德十二年为至大元年。诞布维新之令，式符永固之休。

凡公事并经由中书省可否施行，内外大小衙门毋得隔越闻奏。监察御史、廉访司严纠内外官吏，年终考其殿最者一人，以凭黜陟。政令得失、军民利病，许人上书陈言。若言无可采，并无罪责；如其可取，重加迁擢。培养学校人才，以

借擢用。其贡举法，中书省续议举行。劝课农桑，孝弟力田之人，量加旌赏。存恤蒙古探马赤各翼军人及各翼汉军。管军官举放军人钱物，诏书到日，尽行除免。典卖亲丁，悉听圆聚，价不追还。围猎飞放，毋得骚扰百姓。驱户毋得投充怯歹、鹰房子名色，影避差徭。站赤消乏，仰中书省、通政院先将户口合并截补，管设头目，其整治事理次第举行。禁捕野物地面，除上都、大同、隆兴三路外，大都周围各禁五百里。其余禁断处所及山场、河泊、芦荡，并开禁一年，听民采捕。民户流移，所在官司勿与本管户一体科征。其原籍官司，用心招诱，毋侵占所抛田产。内庭作佛事，毋释重囚，以轻囚代之。岳镇、海渎，风师、雨师、雷师，有司洁斋致祭。

至大元年春正月辛酉，曲赦御史台见系赃吏。甲子，中书平章政事阿沙不花授右丞相，行御史大夫。丙寅，罢江南行都水监。丁卯，中书右丞也罕的斤为平章政事，议陕西行省事。己巳，缅甸进驯象六。己丑，云南王也先帖木儿进封营王。是月，召前中书右丞尚文至京师，以疾辞。

二月甲辰，立皇太子卫率府。戊午，不达达思等送爪哇使归其国。是月，中书平章政事乞台普济为中书左丞相。

三月戊寅，车驾幸上都。封阿沙不花为康国公。甘肃行省右丞脱脱木儿为中书平章政事，加大司徒。己卯，修顺宗、成宗《实录》。敕怯薛歹、昔宝赤、诸王附马部下勿践百姓田禾，犯者罪之。

夏四月戊戌，以永平路盐课赐桑哥刺失公主，中书省臣

执不可，从之。封三宝奴为渤海国公，香山为宾国公。加铁古迭儿右丞相，都护买住中书右丞。癸卯，加平章政事教化太子太保、太尉、平章军国重事，封魏国公。甲辰，知枢密院事也儿吉尼遥授右丞相。乙卯，米楫等使苏鲁国。丙辰，罢征东行中书省。

五月丙寅，知枢密院事塔鲁忽台遥授右丞相。己巳，缅甸进驯象六。乙亥，知枢密院事憨刺合儿遥授左丞相。丙子，禁白莲社，放其人隶民籍，加右丞相塔思不花上柱国，左丞相乞台普济太子太傅。甲申，立大同侍卫亲军都指挥使司。

六月己丑，加三宝奴录军国重事，曲出太子太保，脱虎脱上柱国、太尉、大慈都平章军国重事。戊戌，威定王药木忽儿进封定王。封驸马阿失为昌王。宦者李邦宁遥授左丞相。己酉，乞台普济录军国重事。敕无照会官不得赴任。

七月庚申，立广武康里侍卫亲军都指挥使司。壬戌，立中都留守司兼开宁路总管府。壬申，塔察儿等九人使诸王宽阔，月鲁等十二人使诸王脱脱。癸酉，礼部尚书阿里灰等赍玺书谕安南国，礼部侍郎管祝思监等使缅甸，脱里不花等十二人使诸王合儿班答。壬午，封乃蛮带为寿王。是月，诏中书右丞相塔思不花、左丞相乞台普济曰：

中书政本也，军国之务，小大由之。朕自即位以来，励精求治，爰立辅相，以总中书。期年于兹，大效未著，岂选用之未当欤？何万机之犹繁，而群生之寡遂也。今特命塔思不花为中书右丞相，乞台普济为左丞相，统百官、平庶政，便者举行，弊者革去，一新条理。诸内外大小事务，并听中书省区处奏闻。违者罪之。

八月戊申，特授佩头太师。

九月丙辰，高丽国王王晙卒。雪尼台等使薛思迷干部。辛酉，谕诸王察八儿、宽阔入朝。乙亥，车驾至自上都。庚辰，册王谡为征东行省右丞相、嗣高丽国王，依前驸马都尉、沈阳王。封诸王秃满为阳翟王。

冬十月甲午，阿沙不花知枢密院事。敕持内降文书买河间路盐及以诸王、驸马命至运司者，一切禁之。甲辰，加左丞相、知枢密院事帖木儿不花录军国重事。中书右丞秃忽鲁、河南行省右丞也速、内史脱孛花并知枢密院事。

十一月丁卯，知枢密院事也儿吉尼为御史大夫。己巳，塔思不花、乞台普济并为中书右丞相，脱虎脱为左丞相。壬申，高丽国王王谡来朝。是月，核天下屯田。

闰月甲寅，太傅达剌罕哈剌哈孙卒。

十二月庚申，封和郎撒为陇王。甲戌，平章政事、太子宾客王大亨行太子詹事，平章军国重事、太子少詹事大藏都为太子詹事。

二年春正月己丑，从皇太子请，罢宫师府。庚寅，杀越王秃剌。辛卯，皇太子率诸王、百官上尊号曰统天继圣钦文英武大章孝皇帝。乙未，以上尊号谢太庙。己亥，容国公床兀儿进封句容郡王。丙申，诏曰：

朕荷三灵之隆眷，承列圣之丕基，永言置器之艰，恒切履霜之惧。乃者皇太子率中外臣庶僉谓，抚军十载，遐迩悉平，当九重成规具举，若稽旧典，盍进徽称。岂朕躬之克当，惟祖武之显式，已于正月十七日御大明殿受统天继圣钦文英武大章孝皇帝大号，越五日躬诣太室谢讫。

爱念即位之初，恒以赈灾恤民为务，而恩泽犹未溥博，流离犹未安集。岂有司奉行之不至欤？今特命中书省遴选内外官僚，专以抚治为事。简汰冗员，撙节浮费，官吏各修乃职。劝农桑，兴学校，抚字百姓，严戢吏胥。御史、廉访司年终每道考其殿最者一人，以凭黜陟。围猎飞放及过往屯戍、出使人等扰害百姓，有司再行禁戢。灾区经赈济百姓，本年腹路差税、江淮夏税并行蠲免。本年正月以前，民间逋欠、差税课程，并行蠲免。鳏寡孤独不能自存者，除常例外，每名给中统钞十五两。禁捕野兽地面，除上都、中都、大同三路及大都周围五百里外，其余再弛禁一年。诸位下占据山场、河泊、关津、桥梁并抽分等钱，尽行革罢。检视流民，计口贍济。其还乡者，量给行粮。流民合纳差税，勿邻见户包纳。岳渎、帝王及忠臣、烈士载于祀典者，有司蠲洁致祭。大小职官四品以下普覃散官一等。

二月癸亥，罢行泉府院，归市舶于行省。

三月己丑，辽阳行省右丞洪重喜告高丽国王王谔不法，敕王谔从皇太后幸五台山，勿令辨对。诸王老章代梁王松山镇云南。庚寅，车驾幸上都。封诸王也速不干为襄宁王。己亥，封阿剌的纳八剌公主为赵国公主。驸马注安为赵王。

夏四月辛酉，立兴圣宫江淮财赋总管府。癸亥，立镇守海口屯储亲军都指挥使司。

五月丁亥，通政院使憨刺合儿为知枢密院事，督建兴圣宫。大都留守养安等董其役。

六月甲戌，革殴西番僧者断手、詈者断舌之令。

秋七月癸未，河决归德府。壬辰，改四川松、潘、威、茂

等州安抚司为宣抚司，移治茂州汶州县。己亥，河决封邱县。

八月癸酉，立尚书省。乞台普济为尚书省右丞相，脱虎脱为左丞相，三宝奴、伯颜，也速为平章政事，保八为右丞，忙哥帖木儿为左丞，王黑为参知政事，中书左丞刘楫授尚书左丞、商议尚书省事。甲寅，海刺孙授平章政事、商议枢密院事。己未，立皇太子左卫率府。江西行省参知政事郝彬为尚书省参知政事。甲戌，赐太师瓜头名脱尔赤颜。丁丑，诏天下敢有沮挠尚书省事者罪之。

九月庚辰朔，颁尚书省条画于天下，改各行中书省为行尚书省。诏：朝廷得失军民有上言者，得实封上闻；饥民复业者一切逋欠，并行蠲免，仍除差税三年；中外吏员依世祖皇帝定例，以九十日为满；如有子证父，奴讐主，及妻妾、弟侄干犯名义者，一切禁之。颁行至大银钞。壬寅，追夺前平章政事教化魏国公爵。丙戌，车驾至自上都。丙申，占八国遣使贡白面象、伽蓝木。秃坚、张也先、伯颜使不怜八孙国，薛彻兀、李唐、徐伯颜使八昔国、察罕、亦不剌金、杨呼答儿、阿里使占八国。陕西行台御史大夫沙的授左丞相、行土番等处宣慰使都元帅。

冬十月庚戌朔，皇太子为尚书令。颁行铜钱法。癸亥，翰林学士承旨不里牙敦为御史大夫。乙丑，以皇太后不豫，释天下大辟囚百人。丁卯，御史大夫只儿合郎、中书左丞相脱虎脱、尚服院使大悲都并为知枢密院事。癸酉，知枢密院事秃忽鲁加左丞相。丁丑，辽阳行省平章政事合散为左丞相、行中书平章政事，中书参知政事伯都为平章政事、行中书右丞，商议中书省事忽都不丁为右丞、行中书左丞，参议中书省事

帖里脱欢、贾钧并中书参知政事。是月，杖流洪重喜于潮州。

十一月庚辰，云南行省右丞算只儿威招谕蛮酋谷保等，受谷保赂，复进兵失利。诏严鞠其罪。已而释之。乙酉，诏冬至祀南郊，以太祖皇帝配；明年夏至，祀北郊，以世祖皇帝配。丁亥，湖广行省左丞散术带为平章政事、商议枢密院事。丙午，诸王孛兰奚坐私怨杀人，杖流北边。是月，中书参知政事贾钧、金知枢密院事。

十二月乙卯，有事于太庙。上太祖圣武皇帝尊谥曰法天启运圣武皇帝，光献皇后尊谥曰光献翼圣皇后，睿宗庄圣皇后尊谥曰显懿庄圣皇后。和林行省右丞囊家带擅至京师，诏锁囊家带至和林鞠之。丁丑，增百官俸，定流官封赠格，内外官三品以上者，许请谥，赐谥不在此例。是年常丰洞蛮叛，率洗土、不儿、散毛诸洞蛮寇永宁路。

三年春正月癸未，汰中书省官吏一百八十一员，听尚书省迁叙。乙酉，特授李孟平章政事、集贤大学士、同知徽政院事。辛卯，立宏吉剌氏为皇后，脱虎脱摄太尉，授皇后宝册。戊戌，敕湖广行省招谕叛蛮黄胜许。辛丑，万户移刺四奴讨湖广乖西带叛蛮。听其便宜调遣。壬寅，云南行省右丞算只儿威招谕八百媳妇。乙巳，定枢密院知院七员、同知院事二员、副使二员、佥院事二员、同佥院事一员。御史台增御史大夫、中丞、侍御史、治书侍御史各二员。丁未，立右卫阿速亲军都指挥使司。

二月庚戌，以皇后受册宝，告谢太庙。己未，商议尚书省事刘楫整顿钞法。甲子，以上皇太后尊号，告祀南郊。乙丑，金枢密院事贾钧复为中书参知政事。己巳，宁王阔阔出

与越王秃剌子阿剌纳失里等谋反。事觉，阔阔出下狱，赐其妻完者死，窜阿剌失里于伯铁木儿分地，磔畏兀僧铁里等于市。三宝奴赐号答剌罕，余并晋秩二等。辛未，加脱克赤颜录军国重事。壬申，尚书平章政事乐实遥授左丞相，封齐国公。癸酉，左丞相、行中书省平章政事合散商议辽阳行省事。甲戌，以上皇太后徽号，告祀太庙。是月，诏大司农司总天下农政，定夺黜陟。

三月乙酉，知枢密院事只儿合郎为陕西行尚书省平章政事。壬辰，车驾幸上都。回回人木八剌等坐妖言伏诛。

夏四月己酉，容美洞蛮叛。高丽国王王谡加号纯诚守正推忠宣力定远保节功臣。

五月甲申，封诸王完者为卫王。乙未，尚书参知政事王黑加大司徒。

六月丁未朔，诏太尉尚书右丞相脱虎脱、封太保尚书右丞相三宝奴总治百司，庶务并从尚书省奏行。戊申，中书左丞忽都不丁为中书右丞。甲子，太子詹事斡赤为中书左丞。壬申，以西北叛王察八儿等来朝，告祀太庙。赐脱虎脱、三宝奴珠衣，封三宝奴为楚国公。是月，荆门州大水，山崩，死者三千四百余人。

秋七月，封晋王长女宝塔失怜为韩国长公主。

八月丁未，浙江行省左丞相呼剌出、遥授中书右丞相厘日并为御史大夫。甲子，敕于昂兀脑儿。

九月己卯，平伐蛮酋不老丁来降。辛巳，立宣慰司都元帅府于察罕脑儿。丙戌，车驾至自上都。尚书右丞保八遥授平章政事。是月，流宁王阔阔出于高丽。

冬十月戊申，帝率皇太子、诸王、群臣朝兴圣宫，上皇太后尊号曰仪天兴圣慈仁昭懿寿元皇太后。庚戌，告谢太庙。辛酉，大赦天下。大都、上都、中都免至大三年秋税，其余诸路今岁被灾人口曾经体覆者，依上蠲免。内外不急之役，截日停罢。至大二年以前负欠差税、课程，并行蠲免，阔阔出余党未发觉者，并原其罪。官民田土，诸人勿得陈献。诸收取钱物者，许实诉。丁卯，封驸马贾住韩为衮王。壬申，马合谋但的遥授尚书右丞，为海外诸番宣慰使都元帅、领海道运粮漕运万户府事。丞相铁古迭儿为陕西行台御史大夫。

十一月辛巳，脱虎脱进太师、录军国重事，封义国公。戊子，容美蛮田墨施什用等来降。丙申，有事于南郊，尊太祖皇帝配享昊天上帝。己亥，杀武卫亲军都指挥郑阿思兰，籍其家。

十二月甲辰朔，以建大崇恩福元寺，乞其刺遥授左丞。曲列、刘良遥授知政事，并领行工部事。己未，镇南王老章坐僭拟乘輿，召赴京师。

四年春正月癸酉朔，帝不豫，大赦天下。庚辰，帝崩于玉德殿，在位四年，年三十有一。壬午，葬起辇谷。

夏六月甲子，上尊谥曰仁惠宣孝皇帝，庙号武宗，国语曰曲律皇帝。

史臣曰：“武宗舍其子而立仁宗，与宣公舍与夷而立穆公无以异。公羊子曰：宋之乱，宣公为之。然则英宗之弑，文宗之篡夺，亦帝为之欤！《春秋》贵让而不贵争，公羊子之言

过矣。帝享国日浅，滥恩幸赏无一善之可书。独传位仁宗，不愧孝友。其流祚于子孙宜哉。”

卷十六

本纪第十六

仁宗上

仁宗圣文钦孝皇帝，讳爱育黎拔力八达，顺宗第三子，武宗同母弟也。以至元二十二年三月丙子生。

大德九年冬十月，成宗不豫，皇后伯牙吾氏出帝与兴圣皇太后居怀州。十年冬十二月，帝至怀州，所过屏供张，戒飭扈从之士毋扰累郡县，民皆感悦。

十一年春正月癸酉，成宗崩。戊子，帝与皇太后赴丧。二月辛亥，至大都，入临出居旧邸。时安西王阿维答、诸王明里帖木儿已先至。中书左丞相阿忽台、平章政事八都马辛、前中书平章政事伯颜、中政院使怯烈道兴等，潜谋推皇后称制，以阿难答辅之。三月乙卯朔，阿忽台等请皇后以丁巳日垂帘，自右丞相哈剌合孙以下皆列牋署名。丙辰，帝率卫士入宫，召阿忽台等，责以乱祖宗旧制，执之。戊辰，杀左丞相阿忽台、平章政事八都马辛、中政院使怯烈道兴等。宁王阔阔出、楚王牙忽都进曰：“今内难已平，太子世祖之孙，宜早正大位。”帝曰：“王何为出此言？奸臣构乱，故诛之。吾岂欲觊觎神器耶！怀宁王吾兄，宜入承大统。”乃遣使迎武宗于北边，帝以

太子监国。武宗迟回不至。夏五月乙丑，帝奉皇太后幸上都，率左右部诸王劝进。武宗即位。六月癸巳，立帝为皇太子，受金宝。帝遣使求经籍，有进《大学衍义》者，命詹事丞王约等节而译之。帝曰：“治天下，此一书足矣。”命与《图像孝经》、《列女传》并刊布天下。十一月戊寅，受玉册，领中书省、枢密院。

至大二年八月，立尚书省，诏帝兼尚书令。詹事院启金州献瑟瑟洞，请采之。帝曰：“吾以贤为宝，瑟瑟何用？若此者，后勿复言。”淮东宣慰使撒都献玉观音、七宝帽顶、宝带、宝鞍，俱却之。

四年春正月庚辰，武宗崩。壬午，罢尚书省。命中书右丞相塔思不花、知枢密院事铁木儿不花等参鞠尚书右丞相脱虎脱、左丞相三宝奴、平章政事乐实，右丞保八、左丞忙哥帖木儿、参知政事王罽罪状。丙戌，脱虎脱、三宝奴、乐实、保八、王罽俱伏诛。杖流忙哥帖木儿于海南，流平章政事速思不花于高丽。壬辰，诏世祖旧臣前平章政事程鹏飞、董世选，太子少傅李谦，少保张驴，中书右丞陈天祥、尚文、刘正，中书左丞郝天挺，御史中丞董士珍，太子宾客萧𣒗，参知政事刘敏中、王思廉、韩从益，侍御史赵君信，廉访使程钜夫，杭州达鲁花赤阿合马乘传至京师，咨以庶政。丁酉，云南行省左丞相铁木迭儿为中书右丞相，太子詹事完者、集贤大学士李孟并为中书平章政事。戊戌，中书右丞相塔思不花、徽政院使沙沙并为御史大夫。己亥，改尚书行省仍为中书行省。庚子，停各处营造。罢广武喀刺卫、万户等府。辛丑，塔失铁木儿知枢密院事。

二月乙巳，命和林、浙江二行省依前设左丞相，余省但置平章政事。辛亥，禁诸王、驸马擅据山场，听民樵采。罢阿老瓦丁买卖浙盐，供中政院食羊。禁宣政院违制度僧人。甲寅，罢江南行通政院、行宣政院。甲子，命中书平章政事李孟领国子监。丙寅，陕西行省平章政事孛罗帖木儿、江浙行省平章政事乌马儿、甘肃行省平章政事阔里吉思、河南行省参知政事塔失帖木儿、江浙行省参知政事万僧，坐前任赃罪及挟势害民，俱免官。庚午，思州蛮酋杨正思等来朝，赐金帛有差。是月，中书左丞相康里脱脱罢为江浙行省左丞相。

三月庚辰，诏前枢密副使吴元珪、前中书左丞拜降、前陕西行省右丞兀伯都刺至京师，同诸老臣议事。丙戌，罢五台山行工部。己丑，命毋赦谋反大逆、杀祖父母父母、妻妾杀夫、奴婢杀主等罪。庚寅，即皇帝位天大明殿，受诸王、百官朝贺。诏曰：

惟昔先帝事皇太后抚朕眇躬，孝友天至。践祚曾未逾月，授朕皇太子宝，领中书令、枢密使、百揆机务，悉听总裁，于今五年，先帝奄弃天下，勋戚、元老咸谓，大宝之承既有成命，非与前圣宾天而始征麻宗亲议所宜立者比，当稽前代故事即正宸极。朕以恤方新，诚有未忍，是用经时。今则上奉皇太后之命，下徇诸王劝进之诚，三月十八日于大都大明殿即皇帝位。

凡尚书省误国之臣，先已伏诛。同恶之徒，亦已放殛。百司庶政，悉归中书。命丞相铁木迭儿，平章政事完者、李道复等从新按治。可大赦天下。敢以前赦事相告者，以其罪罪之。

其可为法程拯民者，具如左方：一，凡制诏、号令、钱

粮、选法、刑名，一切政务，并从中书省闻奏、区处，敢有擅自奏请者，以违制论；一，内外百司，其清慎公勤五事备具者，优加迁擢，有贪污败事者，陈告得实，依条断罪；一，庶事更张，图治伊始，式遵世祖皇帝成宪，仰中书省参酌举行；一，凡言军民利病政事得失，有可采者，量加旌擢，如不可采，亦无罪谴；一，仰提调官申明累降条画，劝课农桑，经过军马及昔宝赤、探马赤等，毋得索取饮食刍藁，纵放头匹；一，康里军卫已罢，上项屯军悉听放还，其各处军马阵亡病死者常例存恤外，各加一半，云南等处新附汉军每名给布一匹；一，各投下、诸色人等不得擅招户计，诱占奴婢，违者治罪；一，站赤消乏，除海青外，应进献鹰犬，并令止罢，毋给诸王驸马投下及各衙门铺马；一，陈献地土及山场窑冶之人，并行治罪；一，比者宝合丁、乞儿八答私买所盗内府宝带，既已伏诛，今后得似前申献；一，民间和雇和买、一切难泛差役，除军人并大都至上都自备站户外，其余不论是何户计，一体均当；一，恢办商税、课租，亲遵旧制，法外多取及期盗入己者，依例究治；一，营筑中都，已令停罢，其余不急之役，截日停止；一，鳏寡孤独、废疾无恤者，除常例外，每人给至元钞一贯；一，名山大川、圣帝明王、忠臣烈士，凡在祀典者次第加封，除常祀外，主者施行；一、韩脱因不花、唐华、郑阿思兰等已经昭雪，元没资产悉还本家，今后内外重囚，省部再三详谏，方许奏准；一，比年诏赦频数，吏贪民盗，不知敬畏，自今以始，其各洗心节虑，以保厥身，非常之恩，不可再觐。

於戏！凡我有官君子，皆古所谓治天职、食天禄者，宜一心

力，钦乃有司，无替朕命。

遣金知枢密院事不兰奚颁即位诏于高丽。辛卯，御史中丞李士英为中书左丞。丁酉，命月赤察儿依前为太师，宣徽使铁哥为太傅，集贤大学士典出为太保。是月，前陕西行省左丞兀伯都刺为中书右丞，昭文馆大学士察罕为参知政事；平章政事、知枢密院事床兀儿，钦察亲军都指挥使脱火赤拔都儿，左丞相、知枢密院事铁木儿不花，并录军国重事；知枢密院事也速、兼山东河北蒙古军都万户也先帖木儿、仁虞院事也儿吉尼、太子詹事月鲁帖木儿并知枢密院事。

夏四月戊申，以即位告天地于南郊。丁巳，罢中政院。戊午，以即位告于太庙。辛酉，敕国子师儒之职，有才德者，不拘品级选用。乙丑，封知枢密院事铁木儿不花为宣宁郡王。丁卯，诏曰：

朕惟食货，生民之本，权以币帛，先在适时。我世祖皇帝参酌古今，立中统、至元钞法，天下流行，公私蒙利，五十年于兹矣。比者尚书省不究利病，辄意变更，既创至大银钞，又铸至大铜钱。钞以倍数太多，轻重失宜；钱以喜铸弗给，新旧滞用；曾未用期，其弊滋甚，爰咨廷议，允协輿言，皆愿变通，以复旧制。其罢资国院及各处泉货监提举司，买卖铜器听民自便。应尚书省已发各处至大钞本及至大铜钱，截日封贮，民间行使者，赴行用库倒换。有司依旧印造中统钞，子母并行，以便民用。

改封北宁王帖里哥儿不花为为湘宁王。革僧、道、也里可温、答失蛮、白云宗、头陀教等各衙门免差发。

五月癸酉，八百媳妇及大、小车里蛮俱叛，命云南王及

行省右丞阿忽台讨之。丙子，命翰林国史院修大行皇帝《实录》及累朝皇后、功臣列传。壬午，金齿蛮来献驯象。戊子，罗鬼蛮来献方物。

六月乙巳，命侍臣咨访内外才堪信用者，悉以名闻。仍戒饬诸王恪恭乃职。甲寅，封亦思丹为怀仁郡王。丁巳，命和林行省右丞孛里、马速思经理青海屯田。己未，封知枢密院事孛罗为泽国公。甲子，请大行皇帝谥于南郊，上尊谥曰仁惠宣孝皇帝，庙号武宗。己巳，魏王阿木哥入朝。命翰林侍讲阿林铁木儿以国语译《贞观政要》，使蒙古、色目人诵习之。

秋七月癸未，甘州地震，大风有声如雷。己亥，诏谕中书省曰：“朕前戒近侍，毋辄以文记传旨中书，自今敢有犯者，不须奏闻，直捕其人，付刑部究治。”敕御史台选老成更事者为监察御史。

闰七月辛丑，遣国子祭酒刘赓至曲阜，以太牢祀孔子。丙午，祔武宗皇帝于太庙。戊申，封李孟秦国公，亦怜真乞剌思为司徒。己酉，吐蕃寇礼店、文州，命亦怜真等讨之。壬戌，立上都通政院，邻蒙古诸驿。乙丑，鲁国大长公主祥哥剌吉进号皇姐大长公主。遣使招谕黑水、白水等蛮。

八月己巳朔，裁京官诸司员额，并依至元三十年旧制。丙戌，安南世子陈日昝来贡方物。

九月己亥朔，遥授左丞相不花进太尉。壬子，改元皇庆，诏曰：

朕赖天地祖宗之灵，纂承圣绪，永惟治古之隆，群生咸遂，国以又宁。朕夙兴夜寐，不敢怠遑，任贤使能，兴滞补弊，庶

其臻兹敛时五福，用敷锡厥庶民，朕之志也。逾年改元，厥有彝典，其以至大五年为皇庆元年。

是月，遣都水监木八剌沙往取杭州所造龙舟，中书省臣谏曰：“陛下践阼，诞告天下，凡非宜取索，勿得擅进。若取此舟，有乖有旨。”诏止之。

冬十月戊辰朔，有事于太庙。丁丑，禁僧寺勿冒占民田。戊子，以故太师月儿鲁那演子木剌忽知枢密院事。壬辰，议收至大银钞。

十一月戊戌，封司徒买僧为赵国公。辛亥，诸王不里牙敦等诬告八不沙不法，诏窜不里牙敦于河南。己未，辽阳行省平章政事阿散为中书平章政事。丙寅，加徽政使罗源大司徒。

十二月癸酉，封宣政使爱薛秦国公。壬午，诏曰：“今岁不登，民何以堪。春搜其勿令供亿。”甲申，占城国遣使贡方物。庚寅，曲赦京师大辟囚一人，并流罪。乙未，敕内降旨，一切勿行。遣礼部尚书乃马台等颁皇庆元年历于安南国。

皇庆元年春正月戊戌朔，召河南行省右丞王约至京师。庚子，帝谕御史大夫塔思不花曰：“凡大臣不法，卿等劾奏勿避，朕自裁之。”加太师、录军国重事、知枢密院脱儿赤颜开府仪同三司，封淇阳王。庚戌，封知枢密院事、驸马丑汉为安远王，出总北军。癸丑，旌表广州路番禺县孝子陈韶孙。戊午，改封济王朵列纳为吴王。崇福使也里牙袭封秦国公。是月，以中书平章政事李孟为翰林学士承旨、知制诰，仍兼平章政事。

二月甲戌，改和林行省为岭北行省。己卯，八百媳妇蛮

来献驯象。壬午，封孛罗为永丰郡王。

三月己亥，以帝生日为天寿节，高丽国遣使来贺圣诞。戊申，前河南行省平章政事塔失海牙为御史大夫。甲寅，诸王也先不花等遣使来贡方物。丙辰，封同知徽政院事不兰奚为赵国公。庚申，遣户部尚书马儿经理河南屯田。乙丑，封诸王塔思不花为恩平王。

夏四月癸酉，车驾幸上都。封郕国大长公主忙哥台为大长公主。壬午，封知枢密事木剌忽为广平王。

五月丙申朔，中书平章政事阿散为中书左丞相，江浙行省平章政事张驴为中书平章政事。加枢密院事也先帖木儿开府仪同三司。

六月乙丑朔，日有食之。丁卯，天雨毛。己未，京师地震。丁亥，敕罢封赠，戒左右勿侥幸加官。

秋七月丙午，中书参知政事贾钧乞病归，赐钞三百锭，给安车还籍。

八月己卯，吏总尚书许师敬为中书参知政事。庚辰，车驾至自上都。辛卯，安南国王陈益稷来朝。

九月戊戌，罢讨八百媳妇及大、小车里，以玺书招谕之。辛丑，遣司徒田忠良等至真正府玉华宫祀睿宗御容。八百媳妇及大、小车里蛮来献方物。甲辰，参议中书省事阿里海涯为参知政事。

冬十月甲子，有事于太庙。癸未，中书参知政事察罕加平章政事、商议中书省事。戊子，翰林学士承旨玉连赤不花等进顺宗、成宗、武宗《实录》。辛卯，以诸王入觐，赦天下，敢以赦前事相告者，以其罪罪之。

十一月丙午，谕六部官毋逾越奏事。丙辰，晋封濮阳王、驸马脱脱木儿为岐王。庚申，占城国来献犀象。缅甸遣使来朝。云南不农蛮岑福来朝。

十二月癸亥，中书平章政事李孟致仕。枢密副使张珪为中书平章政事。庚辰，知枢密院事答失蛮罢。丁亥，遣使祈雪于社稷及岳镇海渚。定省部减削繁冗格例。是月，诸王春丹叛。黎贼王奴欧等作乱，伪称平章、元帅。

二年春正月甲午，察罕脑儿等处宣慰使伯忽为御史大夫。辛丑，封乞台普济为安吉王。中书右丞相铁木迭儿以病免。丁未，太府卿秃忽鲁为中书右丞相。是月，黎贼王奴欧降。

二月甲子，立宏吉刺氏为皇后，遣使祭告天地、太庙。丁丑，命张珪领国子学。丁亥，帝谕左右曰：“回回人以宝玉鬻于官，朕思此物何足为宝？惟善人乃可为宝。善人用，则国家安，此朕所宜宝也。”

三月丙申，御史中丞脱欢答刺罕为御史大夫。杖流高丽陪臣李思温、金深于临洮。丙午，诏曰：

《易》述家人，《诗》美关雎，故帝王受命，必建置后妃，所以顺天地之义，重人伦之本也。宏吉刺氏夙由世戚，来嫁我家，事皇太后有孝恭之懿，辅朕躬着淑慎之善。于二月十六日授以册宝，立为皇后。

於戏！位乎内，位乎外，得政道之相成；用之国，用之乡，庶民风之不变。咨尔有众，咸使闻知。

壬子，右丞相秃忽鲁等以天时亢旱，又霜雨沙，乞黜免，以当天意。帝不允。甲辰，高丽王王谥以长子焘入觐，请传位于焘。诏授焘征东行省左丞相、上柱国，袭封高丽国王。

夏四月丙戌，遣纳剌忽等护送高丽王谔归国。乙亥，车驾幸上都。辛巳。加御史大夫伯忽开府仪同三司。

五月辛丑，中书右丞兀伯都剌为平章政事，左丞八剌脱因为右丞，参知政事阿里海牙为左丞，参议中书省事秃鲁花帖木儿为参知政事。是月，中书平章政事张珪罢为大司徒。

六月己未，京师地震。癸亥，秃忽鲁等以灾异，乞赐放黜，不允。丙寅，京师地震。辛未，以参知政事许师敬纲领国子学。甲申，以宋儒周敦颐、程颢、程颐、张载、邵雍、司马光、朱熹、张栻、吕祖廉及前中书左丞许衡从祀孔子庙廷。河决陈、亳、睢等州及开封、陈留县。

秋七月壬寅，京师地震。

八月丁卯，车驾至自上都。庚午，御史薛居敬为中书参知政事。是月，崇明、嘉定二州海溢。

九月癸巳，宣徽院使完者知枢密院事。戊申，封脱欢为安定王。

冬十月己卯，敕中书省议科举法。封不答里为安德王。乙酉，旌表高州民萧又妻毛氏贞节。

十一月甲辰，昭曰：

惟我祖宗以神武定天下，世祖皇帝设官分职、征用儒雅，崇学校为育才之地，设科举为去取之方，规模宏远矣。朕以眇躬，获承丕祚，继志述事，祖训是式。若稽三代以来，取士各有科目，要其本末，举人宜以德行为首，试艺则以经术为先，词章次之。浮华过实，朕所不取。爰命中书参酌古今，定其条制。其以皇庆三年八月，天下郡县举其贤者、能者，充赋有司。次年三月会试京师，中选者朕将亲策焉。

是月，辰州蛮酋吴千道作乱。
十二月丙子，定百官致仕资格。

卷十七

本纪第十七

仁宗下

延祐元年春正月丁亥，授前中书右丞刘正平章政事、商议中书省事。庚子，江浙行省左丞高昉为中书参知政事。丁未，诏曰：

惟天惟祖宗眷佑有国，朕自即位于今四年。比者，阴阳失和，灾异屡见，岂朕修德之未至欤？抑官吏未选，而政令之或乖欤？思以回天心、召和气，侧身修行，实切朕衷。庸敕有司，务共乃职，爰布维新之令。诞敷济众之仁。可改皇庆三年为延祐元年。所有合行事理，条列于后：一，上都、大都差税，自延祐元年蠲免二年；一，曾经赈济灾户，免延祐元年差税；一，内外一切不急之役，截日停罢；一，普免百姓欠负钱粮；一，流民所至，有司勤加存恤，复免差役三年，原抛田产，尽行给复；一，除谋反大逆、谋杀祖父母父母、妻妾杀夫、奴仆杀主及强盗、伪造宝钞、官吏侵盗钱粮，不在原宥外，其余一切罪犯，并行释放，一，湖广、云南叛蛮如能悔过，即与免罪。

於戏！以实应天，爰聿新于庶政，用孚有众，同保合于

太和。咨尔多方，体予至意。

庚戌，右丞相秃忽鲁等以灾变，乞罢黜，不允。

二月甲戌，侍御史赵世延为中书参知政事。壬午，右丞相秃忽鲁罢，阿散为中书右丞相、监修国史。癸未，中书参知政事高昉罢为集贤大学士。

三月癸卯，暹国来贡方物。丙午，封驸马阿鲁秃为赵王。戊申，车驾幸上都。癸丑，中书参知政事察罕致仕。是月，沅州徭贼蒲狗、向金朝等来降。

闰三月丁丑，马八儿国来贡方物。

夏四月己酉，敕郡县官勤职者，赐币帛。以铁木迭儿录军国重事、监修国史。立回回国子监。是月，皇后宏吉剌氏崩。五月戊寅，京兆府为许衡建鲁斋书院，降玺书旌之。

六月戊子，召河南行省左丞相卜怜吉歹至京师，封为河南王。

秋七月庚午，开下番市舶禁。是月，遣使赐高丽国宋秘阁书籍一万七千卷。

八月戊子，车驾至自上都。

九月己巳，复以铁木迭儿为中书右丞相，阿散为左丞相。罢陕西行御史台。

冬十月戊申，复甘肃屯田，立沙、瓜等处屯储总管万户府。庚戌，遣张驴经理江南田赋。

十一月戊辰，通政使萧拜住为中书右丞。辛未，翰林学士承旨答失蛮知枢密院事。癸酉，前中书右丞相秃忽鲁知枢密院事。

十二月己亥，敕中书省，孔子五十三代孙当袭衍圣公者，

以名闻。庚子，复以翰林学士承旨李孟为中书平章政事。

二年正月乙亥，遣宣抚使分十二道，问民疾苦，黜陟官吏。命中书臣分领庶务。禁南人贩卖妻子为驱。是月，黄圣许复叛，陷忠州。

二月己卯朔，会试进士于礼部。壬寅，云南王老的来朝。

三月己卯，廷试进士，赐忽都答儿、张起岩等五十六人及第、出身有差。庚午，上皇太后尊号曰仪天兴圣慈仁明懿寿元合德泰宁福庆后皇太后。免延祐二年四月初一日以前百姓拖欠课税，官吏失陷短少钱粮，亦与免征。丁丑。中书平章政事张驴出为江浙行省平章政事。

夏四月戊寅朔，日有食之。辛巳，赐进士恩荣宴于翰林院。辛丑，赐会试下第举人从七品官致仕，及教授、学正、山长等有差，后不为例。乙巳，车驾幸上都。丙午，封诸王察八儿为汝宁王。五月戊申朔，复立陕西行御史台。乙丑，秦州成纪县山移，陷没民居。甲戌，授宦者续元晖昭文馆大学士。

六月戊戌，河决郑州。丙午，缅甸王遣其子脱刺合来贡方物。

秋七月乙卯，赣州贼蔡五九等作乱，自称洞王。己丑，命铁木迭儿总宣政院事，诏谕中外。

八月丙戌，蔡五九陷汀州宁化县，僭号蔡王，遣江浙行省平章政事张驴等讨之。己丑，车驾至上都。乙未，以蔡五九之乱，罢江浙经理田赋及冒括田租。壬寅，诏江浙行省印《农桑辑要》万部，颁行各路。旌表贵州达鲁花赤相兀孙妻脱脱真死节。

九月丁未，敕吏部尚书王居仁鞠张驴括江浙田租，逼死九人之罪。壬戌，蔡五九伏诛。

冬十月丁丑，封托忽赤为威宁郡王，忽儿赤帖木儿不花为赵国公。庚辰，淮西廉访使郭贯为中书参知政事。壬午，有事于太庙。乙未，以同知枢密院事帖木儿脱知枢密院事。授白云宗道人沈明仁荣禄大夫、司空。丁酉，加铁木迭儿太师。癸卯，八百媳妇蛮来贡驯象。

十一月丙午，彗星见。辛未，以星变，赦天下，免民间拖欠差税，大都、上都、兴和三路免差税三年，其余路分轻重减免有差。甲戌，封武宗长子和世㻋为周王。左丞相阿散等以星变，乞罢黜。帝曰：“此朕之过，岂卿等所致，其复乃职。苟政有差谬，勿惮更改，以安百姓。”

十二月庚寅，旌表汀州宁化县民赖禄孙孝行。日月，广东黎贼陷横州永淳县，杀达鲁花赤。

三年春正月乙巳，特授昔宝赤合剌合孙、达鲁花赤脱欢金紫光禄大夫、太尉。丙午，封前左丞相忽鲁答儿寿国公。辛酉，以同知枢密院事买闾知枢密院事。是月，高丽国王王焘来朝。

二月戊寅，命湖广行省谕安南，归占城国王。

三月辛亥，授高丽世子王暉开府仪同三司，封沈王。加将作院使吕天麟大司徒。甲寅，命中书右丞萧拜住等护送周王和世㻋之云南。癸亥，车驾幸上都。是月，德庆路徭叛。

夏四月壬午，敕卫辉、昌平官吏修殷比干、唐狄仁杰祠。庚子，上都留守憨剌合儿知枢密院事。

五月辛亥，江西行省右丞斡赤为典瑞院使、大司徒。庚

申，大都留守伯铁木儿、中书右丞萧拜住并为中书平章政事，左丞阿里海牙为右丞，参知政事郭贯为左丞，参议不花为参知政事。

六月乙亥，封孟子父为邾国公，母为邾国宣献夫人。丙子，横、融、宾、柳等州徭叛。己卯，诏谕百官各勤其职，毋隳废庶政。

秋七月壬子，命御史大夫伯忽、脱欢答刺罕整治台纲，仍诏谕中外。乙卯，封月鲁帖木儿为保恩王。丙寅，燕帖木儿知枢密院事。

八月癸酉，兵部尚书乞塔为中书参知政事。己卯，车驾至自上都。

九月辛丑，中书左丞郭贯罢为集贤大学士，集贤大学士王毅为中书左丞。

冬十月辛未，江南行台侍御史高昉为中书参知政事。壬申，有事于太庙。是月，周王和世㻋至延安，陕西行省左丞相阿思罕、平章政事塔察儿、行台御史大夫秃鲁卜、御史中丞脱欢与周王常侍教化等奉和世㻋举兵反。

十一月壬寅，命监察御史监治岭北行省。乙巳，改澧州路安抚司为安定军民府。

十二月庚午，知枢密院事秃忽鲁为陕西行省左丞相。丁亥，立皇子硕德八剌为皇太子，兼中书令、枢密使。以同知枢密院事床兀儿知枢密院事。

四年春正月戊申，诏曰：

朕仰惟太祖皇帝圣训，若曰应天顺人，惟以至诚，保安天下，宜遵正道。重念列圣继承丕祚，我世祖皇帝混一之初，顾予

菲德，惧勿克荷，不遑宁处。比者和世琜年幼，听信佞人阿思罕等谋为不轨，构乱我家，已为陕西行省行台管军官等将叛贼阿思罕、教化、彻里哥思等斩首以徇。其同谋及协从者，欲一概加诛，有所不忍。宜推旷荡之恩，开以自新之路。可大赦天下。凡常赦所不原者，罪无轻重，咸赦除之。若有避罪逃从逆党窜匿者，赦书到日，限百日内出首，与免本罪。限外不首，复罪如旧。敢以赦前事告讐者，以其罪罪之。

乙卯，以襄宁王按灰代辽王脱脱镇云南。丙辰，知枢密院事完者为云南行省平章政事。

闰月壬申，流魏王阿木哥于耽罗，寻移大青岛。庚辰，晋封镇远王孛罗为冀王。丙戌，诏曰：

朕荷上天之鸿禧，纂列圣之丕绪。比承皇太后慈训，若稽世祖皇帝成宪，深惟国本，宜建储嗣。亲王、大臣询谋佖同，皇子硕德八剌地居嫡长，天锡仁孝，可以主重器，奉宗祧。已于延祐三年十二月十九日，授以金宝，立为皇太子，中书令、枢密使一如旧制。因前盛典，庸布新条：一，勉励学校，以作人才；一，劝课农桑，耕作以时；一，免探马赤军人合纳粮税；一，经行屯戍军马勿骚扰百姓；一，免各路差税有差；一，停罢内外不急之役；一，免征应合追赔系官钱粮；一，存恤鳏寡孤独；一，岳渎、帝王、忠臣烈士，除常祀外，长吏择日致祭。

於戏！万国以贞，允属元良之重；四方其训，永建太平之基。咨尔臣民，体予至意。

辛卯，封别帖木儿为汾阳王。

二月甲辰，敕州县复置杜仓。

三月辛卯，车驾幸上都。甲午，高丽国遣使来献方物。

夏四月壬寅，加太常礼仪院使拜住大司徒。戊申，答合孙寇边，吴王秃烈纳等败其众于和怀。己未，翰林学士承旨忽都鲁儿迷失、刘赓等译《大学衍义》以进，敕翰林学士阿怜帖木儿，以国语译之。

五月辛未，授上都留守阔阔出开府仪同三司、大司徒。乙亥，封郅国大长公主忙哥台为皇姑大长公主。壬午，翰林学士承旨赤因帖木儿为中书平章政事，平章政事兀伯都剌罢为集贤大学士。己丑，中书左丞阿里海涯为中书平章政事，参知政事乞塔为中书右丞，高昉为中书左丞，参议换住、张思明并为参知政事。

六月戊申，铁木迭儿罢，左丞相阿散为中书右丞相。己酉，兀伯都剌复为中书平章政事。壬子，中书参知政事张思明罢为工部尚书，工部尚书王桂为中书参知政事。丁巳，安南国来贡方物。

秋七月乙亥，中书平章政事李孟罢为翰林学士承旨，江浙行省左丞王毅为中书平章政事。壬午，特授中卫亲军都指挥使孛兰奚为太尉。己丑，成纪山崩，压死居民。

八月丙申，车驾至自上都。

九月丙寅，宣徽使伯答沙为中书右丞相，阿散改左丞相。故事右丞相必用蒙古勋臣，阿散回回人，遂固辞，帝允之。

冬十月甲午朔，有事于太庙。壬寅，遣御史大夫伯忽、参知政事王桂陕西岳镇，并赈成纪县灾民。

十一月己卯，浚扬州运河。辛卯，以高丽国王王焘为开府仪同三司、驸马、高丽国王。

十二月乙巳，置詹事院，以郭贯为太子詹事。丁巳，秃满迭儿知枢密院事。特授晋王府长史按摊出金紫光禄大夫，封鲁国公。

五年春正月丙子，安南国来贡方物。丁亥，会试进士于礼部。加湖广行省平章政事买住大司农、鲁国公。

二月癸巳朔，日有食之。丁酉，封诸王晃火帖木儿为喜王，秃满帖木儿为武平王。

三月戊辰，廷试进士，赐忽都达儿、霍希贤等五十人及第、出身有差。乙亥，特授安远王、驸马丑汉开府仪同三司、录军国重事、知枢密院事。加晋王府内史拾得闰荣禄大夫，封桓国公。

夏四月壬辰，安吉王乞台普济卒。己亥，耽罗猎户成金等作乱，敕高丽国王讨之。庚戌，侍御史敬俨为中书参知政事。戊午，车驾幸上都。

五月辛酉朔，八番顺元蛮酋来献方物。丁卯，御史中丞亦列赤为中书右丞。己卯，陇西县山崩，压死居民。

六月乙巳，妖人赵子玉等谋往高丽迎魏王阿木哥为乱，事觉伏诛。

秋七月己未朔，加宦者李邦宁开府仪同三司。辛酉，遣吏部尚书卜颜、必阁赤买闾使高丽，责问魏王阿木哥及耽罗叛状。壬申，诸王也舍、失刺吉等，坐附叛王不里牙敦，持两端，流也舍于江西，失刺吉于湖广。壬午，罢河南行省左丞陈英等所括民田。

八月庚子，车驾至自上都。

九月癸亥，大司农买住进司农丞苗好谦所撰《载桑图

说》使印千本散之民间。丙寅，广西蛮酋黄法扶、何凯等来献方物。丁卯，中书右丞亦列赤为平章政事，左丞高昉为右丞，参知政事换住为左丞，吏部尚书燕只干为参知政事。丙戌，金太常礼仪院事狗儿为中书参知政事。丁亥，立行宣政院于杭州。

冬十月己丑，播州南宁蛮酋洛麼叛，敕恩州守臣换住哥招谕之，洛麼来献方物。甲午，有事于太庙。

十一月己巳，以同知枢密院事忠嘉知枢密院事。

十二月壬辰，特授集贤大学士脱列大司徒。

六年春正月丁巳朔，暹国来贡方物。癸酉，特授同知徽政院事丑驴答刺罕金紫光禄大夫、太尉。己卯，广东徭贼赵郎庚等作乱，敕江西行省讨之。是月，前中书右丞尚文为太子詹事。

二月丁亥朔，日有食之。丁酉，云南阁里爱俄、永昌蒲蛮阿八刺等并叛，敕云南行省讨之。

三月丁巳，以天寿节释重囚一人。辛酉，召见太子詹事尚文于嘉禧殿之后阁。帝谓太保曲出曰：“是世祖皇帝效力人也。”又诏文曰：“托汝善辅太子，有言勿吝，此朕意也。”丙寅，特授翰林学士承旨八儿思不花开府仪同三司、大司徒。己巳，晋封保恩王月鲁帖木儿为恩王。

夏四月庚子，车驾幸上都。铁木迭儿为太子太师。

五月丙子，加安南国王陈益稷开府仪同三司。是月，云南行省左丞朵儿只讨永昌南窝蒲蛮，大败之，其酋阿良等降。

六月癸丑，以羽林军万人隶东宫。

秋七月丙辰，缅甸国来贡方物。来安路部官岑世兴叛，赐

玺书招谕之。壬戌，以者连怯耶儿万户府隶东宫，置右率卫府。甲戌，皇姊鲁国大长公主作佛事，擅释全宁路重囚二十七人。敕按问全宁官吏阿纵不法，仍追囚还狱。

八月甲申，河东山西道宣慰使张思明为中书参知政事。庚子，车驾至自上都。

闰八月壬申，太傅、御史大夫伯忽为太师。

九月甲申，徽政使朵带为太傅，中书参议钦察为中书参知政事。癸卯，诏四宿卫以贪污受刑夺职不叙者，勿令入禁庭。

冬十月乙卯，诏严鞠白云宗道士沈明仁奸恶。戊午，遣中书右丞相伯答沙授皇太子玉册。辛酉，札鲁忽赤铁木儿不花为御史大夫。

十一月丙子，诏曰：

朕惟世祖皇帝宪章，隆古垂裕，万世灼然，垂训豫建嫡嗣。是以协谋金同，立皇子硕德八剌为皇太子。若稽册命，属当举行，于今十月七日授以玉册，大庆礼成。

於戏！天地之德，宗社之灵，国本既崇，人心攸系。咨尔有众，体予至怀。

十一月辛卯，木邦路蛮酋带邦作乱，敕云南行省招抚之。乙巳，秘书卿苦思丁为大司徒。

十二月壬戌，命皇太子参决国事。封宋儒周颐为道国公。壬申，中书平章政事王毅以亲老致仕，许之，仍赐其父币帛。

七年春正月辛巳朔，司天监奏，是日日食。帝斋居损膳，辍朝贺。既而不食。癸未，帝御大明，受诸王百官贺。丁亥，帝不豫。辛丑，崩于光天宫，年三十有五，在位九年。癸卯，

葬起辇谷。

三月乙未，上尊谥曰圣文钦孝皇帝，庙号仁宗，国语曰普颜笃皇帝。

史臣曰：“仁宗孝慈恭俭，不迓声色，不殖货利。侍宗戚勋旧，始终以礼，大臣亲老，时加恩赆。有司奏大辟，辄恻怛移时，晋宁侯甲兄弟五人，俱坐法死，帝悯之，宥一人以养其父母。崇尚儒学，兴科举之法，得士为多，可谓元之令主矣。然受制母后，嬖幸之臣觊权用事，虽稔知其恶，犹曲贷之。常问右丞相阿散曰：‘卿日行何事。’对曰：‘臣等奉行诏旨而已。’帝曰：‘祖宗遣训，朝廷大法，卿辈犹不遵守，况朕之诏旨乎。’其切责宰相如此。有君而无臣，惜哉！”

卷十八

本纪第十八

英宗

英宗睿圣文孝皇帝，讳硕德八剌，仁宗长子也。母曰庄懿慈圣皇后宏吉刺氏。以大德七年二月甲子生。

仁宗延祐三年，议立皇太子，兴圣太后属意于帝。帝入见太后固辞曰：“臣幼，宜立臣兄和世琜。”太后不从。冬十二月丁亥，立为皇太子，授金宝。六年冬十月戊午，受玉册。诏百司庶务，先启皇太子然后奏闻。

七年春正月，仁宗不豫，帝忧形于色，焚香告天，乞以

身代。辛丑，仁宗崩。哀毁逾礼，日歆一粥。甲辰，皇太后复以铁木儿为中书中右丞相。丙午，遣使谏内外讼狱。

二月壬子，浙江行省左丞相黑驴为中书平章政事。戊午，祭社稷。辛酉，中书平章政事赤斤帖木儿、御史大夫脱欢并罢为集贤大学士。甲子，逮四川行省平章政事赵世延至京师。丙寅，陕西行省平章政事赵世荣为中书平章政事，江西行省右丞木八剌为中书右丞，参知政事张思明为左丞，中书左丞换住出为岭北行省右丞。己巳，罢上都乾元寺规运总管府。辛未，括诸路系官山场、河泊、窑冶、庐舍。壬申，召陕西行台御史大夫答失铁木儿至京师。丁丑，夺翰林学士承旨李孟韩国公敕命。戊寅，中书平章政事兀伯都剌出为甘肃省平章政事，阿礼海涯出为湖广行省平章政事。铁木迭儿以皇太后命，杀集贤大学士杨朵儿只、崇祿院使萧拜住，并籍其家。

三月壬午，爪哇国来贡方物。戊子，诏诸王、驸马流窜者，还就分邑。庚寅，帝即位于大明殿，诏曰：

洪惟太祖应期抚运，肇开帝业；世祖皇帝神机睿略，统一海内，以圣继圣，迨我先皇帝，至仁厚德，涵濡群生，君临万国，十年于兹。以社稷之远图，定天下之大本，协谋宗亲，授予册宝。方春宫之与政，遽昭考之宾天。诸王近戚，无勋硕辅，咸谓朕宜体先皇帝付托之重，既深系乎人心，讵可虚于神器，合辞劝进，诚意交孚。乃于三月十一日，即皇帝位于大明殿。

可大赦天下。腹里被灾路分，据延祐七年合该丝线，十分为率，拟免五分；其余诸路丝线并江淮夏税均免三分之一。延祐七年以前逋欠差徭税银，并行蠲免。已征入主典之手，不

在蠲免之限。各处站赤消乏，毋泛滥给驿。差役不均，监察御史、廉访司严行纠治。远近诸军，其阵亡者，常例存恤外，更展限一年。本管官及奥鲁毋非理科征。两广、福建等处啸聚贼徒，诏书到日，限六日内出官自首，许免本罪，限外不悛，依常收捕。务农所以厚民，劝学所以兴华，各处提调官加意勉求实效。岳渎、帝王，诸在祀典者，长吏择日致祭。

是日尊皇太后为太皇太后，诏曰：

朕惟为治之端，无加于立孝，根本之内，莫大于尊亲。朕肇纘丕图，恪遵彝典。钦惟仪天兴圣慈仁昭懿寿元全德泰宁福庆皇太后仁明渊静，淑睿懿恭；定大策于两朝，功施社稷；著徽音于四海，庆衍本支。夙荷恩慈，抚予眇质，恩仰酬于厚德，宜首进于隆名。谨上尊称曰太皇太后，其应行典礼，令有司讨论以闻。

壬辰，太皇太后受百官朝驾于兴圣宫。铁木迭儿进开府仪同三司、上柱国、太师。丙申，斡罗思等来降，赐钞万四千贯，还其部。戊戌，敕阴阳、医官、匠人勿承荫。辛丑，禁擅奏玺书。以枢密院兼领左右卫率府。壬寅，翰林学士承旨李孟降为集贤侍讲学士。御史台请诏谕百司，以肃台纲。帝曰：“卿等但守职尽言，善则朕从之，否亦不汝罪也。”甲辰，诏中外毋沮议铁木迭儿。丙午，有事于南郊，告即位。

夏四月庚戌，有事于太庙，告即位。诏群臣曰：“一岁惟四祀，使人代之，不能致如在之诚。朕必终身莅祀事，谕卿等知之。”廷臣言：“祀事毕，宜赦天下。”帝曰：“赦不可屡下，使杀人者获免，则死者何辜？”命中书省陈便宜事行之。河南、湖广、辽阳三行省丞相并降为平章政事，惟征东行省

以高丽王不降。乙卯，封诸王彻彻秃为宁远王。戊午，祀社稷，告即位。己未，绍庆路洞蛮叛。平章政事王毅、中书右丞高昉征理京师诸仓库粮帛亏额。庚申，太常礼仪院使拜住为中书平章政事。戊辰，车驾幸上都。封高丽王从子王煦为鸡林君公。有因近侍献七宝带者，帝曰：“朕即位不闻卿等荐贤，而为人进宝，是以利诱朕也，其还之。”照刷宣徽院文卷。

五月庚辰，杀上都留守贺伯颜，籍其家。己丑，中书左丞相阿散出为岭北行省平章政事。中书平章政事拜住为中书左丞相。乃剌忽、塔失海牙并为中书平章政事，只儿哈郎为中书参知政事。辛卯，中书参知政事钦察罢为集贤大学士。乙未，请大行皇帝谥于南郊。戊戌，岭北行省平章政事阿散、中书平章政事黑驴、御史大夫脱忒哈、徽政院使失列门等与黑驴母亦列失八谋废立，事觉，俱伏诛。辛丑，知枢密院事铁木儿脱为中书平章政事。甲辰，诏曰：

朕肇登大宝，祇遵先猷，仍图任于旧人，庶共新于治效。岂期邪党辄蕴私心。迨者阿散、黑驴、脱忒哈、失列门、亦列失八等潜结诡谋，挠乱国政，既自作于不靖，固难逭于严诛。贺伯颜轻侮诏书，殊乖臣礼，不加惩创，曷示等威。今已各正典刑，籍没其家。

於戏！惟帮国之用刑，以靖群慝；俾人臣之知戒，勿蹈非彝。咨尔有众，体驰至怀。

丁未，封诸王王禅为云南王。

六月己酉，流徽政院使米薛迷干于金刚山。甲寅，前太子詹事床兀儿坐党附阿散等，伏诛。丙辰，召河南行省平章政事野仙帖木儿至京师。收脱忒哈广平王印。丁巳，江西行

省左丞相脱脱为御史大夫，宗正札鲁火赤铁木儿不花为知枢密院事。戊午，罢詹事院。封知枢密院事塔失帖木儿为蓟国公。乙丑，西番酋盗洛各目降。己巳，高丽国遣使贺即位。是月，奉元整屋县妖僧圆明作乱，伪称皇帝。

秋七月甲申，知枢密院事买驴、哈丹并出为辽阳行省平章政事。乙未，甘肃行省平章政事钦察知枢密院事。丙申，中书平章政事乃剌忽罢。安王兀都思不花降封顺阳王，寻赐死。始制袞冕。庚子，江南行台御史中丞廉恂为中书平章政事。乙巳，知枢密院事也先吉尼出为江西行省平章政事。是月，云南花角蛮酋韦郎达叛。

八月戊申，祭社稷。丙辰，祔仁宗圣文钦孝皇帝、庄懿慈圣皇后于太庙。

九月壬辰，土番酋利族、阿俄等寇成谷。循州蛮酋泰元吉叛。庚子，慈利州山民贞公纠合诸洞蛮酋并叛，遣湖广行省讨之。甲辰，云南木邦路蛮酋给邦遣其子来献方物，赐币有差。马札蛮等使占城、占腊、龙牙门诸国，索驯象。是月，奉元路达鲁花赤伯颜获僧圆明，诛之。永宁路蛮酋和俄等叛，渠州吏目李荣贵死之。

冬十月丁未，有事于太庙。丁巳，酉阳州耸依洞蛮叛，遣四川行省讨之。戊午，车驾至自上都。诏太常院曰：“朕将以四时躬礼太室，宜与群臣集议其礼。此追远报本之道。毋以朕劳于对越而有所损。”安南国遣使贡方物。酉阳州蛮酋冉世昌遣其子率大、小石堤洞蛮入贡。癸酉，流诸王阿剌铁木儿于云南。

十一月丙子朔，帝御斋宫。丁丑，有事于太庙，至仁宗

皇帝室，呜咽流涕，左右感动。辛巳，以享太庙礼成，御大明殿受贺。甲申，修《仁宗实录》。戊戌，交趾蛮侬志德掠脱零、那乞等六洞。

十二月乙巳朔，诏曰：

朕祇遘谗谄，获承丕绪，念付托之惟重，顾继述之敢忘。爰以延祐七年十一月丙子被服袞冕，恭谢太庙。既大礼之告成，宜普天之均庆。属兹逾岁，用易纪元，于以导天地之至和，法春秋之谨始，可以明年为至治元年。

普免天下至治元年地丁粮十分之二。合该包银，除两广、海北、海南权且停搁，其余减免三分之一。大都、上都、兴和三路免差税三年。腹里被灾人民，与免丝料三分。燕南、山东、汴梁、旧德、汝宁灾伤地面，应有山场、河泊，并听民开采。诸人侵盗、失限、短少、减驳，合追系官钱粮，如在诏书以前，已有追理文案者，先将奴婢财产准折入官，不敷之数，并行释免。已征入主典之手，不在此例。回回人等典卖蒙古子女为驱者，分付所在官司应付口粮收养，听候中书省定夺。流移户口如欲复业者，官司给付行粮，拖欠差徭课程，并行倚阁，原抛田产，全行给付，行免差税三年。诸翼军人消乏，众枢密院分栋合并存恤。管军官放钱利息及翻倒文契者，诏书到日，尽行停搁。和林、甘肃、云南、四川、福建、广海新附汉军，除常例外，每名给布一匹，死者给烧埋银。站赤消乏，诸衙门及诸王、公主、驸马差使，常加撙节，一切关防约束事理，悉从旧制。若有不应差人及多余铺马者，严行断罪。煎盐、冶铁、运粮船户，合该杂泛差役，优免三年。腹里权住煽办，以纾民力。经过军马、昔宝赤、八儿赤

等，不得需索百姓，纵驼马损坏田禾树木。云南、四川、福建、广海之任官员，不幸病故，所在官司取勘应付车船铺马，仍给行粮，如有典卖人口，并听完聚，价不追还。商税三十分取一，已有定制。今正额之外，又索羨余，非多取人民，彼将焉出？仰将延祐七年实办到官数目为定额，已后永不多取，和雇和买，一切杂税差役，除边远军人及自备首思站赤外，不论何户，与民一体均当，诸内外七品官以上，有伟画长策、可以济世安民者，实封呈览。监察御史、布政廉访司，岁举可任守令者二人。隐居行义、不求闻达者，有司具状以闻。复封赠之制，中书省集议举行。

戊申，流前高丽王源于吐番撒思结之地。丁未，播州蛋蛮的羊龙等来降。乙卯，上太皇太后徽号曰仪天兴圣慈仁昭懿寿元全德泰宁福庆徽文崇裕太皇太后。翰林学士忽都鲁都儿译进宋儒真德秀《大学衍义》，帝曰：“修身治国，无逾此书。”赐钞五十贯。丙辰，以太皇太后加号，御大明殿受驾。丙寅，典端院使阔彻伯知枢密院事。戊辰，告祀太庙。己巳，中书右丞木八剌出为江西行省右丞，中书参知政事只儿郎为中书右丞，江南浙西道廉访使薛处敬为中书参知政事。上思州徭寇忠州。江浙行省平章政事伯颜索儿、江西行省平章政事白撒都并坐贪墨免官。

至治元年春正月乙酉，高丽国遣使献童女。丙戌，有事于太庙，丞相拜住为亚献，知枢密院事阔列伯为终献。是月，昭高丽王焘入朝。

二月戊申，祭社稷。改中都武卫为忠翊卫亲军都指挥使

司。己酉，建仁宗神御殿于普庆寺。丁巳，畋于柳林。杀监察御史观音保、锁咬儿哈的迷失，杖流监察御史成圭、李谦亨于奴儿干。

三月丁丑，缅甸遣使贡方物。庚辰，廷试进士泰普化、宋本等六十四人，赐及第、出身有差。辛巳，车驾幸上都。辛丑，铁失为御史大夫。

夏四月庚戌，有事于太庙。己未，吉阳黎寇宁远县。戊辰，宦者孛罗台为太常署令。太常卿言，刑人不应与祭，罢之。

五月壬午，迁武宗皇子图帖木儿于琼州。辛丑，太常礼院进太庙制图。

六月癸卯朔，日有食之。丁巳，前中书参知政事敬俨为陕西行台御史中丞。辛酉，赵宏祚等言事，敕勒归田里，仍禁妄言时政。乙丑，遣使铨江浙、江西、湖广、四川、云南五省官选。己巳，上都留守只儿哈郎为中书平章政事。

秋七月丁丑，有事于太庙。癸未，封太尉孛兰奚为和国公。乙酉，浑河决，被灾者二万三千三百户。吏部尚书教化、礼部郎中文矩颁即位诏于安南国。

八月戊申，祭社稷。庚戌，知枢密院事铁木儿不花整治军人贫乏，敕有敢扰害者罪之。乙卯，中书平章政事铁木儿脱罢为上都留守。壬戌，帝驻蹕兴和，左右以寒甚，请还大都。帝曰：“兵以牛马为重，民以稼穡为本。朕迟留，盖欲马得刍秣，民获刈获耳。岂畏寒乎？”雷州路海康、遂溪二县海溢。秦州成纪山崩。

九月丙子，车驾驻昂兀岭。壬辰，中书平章政事塔失海

牙坐受赅杖免。丁酉，帝至自上都。

冬十月庚戌，有事于太庙，左丞相拜住为亚献，御史大夫铁失为终献。癸丑，敕翰林集贤官年七十毋致仕。丙寅，河南行省参知政事你咱马丁坐残贼免官。

十一月戊寅，君臣上尊号曰继天体道敬文仁武大昭孝皇帝。己卯，以受尊号诏天下。左丞相拜住请释罪囚，不允。辛巳，铁失领左右阿速卫。

十二月辛巳，立亦启烈氏为皇后。癸卯，以立皇后诏天下。戊申，告谢太庙。己酉，封唆南臧卜为白兰王。庚戌，建太庙正殿。

二年春正月辛亥朔，安南国、占城国各遣使来贡方物。丁巳，有事于太庙，赐导驾耆老币帛。戊寅，敕有司存恤孔氏子孙贫乏者。癸未，流徽政使罗源于耽罗。封塔齐儿为兰国公。

二月庚子，立左右钦察卫亲军都指挥司，拜住兼都指挥使。癸卯，江南行台御史大夫钦察为中书平章政事，江浙行省参知政事王居仁为中书参知政事，薛处敬出为河南行省左丞。戊申，祭社稷。丁卯，辽阳行省平章政事买驴为中书平章政事。

三月己巳朔，御史台、翰林院、国子监同议兴举学校。壬申，张瑄复大司徒。癸酉，罢京师营役卒四万余人。辛巳，翰林特制沙的使高丽讯高丽王焘不奉敕书事。丙戌，以享太庙礼成，普减内外官一资。丁亥，凤翔道士王道明坐妖言伏诛。丁酉，车驾幸柳林。驸马许讷子速怯坐讐其父母伏诛。

夏四月戊戌朔，车驾幸上都。

五月己巳，封讼主速克八拉为赵国大长公主。庚午，奉符县民王驴儿等谋反，伏诛。癸未，御史大夫脱脱为江南行台御史大夫。立宗仁蒙古侍卫亲军都指挥使司。车驾幸五台山。甲申，只儿哈朗为御史大夫。云南行省平章政事答失铁木儿、朵儿只等坐受赇杖免。

闰月癸卯，诸王阿马、承童擅役诸王脱列捏卫士，并杖流海南。戊申，铁木迭儿子班丹为知枢密院事。丙寅，沅州洞蛮叛。禁诸司隔越中书省奏事。

六月丁卯，车驾幸五台山，禁扈从者毋践民禾。壬午，辰州江水溢。

秋七月壬子，诸王阇闾秃总兵北边。戊午，车驾次应州。曲赦金城县囚。辛酉，车驾次浑源州。中书右丞张思明有罪，杖免，籍其家。

八月戊辰，祭社稷。己巳，道州宁远县民符翼轸谋反，伏诛。甲戌，车驾次奉圣州。庚寅，铁木迭儿卒。

九月辛亥，车驾幸寿安山寺。丙辰，太皇太后崩。庚申，停今年冬祀南郊。

冬十月戊辰，有事于太庙，以国哀迎香去乐。丙子，押济思国来贡方物。杖谪江南行台御史大夫脱脱于云南。甲申，建太祖神御殿于兴教寺。己丑，拜住为中书右丞相。

十一月甲午朔，日有食之。己亥，以授右丞相诏天下。流民复业者，免差税三年。站户鬻妻子者，官赎回之。凡差役，先科商贾及富实之家，以优民力。差免陕西税十之三，各路官田租十之二，江淮创科包银全免之。安南国来贡方物。癸卯，京师地震。

十二月甲子朔，建昌州山崩。丁卯，中书平章政事买驴罢为大司农，廉恂罢为集贤大学士，集贤大学士张珪为中书平章政事。甲戌，来安路总官广西徭岑世兴叛。宣政院使八思吉思坐受刘夔冒献田地下狱。帝谓左右曰：“祖宗制法非朕所得私，八思吉思虽事朕日久，今有罪，朕不敢枉纵也。”论如律。庚辰，葛蛮安抚司副使龙仁贵叛。知枢密院事钦察台罢为宣政院使。中书参知政事速速为中书左丞，宗仁卫亲军都指挥使马刺为中书参知政事。癸未，绍兴路洞蛮把者叛。御史大夫只儿哈郎为知枢密院事。封诸王彻彻秃为武宁王。以地震、日食，命中书省、枢密院、御史台、翰林、集贤院会议国家利害之事以闻。

三年春正月癸巳，暹国遣使来贡方物。八番蛮酋韦思正等降，请纳岁租。乙未，有事于太庙。己亥，思明州盗起。壬寅，行中书省复兼总军政，前枢密院使吴元圭、王约为集贤大学士，翰林侍讲学士韩从益为昭文馆大学士，并商议中书省事。辛亥，命铁失振举台纲。静江路邕、柳渚州獠叛。丙辰，泉州民留应总作乱。

二月丙寅，翰林国史馆进《仁宗实录》。遣教化抚西番降族。戊辰，祭社稷。宾丹、爪哇等国来贡方物。癸酉，敕于柳林。辛巳，司徒刘夔、同佥枢密院事囊家歹有罪伏诛。颁行《大元通制》。戊子，封鹰师不花为赵国公。辛卯，诸王月思别遣使来朝。

三月壬辰朔，车驾幸上都。丁未，西番参卜郎叛，镇西武靖王搠思班以兵讨之。戊申，祔太皇太后于顺宗庙室，右丞相拜住摄太尉，奉册定，上尊谥曰昭献元圣皇后。

夏四月己巳，释大辟囚三十一人、杖五十七以上六十九人。己卯，行助役法。丁亥，前罗罗斯宣慰使述古妻漂末遣其子来献方物。

五月庚子，大风雨雹。铁木独署御史大夫事。壬寅，云南行省平章政事忽辛坐受赇杖免。戊申，追夺铁木迭儿官爵。帝御大安阁，见太祖、世祖遗衣，皆以缣素木棉为之，重加补缀。嗟叹良久，谓左右曰：“祖宗创业艰难，服用节俭如此，朕安敢顷刻忘之。”戊午，奉天行宫正殿灾。

六月丁卯，徽政使丑驴讨参卜郎。癸未，赠乳母秃忽台定襄郡夫人，其夫阿来追封定襄王。癸酉，增太庙夹室。乙酉，叛王怯伯来降。

秋七月壬辰，占城国王遣其弟保佑八刺遮来贡方物。癸卯，太庙成。乙巳，招谕左右两江叛酋黄圣许、岑世兴。己酉，封诸王拔都帖木儿为威远王。丙辰，籍铁木迭儿家。御史台请下诏开言路，帝曰：“言路何尝不开，卿等选人未当尔。”八月癸亥，车驾南还。是夕，驻蹕南坡。御史大夫铁失、知枢密院事也先帖木儿、大司农失秃儿、前平章政事赤斤帖木儿、前云南行省平章政事完者、铁木迭儿子前治书侍御史锁南、铁失弟宣徽使锁南、典瑞院使脱火赤、枢密院副使阿散、佾书枢密院事章台、卫士秃满及诸王按梯不花、孛罗、月鲁铁木儿、曲律不花、兀鲁思不花等同谋弑逆，以铁失所领阿速卫兵为外应，铁失、赤斤帖木儿先杀中书右丞相拜住，遂弑帝于行殿。在位三年，二十有一。

泰定元年二月上尊谥曰睿圣文孝皇帝，庙号英宗。四月，上国语庙号曰格坚皇帝。

史臣曰：“英宗诛兴圣太后幸臣失列门等，太后坐视而不能救，其严明过仁宗远甚。然蔽于铁木迭儿，既死始悟其奸，又置其逆党于肘腋之地。故南坡之祸。由于帝之失刑，非由于杀戮也。旧史所讥殆不然矣。”

卷十九

本纪第十九

泰定帝

泰定皇帝，讳也孙铁木儿，裕宗之孙，显宗甘麻刺长子也。母曰宣懿淑圣皇后宏吉刺氏。世祖封显宗为晋王，出镇北边。统领太祖四大斡耳朵。至元十三年十月二十九日，生帝于北边。

成宗大德六年，显宗卒，帝袭封晋王，仍镇北边。武宗至大三年九月，奏：“世祖以张铁木儿所献惠州金银铜冶赐臣，后输于有司，乞回赐。”武宗许之。仁宗皇庆元年二月，赐南康路六万五千户为食邑。延佑元年四月，复谕帝以惠州金银铜冶归有司。七月，仍回赐于帝。壬午，命帝赈辽东饥民。英宗即位，部众饥，赐钞五千尤。帝以田七千顷入官，请征其年租以偿赐钞，其谨事朝廷如此。

至治三年八月辛酉，猎于秃刺河。御史大夫铁失遣其党斡罗思以逆谋来告曰：“我与哈散、也先铁木儿、失秃儿谋已

定，事成立王为皇帝。”又命斡罗思以其事告内史倒刺沙，且言勿令旭迈杰知之。于是帝命囚斡罗思，遣别列迷失等赴上都告变。未至，英宗驻蹕南坡，铁失等弑英宗于行殿。诸王按梯不花及也先铁木儿等奉玺绶来迎。时中书平章政事张瑄在京师闻变，告留守魏王彻彻秃，大统宜在晋王。彻彻秃遣使至行在劝进。

九月癸巳，帝即位于龙居河。大赦天下。知枢密院事淇阳王也先铁木儿为中书右丞相，诸王月鲁铁木儿袭封安西王。召前高丽王璋还京师。甲午，倒刺沙为中书平章政事，乃马台为中书右丞，铁失、马思忽门并知枢密院事，孛罗为宣徽院使，旭迈杰为宣政院使。乙未，枢密院使哈散为御史大夫，内史善僧为中书左丞。丁酉，完泽知枢密院事，秃满同知枢密院事。戊戌，撒的迷失知枢密院事，章台同知枢密院事。辛丑，马谋沙知枢密院事，失秃儿为大司农。

冬十月甲子，遣使至大都，以即位告天地、宗庙、社稷。诸王买奴进曰：“不过逆贼，则陛下善名不著。天下后世何从而知非与闻其故乎？”帝然之。也先铁木儿、完泽、锁南、秃满等并伏诛于行在。旭迈杰为中书右丞相，陕西行省左丞相秃忽鲁、通政院使纽泽并为御史大夫，中书左丞速速为御史中丞。旭迈杰、纽泽至上都，铁失、失秃儿、赤斤铁木儿、脱火赤、章台等并伏诛。戊辰，召高昌王铁木儿补花至行在。移魏王阿木哥于大同。壬申，内史按答出为太师、知枢密院事。癸未，江浙行省平章政事兀伯都剌为中书平章政事。八番顺元洞蛮及静江、大理诸路徭并叛。甲戌，直省舍人阿鲁沙等颁即位诏于高丽。

十一月己丑朔，车驾次于中都。辛丑，车驾至京师，丁未，御大明殿，受诸王百官朝贺。辛亥，御史中丞董守庸有罪，免官。癸丑，遣使至曲阜，以太牢祀孔子。丙辰，御史中丞速速有罪，免官。丁巳，广东新会县民汜长弟作乱，副元帅乌马儿讨平之。

十二月己未，雪杨朵儿只、萧拜住、贺伯颜、观音保、锁咬儿哈的迷失及李谦亨、成圭、王毅、高昉、张志弼、普颜笃、卜颜忽里等冤，存者召用，死者赠恤有差。戊辰，请皇考妣尊谥于南郊。上皇考圣王尊谥曰光圣仁孝皇帝，庙号显宗，皇妣宏吉剌氏尊谥曰宣懿淑圣皇后。己巳，盗窃太庙仁宗金主、庄懿慈圣皇后金主。甲戌，铁木迭儿子锁南及其党月鲁、秃秃哈、速敦并伏诛。癸未，广西来安路总官岑世兴来献方物。流月鲁帖木儿及云南，按梯不花于海南，曲吕不花于奴儿干，孛罗及兀鲁思不花于高丽大青岛。乙酉，云南车里蛮入寇。丙戌，封诸王买奴为泰宁王。知枢密院事阔彻伯授开府仪同三司，前太师拜忽商议军国重事。丁亥，改元泰定，诏曰：

朕荷天鸿禧，嗣大历服，侧躬图治，夙夜祗畏，惟祖训是遵。乃明岁甲子景运伊始，思与天下更始。稽诸典礼，逾年改元，可改明年为泰定元年。

免大都、兴和差税三年，八番、思、播、两广洞差税一年，江淮创科包银三年，四川、云南、甘肃秋粮三分，河南、陕西、辽阳丝钞三分。除虚增田税，免斡脱逋钱。赈恤云南、广海、八番等处戍军。求直言。赐高年帛。禁献山场湖泊之利。定吏员出身者许至四品。

是月，云南花角蛮入寇，平章政事倒剌沙为中书左丞相。知枢密院事马谋沙、御史大夫纽泽、宣政院使钦秃，并加光禄大夫。

泰定元年春正月，中书右丞乃马台为平章政事，中书左丞善僧为右丞。召江西行省平章政事也儿吉的至京师。己亥，以诛逆贼也先铁木儿等诏天下。壬寅，拜住子答儿麻失里为宗仁卫亲军都指挥使。撒里哈为左右卫阿速亲军都指挥使。丁未，岭北行省参知政事帖陈、礼部尚书忽都帖木儿使于诸王不赛因。戊申，八番生蛮韦光正等降，岁输布二千五百匹。己酉，召怀宁王图帖木儿于琼州，魏王阿木哥于大同。甲寅，敕高丽王焘归国，还其王印。

二月壬申，请大行皇帝尊谥于南郊，上尊谥曰睿圣文孝皇帝，庙号英宗。甲戌，中书平章政事张珪、翰林学士承旨忽都鲁都儿迷失、翰林侍讲学士吴澄、集贤直学士邓文原进讲《帝范》、《资治通鉴》、《大学衍义》、《贞观政要》，以右丞相旭迈杰领之。诸王怯别、孛罗各遣使贡方物。高昌王帖木儿补化遣使献蒲陶酒。

三月丁亥，立詹事院，太傅朵豁、宣徽使秃满迭儿、桓国公拾得间、太尉丑间答刺罕并为太子詹事。中书参知政事王居仁罢为副詹事，同知宣政院事杨廷玉为中书参知政事。乙未，江西行省平章政事也儿吉的知枢密院事。戊戌，廷试进士，赐八剌、张益等八十四人及第、出身有差。会试下第者，亦赐教官有差。庚子，中书平章政事钦察出为陕西御史大夫。四川行省平章政事囊家台兼宣政院使，讨西番参卜郎。癸卯，

中书平章政事乃马台摄祭南郊，知枢密院事阔列伯摄祭太庙，告册立皇后及皇太子。丙午，立宏吉刺氏为皇后，皇子阿速吉八为皇太子。己酉，皇子八的麻亦儿间卜嗣封晋王。湘宁王八刺失里出镇察罕脑儿。知枢密院事也儿吉的出为云南行省右丞相。癸丑，广西横州徭寇永淳县。诸王不赛因遣使贡方物。

夏四月癸亥，上国语英宗庙号曰格坚皇帝。甲子，车驾幸上都，诸王宽彻不花、失刺，平章政事兀伯都刺，右丞善僧等居守。岭北行省左丞泼皮为中书左丞，江南行台中丞朵朵为中书参知政事。参知政事马刺罢为太史院使。诸王不赛因遣使贡方物。丁卯，封宪宗女孙买的为昌国大长公主。癸酉，太子詹事秃满迭儿为中书平章政事。庚辰，以灾异，戒饬百官。辛巳，太庙新殿成。

五月壬辰，御史大夫秃忽鲁、纽泽以灾异屡见，不能劾宰相徇私违法，自请罢黜。于是中书平章政事兀伯都刺、张珪，参知政事杨廷玉，中书右丞相旭迈杰，左丞相倒刺沙先后皆引罪自劾，帝慰留之。戊戌，奉移列圣神主于太庙新殿。辛丑，循州徭寇长乐县。

六月乙卯朔，诸王阔阔木出镇畏兀儿部。戊午，云南蛮猷高兰等寇威楚州。丙寅，招谕西番参卜郎。广西叛蛮黄胜许、岑世兴乞遣其子朝贡，许之。己卯，诸王怯别等遣使贡驯豹、西马。诏：“疏决系囚。存恤军士。免天下和买杂役三年，蛋户差税一年。内外官四品以下率散官一等，三品递进一阶。仕瘴地身死者，有司资给归葬，仍著为令。

秋七月丙戌，思州蛮酋杨大车、酉阳州蛮蛮西冉世昌并

叛。庚子，诸王伯颜帖木儿出镇阔连东部，阿剌忒纳失里出镇沙州。癸卯，罢闽、广等处采珠蛋户为民，仍免差税一年。吏部尚书马合谋等颁即位诏于安南。定州屯河溢、山崩，广西庆远徭酋潘文绢等来降。

八月丙辰，有事于太庙。丁丑，车驾至自上都。癸酉，招谕云南大、小车里蛮酋。秦州成纪山崩、水溢。

九月乙酉，封也速不坚为荆王。癸丑，岑世兴来献方物。

冬十月戊午，有事于太庙。庚申，高丽国遣使贺圣诞。己巳，云南车里蛮酋寒赛子尼而雁、构木子刁零降。壬申，安南世子陈日炉遣使贡方物。丁丑，云南王王禅改封梁王，其子帖木儿封云南王。封武宗皇子图帖木儿为怀王。

十一月癸巳，诸王不赛因藩臣出班授开府仪同三司，封翊国公。己亥，术温台知枢密院事。己酉，免也里可温、答失蛮差役。

十二月癸丑朔，岑世兴遥授沿边溪洞军民安抚使致仕，其子志熟为上思州知州，仍各赐币帛。乙卯，云南阿吾等叛。庚申，同州地震。癸亥，盐官州海溢。丙寅，修显宗、英宗《实录》。乙亥，曲赦重囚三十八人。容米洞蛮田先什用等率九洞俱叛。

二年春正月乙未，敕后妃、诸王、驸马毋接星术之士，非天文官不得妄言祸福。戊戌，参卜郎降。辛丑，怀王图帖木儿出镇建康。甲辰，江浙行省平章政事脱欢答刺罕为行省右丞相。诸王怯别遣使贡方物。庚戌，诏群臣曰：

向者，卓儿罕察苦鲁及山后皆地震，愉郡大小民饥。朕自即位以来，惟太祖开创之艰，世祖混一之盛，期与民人共

享安乐，灾沴之至，莫测其由。岂朕思臣有所不及而事或僭差，天故以此示警与？卿等其与诸司集议便民之事，自死罪始议定以闻。

闰月壬子朔，大赦天下。除江淮创科包银免被灾地差税一年。戊辰，诸王忽塔梯迷失等来朝。己卯，阶州土番入寇。站八儿监藏叛于兀敦。颁族葬帛。禁阴阳相地邪说。

二月甲申，祭先农。丁亥，平伐苗酋的娘来降。辛卯，爪哇国遣使贡方物。广西徭酋潘宝陷柳城县。己亥，封阿里迷失为和国公，张珪为蔡国公。中书右丞善僧为平章政事，中书左丞泼皮为右丞，御史大夫秃忽鲁加太保。是月，中书平章政事张珪致仕。

三月甲寅，禁捕天鹅。乙丑，车驾幸上都。乙亥，安南世子陈日炉遣使贡方物。

夏四月辛丑，寿字公主加封皇姐大长公主。丁未，封后父火里兀察儿为威靖王。戊申，山东廉访使许师敬为中书左丞；中政使冯享为中书参知政事，仍兼中政使。

五月壬子，开南州阿都刺蛮酋引车里酋陶刺孟等寇陷朵刺等十四寨。木邦路蛮酋八庙等寇陷倒八汉寨。癸丑，龙牙门国来贡方物。辛未，通政院使察乃使于周王和世琜。癸酉，融州洞徭叛。丙子，檀州大水，平地深丈有五尺。

六月己卯朔，皇子小薛生。静江徭叛，广西宣慰司讨之。癸未，浔州平南县徭叛，达鲁花赤都坚、县尹姚泰亨死之。甲申，嘉王晃火帖木儿改封并王。丙申，敕御史台、枢密院大臣勿领军卫。丁酉，静江徭及庆远徭并叛。息州民赵丑厮、郭菩萨坐妖言“弥勒佛当有天下”，伏诛。辛丑柳州徭叛。秦州

山移。

秋七月戊申朔，大、小车蛮来献驯象。甲寅，遣使赍玺书分谕徭蛮。镇康路蛮酋你囊、谋粘路蛮酋赛邱罗来降。木邦路蛮酋八庙既降复叛。丙辰，有事于太庙。播州蛮酋黎平等叛。癸亥，广西诸徭尽叛，左丞乞住、兵部尚书李大成等讨之，以诸王斡耳朵罕监其军。海北徭盘吉祥寇阳春县。庚午，亦刺马丹等至大理，普颜实立等至威楚，招谕叛蛮。思州洞蛮杨银千等来献方物。封驸马孛罗帖木儿、知枢密院事火沙并为郡王。辛未，置河南行都水监。濒河州、县并兼知河防事。壬申，敕太傅朵儿剌、太保秃忽鲁日至禁中集议国事。广西徭潘宝寇义宁、来宾诸县。

八月辛卯，云南白夷寇云龙州。

九月戊申朔，分天下为十八道，遣使分道宣抚。诏曰：

朕祇承洪业，夙夜维寅，凡所以图治者，悉遵祖宗成宪。曩屡诏中外百司，宣布德泽，蠲赋详刑，赈恤贫民，思与黎元共享有生之乐。尚虑有司未体朕意，庶政或阙，惠泽未洽，承宣者失于抚绥，司宪者怠于纠参，俾吾民重困，朕甚悯焉。今遣使宣抚，分行诸道，按问官吏不法，询民疾苦，审理冤滞，凡可以兴利除害，从宜举行。有罪者，四品以上，停职申请，五品以下，就便处决。其有政绩尤异，暨晦迹邱园、才堪辅治者，具以名闻。湖广行省参知政事马合谋、河东宣慰使李处恭之两浙江东道，鹰坊使朵列秃、太史院使齐履谦之江西福建道，都功德使举林伯、荆湖宣慰使蒙弼之江南湖广道，礼部尚书李家奴、工部尚书朱赉之河南河北，同知枢密院事阿吉剌、御史中丞曹立之燕南山东道，太子詹事别帖木

儿，宣徽叛韩让之河东陕西道，吏部尚书纳哈出、董讷之山北辽东道，陕西盐运使众家奴、中书断事官韩庭茂之云南，湖南宣慰使寒食、冀宁总官刘文之甘肃，山东宣慰使秃思帖木儿、陕西行省左廉悖之四川，翰林侍讲学士帖木儿不花、秘书郎吴秉道之京畿道。癸丑，车驾至自上都。乙卯，有事于太庙。壬戌，广西徭寇宾州。

冬十月戊寅朔，岑世兴寇上林州。癸未，中书左丞相倒刺沙罢为御史大夫。丁亥，有事于太庙。癸巳，播州凯黎苗叛。丁酉，广西徭酋何童降。戊申，周王和世疎遣使献文豹。

十一月庚戌，以岁饥，罢上都皇后营缮。己未，整飭台纲。庚申，日本船来互市。广西宣慰使获徭酋潘定，其弟潘儿寇柳州，行省左丞乞往讨之。丙寅，倒刺沙复为中书左丞相，加开府仪同三司、录军国重事。是月，中书右丞相旭迈杰卒。

十二月戊寅，塔失帖和为中书右丞相。癸未塔失帖木儿加开府仪同三司、上柱国、录军国重事，封蓟国公。甲午，召张珪于保定。丁酉，加纽泽知枢密院事，与马诛沙并开府仪同三司。乞住等败徭贼于广西。元山路蛮酋普山叛。

三年春正月丙午，高丽国遣使贡方物，并贺正旦。播州蛮酋黎平爱等来降。戊申，元江路蛮酋普奴叛。诸王薛彻秃、晃火帖木儿来朝。壬子，封宽彻不花为威顺王，镇湖广。泰宁王买奴，改封宣靖王，镇益都。诸王不赛因遣使来献马。翰林学士吴澄谢病归。癸亥，知枢密院事撒忒迷失出为岭北行省平章政事。戊辰，緬王荅里也伯以国乱来乞师，并献方物。安南国入寇，陷思明州。

二月壬午，广西全茗州徭酋许文杰叛，茗盈州知州李德卿等死之。中书平章政事乃马台知枢密院事。甲戌，爪哇国来贡方物。庚子，通政院使察乃为中书平章政事。甲辰，车驾幸上都，诸王也忒古不花、平章政事兀伯都剌、察乃、善僧、左丞许师敬，参知政事朵朵居守。

三月乙巳朔，帝以不雨自责，命审录重囚，分祷岳渎、名山大川及京师寺观。癸丑，八番岩霞洞蛮来降。丁巳，诸王失刺出镇北边。戊午，诏安抚缅甸。赐其王金帛。丙寅，翰林学士承旨阿怜帖木儿、许思敬等译《帝训》成，赐名《皇图大训》，授皇太子读之。辛未，泉州民阮凤子作乱，军民官坐失讨，降黜有差。

夏四月戊戌，容米洞蛮寇长阳县。

五月甲戌朔，诸王怯别遣使献文豹。乙巳，罢福建岁贡蔗糖。禁西僧弛驿扰民。甲寅，八百媳妇酋招南道遣其子来献方物。丁卯，招谕岑世兴。庚午，永明县五洞徭，河西加木笼四部番夷俱来降。

六月癸酉朔，四川行省平章政事秃哈帖木儿请终母丧，许之。癸酉，播州蛮酋黎平爱复叛，合蛮酋谢乌穷入寇。招抚使杨燕里不花谕平爱出降，乌穷不从。己亥，纳姊姐寿宁公主女撒答八剌为皇后。道州徭叛。

秋七月甲辰，车驾发上都，禁车驼践民田禾。丙午，有事于太庙。丁未，绍庆蛮酋冉世昌叛。辛亥，封阿都赤为绥宁王。乙卯，翰林侍讲学士阿鲁威、直学士翰赤译《世祖圣训》以备经筵进讲。戊午，诸王不赛因遣使献驼马。八百媳妇蛮来献方物。己巳，郑州、阳武县河决。

八月甲戌，平章政事兀伯都剌、右丞许师敬以灾异饥馑，乞罢黜，不允。乙亥，知枢密院事乃马台简阅边兵。甲申，有事于太庙。宁远州洞蛮叛。丁亥，梁王王禅整饬翰耳朵思边事。丁酉，诸王不赛因遣使献玉及独峰驼。辛丑，车驾次中都，畋于汪兀察都之地。盐官州、扬州、崇明州同时海溢。

九月庚申，车驾至自上都。癸亥，赐大车里新附蛮酋七十五人裘帽、靴袜。戊辰，斡赤等使于诸王怯别、月思别、不赛因。威楚路蛮酋哀培等来献方物。

冬十月甲戌，纽泽为右御史大夫。庚辰，有事于太庙。癸未，汴梁路河决。

十一月庚子朔，诸王不赛因来献虎。癸卯，敕西僧以元日疏释重囚，当释者命宗正府审复。辛亥，追复前中书平章政事李孟官。戊午，帖木儿不花袭封镇南王、镇扬州。辛酉，播州蛮宋王保来降。丁丑，诸王月思别遣使献文豹。是月，崇明州海溢。

十二月壬午，御史贾沛请祔武宗皇后于太庙，不报。庚寅，大赦天下。亳州河决。

四年春正月壬子，靖安王阔不花出镇陕西。戊午，盐官州海溢。甲子，武龙洞蛮寇武缘县。

二月辛未，祭先农。乙亥，营王也先帖木儿出镇北边。壬午，畋于灊州。诸王火沙、阿荣、达里俱出镇北边。戊子，衍圣公孔思晦进阶嘉议大夫。马忽思为云南行省平章政事，提调乌蒙屯田。庚寅，八百媳妇蛮来献方物。

三月辛丑，皇子允丹藏卜出镇北边。封那海赤为惠国公，商议内史府事。丙午，廷试进士阿察赤、李黼等八十五人，赐

及第、出身有差。辛亥，诸王搆思班、不赛因等遣使献文豹及佩刀、珠宝。辛酉，太傅朵豁为太师，太保秃鲁忽为太傅，也可札鲁忽赤伯答沙为太保。召翰林学士承旨张珪、集贤大学士廉恂、太子宾客王毅至都，悉复旧职。陕西行台中丞敬俨为集贤大学士，并商议中书省事。壬戌，车驾幸上都。阿散火者知枢密院事。诸王不赛因遣使献文豹、狮子。

夏四月辛丑，盗窃太庙武宗金主及祭器。大理庆甸蛮酋阿的叛。己卯，道州徭叛。癸巳，高州徭寇电白县，千户张恒死之。己未，武备寺卿阿昔儿答剌罕为御史大夫。

五月辛丑，太尉丑驴卒。己未，占城国来贡方物。丁卯，元江路蛮酋普奴叛。德庆路徭降。

六月辛未，翰林待讲学士阿鲁威、直学士燕赤进讲，命译《资治通鉴》以进。丁丑，左丞相倒刺沙等以灾异乞罢黜，不允。罢两都营缮工役。录各路系囚。甲申，广西花角蛮叛。乙未，绍庆路四洞蛮酋阿者等降。

秋七月己亥，八儿忽部酋晃忽来献方物。占城国来献驯象。甲辰，播州蛮酋谢乌穷来献方物。丙午，有事于太庙。戊午，八百媳妇酋招三斤降。乙丑，周王和世㻋及诸王燕只哥等来贡方物。丙寅，籍僧道有妻者为民。

八月庚辰，田州洞徭叛。癸巳，加谥武宗皇后宏吉剌氏曰宣慈懿圣皇后，英宗皇后亦乞烈氏曰庄静懿圣皇后，并升祔太庙。是月，崇明州海溢。汴梁路扶沟、兰阳二县河决。巩昌府山崩。

九月丙申朔，日有食之。甲寅，播州蛮酋宋王保来献方物。壬戌，脱欢赤等使于诸王怯别。

闰月己巳，车驾至自上都。壬申，大赦天下。广西两江徭叛。甲戌，有事于南郊。甲午，罢蒙庆路宣慰司都元帅府。

冬十月丙申，有事于太庙。戊戌，诸王脱列帖木儿、哈儿蛮来献玉及蒲桃酒。己酉，治书侍御史王士熙为中书参知政事。癸丑，云南沙木寨蛮酋马愚等来朝。丁巳，御史中丞赵世延为中书右丞。安南国遣使贡方物。壬戌，开南州蛮酋阿只弄叛。

十一月庚午，召镇南王帖木儿不花赴上都。丙子，平乐府徭叛。

十二月甲辰，梧州徭叛。乙卯，爪哇国来献金文豹、白猴、白鹦鹉各一。己未，静江徭叛。右江蛮酋岑世忠来献方物。

致和元年春正月乙丑朔，高丽国遣使贺正旦并贡方物。甲戌，有事于太庙。丁丑，颁农桑旧制十四条于天下，仍诏有司察其勤惰。占城国来贡方物，且言为安南所侵；诏和解之。辛丑，静江徭寇灵川、临桂二县。戊子，诏护送爪哇国王札牙纳哥还其国。

二月乙卯，牙即国来献方物。庚申，改元致和。免河南自实田粮税一年，被灾州郡粮税一年，流民复业者差税三年，疑狱系三岁不决者咸释之。

三月甲戌，雅洮国来献方物。甲申，户部尚书李家奴祀海神于盐官州，造浮屠二百一十六以厌海溢。戊子，车驾幸上都。己丑，云南蛮酋撒加布来献方物。

夏四月丙申，钦州徭黄焱等叛。己亥，塔失帖木儿、倒

刺沙请蒙古、色目人效汉人丁忧者除名，从之。是月，崇明州大风海溢。

五月，广西普宁路妖僧陈庆安作乱，僭号改元。己巳，八百媳妃蛮来献驯象。大理怒江甸蛮酋阿哀钦叛。甲申，安南国遣使来贡方物。戊子，岭北行省平章政事塔失帖木儿为中书平章政事。

六月丙午，祀世祖神御殿。

秋七月己巳，遣中书平章政事买闾等至高丽质问高丽国王王焘夺沈王焘世子印事。庚午，帝崩于上都，年三十有六。葬起辇谷。

八月甲午，金枢密院事燕帖木儿等反于大都，迎怀王图帖木儿于江陵。

九月，皇太子即皇帝位于上都，改元天顺。

冬十月辛丑，齐王月鲁帖木儿等以兵犯上都，左丞相倒刺沙奉皇帝宝出降，少帝不知所终。

史臣曰：“孔子称叔孙昭子之不劳。泰定帝讨铁失等弑君之罪，虽叔孙昭子何以尚之。文宗篡立，欲厌天下之人心，诬蔑之辞无所不至。惜乎后世之君子，不引孔子之言，以论定其事也。”

卷二十

本纪第二十

明宗

明宗翼献景孝皇帝，讳和世琜，武宗长子也。母曰仁献章圣皇后亦乞烈氏。帝生于大德四年十一月壬子。武宗入继大统，立仁宗为皇太子，命以次传位于帝。

武宗崩，仁宗即位。延祐二年冬十一月，封帝为周王。三年春，议建东宫，右丞相铁木迭儿欲固宠，建议立英宗为皇太子。帝少有英气，兴圣皇太后惮之，其幸臣失烈门等亦恐帝立将不利于己，遂附和铁木迭儿，谮帝于仁宗及皇太后。三月，命帝出镇云南，置常侍府，遥授中书左丞相秃忽鲁、大司徒斡儿朵、中政使尚家奴、山北辽阳等路蒙古军万户孛罗、翰林侍读学士教化等并为常侍，中卫亲军都指挥使唐兀、兵部尚书赛罕八都鲁为中尉。敕陕西、四川省臣各一员护送帝至云南。

冬十一月，帝次延安，秃忽鲁、尚家奴、孛罗及武宗旧臣厘日、沙不丁、哈八儿秃等皆来会。教化与秃忽鲁等谋曰：“天下者，武宗之天下也。太子出镇云南，本非上意，由左右之离间。请白其事于行省诸臣，使闻之朝廷，庶可杜谗人之口。不然事且不测。”遂与数骑驰至陕西行省。初，阿思罕为太师，铁木迭儿夺其位，出为陕西行省左丞相。至是，教化

至，即与平章政事塔察儿、行台御史大夫脱思伯、中丞脱欢，悉发关中兵，分道自潼关、河中府趋京师。已而，塔察儿、脱欢中悔，袭杀阿思罕、教化于河中。诸臣率数百骑拥帝西行，至和林，逾金山而北。诸王察阿台等闻帝至，咸率众归附。帝与定约束，每岁冬居札颜，夏居斡罗察山，春则命从者耕于野泥之地。

延祐七年夏四月丙寅，皇子妥欢帖木儿生，其母为阿儿厮兰郡王裔孙，罕禄鲁氏。泰定帝元年夏五月，皇后八不沙至自京师。二年，帝遣使贡文豹。五月，泰定帝遣察乃来。

致和元年秋七月，泰定帝崩于上都。八月甲午，金枢密院事燕铁木儿起兵于大都，以帝远在沙漠，乃迎皇弟怀王图帖木儿于江陵，且宣言已遣使迎帝，以安众心。复诈称使者自北方来，云周王率诸王兵旦夕至。丁巳，怀王入京师，群臣请即大位，怀王固让于帝曰：“吾兄在北，以长以贤，当有天下，必不得已，宜明以予志播告中外。”九月壬申，怀王即皇帝位，改元天历，颁诏于天下曰：“谨俟大兄之至，以遂固让之心。”

冬十月，齐王月鲁帖木儿等克上都，两京道路始通。于是怀王遣哈欢及撒迪等相继来迎。西北诸王皆同时劝进，帝遂发北庭旧臣孛罗、尚家奴、哈八儿秃从行，诸王察阿台、元帅朵烈捏、万户买驴等皆随扈。逾金山，岭北行省平章政事泼皮、武宁王彻彻秃、金枢密院事帖木儿不花相继至。帝命孛罗如京师，百姓闻使者至，欢呼曰：“吾天子实自北来矣！”

天历二年春正月乙丑，怀王复遣中书左丞跃里帖木儿来迎。乙酉，撒迪等觐帝于行在，奉怀王命劝进。丙戌，帝即位于和林之北。是月，前翰林学士承旨不答失里以太府太监沙剌班犍金银币帛至。帝遣撒迪等还京师，命之曰：“曩朕弟喜览经史，迩者得勿废乎？听政之暇，宜亲贤士大夫，讲论古今，以知治乱得失。卿等至京师，当以朕意谕之。”

二月壬辰，宣靖王买奴自京师来觐。是月，怀王遣使以除目奏帝，并从之。

三月戊午朔，车驾次洁坚察罕。辛酉，中书右丞相燕铁木儿奉皇帝宝来上，御史中丞八即刺、知枢密院事秃儿哈帖木儿等各率其属以从。壬戌，造乘舆服御。丙寅，帝谓中书左丞跃里帖木儿曰：“朕至上都，宗室诸王必皆入觐，非寻常朝会比也，诸王察阿台亦从朕远来，有司供帐皆宜豫备。卿其与中书省议之。”

夏四月癸巳，燕铁木儿入觐于行在，率百官奉上皇帝宝。以燕铁木儿为太师，仍兼中书右丞相，开府仪同三司、上柱国、录军国重事、答剌罕如故。复谕燕铁木儿等曰：“凡京师百官，朕弟所用者，并仍其旧。卿等其以朕意谕之。”是日，哈八儿秃为中书平章政事，前中书平章政事伯铁木儿知枢密院事，常侍孛罗为御史大夫。甲午，立行枢密院，昭武王、知枢密院事火沙领行枢密院事，赛帖木儿、买奴并同知行枢密院事。帝燕诸王大臣于行殿，燕铁木儿、哈八儿秃、伯铁木儿、孛罗等侍。帝谕台臣曰：“太祖皇帝尝训敕臣下云，美色、名马，人皆悦之，然方寸一有系累，即能坏名败德。卿等居风纪之司，亦尝念及此乎？天下国家，譬犹一人，中书则右

手也，枢密则左手也。左右手有病，治之以良医，省、院阙失，不以御史台纠之可乎？凡诸王、百官，违法越礼，一听举劾。风纪重则贪墨惧，犹斧斤重则入木深，其势然也。朕有阙失，卿亦奏闻，朕不汝责也。”乙未，命孛罗等传谕燕铁木儿、伯答沙、火沙、哈八儿秃、八即刺等曰：“世祖皇帝立中书省、枢密院、御史台及百司，共治天下，大小职掌已有定制。世祖命廷臣撰律令章程，以为万世法。列圣相承，罔不恪遵。朕今居世祖所居之位，凡百司庶政，询谋僉同，标译所奏，以告于朕。军务机要，枢密院即奏闻，毋以夙夜为间而稽留之。其他必先白中书省、枢密院、御史台，毋得隔越陈请。倘违朕命，必罚无赦。”丁酉，陕西行台御史大夫铁木儿脱为上都留守。辛丑，怀王遣使以御史台除目上。癸卯，遣使如京师，卜日，中书左丞相铁木儿补化摄告即位于郊庙、社稷。立皇弟图帖木儿为皇太子，仍置詹事院，罢储庆司。彻里贴木儿为中书平章政事，阔儿吉思为中书右丞，怯来、只儿哈郎并为甘肃行省平章政事，忽刺台为江浙行省平章政事，那海为岭北行省平章政事。甲辰，敕中书省官吏送宝者，晋秩一等，从者赉以币帛。乙巳，岭北行省平章政事塔即吉、左丞马谋并坐党附倒刺沙免官。

五月丁巳朔，车驾次朵里伯真。戊午，遣西安王阿剌忒纳失里还京师。封帖木儿为保德郡王。己未，皇太子遣翰林学士承旨阿邻帖木儿来觐。庚申，车驾次斡耳罕水东。辛酉，御史大夫孛罗、中政使尚家奴并加开府仪同三司，典四番宿卫。癸亥，车驾次必忒怯秃，翰林学士承旨斡儿朵自京师来觐。庚午，命燕铁木儿擢用岭北行省官吏，凡潜邸旧臣及扈

从之士受制命者八十有五人，六品以下二十有六人。壬申，车驾次探秃儿海。封亦怜真八为柳城王，八即刺为陕西行台御史大夫，众家奴为御史中丞。乙亥，车驾次秃忽刺。敕中书省臣铸皇太子宝。己卯，翰林学士承旨唐兀加太尉。辛巳，车驾次斡罗斡秃。壬午，次不鲁通。是日，左丞相铁木儿补化等以帝即位，摄告南郊。甲午，车驾次忽刺火失温。

六月丁亥朔，车驾次坤都也不刺。是日，铁木儿补化等摄告宗庙、社稷。庚寅，车驾次撒里。丁酉，次兀纳八。改都督府为太都督府。己亥，次阔朵。辛丑，次撒里怯儿。壬寅，戒近侍毋辄有奏请。丁未，车驾次哈儿温。戊申，次阔朵杰阿刺伦。辛亥，次哈儿哈纳土。谕中书省：凡国家钱谷铨选诸政，先启皇太子然后奏闻。癸丑，车驾次忽秃。

七月丙辰朔，日有食之。甲子，车驾次孛罗火你。乙亥，次不罗察罕。戊寅，次小只。壬午，中书平章政事哈儿八秃同翰林官祭太祖、太宗、睿宗御容。

八月乙酉朔，车驾次王忽察都。丙戌，皇太子入觐。是日，燕皇太子及群臣于行殿。庚寅，帝暴崩，年三十。葬起辇谷。

冬十月丙申，上尊谥曰翼献景孝皇帝，庙号明宗，国语曰护都笃皇帝。至元六年冬十月己巳，上尊号曰顺天立道睿文智武大圣孝皇帝。

史臣曰：“燕铁木儿立文宗，文宗固让于兄，犹仁宗之奉武宗也。明宗之弑，盖出于燕铁木儿，非文宗之本意。然与闻乎弑，是亦文宗弑之而已。”

卷二十一

本纪第二十一

文宗上

文宗圣明元孝皇帝，讳图帖睦尔，武宗次子也。母曰文献昭圣皇后唐兀氏。帝以大德八年正月癸亥生。

英宗至治元年五月，钦察台、咬住告脱欢察儿等交结亲藩，有异志，词连于帝，乃出帝居琼州。泰定元年正月，召还至潭州，复命止之。四月，自潭州至京师。八月，赐钞三千锭。十月，封怀王食邑端州六万五千户，赐金印，并增岁币千匹。二年正月，又出帝居建康，以殊祥院使也先捏领宿卫。

致和元年三月，遣宗正札鲁忽赤雍古台迁帝于江陵。七月庚午，泰定帝崩于上都。先是，泰定帝将幸上都，命西安王阿剌忒纳失里留守，同枢密院事燕铁木儿留掌枢密符印。至是，燕铁木儿闻泰定帝崩，密与阿剌忒纳失里谋，奉帝入承大统。

八月甲午黎明，百官集兴圣宫，燕铁木儿率阿剌铁木儿、孛伦赤等十七人，露刃宣言于众曰：“武宗皇帝有圣子二人，天下归心，宜践大位，有不奉命者斩之。”乃缚平章政事兀伯都剌、伯颜察儿，分命执中书左丞朵朵，参知政事王士熙，参议中书省事脱脱、吴秉道，侍御史铁木哥、邱世杰，治书侍

御史脱欢，詹事丞王桓等下狱。与阿剌忒纳失里籍府库、拘符印，召百官入内廷听命。遣大司农卿明里董阿、前宣政使答里麻失里驰驱迎帝于江陵。密谕河南行省平章政事伯颜简士马以备扈从。是日，推前湖广行省左丞相别不花为中书左丞相，太子詹事塔失海牙为中书平章政事，前湖广行省右丞速速为中书左丞，前陕西行省参知政事王不怜吉歹为枢密副使，萧蒙古歹仍为通政院使。同佥枢密院事燕铁木儿、翰林学士承旨亦列赤、通政院使寒食分典庶务。诸人既受命，未知所谢，注目而立。燕铁木儿麾众使南向拜，以帝在江陵也，众始喻旨。丁酉，燕铁木儿复遣撒里不花等来迎，且使塔失铁木儿矫为帝使者自南来，言车驾已次近郊。癸卯，明里董阿等至江陵。甲辰，帝发江陵，召镇南王铁木儿不花、威顺王宽彻不花、湖广行省平章政事高昌王铁木儿补化来会。执湖广行省左丞马合某送京师，以别薛代之。乙巳，召陕西行台侍御史马札儿台、行省平章政事探马赤，不至。丁未，河南行省平章政事伯颜为行省左丞相。庚戌，车驾至汴梁，伯颜等扈从北行。铁木儿补化为湖广行省左丞相，前翰林学士承旨阿里海涯为河南行省平章政事。辛亥，燕铁木儿知枢密院事，亦列赤为御史中丞。壬子，阿速卫指挥使脱脱木儿率所部自上都来降，命守古北口。乙卯，脱脱木儿与上都诸王失剌、平章政事乃马台、詹事钦察等战于宜兴，败之，获乃马台、钦察。丙辰，燕铁木儿奉法驾郊迎。丁巳，帝至京师。贵赤卫指挥使脱迭出帅所部自上都来降，命与脱脱木儿同守古北口。戊午，速速为中书平章政事，前御史中丞曹立为中书右丞，江浙行省参知政事张友谅为中书参知政事，河南行

省左丞相伯颜为御史大夫，中书右丞赵世延罢为御史中丞。己未，万户也速台儿同知枢密院事。杀隆镇卫指挥使黑汉，籍其家。梁王王禅、右丞相塔失帖木儿、太尉不花、平章政事买驴、御史大夫纽泽等将上都兵次于榆林。

九月庚申朔，燕铁木儿督师至居庸关，撒敦败上都兵于榆林。壬戌，诏曰：

昔在世祖以及列圣临御，咸令中书省纲维百司，总裁庶政，凡钱谷、铨选、刑罚、兴造罔不司之。自今除枢密院、御史台，其余诸司及左右近侍敢有隔越中书奏请政务者，以违制论，监察御史其纠之。

铁木儿补化录军国重事，征五卫屯田兵赴京师。安南国来贡方物。召燕铁木儿还京师。丁卯，燕铁木儿率诸王大臣伏阙，请早正大位，以安天下。帝固辞曰：“大兄在朔方，朕安敢紊天序？”燕帖木儿进曰：“人心向背之机，间不容发，一或失之，噬脐无及。”帝曰：“必不得已，宜宣明朕意以示天下。”戊辰，大司农明里董阿、大都留守阔阔台并为中书平章政事。己巳，铸御宝成。立行枢密院于汴梁，同知枢密院事也速台儿知行枢密院事，巡视太行诸隘。辛未，帝常服谒太庙。云南孟定路蛮酋来献方物。杀兀伯都剌、铁木哥，流朵朵、王士熙、伯颜察儿、脱欢等于远州，并籍其家。壬申，帝即位于大明殿，受诸王百官朝贺。诏曰：

洪维我太祖皇帝混一海宇，爰立定制，以一统绪，宗亲各受分地，勿敢妄生觊觎，此不易之成规，万世所守者也。世祖之后，成宗、武宗、仁宗、英宗以公天下之心，次第相传，宗王、贵戚咸遵祖训。至于晋王具有盟书，原守藩服，而与

贼臣铁失、也先帖木儿等潜通阴谋，冒干天位，使英宗不幸罹于大故。朕兄弟播迁南北，备历艰难。

朕以叔父之故，顺承惟谨，于今六年，灾异迭见。权臣倒刺沙、兀伯都刺等专权自用，疏远勋旧，废弃忠良，变乱祖宗法制，空府库以私其党与。大行上宾，利于立幼，显握国柄，用济其奸。宗王、大臣以宗社之重，统绪之正，协诚推戴，属于眇躬。朕以菲德，宜俟大兄，固让再三。咸以神器不可久虚，天下不可无主，民庶遑遑已及三月，诚恳迫切。朕始曲从其请，仍俟大兄之至，以遂朕固让之心。已于致和元年九月十三日，即皇帝位于大明殿。其以致和元年为天历元年。

可大赦天下。自九月十三日昧爽以前，除谋杀祖父母父母、妻妾杀夫、奴婢杀主、谋杀故杀及强盗、印造伪钞不赦外，其余罪无轻重，咸赦除之。

於戏！朕岂有意于天下哉！重念祖宗开创之艰，恐堕大业，是以勉徇輿情。尚赖尔中外文武臣僚，协心相予，辑宁亿兆，以成治功。咨尔多方，体予至意！

遣使颁即位诏于高丽。甲戌，燕铁木儿加开府仪同三司、上柱国、同录军国重事，中书右丞相、知枢密院事如故。癸酉，中书右丞曹立罢为江浙行省平章政事，福建廉访使易释董阿为中书右丞，前中书左丞张思明为左丞。诸王塔术、只儿哈郎、佛宝等自恩州入朝。燕铁木儿督师于蓟州。伯颜加太尉。江南行台御史大夫朵儿只为江浙行省左丞相，淮西道廉访使阿儿思兰海牙为江南行省御史大夫。诸王孛罗、忽都火者入朝。乙亥，立太禧院。梁王王禅陷居庸关。丙子，燕铁木儿还次榆河。车驾出齐化门视师。丁丑，车驾还宫。杀

指挥使忽都不花、塔失帖木儿、同知指挥使太不花。戊寅，诏曰：

近以奸臣倒刺沙、兀伯都刺潜通阴谋，变易祖宗成法，既已明正其罪；凡回回种人不预其事者，各安业勿惧，因而煽惑其人者罪之。

诸王阿儿八忽、按灰、脱脱入朝。己卯，燕铁木儿败王禅于榆河，又败王禅及阿刺帖木儿等于红桥。庚辰，遣使赐燕铁木儿御衣一袭。辛巳，别不花知枢密院事，依前中书左丞相。燕铁木儿败王禅于白浮，又败亚失帖木儿于石槽，脱帖木儿败辽东兵于檀州。癸未，秃儿哈帖木儿知枢密院事。中书平章政事明里董阿出为江浙行省平章政事。甲申，撒敦、脱脱木儿败王禅于昌平北。赐燕铁木儿上樽。是日，竹温台、阔阔出等陷古北口。明里董阿复为中书平章政事。岭北行省左丞燕不邻知枢密院事。丙戌，燕铁木儿败竹温台等于牛头山，获驸马孛罗帖木儿，平章政事蒙古塔失、牙失帖木儿。丁亥，秃满迭儿及诸王也先帖木儿等陷通州。戊子，诸王忽刺台陷紫荆关。陕西行台御史大夫也先帖木儿陷河中府。召云南左丞相也儿吉尼，不至。

冬十月己丑朔，燕铁木儿败诸王也先帖木儿于通州。壬辰，宣徽使也先捏杀保定路同知阿里沙及万户张景武兄弟五人。癸巳，燕铁木儿败阳翟王太平、国王朵罗台等于檀子山之枣林，获太平。乙未，诸王忽刺台等寇良乡。丙申，燕铁木儿至芦沟桥，忽刺台遁走。是日，燕铁木儿入朝，赐宴兴圣殿。戊戌，获忽刺台、阿刺帖木儿、朵罗台、安童、塔海等于紫荆关。己亥，封燕铁木儿太平王，加号答剌罕。燕铁

木儿败秃满迭儿等于檀州南之桑口。辛丑，同知枢密院事脱脱木儿、通政使也不伦并知枢密院事，御史中丞亦列赤为御史大夫。齐王月鲁帖木儿、东路蒙古元帅不花帖木儿围上都，倒刺沙奉皇帝宝出降。月鲁帖木儿杀辽王脱脱。壬寅，宣徽使也先捏知行枢密院事，宣徽副使章吉为行枢密院副使，与知枢密院事也速台儿等御潼关兵。甲辰，诏晋王、辽王管内路府州县达鲁火赤并免官禁锢，选流官代之。丙午，敕有罪者只籍其家，勿没妻子。丁未，告祭南郊。中书平章政事塔失海牙罢为大司农，钦察台复为中书平章政事。云南银沙罗甸蛮酋来献方物。己酉，中书左丞相别不花加太保，落知枢密院事。庚戌，帝御兴圣殿，齐王月鲁帖木儿、诸王别思帖木儿阿儿哈失里、那海罕及元帅不花帖木儿奉上皇帝宝。下倒刺沙等于狱。辛亥，云南彻里路蛮酋来献方物。癸丑，不花帖木儿知枢密院事。甲寅，罢徽政院，改立储庆使司。也速答儿执湘宁王八剌失里送京师。丁巳，毁显宗庙室。戊午，盗杀太尉不花。十一月己未，诏曰：

诸王王禅及秃满迭儿、阿剌不花、秃坚等兵败而逃，有能禽获者，授五品官。同党之人，能去逆效顺，擒王禅等，免本罪，依上授官。敢有隐匿者，事觉与犯人同罪。

太保伯答沙为太傅兼宗正札鲁忽赤，总兵北边。辛酉，诸王也先帖木儿来降。甲子，有事于太庙。辛未，铁木哥陷襄阳，县尹谷庭圭、主簿张德死之。壬申，祭告社稷。癸酉，八百媳妇蛮酋及云南威楚路九十九寨蛮，各以方物来献。杖流诸王失刺等于远州，并籍其家。甲戌，迁泰定帝皇后宏吉剌氏于东安州。丙子，中书平章政事速速坐受赇，杖徙襄阳，以

母老留之京师。丁丑，以祀太庙礼成，受诸王百官朝贺。庚辰，遣使迎皇兄周王于漠北。中政院使敬俨为中书平章政事，同知枢密院事彻里帖木儿为中书左丞。辛巳，御史中丞珙璐不花为中书右丞。癸未，杀倒刺沙、马某沙、纽泽、撒的迷失、也先帖木儿，磔倒刺沙之尸于市。梁王王禅赐死。御史中丞赵世延加平章政事。罢行宣政院、行都水监。四川行省平章政事囊家歹自称镇西王，杀行省平章政事宽彻。中书左丞相别不花罢。

十二月丙午，幸大崇福元寺，谒武宗神御殿。云南蛮酋普双等来献方物。同知枢密院事也先捏坐擅杀官吏，杖窜南宁，并籍其家。庚子，大赦天下。追封王满秃为果王，阿马刺台为毅王。宗正札鲁忽赤阔阔出等十七人，并追赐功臣号及官阶爵谥。辛丑，立龙翊侍卫亲军都指挥使司。乙巳，伯颜加开府仪同三司，与亦列赤并为御史大夫。云南姚州蛮酋来献方物。戊申，加伯颜太保，不花帖木儿太尉，香山司徒。甲寅，复遣治书侍御史撒迪、内侍不颜秃古思迎皇兄于漠北。丙辰，中书左丞珙璐不花罢为太禧院使。丁丑，封西安王阿剌忒纳失里为豫王，彻里帖木儿为中书右丞，跃里帖木儿为中书左丞，赵世安为中书参知政事。是月，召云南行省左丞相也儿吉尼，复不至。高丽国王遣使贺即位及正旦，又遣使贺圣诞节。

天历二年春正月己未朔，立都督府，领左右钦察及龙翊卫。庚申，封知枢密院事火沙为昭武郡王。辛酉，封朵列帖木儿为楚王。高昌王铁木儿补化为中书左丞相，大司农王毅为中书平章政事，钦察知枢密院事。癸亥，燕铁木儿为御史大夫。甲

子，有事于太庙。齐王月鲁帖木儿卒。乙丑，遣中书左丞跃里帖木儿迎皇兄于北边。丙寅，幸大崇恩福元寺。戊辰，遣使献海青鹞于皇兄。辛未，以册立皇后告于南郊。甲戌，复命太仆卿教化献青鹞于皇兄。己卯，以册立皇后告于太庙。壬午，陕西行台御史大夫阿里海牙为中书平章政事。遣内侍秃教化觐皇兄于行在。癸未，遣宣靖王买奴觐皇兄于行在。丙戌，皇兄周王即皇帝位于和林北，是为明宗。

二月己丑，曲赦四川囊家台。庚寅，燕帖木儿复为中书右丞相。辛卯，帝御大明殿，册立皇后宏吉刺氏。广西思宁路蛮酋黄克顺来献方物。癸巳，翰林侍读学士曹元用祀孔子于阙里。戊戌，察罕脑儿宣慰使撒忒迷失会镇西武靖王搠思班讨囊家台。颁行《农桑辑要》及《栽桑图》。辛丑，追尊皇妣亦乞烈氏为仁献章圣皇后，唐兀氏为文献昭圣皇后。八百媳妇及金齿九十九洞、蒙通、蒙莱、银沙罗甸诸蛮并来献方物。丙午，囊家台分兵寇襄阳。辛亥，帝谕群臣曰：“撒迪还，言大兄已即皇帝位。凡二月二十一日以前除官者，速与制敕，以后铨选，其闻于行在。”癸丑，诸王月鲁帖木儿至播州，诏谕杨延里不花等，皆降。甲寅，立奎章阁学士院，翰林学士承旨忽都鲁迷失、集贤大学士赵世延并为奎章阁大学士。乙卯，置银沙罗甸等处宣慰使都元帅府。

三月辛酉，遣燕铁木儿奉皇帝宝，觐明宗于行在，知枢密院事秃儿哈帖木儿、御史中丞八即刺、翰林直学士马哈谋、典瑞使教化的、宣徽副使章吉、佾中政院事脱因、通政使那海、太医使吕廷玉、给事中咬驴、中书断事官忽儿忽答、右司郎中孛别出、左司员外郎王德明、礼部尚书八刺哈赤等从

行。帝谕群臣曰：“宝玺既北上，自今国家政事其闻于行在。”乙亥，立行枢密院，山东都万户也速台儿知行枢密院事，与湖广、河南两行省官会讨四川。庚辰，召诸王秃剌于高丽。

夏四月乙丑，有事于太庙。辛卯，也速台儿以病卒，命跃里帖木儿、王不怜吉台代之。王不怜吉台又以母老辞，改命同佥枢密院事傅岩起代之。己亥，囊家台降。癸卯，明宗遣武宁王彻彻秃、中书平章政事哈八儿秃来锡命，立帝为皇太子。

五月己未，遣翰林学士承旨阿怜帖木儿奉迎大驾。癸亥，复遣翰林学士承旨斡儿朵奉迎。甲戌，命中书省拟注中书六部官，奏于行在所。丙子，改储政院为詹事府，伯颜、铁木儿补化，江南行台御史大夫阿儿思兰海牙、江浙行省平章政事曹立，并为太子詹事，中书参知政事赵世安为詹事丞。丁丑，皇太子发京师，北迎大驾。镇南王帖木儿不花，诸王也速、斡即、答来不花、朵来只班、伯颜、也不干，驸马别阁及扈卫百官悉从行。

六月丁酉，铁木儿补化以天旱乞避相位，皇太子谕之曰：“皇帝远在沙漠，未能早至京师，故勉摄大位。今亢旱，皆予阙失所致。汝其祇修实政，庶几上答天变。”仍命铁木儿不花奏于行在。

秋七月丙辰朔，日有食之。丙子，受皇太子宝。

八月丙戌，皇太子觐明宗于旺忽察都。庚寅，明宗崩。燕铁木儿以皇后之命奉皇帝宝授于皇太子，皇太子北还。壬辰，皇太子次孛罗察罕。伯颜复为中书左丞相，依前太保。钦察台、阿儿思兰海牙、赵世延并中书平章政事，甘肃行省平章

政事朵儿只为中书右丞，参议中书省事阿荣、詹事丞赵世安并中书参知政事。前右丞相塔失铁木儿，知枢密院事、太子詹事铁木儿补化，上都留守铁木儿脱并为御史大夫。癸巳，皇太子至上都。丙申，流诸王忽刺出于海南。丁酉，命阿荣、赵世安提调通政院事。戊戌，杀囊家台。己亥，皇太子复即位于上都大安阁，大赦天下，诏曰：

朕惟昔上天启我太祖皇帝肇造帝业，列圣相承。世祖皇帝既大一统，即建储贰，而裕皇天不假年，成宗入继，才十余载。我皇考武宗归膺大宝，克孝天心，志存无私，以仁宗居东宫，遂嗣宸极。甫及英宗，降割我家。晋王违盟构逆，据有神器，天示谴告，竟陨厥身。

于是宗戚旧臣协谋以举义，正名以讨罪，揆诸统绪，属在眇躬。朕念大兄播迁朔漠，以贤以长，历数宜归，力拒群言，至于再三。乃日艰难之际，天位久虚，则民心不固，恐堕大业。朕虽徇众请以临御，秉初志而不移，是以固让之诏始颁，奉迎之使已遣，命阿剌忒纳失里、燕铁木儿奉皇帝宝玺，远迓于途。而先皇帝跋涉山川，蒙犯霜露，道里辽远，自春徂秋，怀艰阻于历年，望都邑而滋慨，徒御弗慎，节宣失宜。信使往来，相望于道，彼此思见，交切于怀。八月一日，大驾次旺忽察都，朕方欣瞻对之有期，独兼程而先进，相见之顷，悲喜交集。何期数日之间，宫车弗驾，国家多难，遽至于斯！念之痛心，以夜继旦。

诸王、大臣以为祖宗基业之隆，先帝付托之重，天命所在，诚不可违，请即正位，以安九有，朕以先皇帝奄弃天下，摧怛方新，保忍衔哀以践大宝。乃群臣固请伏阙，至三日之

久。朕维宗社大计，乃于八月十五日即皇帝位于上都。可大赦天下，自天历二年八月十五日昧爽以前，罪无轻重，同赦除之。

於戏！戡定之余，莫急于与民休息。丕变之道，莫大乎使民知义。亦惟尔中外大小之臣，各究乃心，以称朕意。甲辰，钦察台还京师，经理庶政。燕铁木儿、阿荣留上都，监给恩赉金币。庚子，封牙纳失里为辽王。戊申，封诸王宽彻为安肃王。乙酉，车驾发上都。庚戌，改詹事院为储政院。癸酉，召吴王浚皮及其诸父木楠子至京师。前左丞相别不花坐与平章政事速速召日者推测帝算，安置别不花于集庆路。

九月辛酉，敕往大行皇帝行在送宝官吏越次超擢者，皆从降黜。丁卯，车驾至自上都。戊辰，召威顺王宽彻不花至京师。辛未，知枢密院事塔失帖木儿坐附倒刺沙免官。壬申，特授怯薛官定住开府仪同三司。癸酉，御大明殿，受诸王、百官朝贺。甲戌，广西思明州蛮酋来献方物。丙子，铁木儿补化录军国重事。翰林学士承旨也儿吉尼、元帅梁国公都列捏并知行枢密院事。也先捏伏诛。壬午，封知枢密院事燕不邻为兴国公，大司农卿燕赤为司徒。是月，直省舍人完者等颁即位诏于高丽。

冬十月甲申，有事于太庙。诏镇南王孛罗不花镇扬州。戊子，知枢密院事火沙兼知行枢密院事。辛卯，燕铁木儿率群臣请上尊号，不许。封太禧宗禋使坚帖木儿为梁国公。甲午，以即位告祀南郊、社稷。丙申，上大行皇帝尊谥曰翼献景孝皇帝，庙号明宗，国语曰护都笃皇帝。癸卯，中书左丞张思明罢。庚戌，以亲祀太庙礼成，诏天下。云南威楚路蛮酋呢

放遣其子来献方物。是月，中书参知政事赵世安为中书左丞。

十一月乙卯，以立皇后宏吉刺氏诏天下。丙辰，答邻答里知枢密院事，朵儿只亦都护为河南行省左丞相。中书省奏：“近制，行省不设丞相。”帝曰：“朵儿只先朝旧臣，不当以例拘之。”癸亥，翰林学士承旨阔彻伯知枢密院事。丙寅，云南威楚路蛮酋呢放来朝。己巳，撒迪为中书右丞。壬申，毁木剌忽广平王印，命哈班袭广平王，更铸印赐之。丁丑，复立孟定路军民总管府。湖广徭贼作乱。乙卯，高丽王王焘遣使贺即位，并请传位于世子楨。壬午，诏豫王阿剌忒纳失里镇云南。

十二月庚寅，末吉为大司徒。乙未，改封前镇南王铁木儿不花为宣让王，诏曰：

皇姑大长公主，蚤寡守节，不从诸叔继尚，鞠育遗孤，其子袭王爵，女配予一人。朕思庶民若是者犹当旌表，况在懿亲乎！其令赵世延、虞集等议封号以闻。

戊申，珣璐不花为御史大夫。辛亥，趣内外已授官者速赴任。

是年，安南国王陈益稷卒。

卷二十二

本纪第二十二

文宗下 宁宗

至顺元年春正月丁巳，知枢密院事伯帖木儿出为辽阳行省左丞相。辛酉，有事于太庙。甲午，燕铁木儿、伯颜并乞罢退，不允，仍命阿荣、赵世安慰谕之。丁卯，诸王秃坚及万户伯忽、阿木、怯朝等起兵于云南，陷中庆路。壬申，衡阳徭寇湘乡州。癸酉，宣徽使撒敦知枢密院事。丁丑，召荆王也速也不干子脱脱木儿至京师。赵世延乞致仕，不允。衡阳徭寇石康县。己卯，封太医院使野里牙为秦国公。

二月壬午朔，赵世安为御史中丞，史惟良为中书左丞。癸未，知枢密院事燕不怜加开府仪同三司。籍故中书平章政事张珪五子资产。己丑，秃坚等陷仁德府。是月，典瑞院使阿鲁等使高丽。甲午，秃坚自立为云南王。丙申，云南蒲蛮酋入觐。己亥，中书平章政事朵儿失有罪免。徭贼陷灌阳县。壬寅，御史大夫珣璐不花乞致仕，不允。甲辰，流王禅子帖木儿不花于吉阳军。乙巳封明宗皇子亦璘真班为郕王。丙午，中尚卿小云失海涯以兵讨云南。丁未，伯颜知枢密院事，依前太保、录军国重事。诏曰：

昔在世祖，尝以宰相一人总领庶务，故治出于一，政有所统。今燕铁木儿为右丞相，伯颜既知枢密院事，左丞相其

勿复置。

戊申，太禧宗禋使阿里海牙为中书平章政事。命中书左丞史惟良、参知政事和尚总督建言之事。是月，典瑞院使阿鲁等使高丽，册高丽世子桢为开府仪同三司、征东行省左丞相、高丽国王。

三月甲寅，乖西蛮入寇。丁巳，徙封济阳王木楠子为燕王，吴王泼皮为济阳王。戊午，封皇子阿剌忒纳荅刺为燕王。延试进士，赐笃列图、王文烨等九十七人及第、出身有差。河南行省平章政事乞住为云南行省平章政事，八番顺元宣慰使帖木儿不花为云南行省左丞，从豫王讨云南。癸亥，诸王桑哥班、撒忒迷失、买哥分使燕只吉台、不赛因、月即别三藩。丁卯，命御史大夫铁木儿补化等振举台纲。辛未，封知枢密院事不花帖木儿为武平郡王。录讨秃坚功，云南宣慰使举宗、禄余并遥授云南行省参知政事。壬申，祔明宗皇帝于太庙。甲戌，封诸王速来蛮为西宁王。乙亥，西番、哈刺火州来献蒲桃酒。丙子，改山东都万户府为都督府。云南木邦酋浑都来献方物。赐燕铁木儿定策元勋碑。辛巳，诸王哈儿蛮遣使贡葡萄酒。

夏四月甲申，有事于太庙。丙戌，封也真也不干为桓国公。丁酉，遣诸王桑兀孙还云南。明宗皇后八不沙崩。云南宣慰使禄余杀乌撒宣慰司官吏，叛附伯忽，罗罗诸蛮俱叛，平章政事帖木儿不花死之。戊申，诸王云都帖木儿将江浙、江西、河南三行省兵，与湖广行省平章政事脱欢讨云南。

五月乙卯，以受尊号，告祭南郊。戊午，御大明殿，燕铁木儿率百官及僧道耆民，上尊号曰钦天统圣至德诚功大文

孝皇帝。是日，改元至顺。诏河南、怀庆、卫辉、普宁四路曾经赈济人户，今岁差发全行蠲免。其余被灾路分，已经赈济者，腹里差发、江淮夏税，俱免三分。庚申，以受尊号，谢太庙。甲子，申命燕铁木儿为中书右丞相，诏天下。丁卯，翰林国史院进《英宗实录》。戊辰，车驾幸上都，次大口。阿怜帖木儿为大司徒。遣豫王阿剌忒纳失里镇西番。赵世延加翰林学士承旨，封鲁国公。己巳，车驾次龙虎台。辛未，置宣忠扈卫亲军都万户府。太禧宗禋使亦列赤为中书平章政事。癸酉，遣使劳云南军。甲戌，八番乖西蛮作乱。乙亥，置顺元宣抚使司，统答剌罕军讨云南。是月，以浙东宣慰使陈天祐、湖广行省参知政事樊楫死事，赠天祐推忠秉义全节功臣，江浙行省左丞，追封河南郡公，楫推忠宣力效节功臣、江浙行省右丞、上党郡公。

六月丙戌，车驾至上都。丙申，立行枢密院，彻里铁木儿知行枢密院事，探马赤同知枢密院事，教化为枢密副使，率朵甘思、朵思麻及巩昌兵万三千人，从镇西武靖王搠思班、豫王阿剌忒纳失里分道讨云南。庚子，内侍撒里为大司徒。杀知枢密院事阔彻伯、脱脱木儿，通政使只儿哈郎，翰林学士承旨教化的、伯颜也不干，燕王宫相教化的、斡罗思，中政使尚家奴、秃乌台，阿速卫指挥使那海察、拜住，并籍其家。乙巳，罗罗斯蛮酋撒加伯合乌蒙蛮寇建昌县，云南行省右丞跃里帖木儿败之，四川兵又败撒加伯于庐古驿。丁未，改东路蒙古军元帅府为东路钦察军万户府。

秋七月辛亥，封诸王按浑察为广宁王。丁巳，诸王不赛因遣使来朝。乙丑，翰林学士承旨也儿吉尼知枢密院事。丁

丑，故丞相铁木迭儿子匠作使锁住与其弟观音奴及大医院使野里牙等祭北斗咀咒事觉，俱伏诛，并杀前刑部尚书乌马儿、前御史大夫孛罗、上都留守马儿。

闰月庚辰朔，封诸王卯泽为永宁王。辛卯，陕西行台御史中丞脱亦纳为中书参知政事，中书平章政事赵世延罢为翰林学士承旨。癸巳，月鲁帖木儿为大司徒。丁酉，车驾发上都。戊戌，封甘肃行省平章政事乃马台为宣宁郡王，驸马谨只儿为郾国公，并知行枢密院事。戊申，加封宣圣父叔梁纥为启圣王，母颜氏为启圣王夫人，颜子为兗国复圣公，曾子郕国宗圣公，子思沂国述圣公，孟子邹国亚圣公，程颢为豫国公，程颐为洛国公。罗罗斯酋撒加伯等寇建昌，四川行省以兵讨之。广西徭贼寇修仁，荔浦诸县，广西元帅府以兵讨之，获其酋于国安。

八月丁巳，诸王月即别遣使来朝。己未，车驾至自上都。甲子，忠州蛮酋黄祖显遣其子来献方物。乙丑，遣使至真定玉华宫，祀睿宗及庄圣皇后。壬申，兴举蒙古字学。

九月庚辰，大宁路地震。罢入粟补官例。甲申，不兰奚、月鲁帖木儿并授大司徒印。辽阳行省平章政事哈刺铁儿为御史葛明诚所劾，免官。己丑，岭北行省平章政事哈八儿秃为御史朵罗台、王文若所劾，免官。癸巳，封魏王阿木哥子阿鲁为西靖王。甲午，窜湖南行省平章政事速速于雷州。丙子，中书左丞史惟良致仕。丁未，中书参知政事张友谅为中书左丞。知枢密院事脱别台出为陕西行台御史大夫。

冬十月己未，中书右丞相燕铁木儿等告于太庙，请以太祖皇帝配享南郊。辛酉，帝服大裘袞冕，祀昊天上帝天南郊，

以太祖皇帝配享，中书右丞相燕铁木儿为亚献，御史大夫帖木儿补化为终献。乙丑，广西徭贼寇横州及永淳县。辛未，乌蒙路蛮酋阿朝降。乙亥，撒敦、唐其势并赐号答刺罕。

十一月戊寅，伯忽及其弟伯察儿等俱伏诛。丙戌，跃里帖木儿败罗罗斯诸蛮于建昌木托山。辛卯，阔阔台知枢密院事。癸巳，阿秃伏诛。甲午，诸王按灰坐毆伤巡检，杖谪广宁。乙未，跃里帖木儿等平云南。

十二月戊申，以立皇太子，遣知枢密院事伯颜告于郊庙。己酉，以汉儒董仲舒从祀孔子庙。辛亥，立皇子燕王阿剌忒纳答剌为皇太子。戊午，以郊祀礼成，帝御大明殿受百官贺，大赦天下，甲戌，御史中丞和尚坐贪纵，免官禁锢。

二年春正月戊寅，乌撒、乌蒙诸蛮及东川夷獠俱来降。癸未，立侍正府，伯颜、月鲁帖木儿等十四人并以本官兼侍正。乙酉，有事于太庙。庚寅，改东路蒙古军万户府为东路蒙古亲军都指挥使司。诸王哈儿蛮遣使贡葡萄酒。辛卯，皇太子阿剌纳答剌卒。己亥，吏部尚书撒里瓦、礼部郎中赵期颐颁即位诏于安南并赐以新历。甲辰，建孔子庙于后卫。

二月丙戌，上都留守乃马台知岭北行枢密院事，太禧宗禋使谨只儿、答邻答里、马列捏并知枢密院事，遥授平章政事。四川怀德府驴谷什用等四洞及生蛮十二洞，俱来降，改怀德府为宣抚司。湖广行省参知政事彻里帖木儿及速速、班丹俱坐出言怨望，流彻里帖木儿于广东，班丹于广西，速速于海南，并籍其家。壬子，中书平章政事亦列赤兼沈阳等路安抚使，伯撒里为中书平章政事，朵儿只班为中书参知政事。乙卯，云南叛蛮悉降。壬戌，改封宁王彻彻秃为郯王。庚午，

占城国遣使来贡方物。郯王彻彻秃及诸王沙哥坐妄言不道，安置彻彻秃于广州，沙哥于雷州。甲戌，荆王也不干遣使贡犁牛。云南景东蛮酋阿只弄遣其子来献驯象。

三月戊子，诸王阿鲁出镇陕西。己丑，江浙行省平章政事童童为御史所劾，免官。庚寅，命威顺王宽彻不花仍镇湖广。癸巳，云南贼也不干、罗罗、脱脱木儿等俱伏诛。庚子，立宫相都总管府。

夏四月戊申，以宫中高丽女子不颜帖你赐燕铁木儿。高丽国王请献国中田为资送，遣使往受之。庚戌，建燕铁木儿生祠于红桥，并赐功德碑。壬子，燕铁木儿总制宫相府事，也不伦、伯撒里并以本官兼都达鲁化赤。甲寅，改宣忠扈卫亲军都万户府为宣忠斡罗斯扈卫亲军都指挥使司。乙卯，有事于太庙。镇西武靖王搠思班等以云南平，各遣使来献捷。庚申，征河南儒士吴炳为艺文监典簿，炳不至。壬戌，探马赤为云南行省平章政事，总制境内军事。

五月己卯，安南世子陈日煊遣使来贡方物。己丑，置八百等处宣慰司都元帅府，临江、元江等处宣慰司。癸巳，云南威楚路蒲蛮猛吾来献方物，愿入银为岁赋，诏置散府一、土官三十三，皆赐金银符。甲午，封宣政使脱力为蓟国公。乙未，陕西行台御史大夫脱别台知枢密院事。御史大夫玘璐不花罢。奎章阁大学士赵世延等进《皇朝经世大典》。丙申，车驾幸上都。戊戌，次红桥，祀燕铁木儿生祠。己亥，也儿吉尼知行枢密院事。八百等处蛮酋来献方物。癸卯，也儿吉尼加太尉。

六月丙寅，云南乌撒、罗罗斯诸蛮复叛。是月，加封郅

国夫人并官氏为大成至圣文宣王夫人。

秋七月己卯，曲赦云南叛蛮禄余等。壬午，监察御史张益等劾四川行省平章政事钦察台反复不可信任，流钦察台于广东，同妻孥禁锢，仍诏御史台凡恤人如钦察台者，其极言之。丁亥，琼州黎贼作乱。壬辰，知枢密院事脱别台为御史大夫。戊戌，封伯颜为浚宁王。庚子，广西徭贼平。辛丑，怀德府二十一洞蛮来献方物。

八月甲辰朔，日有食之。封脱怜忽秃鲁为靖恭王，阿蓝朵儿只为懿德王。诸王不赛因遣使来朝。辛亥，车驾至自上都。壬子，诸王答儿麻失理遣孛儿只吉歹等来贡方物。丙辰，封怯列该为丰国公。己未，诸王不赛因遣使来言其臣怯列木丁矫王命入朝，请执以归；敕怯列木丁乘驢还。

九月丙子，云南东川路总管普沂先那具杀宣慰使月鲁以叛，西域指挥使锁住以兵讨之。海南贼王周率十九洞黎蛮作乱，湖广行省左丞移剌四奴以兵讨之。庚寅，幸大承天护圣寺。禄余寇顺元路。

冬十月己酉，有事于太庙。辛亥，召江南行台御史大夫阿儿思兰海涯至京师。癸丑，幸大承天护圣寺。蒙古都元帅怯烈败阿禾党于靖江路。乙丑，立昭功万户都总使府。

十一月壬申朔，日有食之。乙亥，李彥通、萧不兰奚等谋反，伏诛。丙子，封诸王斡即为保宁王。己卯，封蘸班为豳国公。辛巳，户部尚书耿焕为中书参知政事。癸未，养燕铁木儿之子塔刺海为皇子。荆王也速也不干贡犁牛四百。

十二月壬子，命诸王忽刺出复镇云南。戊午，诸王秃列帖木儿来献马及葡萄酒。庚申，遣集贤直学士答失蛮至真定

玉华宫祀睿宗及庄圣皇后。

三年春正月辛未朔，高丽国遣使贺正旦兼贡方物。癸酉，前高丽王焘仍为高丽国王。己卯，有事于太庙。广西罗伟里蛮合龙州落羽蛮作乱。丁亥，幸大承天护圣寺。戊子，万安军黎贼寇陵水县。庚子，封公主桑哥不刺为郢国大长公主。夔州路洞蛮寇施州。

二月辛丑朔，八番蛮酋骆度来献方物。甲辰，诸王答儿蛮失里、哈儿蛮各遣使贡马及金鸦鹖、蒲萄酒。乙巳，湖广行省平章政事珣璐不花为陕西行台御史大夫。戊申，禄余合芒部蛮寇罗罗斯及东川、会通等州，己酉，禄余乞降。己巳，诏修曲阜宣圣庙。

三月庚午朔，遣使赐诸王不赛因绣彩币帛。爪哇国遣使奉表贡方物。丁亥，诸王伯岳兀、完者帖木儿来朝。戊子，占城国遣使奉金字表，贡方物。癸巳，皇子古剌荅纳更名燕帖古思。丁酉，缅甸遣使贡方物。

夏四月壬寅，四川师壁、散毛、盘速出三洞蛮酋来献方物。戊申，大宁路地震。四川大盘洞蛮来献方物。丙辰，诸王不别居法郎，及不赛因各遣使贡方物。乙丑，安南世子陈日炉遣使贡方物。安西王月鲁帖木儿与国师必剌忒纳失里沙津、畏兀僧玉你达八的刺板的谋为不轨，事觉皆伏诛。

五月戊寅，幸大承天护圣寺。京师地震，有声。庚寅，车驾幸上都。

六月己亥朔，赦天下。以月鲁帖木儿等罪状，诏谕中外。己酉，御史中丞赵世安为中书左丞。癸亥，知枢密院事也卜伦加开府仪同三司。

秋七月戊辰朔，诸王答里麻失里等遣使献虎豹。丁丑，移刺四奴以兵讨广东黎贼。壬辰，不赛因遣使贡七宝水晶。甲午，诸王月即别遣使贡方物。宥诸王彻彻秃、沙哥还本部。

八月癸卯，吴王木楠子及诸王答都阿海、锁南管卜、帖木儿赤、帖木迭儿等来朝。乙巳天鼓鸣于西北。丙午，祭社稷。丁未，有事于太庙。己酉，帝崩于上都，在位五年，年二十有九。癸丑，葬起辇谷。

元统元年十一月辛亥，上尊谥曰圣明元孝皇帝，庙号文宗，国语曰札牙笃皇帝。

宁宗冲圣嗣孝皇帝，讳懿璘质班，明宗第二子也。母曰皇后乃蛮真氏。

天历二年二月，封郕王。

至顺三年八月，文宗驻蹕上都，疾大渐，召皇后及丞相燕铁木儿至榻前曰：“旺忽察都之事，为朕平生大错，悔之无及。燕帖古思虽朕子，然天下乃明宗之天下也。汝等如爱朕，其召妥欢帖木儿立之。朕见明宗于地下，亦可以自解矣。”言讫而崩。燕铁木儿不欲立妥欢帖木儿，秘遗诏不发，扬言大行皇帝申固让夙志，传位于明宗之子，请以帝入承大统，遣使征诸王会京师，中书庶务启皇后取进止。

九月辛巳，京师地震。

冬十月庚子，帝即位于大明殿。诏曰：

洪惟太祖皇帝启辟疆宇，世祖皇帝统一万方，列圣相承，法度明著。我曲律皇帝入纂大统，修举庶政，动合成法，授大宝位于普颜笃皇帝以及格坚皇帝。历数之归，实当在我忽都笃皇帝、扎牙笃皇帝，而各播越辽远。时则有若燕铁木儿，建义效忠，戡平内难，以定邦国，协恭推戴扎牙笃皇帝。登极之始，即以让兄之诏明告天下。奉玺绂远迓忽都笃皇帝。及忽都笃皇帝奄弃臣庶，扎牙笃皇帝复正宸极，仁义之至，视民如伤，恩泽旁被，无间远迓。顾育眇躬，尤笃慈爱。宾天之日，皇后传顾命于太师太平王右丞相答剌罕燕铁木儿、太保浚宁王知枢密院事伯颜等，谓圣体弥留，益推固让之初志，以宗社之重，属诸忽都笃皇帝之世嫡。乃遣使召诸王宗亲，以十月一日来会于大都，与宗王、大臣同奉遗诏劝进。朕以至顺三年十月初四日，即皇帝位于大明殿。可大赦天下。

大都、上都、兴和三路差税免三年。腹里差发并诸郡不纳差发去处税粮，十分为率，免二分。江淮以南，夏税亦免二分。土木工役，除仓库必合修理外，毋创造以纾民力。民间应有逋欠差税课程，尽行蠲免。监察御史、肃政廉访司官并内外三品以上正官，岁举才堪守令者一人，申省部先行录用，如称职，举官优加旌擢。重囚淹禁三年以上，疑不能决者，申省部详谳释放。学校农桑、孝义贞节、科举取士、国学贡试，并依旧制。广海、云南梗化之民，诏书到日，限六十日内出官，与免本罪。

辛丑，知枢密院事撒敦为御史大夫，中书右丞撒迪为平章政事，宣政使阔里吉思为中书右丞，中书平章政事秃儿哈铁木儿知枢密院事。甲寅，不赛因遣使贡塔里牙、佩刀。乙卯，以

即位告祀南郊。己未，告祀太庙。庚申，告祀社稷。是月，立皇后宏吉刺氏。

十一月壬申，命鄯王彻彻秃镇辽阳。甲戌，以上皇太后玉册，告祭南郊及太庙。戊寅，尊皇后曰皇太后。己卯，御大明殿受朝贺。壬辰帝崩，年七岁。甲午，葬起辇谷。

至元三年正月辛亥，上尊谥曰冲圣嗣孝皇帝，庙号宁宗。

史臣曰：“燕铁木儿挟震主之威，专权用事。文宗垂拱于上，无所可否，日与文学之士从容翰墨而已。昔汉灵帝好词赋，召乐松等待诏鸿都门，蔡邕露章极谏，斥为俳优。况区区书画之玩乎？君子以是知元祚之衰也。《春秋》之义，未逾年之君称子。宁宗即位匝月而殇，乃入庙称宗；其廷臣不学如此，岂非失礼之大者哉。”

卷二十三

本纪第二十三

惠宗一

惠宗皇帝，讳妥欢帖木耳，明宗长子也。母曰贞裕徽圣皇后罕禄鲁氏。延祐七年夏四月丙寅生帝于北边。

至顺元年夏四月，文宗将立其子阿剌忒纳答剌为皇太子，乃以八不沙皇后言明宗平日谓太子非其子，使翰林学士阿怜

帖木耳等书其事于《脱卜赤颜》，遂徙帝于高丽之大青岛。未几，有飞语谓，高丽与辽阳行省将奉帝起事。

二年十二月，文宗复召帝还，使学士虞集草诏布告天下，谓帝非文宗之子，徙帝于广西之静江。

文宗崩，遗命传位于帝。燕铁木儿矫诏立宁宗。宁宗崩，复言于皇太后，请立文宗子燕铁古思。皇太后曰：“吾儿尚幼，妥欢帖木儿在广西，今年十三矣，且明宗长子，宜立之。”乃命中书右丞阔里吉思迎帝于静江。

元统元年春二月，帝至良乡，具卤簿导入。燕铁木儿与帝并马徐行，陈迎立之意。帝畏之，不能答。燕铁木儿疑帝意不可测，故帝至，久不得立。国事皆决于燕铁木儿，奏皇太后行之。

五月，燕铁木儿卒，皇太后始与群臣定议以帝承大统，且曰：万岁之后，其传位于燕帖古思，若武宗、仁宗故事。

夏六月己巳，帝即位于大都，大赦天下。诏曰：

洪惟我太祖皇帝受命于天，肇造区夏。世祖皇帝奄有四海，治功大备。列圣相传，丕承前烈。我皇祖武宗皇帝入纂大统。及致和之季，皇考明宗皇帝远居沙漠，札牙笃皇帝戡定内难，以天下让。我皇考宾天，札牙笃皇帝复正宸极。治化方隆，奄弃臣庶。

今皇太后召大臣燕铁木儿、伯颜等曰：“昔者阔彻、脱脱木儿、只儿哈郎等谋逆，以明宗太子为名，又先为八不沙皇后妄构诬言，疏离骨肉。”逆臣等既正其罪，朕遂迁于外。札牙笃皇帝后知其妄，寻至大渐，顾命有曰：“朕之大位，其以兄子继之。”时朕远在南服，遂以朕弟懿璘质班登大位，以

安百姓，乃又遽至大故。皇太后体札牙笃皇帝遗意，以武宗皇帝之元孙，明宗皇帝之世嫡，以贤以长，在予一人，遣使迎还。征宗室诸王来会。今奉皇太后勉进之笃，宗室诸王恳请之至，以至顺四年六月初八日即皇帝位于大都。

於戏！惟天、惟祖宗全付予有家，栗栗危惧，若涉渊冰，罔知攸济。尚赖宗亲臣邻，交修不逮，以底隆平。咨尔多方，体予至意。

辛未，伯颜为太师、中书右丞相，撒敦为太傅、左丞相。是月，京师大水。

秋八月壬申，巩昌徽州山崩。是月，立燕铁木儿女伯牙吾氏为皇后。

九月庚申，诏太师伯颜、太傅撒敦外，余官不得兼领三职。

冬十月丙寅，凤州山崩。戊辰，改元元统，诏曰：

在昔世祖皇帝绍开丕图，稽古建元，立经陈纪，列圣相承，恪遵成宪。肆予冲人，嗣大历服，兹图治之云初，嘉与民而更始。乃新纪号，诞告多方，其以至顺四年为元统元年。

癸酉，僦罗蛮酋浑邓马弄来贡方物。丁丑，依皇太后行年，释重囚二十七人。戊子，封撒敦为荣王，唐其势袭太平王。

十一月丙申，成纪县山崩地裂，丁酉，有事于太庙。辛亥，上札牙笃皇帝尊谥为圣明元孝皇帝，庙号文宗。封伯颜为秦王。是日，秦州山崩地裂。乙卯，伯颜、撒敦统百官，总庶政。

十二月乙丑，广西徭陷道州，千户郭震死之。甲戌，秃

坚帖木儿加太尉致仕。乙亥，立徽政院。是年，廷试进士百人，左右榜各三人，同同、李齐等赐及第、出身有差。

元统二年春正月庚寅朔，汴梁路雨血。辛卯，御史大夫脱列台为中书平章政事，阿里海涯出为河南行省左丞相。丁酉，有事于太庙。戊戌，四川大盘洞蛮酋谋谷什用来献方物。吏部尚书帖住等使安南。己酉，以上文宗尊谥，告祀南郊。甲寅，立行宣政院于杭州。乙卯，云南姚安路总管高明来献方物。

二月己未朔，诏内外兴学校。乙丑，燕不邻为太保。戊辰，封也真也不干为昌宁王。丁丑，封皇姑妥妥辉为英寿大长公主。三月癸巳，广西贼徭复叛，同知元帅吉列思死之。复立西番巡捕都元帅府。丁未，河南行省左丞相阿里海涯为江浙行省左丞相。壬子，广西徭贼寇全州。

夏四月戊午朔，日有食之。庚申，封诸王蛮子为文济王。壬申唐其势、马札儿台并为御史大夫。己卯，祔文宗皇帝于太庙，帝亲行告祭礼。左丞相撒敦加开府仪同三司、上柱国、录军国重事。壬午，特录许衡孙从宗为章佩监提点。是月，车驾幸上都。

五月辛卯，唐其势为中书左丞相，撒敦仍商量中书省事。戊申，诏文济王蛮子镇大名，西靖王阿鲁镇云南。是月，赐涪州万户府知事阚文兴谥英毅侯，妻王氏贞烈夫人，庙号双节。

六月乙亥，唐其势辞左丞相不拜，撒敦复为左丞相。乙酉，追封燕铁木儿为德王，谥忠武。是月，彰德路雨白毛。

秋七月辛卯，祭太祖、太宗、睿宗御容。

八月辛未，赦天下。京师地震。鸡鸣山崩陷为池。

九月辛卯，车驾至自上都。甲午，广西徭贼陷贺州，都元帅章伯颜以兵讨之。

冬十月戊午，有事于太庙。辛酉侍御史许有壬为中书参知政事。丁卯，立湖广黎兵屯田万户府。

十一月己卯，上皇太后尊号曰赞天开圣仁寿徽懿昭宣皇太后，赦天下，免今年民租之半，内外官四品以下减一资。是月，镇南王孛罗不花来朝。始以宣慈惠圣皇后配享武宗。

十二月甲戌，诏整治学校。

至元元年春正月癸巳，命廉访司察劝农官勤惰，上于大司农司，以惩黜陟。

二月戊午，祭社稷。己卯，以上皇太后尊号，告祀南郊。

三月癸未朔，遣五府官决天下囚。平伐、都云、定云等蛮来降。辛卯，以上皇太后尊号，告祀太庙。庚子，禁选高丽女子。议罕祿鲁太后祔庙礼。乙巳，封安南世子陈端午为安南王。

夏四月辛酉，有事于太庙。江南行台中丞不花为中书参知政事。

五月丙戌，占城国遣使贡方物，且言安南阻其贡道，遣使谕安南国。戊子，车驾幸上都。遣使祭曲阜孔子庙。甲辰，伯颜请以右丞相让唐其势，不允，命唐其势为左丞相。

六月庚辰，唐其势及其弟塔刺海作乱，伏诛。废皇后伯牙吾氏。

秋七月辛巳朔，马札儿台、阿察赤并为御史大夫，御史

中丞撒迪为中书平章政事。壬午，伯颜弑废后伯牙吾氏。甲申，孛罗为中书平章政事。丁亥，有事于太庙。壬寅，伯颜为中书右丞相，罢左丞相不置。癸卯，知枢密院事阿吉剌为中书平章政事。戊申，燕铁木儿弟答里等伏诛。伯颜赐号答剌罕，赦天下。是月，江南行台中丞纳麟为中书参知政事。

八月戊午，祭社稷。癸亥，淇阳王完者帖木儿、知枢密院事帖木儿不花并为御史大夫。甲子，完者帖木儿加太傅。己卯，尊皇太后为太皇太后。

九月丙戌，赦天下。知枢密院事定住为中书平章政事。丁亥，封定住为宣德王，知枢密院事阔里吉思为宜国公。丙午，车驾至自上都。

冬十月丙辰，大司农塔失海牙为太尉、商议中书省事。丁巳，塔失帖木儿为太禧院使、议军国重事。流诸王晃火帖木儿及答里、唐其势子孙于北边。癸亥，流御史大夫完者帖木儿于岭南。平章政事撒迪为御史大夫。辛未，太皇太后册宝成，告祀太庙。

十一月庚辰，罢科举。丁酉，户部尚书徐奭、吏部尚书定住参议中书省事。戊戌，诏前知枢密院事福丁、失剌不花、撒儿的哥还京师。辛丑，改元至元，诏曰：

朕祗绍天明，入纂丕绪，于今三年，夙夜寅畏，罔敢怠荒。兹者年谷顺成，海宇清谧，朕方增修厥德，日以敬天恤民为事，属太史上言，星文示儆。将朕薄德，有所未逮欤？抑天心仁爱，俾予以治，有所告戒欤？弭灾有道，善政为先。更号纪年，实惟旧典。惟世祖皇帝在位长久，天人协和，诸福咸至，祖述之志，良切朕怀。今特改元统三年仍为至元元年。

遡遵成宪，诞布宽条，庶格祲祥，永绥景祚。

是日，赦天下。

十二月丙辰，征高丽前王阿剌忒纳失里入朝。乙丑，上太皇太后尊号曰赞天开圣徽懿宣昭贞文慈佑储善衍庆福元太皇太后。

闰月戊子，宗正府复为大宗正府。戊戌，中书平章政事彻里帖木儿有罪免。壬寅，流彻里帖木儿于安南。

是年，太庙惟举冬、夏二享。

二年春正月，置都水庸田使司于平江。

二月戊寅朔，祭社稷。丁酉，追尊帝生母罕禄鲁氏为贞裕徽圣皇后。庚子，宣靖王买奴进封益王。

夏四月戊寅，封驸马孛罗帖木儿为毓德王。庚寅，知枢密院事帖木儿不花为中书平章政事。壬寅，车驾幸上都。中书右丞耿焕罢为侍御史，王懋德为中书右丞。

五月丙午朔，河复故道。壬申，秦州山崩。

六月丁丑，赠诸王忽都答儿为云安王，追谥忠武，罗罗歹为保宁王，追谥昭勇。戊子，帖木儿补化出为江浙行省左丞相。

秋七月庚戌，定住、锁南参议中书省事。

八月甲戌朔，日有食之。戊寅，祭社稷。壬辰，立屯卫于马札罕之地。

九月戊辰，车驾至自上都。

冬十月己卯，有事于太庙。己亥，诏每日丞相伯颜，太保定住，平章政事孛罗、阿吉刺议事于内廷，平章政事塔失海牙，右丞巩卜班，参知政事纳麟、许有壬议事于中书省。是

月，高丽王普塔失里来朝。

十一月壬子，那海为湖广行省平章政事，讨广西叛徭。祔武宗宣慈惠圣皇后、英宗庄静懿圣皇后、明宗贞裕徽圣皇后于太庙。癸亥，安置诸王不兰奚于梧州。

十二月丙子，诏群臣议懿璘质班皇帝庙谥。诸王也孙帖木儿来献马。

是年，太庙惟举冬享。江浙大旱，自春至于八月不雨。

三年春正月癸卯，广州增城县贼朱光卿伪称大金国，改元赤符，指挥使狗札里、江西行省左丞沙的以兵讨之。辛亥，上懿璘质班皇帝尊谥冲圣嗣孝皇帝，庙号宁宗。癸丑，立宁夏屯田万户府。戊午，畋于柳林，凡三十五日。监察御史丑的、宋绍明进谏，帝赐以金币。丑的等固辞，帝曰：“昔魏征进谏，唐太宗赏之，未尝不受。汝其受之。”

二月壬申朔，日有食之。陈州贼胡闰儿作乱，河南行省左丞庆童以兵讨之。壬午，以上太皇太后册宝，恭谢太庙。甲申，定服色、器皿、舆马之制。辛卯，广西徭贼复叛，湖广行省平章政事那海、江西行省平政事秃儿迷失海牙以兵讨之。丙申，太保定住卒。

三月戊午，立宏吉剌氏为皇后。是月，天雨线。

夏四月甲戌，有星孛于王良，至七月壬寅没于贯索。以立皇后，告谢太庙。己卯，车驾幸上都。辛卯，合州大足县贼韩法师伪称赵王，行省参知政事举里等以兵讨之。己亥，惠州归善县贼聂秀卿、覃景山等作乱，江西行省左丞沙的以兵讨之。是月，禁汉人、南人习蒙古、色目文字。

五月辛丑，民间讹言拘刷童男、童女，一时嫁娶殆尽。甲

寅，哈八儿秃、秃坚帖木儿并为太尉。西番叛，镇西王世子党兀班死之。宣政院使也先帖木儿以兵讨西番。

六月戊寅，追赠丞相安童推忠佐运开国元勋、东平忠宪王。是月，大霖雨京师，河南北俱大水。

秋七月己亥，封平章政事巩卜班为西平王。庚子，彗星见天市垣。丙午，车驾幸失刺斡耳朵。丁未，车驾幸上都之龙冈，洒马潼祭天。壬子，车驾幸乾元寺。是月，狗札里、沙的获朱光卿，广州平。

八月戊辰，祭社稷。壬午，京师地震，太庙梁柱裂，文宗神主及御床皆碎。是月，车驾至自上都。

九月己酉，立四川、湖广、江西、江浙行枢密院。

冬十月乙亥，江浙行省参知政事搠思监提调海运。

十一月丁巳，诏脱脱木儿袭脱火赤荆王封，仍命其妃忽刺灰同治兀鲁特事。

十二月己巳，有事于太庙。是月，马札儿台为太保。四年春正月丙申，以地震大赦天下。辛酉，寿王乃马歹知行枢密院事。是月，修曲阜孔子庙。

二月丁卯，罢河南、江西、江浙、湖广、四川等处行枢密院。戊辰，祭社稷。庚午，畋于柳林。

三月辛酉，中书平章政事阿吉剌监修《至元条格》。告祭南郊。诸王玉里不花为知枢密院事。国王朵儿只为辽阳行省左丞相，以乃蛮台袭国王。

夏四月，京师雨红沙，昼晦。辛未，探马赤、只儿瓦歹为中书平章政事。癸酉，脱脱为御史大夫。乙亥，阿吉剌罢为奎章阁大学士。己卯，车驾幸上都。胡闰儿伏诛。

五月，阿吉剌复为中书平章政事。

六月辛巳，袁州贼周子旺僭称周王，寻伏诛。南胜县贼李志甫围漳州，浙江行省平章政事别不花以兵讨之。

秋七月丙辰，巩昌山崩。

八月癸亥朔，日有食之。戊辰，祭社稷。丙子，京师地震。甲申，云南老告蛮酋八那来献象马，立老告军民总管府。是月，车驾至自上都。

冬十月辛卯，有事于太庙。

十一月丁卯，立绍熙府军民宣抚都总使司。壬午，四川散毛洞蛮叛。

十二月戊戌，立邦牙等处宣慰司都元帅府。壬寅，汪家奴知枢密事，宣徽使别儿怯不花为御史大夫。庚戌，加荆王脱脱木儿元德上辅广中宣义正节振武佐运功臣。

五年春正月癸亥，禁滥予僧人名爵。

二月戊戌，祭社稷。

三月，中书平章政事阿吉剌出为辽阳行省平章政事。

夏四月，车驾幸上都。

秋七月丁丑，封皇姊月鲁公主为昌国大长公主。戊寅，诏诸王位下官毋入常选。

八月丁亥，车驾至自上都。戊子，祭社稷。

冬十月辛卯，有事于太庙。甲午，伯颜为大丞相，加元德上辅功臣，赐七宝玉书、龙凤金符。

十一月戊辰，河南行省掾范孟端诈为诏书，杀行省平章政事月鲁帖木儿、右丞劫烈、廉访使完者不花等，执大都路儒学提举归咎，咎不屈。未几，孟端伏诛，擢咎为监察御史。

十一月，中书省断事官头麟等使高丽，执高丽王普塔失里以归。

十二月辛卯，复立都水庸田使司于平江。是月，伯颜杀郯王彻彻秃，贬宣让王帖木儿补化，夺其印。

六年春正月甲戌，立司禋监，奉太祖、太宗、睿宗御容。

二月甲申朔，权止今年印钞。戊子，祭社稷。己亥，中书大丞相伯颜罢为河南行省左丞相，诏曰：

朕践位以来，命伯颜为太师、秦王、中书大丞相，而伯颜不能安分，专权自恣。欺朕年幼，轻视太皇太后及朕弟燕贴古思。变乱祖宗成宪，虐害天下。加以极刑，允合舆论。朕念先朝之故，尚存悯恤。今命伯颜出为河南行省左丞相，所有元领诸卫新军并怯丹人等，诏书到时，即许散还。

是日，太保马札儿台为太师、中书右丞相，太尉塔失海牙为太傅，知枢密院事塔马赤为太保，御史大夫脱脱为知枢密院事，汪家奴为中书平章政事，岭北行省平章政事也先帖木儿为御史大夫。壬寅，诏除知枢密院事脱脱外，诸王、大臣不得带弓刀、辄入宫禁。己酉，彗星见，状如纷絮。

三月甲寅，漳州人陈君用杀李志甫，以君用同知漳州路总管府事。辛未，迁伯颜于南恩州阳春县。丁丑，治书侍御史达识帖睦迺为奎章阁大学士。辛巳，彗星见。是月，释高丽王普塔失里，复其位。

夏四月己丑，有事于太庙。庚寅，同知枢密院事铁木儿达识为中书右丞。丙午，封马札儿台为忠王，赐号答剌罕，马札儿台固辞。是月，立高丽女奇氏为第二皇后。

五月己未，追封镇西王世子党兀班为凉王，谥忠烈。丙

子，车驾幸上都。

六月丙申，撤文宗庙主，徙太皇太后于东安州安置，放燕帖古思于高丽。诏曰：

昔我皇祖武宗皇帝升遐之后，祖母太皇太后惑于怵慝，俾皇考明宗皇帝出封云南。英宗遇害，我皇考以武宗之嫡，逃居朔漠，宗王大臣同心翊戴，肇启大事，于时以地近，先迎文宗暂总机务。继知天理人伦之攸当。假让位之名，以宝玺来上，皇考推诚不疑，即授以皇太子宝。文宗稔恶不悛，当躬迎之际，与其臣月鲁不花、也里牙、明里董阿等谋为不轨，使我皇考饮恨上宾。归而再御宸极，海内闻之，靡不切齿。

又私图传子，乃构邪言，嫁祸于八不沙皇后，谓朕非明宗之子，俾朕出居高丽。祖宗大业，几于不继。上天不佑，随降陨罚。叔婶不答失里怙其势焰，不立朕，而立朕之幼弟懿璘质班，奄复不年，诸王、大臣以贤以长，扶朕践阼。

每念治必本于尽孝，事莫先于正名，赖天之灵，权奸屏黜，永惟鞠育罔极之恩，忍忘不共戴天之义。既往之罪，不可胜诛，其命太常撤去图帖木儿庙主。不答失里本朕婶母，僭膺太皇太后之号，迹其闺门之祸，离间骨肉，罪恶尤重，揆之大义，宜削鸿名，徙东安州安置。燕帖古思昔虽幼冲，理难同处，朕终不陷于覆辙，专行残酷，其放诸高丽。当时贼臣月鲁不花、也里牙已死，其以明里董阿等明正典刑。

监察御史崔敬言燕帖古思不宜放逐，不报。己亥，成纪县山崩地坼。庚戌，桃源县山崩。

秋七月戊午，有事于太庙。以蝗旱相仍，颁罪己诏于天下。己未，亦璘真班为御史大夫。丁卯，杀燕帖古思。不答

失里皇后寻亦赐死。戊寅，翰林学士承旨腆哈等删修《大元通制》是月，禁色目人妻叔母。

八月壬午，也先帖木儿为御史大夫。戊子，祭社稷。帝至自上都。

九月辛亥，明里董阿伏诛。丙寅，诏今后勿籍罪人妻女。

冬十月甲申，尊皇考明宗为顺天立道睿文智武大圣孝皇帝。帝亲裸太室，右丞相马札儿台为亚献，知枢密院事阿鲁图为终献。壬寅，右丞相马札儿台为太师，脱脱为中书右丞相，宗正札鲁忽赤铁木儿不花为中书左丞相。是月，中书平章政事汪家奴知枢密院事。

十一月乙卯，以亲裸礼成，御大明殿受群臣朝。

十二月，复科举取士法。戊子，罢太禧宗禋等院，改奎章阁为宣文阁。

卷二十四

本纪第二十四

惠宗二

至正元年春正月己酉朔，改元，诏曰：

朕惟帝王之道，德莫大于克孝，治莫大于克贤。朕早历多艰，入承大统，仰思祖宗付托之重，战兢惕厉，于兹八年。慨念皇考，久劳于外，甫即大位，四海缺望，夙夜追慕，不忘于怀。乃以至元六年十月初四日奉册宝，追上皇考曰顺天

立道睿文智武大圣孝皇帝，被服衮冕，裸于太室，式展孝敬。十有一月六日，勉徇大礼庆成之请，御大明殿受群臣朝。

自去春畴咨于众，以知枢密院事马札儿台为太师、右丞相，寻即控辞，养痾私第。朕悯其劳日久，不忍烦之以政，俾解机务，仍为太师。知枢密院事脱脱，早岁辅朕，克著忠贞，乃命为中书右丞相；宗正札鲁忽赤帖木儿不花尝历政府，嘉绩著闻，命为中书左丞相；并录军国重事。夫三公论道，以辅予德，二相秉政，以弼予治。其以至元七年为至正元年，与天下更始焉。

丁巳，有事于太庙。免天下税粮五分。

二月戊寅，祭社稷。乙未，加封皇姊不答昔你为明慧贞懿大长公主。

三月甲寅，复给帖木儿补化宣让王印，镇淮西。召威顺王宽彻不花还。

夏四月丁丑，道州贼唐大二、蒋仁五等作乱，陷江华县。甲申，有事于太庙。庚寅，车驾幸护圣寺。中书右丞铁木儿达识为中书平章政事，中书左丞阿鲁灰为右丞，参知政事许有壬为左丞。庚子，杭州大火。复封马札儿台为忠王。是月，车驾幸上都。

六月，崇明、通、泰等州海溢。

秋七月己卯，有事于太庙。

八月戊申，祀社稷。车驾至自上都。

九月壬寅，许有壬进讲仁明殿，帝悦，赐宴宣文阁，仍赐貂裘文币。

冬十月丁未，有事于太庙。

十一月丙子，道州贼何仁甫等作乱。

十二月乙卯，诏年八十以上蒙古人赐缗帛二端，其余以高年耆德旌之，免其杂役。壬戌，云南车里蛮叛，平章政事脱脱木儿以兵讨之。

二年春正月丙戌，开京师金口河，役夫十万，功卒不就。

二月壬寅，颁《农桑辑要》。戊申，祭社稷。

三月戊寅，廷试进士七十八人，赐拜住、陈友仁等及第、出身有差。

夏四月辛丑，冀宁路平晋县地震，声如雷鸣，裂地尺余。乙巳，有事于太庙。是月，车驾幸上都。

五月丁亥，江浙行省平章政事只而瓦台为河南行省平章政事。

六月壬子，济南山崩水涌。

秋七月庚午朔，惠州罗浮山崩。辛未，有事于太庙。己亥，庆远路徭贼莫八作乱，陷南丹、左右两江等路，脱脱赤颜以兵讨之。是月，佛郎国来献异马。

八月庚子朔，日有食之。戊申，祭社稷。

九月己巳，湖广行省平章政事巩卜班讨道州贼平之。辛未，车驾至自上都。

冬十月己亥朔，日有食之。丁未，有事于太庙。壬戌，遣使祭曲阜孔子庙。

十一月甲申，免云南明年差税。

十二月壬寅，申服色之禁。丙辰，云南蛮酋死可伐叛。癸亥，阿鲁、秃满答儿等，坐谋杀右丞相脱脱，伏诛。

三年春正月丙子，中书左丞许有壬乞病归。丁丑，有事于太

庙。乙酉，中书平章政事纳麟罢。庚寅，汰怯薛丹。

二月戊戌，祭社稷。丁未，辽阳吾者野人叛。是月，巩昌府宁远、伏羌二县山崩、水溢。

三月戊寅，诏作新风宪，内官不法者，监察御史劾之，外官不法者，行台监察御史劾之。是月，诏修辽、金、宋三史。

夏四月丙申朔，日有食之。乙巳，有事于太庙。是月，车驾幸上都。五月，河决白茅堤。

六月壬子，命经筵官一月三进讲。帝优礼讲官，赐酒馔，又以高年疲于奔走，命乘舟太液池。

秋七丁卯，有事于太庙。成寅，立永昌等处宣慰司。河南自四月至七月，霖雨不止。

八月甲午朔，朵思麻宣慰司同知锁儿哈等以兵讨四川上蓬锁吃贼。戊戌，祭社稷。是月，车驾至自上都。

九月甲子，道州贼唐大二、蒋仁五伏诛，其党蒋丙伪号顺天王，陷连、桂二州。

冬十月戊戌，以亲祀南郊，告祭于太庙。至宁宗室，帝问曰：“朕宁宗兄也，当拜否？”太常博士刘闻对曰：“宁宗虽弟，其为帝时陛下臣之。春秋时鲁闵公弟，僖公兄，完庙之祭，未闻僖公不拜。”帝乃下拜。己酉，有事于南郊。癸丑，签枢密院事韩元善为中书参知政事。己未，以郊祀礼成，大赦天下，文官普减一资，武官升散官一等，蠲民间田租五分，赐高年帛。

十一月辛未，有事于太庙。

十二月丁未，江浙行省左丞相别儿怯不花为中书左丞相。

四年春正月辛未，有事于太庙。辛巳，定守令黜陟法：六

事备者，升一等；四事备，减一资；三事备，迁；六事俱不备，降一等。六事者，农桑、学校、词讼、盗贼、赋役及平常法也。庚寅，河决曹州，未几，又决于汴梁。

二月戊戌，祭社稷。是月，贺惟一为中书平章政事。

三月壬寅，特授八秃麻朵儿只为征东行省左丞相，嗣高丽国王。癸丑，河南行省平章政事纳麟为中书平章政事，集贤大学士姚庸为中书左丞。是月，中书右丞相脱脱等表进《辽史》一百一十六卷。

夏四月，车驾幸上都。

五月甲辰，右丞相脱脱罢，阿鲁图为中书右丞相。乙巳，封脱脱为郑王。是月，河决白茅堤、金堤，平地水深二丈，北入会通河，曹、濮、济、兗皆罹水患。

秋七月戊子朔，温州飓风，海溢，地震。己丑，有事于太庙。

八月戊午，祭社稷。益都路盐徒郭你赤作乱。

九月丁亥朔，日有食之。辛亥，秦从德为江浙行省参知政事，提调海运。

冬十一月丁亥朔，以民饥，禁抑配食盐，复令民入粟补官。是月，中书右丞相阿鲁图表进《金史》一百三十七卷。

十二月戊寅，徭贼寇靖州。

五年春正月辛卯，有事于太庙。

二月戊午，祭社稷。

三月辛卯，廷试进士七十有八人，赐普颜不花、张士坚等及第、出身有差。是月，以天灾、河患，下诏罪己。诸路盗贼，去限二十日者，赦之。前所免租外，被灾者全免之。已

纳者准明年补免。

夏四月，车驾幸上都。

五月己丑，敕云南驱口给行粮放还，其不愿还者听。辛卯，翰林学士承旨巉巉卒。

六月，卢州人张顺出米赈饥，旌其门。

秋七月丁亥，河决济阴。己丑，有事于太庙。丙午，中书平章政事铁木儿达识为御史大夫，巩卜班为中书平章政事。

八月戊午，祭社稷。是月，车驾至自上都。

九月壬午朔，日有食之。辛丑，中书右丞达识帖睦迺罢为翰林学士承旨，参知政事搠思监为右丞，资政院使朵儿只班为中书参知政事。

冬十月壬子，中书平章政事贺惟一为御史大夫，赐姓蒙古氏，名太平。乙卯，有事于太庙。辛酉，遣使巡行天下，诏曰：

朕自践阼以来，至今十有余年，托身亿兆之上，耳目所及，岂能周知。虽夙夜忧勤，凯安黎庶，而和气未臻，灾眚时作，岂承宣之寄，纠劾之司奉行有未至欤？若稽先朝成宪，遣官分道奉使，宣布朕意，询民疾苦，疏涤冤滞，蠲除烦苛。体察官吏贤否，明加黜陟，四品以上停职申请，五品以下就便处决。一切兴利除弊之事，悉听举行。

江西行省左丞忽都不丁、吏部尚书何执礼巡两浙江东道，前云南行省右丞散散、将作院使王士宏巡江西福建道，大都路达鲁花赤拔实、江浙行省参知政事秦从德巡江南湖广道，吏部尚书定僧、宣政院签事魏景道巡河南江北道，资政院使蛮子、兵部尚书李宪巡燕南山东道，兵部尚书不花、枢密院判

官靳义巡河东山西道，宣政院同知伯家奴、宣徽院佥事王也速迭儿巡山北辽东道，判湖北道宣慰使阿乞刺、两淮运使杜德远巡云南行省，上都留守阿牙赤、陕西行省左丞王冲巡甘肃永昌道，大都留守答儿麻失理、河南行省参知政事王守诚巡四川行省，前西台御史中丞定定、集贤侍讲学士苏天爵巡京畿道，平江路达鲁花赤左答纳失里、都水监贾惟贞巡海北海南广东道。辛未，阿鲁图等表进《宋史》四百九十六卷。至是，三史告成。帝谕阿鲁图等曰：“史既成书，前人善者，朕当取以为法，恶者取以为戒。然为臣者，亦当知之。卿等其以前代善恶之事自勉。”是月，吕思诚为中书参知政事。

十一月甲午，《至正条格》成。奉元人陈望林伪称燕古思太子，伏诛。

十二月丁巳，定荐举守令法。

六年春二月庚戌朔，日有食之。是月，山东地震七日。

三月，山东盗起。戊申，遣中书参知政事锁南班防盗于东平。

夏四月壬子，辽阳路吾者野人及水达达并叛。癸丑，颁行《至正条格》。甲寅，中书参知政事吕思诚为中书左丞。乙卯，有事于太庙。丁卯，车驾幸上都。万户买住等讨吾者叛贼，死之，诏恤其家。

五月壬午，广西象州盗起。丁亥，盗窃太庙神主。火儿忽答以兵讨吾者叛贼。丁酉，立河南山东行都水监。

六月己酉，汀州贼罗天麟等陷长汀县，元帅府经历真保、万户廉和尚等以兵讨之。丁巳，亦秋七月，己卯，有事于太庙。丙戌，太保伯撒里为辽阳行省左丞相。丁亥，散毛洞叛

酋覃全在降，授散毛誓崖等处军民安抚使。丙申，朵儿只班为中书右丞，答儿麻为中书参知政事。

八月丙午，江浙行省左丞忽都不花、江西行省右丞秃鲁讨汀州贼，平之。戊申，祭社稷。是月，车驾至自上都。

九月戊子，邵武府地震。

冬十月，靖州徭贼寇武冈，湖南宣慰元帅完者帖木儿等以兵讨之。

闰月癸酉，罗天麟伏诛。乙亥，赦天下，免差税有差。靖徭贼陷黔阳县。

十二月丁丑，改谥明宗生母仁献章圣皇后曰庄献嗣圣皇后。己卯，立山东东西道宣慰司都元帅府。甲午，置海刺秃屯田。复立八百等处宣慰司。辛丑，吉刺班为太尉。壬寅，山东、河南盗起，左右阿速卫指挥使不儿图等以兵讨之。是月，右丞相阿鲁图罢。

七年春正月甲辰朔，日有食之。己酉，有事于太庙。壬子，中书左丞相别儿怯不花为右丞相，寻罢。丁巳，复立东路都蒙古军元帅府。庚申，云南老了蛮降，立老了耿冻路军民总管府。

二月己卯，山东地震。庚辰，中书参知政事锁南班为中书右丞，道童为中书参知政事。丙戌，宦者伯颜帖木儿为大司徒。是月，阿吉刺知枢密院事，整治军务。

三月戊午，敕中书省编《六条政类》。乙丑，云南王孛罗来献死可伐之捷。

夏四月己卯，有事于太庙。辛巳，达本、贺方使占城国。通政院使朵郎吉儿为辽阳行省参知政事。己丑，翰林学士承

旨定住为中书右丞。庚寅，别儿怯不花复为中书右丞相，中书平章政事铁木儿塔识为左丞相。是月，车驾幸上都。河东大旱，民多饿死。

五月乙丑，右丞相别儿怯不花罢。

六月，太师马札儿台免官，安置西宁州。御史大夫太平复为中书平章政事，福寿为中书参知政事。彰德路大饥，民相食。

秋七月丁巳，江南行台御史大夫纳麟为御史大夫。是月，吴天保陷溆浦、辰溪等县。徙马札儿台于甘肃。脱欢为中书右丞，孔思立为中书参知政事。

九月戊申，车驾至自上都。甲寅，诏举才学之士以备侍从。丁巳，中书左丞相铁木儿塔识卒。辛酉，御史大夫朵儿只为中书左丞相。甲子，集庆路盗起，镇南王孛罗不花以兵讨之。丁卯，吴天保寇宝庆，湖广行省右丞相沙班军败死之。

冬十月辛未，有事于太庙。丙戌，亦怜只答儿叛。戊戌，西番叛，陷哈剌火州。忽都不花为中书平章政事。

十一月庚戌，湖广行省平章政事苟尔，以兵讨徭贼吴天保。以河决，遣工部尚书迷儿马哈谟行视金堤。甲寅，吴天保陷靖州。丁巳，中书平章政事太平为中书左丞相。己未，中书参知政事韩嘉讷为中书平章政事。

十二月丙子，以连年水旱，选台阁名臣二十六人为知州县令，仍许民间利害实封上闻。中书平章政事韩嘉讷为御史大夫。

是年置中书议事平章四人。晋衍圣公秩三品。

八年春正月戊戌，也先帖木儿知枢密院事。丁未，有事于太

庙。己未，河决。是月，湖广行省右丞秃赤等讨平莫磐洞诸蛮，获其酋杨鹿五。

二月癸酉，御史大夫纳麟加太尉，致仕。乙亥，罢海刺秃屯田。是月，立行都水监于郢城。

三月丁酉，辽东贼锁火奴作乱，妄称金后，水达达路脱脱禾孙火鲁火赤讨斩之。壬寅，以福建盗起，立分元帅府于汀、漳二州。癸卯，廷试进士七十有八人，赐阿鲁辉帖木儿、王宗哲等及第、出身有差。壬戌，徽州路达鲁花赤哈刺不花有政绩，赐金帛旌之。

夏四月乙亥，帝幸国子学。晋衍圣公秩二品。丁丑，有事于太庙。辽阳贼董哈刺作乱，镇抚使钦察讨斩之。己卯，海宁州盗起，翰林学士秃坚不花以兵讨之。是月，车驾幸上都。脱脱为太傅。

五月庚子，广西山崩、水涌。

六月丙戌，立司天台于上都。

秋七月丙申朔，日有食之。乙巳，有事于太庙。旌大都节妇巩氏门。乙卯，遣使祭曲阜孔子庙。丙辰，阿刺不花为大司徒。

八月，车驾至自上都。

冬十月丁亥，广西叛蛮寇道州。

十一月，台州人方国珍作乱，江浙行省参知政事朵儿只班以兵讨之。太不花为中书平章政事，忽都不花为中书右丞。九年春正月丁酉，有事于太庙。

二月戊寅，祭社稷。

三月己巳，大司农达识帖睦迺为湖广行省平章政事。吴

天保复陷沅州。

夏四月丁丑，有事于太庙。知枢密院事钦察台为中书平章政事。己卯，燕南道廉访使韩元善为中书左丞。是月，车驾幸上都。

五月戊戌，命太傅脱脱提调大斡耳朵。庚子，筑黄河金堤。是月，河东注沛县，遂成巨浸。

秋七月庚寅，监察御史斡勒海寿劾侍御史哈麻及其弟雪雪交结脱忽思皇后近侍。御史大夫韩嘉讷以闻，章三上。免哈麻、雪雪官，出海寿为陕西廉访副使，韩喜讷罢为宣政院使。甲午，也先帖木儿为御史大夫。乙未，湖广行省左丞相亦怜真班知枢密院事。中书右丞相朵儿只罢，依前为国王。左丞相太平罢为翰林学士承旨。

闰月辛酉，太傅脱脱复为中书右丞相。庚午，也可札鲁忽赤搠思监为中书右丞，同知枢密院事玉枢虎儿吐华为中书参知政事。戊子，命岐王阿剌乞镇西番。

八月甲辰，集贤大学士伯颜为中书平章政事。是月，车驾至自上都。

九月甲子，诏中外建言者，委官选其可行之事以闻。

冬十月辛卯，有事于太庙。丁酉，改宣文阁为端本堂，命皇子入端本堂读书。

十一月戊午朔，日有食之。

十二月丁未，吴天保陷辰州。脱忽思皇后诉斡勒海寿于帝，免海寿官，并杖流韩嘉讷于奴儿干。

十年春正月丙辰朔，中书右丞搠思监为平章政事。玉枢

虎儿吐华为中书右丞。壬戌，立四川容美洞总管府。

夏四月丁酉，大赦天下。是月，车驾幸上都。

秋八月壬寅，车驾至自上都。

九月辛酉，祭三皇庙如祭孔子庙礼。

冬十月乙未，敕中书省，御史台，集贤、翰林两院，集议钞法。

十一月壬子朔，日有食之。己巳，诏天下以中统钞一贯权铜钱一千文，准至元宝钞二贯，仍铸至元通宝钱并用。

十二月辛卯，大司农秃鲁等兼领都水监，集河防官议治河。己酉，方国珍寇温州，江浙左丞孛罗帖木儿以兵讨之。

是岁，京师丽正门楼有人言祸福。鞫之，自称冀州人，俄不知所住。

卷二十五

本纪第二十五

惠宗三

十一年春正月乙卯，有事于太庙。庚申，江浙行省左丞孛罗帖木儿以兵讨方国珍。是月，清宁殿灾。

二月，立湖南分元帅府于宝庆路。

三月庚戌，立山东分元帅府于登州。丙辰，廷试进士八十三人，赐朵列图、文允中等及第、出身有差。壬戌，征建宁处士彭斌为端本堂说书，不至。

夏四月壬午，贾鲁为工部尚书、总治河防使，发民夫十五万、兵二万，开河合于故道，凡二百八十余里。乙酉，有事于太庙。封河渎神为灵源神祐宏济王。改永顺安抚司为宣抚司。丁酉，孟州地震。辛丑，师壁安抚司蛮酋田驴什用、盘顺府蛮酋墨奴什用降。是月，罢沂州分元帅府。车驾幸上都。

五月己酉朔，日有食之。辛亥，颖州妖贼刘福通作乱，陷颖州。壬申，同知枢密院事秃赤以兵讨刘福通。

六月，刘福通陷朱皋及罗山、上蔡等县。孛罗帖木儿讨方国珍，兵败，为国珍所执。

秋七月丙辰，广西大水。命大司农卿达识帖睦迺、江浙行省参知政事樊执敬招谕方国珍。

八月丁丑朔，中兴地震。戊寅，祭社稷。丙戌，萧县妖贼芝麻李等作乱，陷徐州。是月，车驾至自上都。罗田妖贼徐寿辉等作乱。

九月壬子，御史大夫也先帖木儿知枢密院事，与卫王宽彻合兵讨河南妖贼。壬戌，废高丽王迷思监朵儿只，以前王弟伯颜帖木儿袭高丽国王。是月，刘福通陷汝宁府及光、息二州。徐寿辉陷黄州路。

冬十月己卯，有事于太庙。癸未，知枢密院事老章以兵讨河南妖贼。辛卯，中书参知政事松寿分省济宁。

十一月丁巳，河功告成，召贾鲁入朝，授集贤大学士，脱脱世袭答剌罕。是月，徐寿辉僭号天完国皇帝，建元治平。

十二月丙戌，治书侍御史乌古孙良桢为中书参知政事。辛丑，也先帖木儿复上蔡县，获贼将韩咬儿，诛之。

十二年春正月戊申，竹山贼孟海马陷襄阳路总管柴肃死之。己

西，有事于太庙。庚戌，宣政院使月鲁不花为中书平章政事。丙辰，徐寿辉遣其将丁普郎等陷汉阳。丁巳，陷兴国府。己未，徐寿辉将邹普胜陷武昌，威顺王宽彻不花、湖广行省平章政事和尚弃城走。刑部尚书阿鲁以兵讨山东妖贼。乙丑，徐寿辉将鲁法兴陷安陆府，知府丑驴及其妻侯氏死之。丙寅，以河平，大赦天下。辛未，徐寿辉陷沔阳府。推官俞述祖死之。壬申，陷中兴路，山南道廉访使卜礼牙敦败绩，死之。是月，逯鲁曾为淮东添设元帅，讨徐州贼。四川行省平章政事月鲁帖木儿为总兵官，与右丞长吉讨兴元、金州贼。知枢密院事月赤察儿率兵马指挥使宝童讨徐州贼。

二月己亥朔，定远人郭子兴作乱，陷濠州。丁丑，集贤大学士贾鲁为中书添设左丞。江北河南道廉访使哈蓝朵儿只为荆湖北道宣慰使都元帅，守襄阳。癸未，命诸王秃坚镇扬州，宁王牙安沙镇四川。乙酉，徐寿辉陷江州，总管李黼死之，遂陷南康路。丙戌徐寿辉陷岳州，遂分兵陷归州。戊子，赦徐州贼。立安东、安丰分元帅府。辛丑，邓州贼王权陷澧州，指挥使俺都剌哈蛮等复之。褒赠死事者宣徽使帖木儿等二十七人。壬寅，御史大夫纳麟为江南行台御史大夫，仍兼太尉。命诸王孛兰奚与翰林学士承旨八剌守大名。是月，徐寿辉将欧普祥陷袁州。中书参知政事帖里帖木儿分省济宁。

三月丁未，徐寿辉将陶九陷瑞州。壬子，河南行省平章政事太不花复南阳府。癸丑，行纳粟补官法。辛酉，诸王阿儿麻以兵讨商州等处贼。巩卜班知行枢密院事。甲子，徐寿辉将项普略陷饶州，遂陷徽州、信州，饶州知州魏中立、信州总管于大本俱死之。丁卯，江南行台御史大夫帖木哥为甘

肃行省平章政事。戊辰，诏依世祖旧制，用南人为中书省、枢密院、御史台官。江浙行省左丞相亦怜真班为江西行省左丞相，以兵讨饶、信诸州贼。庚午，台州路达鲁花赤泰不花与方国珍战于黄岩之州港，死之。陇西地震百余日，改定西为安定州，会州为会宁州。是月，徐寿辉寇南昌，平章政事道童等败之。

闰三月甲戌朔，钟离人朱元璋从郭子兴于濠州。壬午，大理宣慰使答失八都鲁为四川行省添设参知政事，与平章政事咬住讨山南湖广贼。乙酉，徐寿辉将陈普文陷吉安路，吉安人罗明远起兵复之。立淮南江北行中书省，治扬州。壬辰，大都留守兀忽失为江浙行省添设右丞，以兵讨饶、信贼。丁酉，湘广行省参知政事铁杰复岳州。戊戌，翰林学士承旨晃火儿不花、湖广行省平章政事失列门并为淮南江北行省平章政事，淮东元帅蛮子为右丞，燕南道廉访使秦从德为左丞，陕西行台侍御史答失秃、山北道廉访使赵琰为参知政事。庚子，枢密副使悟良哈台为中书添设参知政事。是月，四川行省平章政事咬住复忠、万、夔、云阳等州。方国珍不肯降，江浙行省左丞左答纳失里以兵讨之。也先帖木儿军溃于沙河，以中书平章政事蛮子代之。召也先帖木儿还，仍为御史大夫。陕西行台御史大夫朵尔直班、监察御史蒙古鲁海牙、范文等劾其丧师辱国，不报。左迁朵尔直班为湖广行省平章政事，蒙古鲁海牙等为各路添设佐贰官。

夏四月癸卯朔，日有食之。临川贼邓忠陷建昌路。己酉，有事于太庙。甲寅，御史大夫搠思监为中书平章政事。丙辰，宜黄贼涂佑、建宁贼应必达陷邵武路，总管吴按摊不花讨斩

之。建宁贼复陷福宁州，知州王伯颜死之。辛酉翰林学士承旨浑都海牙为中书平章政事，四川行省参知政事桑哥失理复渠州。辛未，荆门州知州聂炳复荆门州。是月，车驾幸上都。四川行省平章政事咬住复归州，与峡州总管赵余禩败贼将李大业等，遂复峡州。畏兀儿亦都护月鲁帖木儿、豫王阿剌忒纳失里等以兵讨襄、邓、南阳贼。

五月壬申朔，答失八都鲁复襄阳。戊寅，台州人陈子由等率民兵夹攻方国珍，命行台御史大夫纳麟给以宣敕。己卯，咬住复中兴路。安置瀛国公子和尚赵完普于沙州，禁与人交通。癸未，建昌人戴良以民兵复建昌路。是月，答失八都鲁败贼于襄阳。

六月己丑，遥授绍庆路宣慰使杨延礼不花湖广行省左丞。丙申，周伯颜陷道州。

秋七月丁丑，有事于太庙。庚辰，项普略陷杭州路，参知政事樊执敬死之。济宁路总管董抟霄复杭州，遂复徽州。辛己，通政院使答儿麻失理、枢密副使秃坚不花以兵讨徐州贼。己丑，周伯颜陷宝庆路。庚寅，右丞相脱脱请亲讨徐州贼，许之。辛卯，脱脱为行枢密院使。丁酉，杜秉彝为中书添设参知政事。湖南副元帅小云失海牙、总管兀颜思忠以兵复宝庆路。是月，徐寿辉将王善陷福安、福宁等县。

八月癸卯，方国珍寇台州，浙东元帅也忒迷失、福建元帅黑的儿败之。甲辰，同知枢密院事哈麻为中书添设右丞。己酉，知枢密院事咬咬、中书平章政事搠思监、也可札鲁忽赤福寿并从脱脱讨贼。壬子，札撒温孙为河南行省右丞，楔哲笃为淮南行省左丞。丙辰，秃思迷失为淮南行省平章政事。丁

卯，诏脱脱以答剌罕、中书右丞相分省于外，节制各处军马，听便宜从事。是月，车驾至自上都。徐寿辉将俞君正复陷荆门州，知州聂炳死之。其别将党仲达复陷岳州。

九月乙亥，俞君正复陷中兴路，判官上都死之。咬住与俞君正战于楼台，败绩。丁丑，中兴人范中率民兵复中兴路。乙酉，脱脱至徐州。丁亥，命知行枢密院事阿剌吉从脱脱讨贼。辛卯，脱脱复徐州，李二伏诛，其党彭大、赵君用奔濠州。庚子，脱脱加太师，振旅还京师。

冬十月丁未，有事于太庙。甲寅，知枢密院事阿乞刺为太尉、淮南行省平章政事。乙丑，霍山崩。

十一月辛未，江浙行省平章政事庆童以兵讨常州贼。癸未，江浙行省右丞帖里帖木儿以兵讨方国珍。

十二月辛亥，诏以杭、湖、常、信、广德诸路皆克复，赦诖误者，蠲其夏税、秋粮，命有司抚恤之。辛酉，卜颜不花、阿儿灰复潭、岳等州。

是年，海运不通。立都水庸田司于汴梁路。

十三年春正月庚午朔，中书添设左丞哈麻为中书右丞，中书添设参知政事悟良哈台为添设右丞，乌古孙良桢为中书左丞。壬申，陕西行省平章政事卜答失里为总兵官。癸酉，有事于太庙。乙亥，中书右丞秃秃以兵讨商州贼。丙子，方国珍降。庚辰，杜秉彝为中书参知政事。庚寅，知枢密院事老章复襄阳及唐州。

二月丁未，祭先农。

三月己卯，命脱脱以太师开府。是月，命帖里木儿、左答纳失里同招谕方国珍。

夏四月庚子，甘肃行省平章政事锁南班为永昌路宣慰使，以兵讨叛蛮愚鲁罢等，仍给平章政事俸。乙巳，有事于太庙。是月，车驾幸上都。

五月辛未，江西行省左丞相亦怜真班、江浙行省右丞老老，元帅韩邦彦、哈迷同复饶州，蕲黄贼皆奔溃。癸酉，太尉阿剌吉为岭北行省左丞相。封知行枢密院使伯家奴为武国公，同诸王孛罗帖木儿讨贼。壬午，中书右丞贾鲁卒于军中。乙未，泰州人张士诚作乱，陷泰州兴化县，遂陷高邮，知府李齐死之。士诚僭号大周国诚王，建元天祐。

六月丙申朔，置詹事院。丁酉，立皇子爱猷识理达腊为皇太子，告祀天地、宗庙。右丞相脱脱兼太子詹事。庚子，知枢密院事失剌拔都、平章政事答失八都鲁同复安陆府。甲辰，以立皇太子，大赦。己酉，高昌王月鲁帖木儿卒于军中。辛亥，诸王完者都及张士诚战于泰州，死之。诸王八秃及刘福通战于亳州，死之。

秋七月丁卯，有事于太庙。壬申，湖广行省参知政事阿鲁辉复武昌及汉阳府。壬辰，诸王只儿哈忽卒于军中。

八月癸卯，诸王阔儿吉思、帖木儿来献马。诸王只儿哈郎讨金山贼，卒于军中。是月，车驾至自上都。资政院使脱火赤复江州路。中书平章政事咬住左迁为淮西元帅。郭子兴将朱元璋陷滁州。

九月乙丑朔，日有食之。乙亥，广平王咬咬坐讨贼无功，削其王爵，降为河南行省平章政事。壬辰，南台御史大夫纳麟致仕，仍为太尉。丁酉，有事于太庙。

冬十月丁未，广西元帅甄崇福复道州，周伯颜伏诛。庚

戌，授方国珍徽州路治中，国珍不受命。立水军都万户府于昆山州。是月，江浙行省平章政事卜颜帖木儿等讨徐寿辉于蕲水，大败之，寿辉遁，获其伪官四百余人。

十一月丁亥，江西行省右丞火你赤复富州、临江府，遂复瑞州。

十二月癸丑，西安王阿剌忒纳失进封豫王，封其弟答儿麻为西安王，镇崇吉儿之地。陕西行省平章政事孛罗等复均、房诸州。彭大子早住僭称鲁淮王，赵君用僭称永义王。

是岁，自六月不雨，至于八月。

十四年春正月辛未，有事于太庙。丙戌，宣政院使答儿麻监藏遥授陕西行省平章政事，整治西番。是月，答失八都鲁复峡州。

二月戊戌，祭社稷。己未，湖广行省平章政事苟儿为淮南行省平章政事，以兵讨张士诚。是月，吕思诚为湖广行省左丞。湖广行省右丞伯颜普化、江南行台御史中丞蛮子海牙等会湖广行省平章政事也先帖木儿讨沿江贼。立镇江水军万户府，江浙行省右丞佛家闾领之。

三月癸亥朔，日有食之。己巳，廷试进士六十二人，赐薛朝晤、牛继志等及第、出身有差。甲戌，诸王速哥帖木儿以兵讨宿州贼。丙子，刘福通陷颖州。是月，答失八都鲁为四川行省平章政事，兼知行枢密院事，总荆襄各路军马从宜调遣。

夏四月癸巳朔，介休县地震、水涌。是月，车驾幸上都。江西、湖广大饥。江浙行省参知政事阿儿温沙为行省右丞，浙东宣慰使恩宁普为行省参知政事，以兵讨方国珍。

五月，安丰贼围庐州，湖广行省参知政事阿儿灰为行省右丞，以兵援庐州。命荆王答儿麻失理镇河西，讨西番贼。郭子兴将朱元璋陷全椒县。

六月辛卯朔，张士诚寇扬州。丙申，达识帖睦迺败绩于扬州，诸军皆溃。诏佛家间会达识帖睦迺复进兵。己酉，赵君用、彭早住陷盱眙县。庚戌，陷泗州。

秋七月壬申，刑部尚书阿鲁募兵于汝宁州，讨泗州贼。

八月，车驾至自上都。江西行省左丞相亦怜真班卒。

九月庚申，湖广行省左丞吕思诚为中书右丞。辛酉，知枢密院事月赤察儿为平章政事。诏脱脱以太师、中书右丞相，总制诸王、诸行省、各翼军，讨张士诚。甲子，封高丽国王脱脱不花为沈王。将作院使臧卜为中书参知政事。

冬十月甲午，有事于太庙。戊戌，答失八都鲁、太不花等会讨安丰贼。

十一月丙寅，敕中书省、枢密院、御史台，凡奏事先启皇太子。辛未，脱脱大败张士诚于高邮。乙酉，脱脱分兵复六合县。是月，答失八都鲁复郑、均、许三州。

十二月丙申，中书平章政事定住为左丞相，宣政院使哈麻、永昌宣慰使锁南班为中书平章政事。御史大夫也先帖木儿罢，宣徽使汪家奴为御史大夫。丁酉，削太师、右丞相脱脱官爵，安置淮安路，其弟也先帖木儿安置宁夏路。河南行省平章政事太不花为行省左丞相，中书平章政事月阔察儿加太尉，集贤大学士雪雪知枢密院事，同领诸路征进军马。戊戌，中政院使桑哥失里为中书添设右丞。庚子，冀国公秃鲁加太尉。己酉，绍兴路地震。是月，命威顺王宽彻不花仍镇

湖广。甘肃行省右丞崑的以兵讨西番贼。徭贼寇衡州，万户许脱因死之。京师大饥，有父子相食者。

十五年春正月戊午，宣徽使黑厮为中书平章政事，河南行省左丞许有壬为集贤大学士，辽阳行省左丞奇伯颜不花为行省平章政事。癸亥，有事于太庙。甲子，诸王秃坚帖木儿卒于军中。丁丑，徐寿辉将倪文俊复陷沔阳府。威顺王宽彻不花子报恩奴及倪文俊战于汉川，死之，宽彻不花奔陕西。是月，安置脱脱于亦集乃路。郭子兴陷和州。

闰月壬寅，调右卫军人屯田京畿，以本管万户督其勤惰。

二月己未，刘福通立韩林儿为皇帝，僭号宋，又称小明王，建元龙凤。戊辰，太傅、御史大夫汪家奴为中书右丞相，平章政事定住为左丞相。庚午河南行省平章政事咬咬为辽阳行省左丞相。壬申，立淮东等处宣慰使司都元帅府。丙子，达识帖睦迺为中书平章政事。是月，以刑部尚书董铨等与江西行省平章政事火你赤专任征讨，先降曲赦，谕以祸福，如执迷不悛，克日进兵。

三月癸巳，徐寿辉陷襄阳路。甲午，汪家奴摄太尉，持节授皇太子玉册，锡冕服九旒，谒太庙。辛丑，改窜脱脱于云南镇西路，籍其家。是月，中书右丞相汪家奴罢。

夏四月乙丑，中书右丞臧卜、左丞乌古孙良桢分省彰德路。癸酉，中书左丞相定住为右丞相，平章政事哈麻为左丞相，太子詹事桑哥失里为中书平章政事，雪雪为御史大夫。丁丑，知枢密院事众家奴加太傅。是月，车驾幸上都。遣翰林待制乌马儿、集贤待制孙搆招谕张士诚，为士诚所杀。宁国路山崩。

五月壬辰，答失八都鲁复襄阳路。削河南行省左丞相太不花官爵，仍命从答失八都鲁征进。壬寅，蛮子海牙与朱元璋战于峪溪口，败绩。庚戌，倪文俊陷中兴路。都元帅朵儿只班死之。是月，命淮南行省平章政事咬住、淮东道廉访使王也先迭儿招谕张士诚。

六月癸酉，四川行省平章政事答失八都鲁为河南行省平章政事。乙亥，诸王倒吾卒于军中。己卯，陕西行省平章政事秃秃加号答刺罕。丁亥，遣将作院判官乌马儿等招谕朱元璋，章佩监丞普颜帖木儿等招谕倪文俊。是月，朱元璋陷太平路，总管靳义死之，其另将徐达陷溧水州。国王朵儿只卒于军中。

秋七月辛卯，有事于太庙。壬辰，朱元璋攻集庆路。壬寅，倪文俊复陷武昌、汉阳等路。

八月戊辰，中书平章政事达识帖睦迺为江浙行省左丞相，便宜行事。甲戌，大宗正府札鲁忽赤迭里迷失为甘肃行省平章政事。云南蛮死可伐降，置平缅军民宣抚司。四种蛮酋向思胜降，改安定州为军民安抚司。是月，车驾至自上都。淮南行省左丞相太平统诸军讨淮南贼。蕲黄贼陷宣州，致仕礼部尚书汪泽民死之。

九月癸未，知岭北行枢密院事纽的该为中书平章政事。戊戌，朱元璋将郭天叙等攻集庆路，败死。己亥，倪文俊围岳州。是月，移脱脱于阿轻乞之地。

冬十月丁巳，立淮南行枢密院于扬州。甲子，命中书左丞斡朮、前中书右丞吕思诚议亲祀郊庙典礼。中书右丞拜住为平章政事。丙子，以郊祀，命皇太子告祀太庙。己卯，翰

林学士承旨庆童为淮南行省平章政事。

十一月壬辰，有事于南郊，皇太子为亚献，摄太尉右丞相定住为终献。甲午，太不花为湖广行省左丞相，讨湖广贼，还所夺河南行省左丞相宣命。戊申，右丞相定住以太保致仕。庚戌，徐寿辉陷饶州路。辛亥，高丽王伯颜帖木儿赐号亲仁辅义宣忠奉国彰惠靖远功臣。河南贼陷怀庆路。是月，答失八都鲁败刘福通于夹河。

十二月丁巳，中书参知政事月伦失不花、陈敬伯分省彰德。己未，哈麻矫诏杀脱脱于阿轻乞之地。乙亥，下罪已诏，大赦。是月，答失八都鲁败刘福通于太康，遂围亳州。韩林儿奔安丰。立兴元路宣慰使司都元帅府于兴元路。中书平章政事拜住分省济宁。

十六年春正月壬午，改福建宣慰使司都元帅府为福建行中书省。戊子，有事于太庙。乙巳，辽阳行省左丞相咬咬为太子詹事，翰林学士承旨朵列帖木儿同知詹事院事。戊申，云南蛮酋阿芦来献方物。庚戌，左丞相哈麻有罪免。辛亥，御史大夫雪雪有罪免。复以定住为右丞相，搠思监为御史大夫。是月，倪文俊迎徐寿辉，建伪都于汉阳。

二月壬子朔，张士诚陷平江路。甲寅，右丞相定住仍兼太保，总裁中书一切机务。丙辰，安置哈麻于惠州，雪雪于肇州，寻皆杖杀之。甲戌，封蛮蛮为靖安王。丙子，蛮子海牙及朱元璋战于采石，败绩。己卯，遣集贤直学士杨俊民致祭曲阜孔庙。是月，张士诚据平江，遂陷松江、常州诸路。

三月壬午，徐寿辉寇襄阳。庚寅，朱元璋陷集庆路。行台御史大夫福寿、行省平章政事阿鲁灰、参知政事百家奴、治

书侍御史贺方、达鲁花赤达尼达思俱死之。丙申，倪文俊陷常德路。丁酉，朱元璋将徐达等陷镇江路，平章政事定定、守将段武俱死之。立行枢密院于杭州，行省左丞相达识帖睦迺兼知行枢密院事，节制诸军，许以便宜从事。戊申，方国珍复降，授海道运粮万户。

夏四月辛亥，搠思监为中书左丞相。壬子，张士诚陷湖州。癸丑，朱元璋陷金坛县。丙辰，资政院使普化为御史大夫。庚申，河南行省左丞卜兰奚为湖广行省平章政事。丁卯，陕西行台御史大夫朵朵为陕西行省左丞相。大司农咬咬为辽阳行省左丞相。知枢密院事实理门分院济宁。是月，车驾幸上都。

五月丙申，倪文俊陷澧州路。

六月乙卯，朱元璋将邓愈等陷广德路。

秋七月己卯朔，朱元璋称吴国公，总江南行中书省事。遣中书省断事官撒迪罕谕高丽国王发兵讨贼。是月，张士诚遣其弟士德陷杭州，行省平章政事左答纳失里死之。未几，苗军元帅杨完者、万户普贤奴与士德战，大败之，遂复杭州。

八月丙辰，奉元路判官王渊以义兵复商州。庚午，倪文俊陷衡州路，都元帅甄崇福死之。甲戌，彗星见于张。是月，车驾至自上都。河决山东，大水。

九月庚戌，汝颍贼李武等陷潼关，参知政事述律杰死之。壬午，豫王阿剌忒纳失里、同知枢密院事定住以兵复潼关。丙申，潼关再陷，阿剌忒纳失里又克之。戊戌，贼陷陕州及虢州。太尉纳麟复为江南行台御史大夫，迁行台于绍兴路。是月，兵部尚书察罕帖木儿复陕、虢二州。

冬十月丁未朔，星堕于大名路，化为石如狗头。是月，中书右丞吕思诚罢为大司农卿。乙丑，赵君用陷淮安路，廉访使褚不花死之，镇南王孛罗不花被执，不屈，与其妻俱赴水死。是月，太尉帖木儿罢。

十一月，置分枢密院于沂州。刘福通略山东、河北，京师大震。

十二月庚申，达识帖睦迺大破刘福通于太康。倪文俊陷岳州路，威顺王子歹帖木儿死之。湖广行省参知政事也先帖木儿、左江义兵万户王祖胜，合兵复衡州。

十七年春正月丙子朔，日有食之。伯颜秃古思为大司徒。

二月癸丑，以河南诸军屡捷，赦天下。戊辰，知枢密院事脱欢复邳州。壬申，亳州贼毛贵陷胶州，知枢密院事脱欢死之。甲戌，倪文俊陷陕州。是月，李武、崔德陷商州。察罕帖木儿与李思齐援陕西，以察罕帖木儿为陕西行省左丞，李思齐为四川行省左丞。

三月乙亥，义兵万户赛甫丁、阿迷里丁据泉州叛。庚辰，毛贵陷莱州，山东宣慰副使释加纳死之。甲午，毛贵陷益都路，前海南海北道宣慰使王英死之。丁酉，毛贵陷滨州。戊戌，中书平章政事帖里帖木儿为御史大夫，悟良哈台、斡朮并为中书平章政事。是月，诏河南行省左丞相答失八都鲁至京师，加开府仪同三司、太尉，改四川行省右丞相。

夏四月乙卯，毛贵陷莒州。辛酉，咬咬为甘肃行省左丞相。丁卯，朱元璋将徐达陷宁国路，百户张文贵死之。是月，车驾幸上都。封江西行省平章政事火你赤为营国公。

五月戊寅，平章政事赤老温、帖木儿复武安州等三十余

城。壬午，池州路总管陶起祖叛降于朱元璋。丙申，搠思监为右丞相，太平为左丞相，诏天下。免今岁粮税之半。

六月甲辰朔，实理门为中书右丞，分省济宁。己未，帖里帖木儿、老的沙并为御史大夫。庚申，朱元璋将赵继祖陷江阴州。是月，刘福通分其兵为三道：关先生、破头潘、冯长舅、沙刘二、王士诚寇山西，白不信、大刀敖、李喜喜寇陕西，毛贵寇山东，声势大振。

秋七月庚辰，朱元璋将胡大海陷徽州路，建德路万户吴讷死之。戊子，李稷为御史中丞。丙申，胡大海陷休宁县，行省参知政事杨完者败绩。己丑，黄河义兵万户田丰叛，陷济宁路，义兵万户孟本周败之，遂复济宁。甲午，御史中丞完者帖木儿为中书右丞，河南道廉访使俺普为中书参知政事。是月，立四方献言详定使司。归德府知府林茂、万户时公权叛，降于刘福通。

八月癸丑，刘福通陷大名路，遂陷卫辉路。乙丑，陕西行台御史中丞伯嘉讷为陕西行省平章政事，淮南行省参知政事余阙为淮南行省左丞，参知政事杨完者为右丞，方国珍为江浙行省参知政事。是月，车驾至自上都。知枢密院事纽的该以兵讨山东贼。朱元璋将缪大亨陷扬州路。张士诚降，以士诚为太尉，其弟士德为淮南行省平章政事。

九月癸酉，婺源州元帅汪同、祁门元帅马国奕，俱叛降于胡大海。甲戌，江浙行省平章政事夏章亦叛降。丙子，老的沙为中书平章政事。戊戌，太不花复大名路。辛丑，诏中书右丞也先不花、御史中丞成遵宣抚彰德、大名等路。是月，纽的该加太尉，统诸军守东昌。徐寿辉将陈友谅杀倪文俊。

闰月丙午，右丞相搆思监、左丞相太平，并加开府仪同三司。乙丑，关先生、破头潘等陷潞州。丙寅，进寇冀宁，察罕帖木儿败之。

冬十月辛未朔，朱元璋将常遇春陷池州。戊寅，设分詹事院。是月，白不信、李喜喜等陷兴元，遂寇凤翔，察罕帖木儿、李思齐屡败之，贼入四川。知枢密院事答里麻失里与贼战于曹州，败绩，答里麻失里死之。静江路山崩、地陷。

十一月壬寅，察罕帖木儿败贼于壶关。戊午，河南行省平章政事答兰为中书平章政事，御史中丞李献为中书左丞，陕西行台中丞卜颜帖木儿、枢密副使哈剌那海、司农少卿崔敬、侍御史陈敬伯皆为参知政事。己巳，参知政事八都麻失里为中书右丞。

十二月丁酉，象山县山崩。庚子，四川行省右丞相答失八都鲁卒于军中。

是岁，倪文俊将明玉珍入四川。义兵万户余宝杀知枢密院事宝童，叛降于毛贵。河南大饥。

十八年春正月丙午，陈友谅陷安庆，淮南行省右丞余阙及万户李宗可死之。乙卯，朱元璋将邓愈陷婺源州。甲子，不兰奚知枢密院事。丙寅，田丰陷东平路。丁卯，不兰奚及毛贵战于好石桥，败绩。是月，孛罗帖木儿为河南行省平章政事，统其父答失八都鲁原管军马。

二月己巳朔，中书右丞塔失帖木儿、左丞乌古孙良桢提调西山民寨，分守要害。毛贵陷沧州。癸酉，毛贵陷济南路，达鲁花赤爱的死之。河南行省右丞董抟霄与毛贵兵战于南皮

之魏家庄，死之。辛巳，太不花为中书右丞相，讨山东贼。壬午，田丰复陷济宁路。甲申，陷辉州。丙戌，纽的该弃东昌走，复拜中书添设左丞相。丁亥，察罕帖木儿复涇州、平凉。戊子，田丰陷东昌路。辛卯，安童为中书参知政事。

三月己亥朔，右丞相搠思监加太保。庚子，毛贵陷般阳路。癸卯，王士诚陷晋宁路，总管杜赛因不花死之。甲辰，察罕帖木儿复晋宁路。己酉，孛罗帖木儿复濮州。庚戌，毛贵陷蓟州。征四方兵入卫京师。乙卯，毛贵寇溲州，枢密副使达国珍败绩于枣林，死之。同知枢密院事刘哈刺不花败毛贵于柳林，贵走济南。丙辰，朱元璋将邓愈陷建德路，参知政事不花待弃城走。丁巳，田丰陷益都路。

夏四月庚午，淮南行省右丞杨完者败绩于徽州。辛巳，杨完者攻建德路，复败。壬午，田丰陷广平路，诏元帅方脱脱复广平。癸未，颁军民事宜十一条。甲申，陈友谅陷龙兴路，遣其将康泰寇邵武路。庚寅，翰林学士承旨蛮子为岭北行省平章政事。甲午，陈友谅将王奉国陷瑞州路。是月，车驾幸上都。李思齐、张良弼杀同知宣慰司事拜帖木儿。

五月戊戌朔，察罕帖木儿复冀宁路。方国珍为江浙行省左丞，兼海道运粮万户。李思齐杀同佥枢密院事郭择善。庚子，察罕帖木儿为山西行省右丞，兼行台侍御史、同知河南行枢密院事。壬寅，刘福通陷汴梁，迎伪主韩林儿都之。甲辰，太尉阿吉剌为甘肃行省左丞相。乙巳，察罕帖木儿部将关保败于高平。庚戌，陈友谅陷吉安路。乙卯，削太不花官爵，安置益州。知行枢密院事悟良哈台节制河北诸军，河南行省平章政事周全节制河南诸军。辛酉，陈友谅陷抚州路。

六月戊辰朔，日有食之。刘哈刺不花执太不花送京师，中道杀之。察罕帖木儿为陕西行省平章政事。庚辰，关先生、破头潘陷辽州，遂陷晋宁路及汾州，晋宁人乔彝、王佐，汾州人国子助教张岩起，俱不屈死。是月，江南行台御史大夫拜住哥杀绍兴路达鲁花赤迈里古思。

秋七月丁酉朔，周全以怀庆路叛降于刘福通。丁未，不兰奚复般阳路，未几复陷。丙寅，完不花、脱脱木儿为中书平章政事。是月，京师大水。

八月乙丑，江浙同签枢密院事员成叛降于朱元璋。庚辰，陈友谅陷建昌路。辛己，王士信以胜州叛降于毛贵。庚寅，老的沙为御史大夫。

九月丁酉朔，关先生等陷完州。壬寅，命中书参知政事普颜不花、治书侍御史李国凤经略江南。福建行省平章政事庆童为江南行台御史大夫。丙午，关先生等陷平定州。乙丑，陈友谅陷赣州，江南行省参知政事全普庵撒里及总管哈海赤死之。

冬十月辛未，胡大海陷兰溪州，执廉访使赵秉中。壬午，右丞相搠思监为御史燕赤不花所劾，诏收其印绶。乙酉，御史答里麻失里等复劾之，不报。壬辰，关先生等陷大同路。

十一月乙未，普化木儿帖木儿为福建行省平章政事。癸卯，陈友谅陷汀州路。丁未，田丰陷顺德路。

十二月乙丑朔，日有食之。癸酉，关先生等陷上都，焚宫阙。壬午，朱元璋攻婺州，行省参知政事石抹宜孙以兵来援，败绩。甲申，同签枢密院事宁安、安庆都事李相以婺州叛降于朱元璋，浙东廉访使杨惠、达鲁花赤僧住死之。

卷二十六

本纪第二十六

惠宗四 昭宗

十九年春正月甲午朔，陈友谅遣其将王奉国寇信州路，江东廉访副使伯颜不花的斤败之。乙巳，朵儿只班为中书平章政事。丙午，关先生、破头潘等陷辽阳，懿州路总管吕震、广宁路总管郭嘉死之。

二月甲申，叛将梁炳寇辰州，达鲁花赤和尚败之，以和尚为湖广行省参知政事。是月，诏孛罗帖木儿移兵镇大同。详定使王时为中书参知政事。明玉珍分兵陷嘉定，行省左丞相完者都、平章政事朗革歹、参知政事赵资死之。

三月癸巳朔，陈友谅陷襄阳。辛丑，兵马司指挥周哈刺歹等谋反，事觉伏诛。

夏四月癸亥朔，知枢密院事佛家奴复金、复诸州。甲子，天寿节，诏曰：“方今宜敬天地，法祖宗，以自修省。朕初度之日，群臣勿贺。”皇太子及左丞相太平等固请，不听。

五月壬辰朔，日有食之。陕西行台御史大夫完者帖木儿为陕西行省左丞相，便宜行事。是月，山东、河南、河东、陕西等路飞蝗蔽天，民大饥。

六月辛巳，宣徽使燕古思为御史大夫。是月，陈友谅陷信州，伯颜不花的斤死之。

秋七月壬辰朔，右丞相搆思监出为辽阳行省左丞相。乙巳，朱元璋将常遇春寇衢州，廉访使宋伯颜不花固守拒之。戊申，国王囊家歹、中书平章政事也先不花，知枢密院事佛家奴、黑驴等，会讨辽阳贼。

八月辛酉朔，倪文俊余党陷归州。戊寅，察罕帖木儿复汴梁路，刘福通挟其伪主韩林儿奔安丰。己卯，察罕帖木儿为河南行省平章政事，兼同知河南行枢密院事、陕西行台御史中丞，依前便宜行事。

九月癸巳，中书平章政事帖里帖木儿出为陕西行省左丞相。丁未，常遇春陷衢州，总管汤浩死之，执廉访使宋伯颜不花。是月，兵部尚书伯颜帖木儿等征海运于张士诚。

冬十月庚申，方国珍为江浙行省平章政事，时国珍已降于朱元璋，遂拒命。

十一月壬寅，朱元璋将胡大海陷处州。

十二月丁卯，关先生等入高丽，陷义州。戊辰，朱元璋将常遇春攻杭州。

是月，杀中书左丞成遵、参知政事赵中、参议萧庸。

二十年春正月癸卯，关先生等陷大宁路。壬子，危素为中书参知政事。

二月戊午朔，左丞相太平罢为太保，留守上都。庚申，福建行省参知政事袁天禄以福宁州叛，降于朱元璋。是月，御史大夫老的沙为中书平章政事。阳翟王阿鲁辉反，屯于木儿古彻兀之地。

三月戊子朔，彗星见。田丰陷保定路。甲午，廷试进士三十五人，赐买住、魏元礼等及第、出身有差。己巳，贼陷

冀宁路。壬子，辽阳行省左丞相搠思监为中书右丞相。

夏四月庚申，遣大司农都事乐元臣招谕田丰，丰杀之。辛未，金行枢密院事张居敬复兴中州。

五月丁亥朔，日有食之。乙未，陈友谅分兵陷辰州。己亥，绊住马为中书平章政事。

闰月庚午，陈友谅弑徐寿辉于采石，僭称皇帝，国号汉，改元大义。己未，甘肃行省左丞相阿吉剌为太尉。戊寅，胡大海陷信州。

六月壬子，石抹宜孙败绩于庆元县，死之。

秋七月辛酉，孛罗帖木儿败贼于台州。乙亥，孛罗帖木儿为总兵官，总领诸军，仍便宜行事。

八月乙未，贼陷永平路。庚戌，江浙行省左丞相达识帖睦迺加太尉，兼知江浙行枢密院事，便宜行事。

九月乙卯朔，遣参知政事也先不花谕孛罗帖木儿、察罕帖木儿毋越境相攻。壬戌，贼陷孟州及赵州。癸未，贼犯上都，右丞相忙哥帖木儿败绩。

十月甲辰朔，张良弼为湖广行省参知政事。丙戌，迭儿必失为太尉，守大斡儿朵。

十一月甲寅朔，河清三日。

十二月辛卯，贼陷广平路。

二十一年春正月癸丑朔，大赦天下。遣中书平章政事达识帖木儿、参知政事七十谕孛罗帖木儿、察罕帖木儿各罢兵还镇。乙丑，察罕帖木儿败贼于杞县。

二月甲申，同金枢密院事迭里帖木儿复永平府及滦州。是月，江南行台御史八撒刺不花杀广东道廉访使完者都等。据

广州以叛。

三月丁酉，泗州守将薛显叛降于朱元璋。

夏四月辛巳朔，日有食之。湖广行省参知政事张良弼为陕西行省参知政事。

五月癸丑，明玉珍陷嘉定路。是月，陕西贼李武、崔德等降于李思齐。

六月丙申，察罕帖木儿率所部讨山东贼。

秋七月辛酉朔，日有食之。辛亥，察罕帖木儿复东昌，遂复冠州。

八月庚子，福建行省平章政事普化帖木儿为江南行台御史大夫。是月，察罕帖木儿败田丰于东平州，丰降。棣州贼俞宝、东平贼王士诚、东昌贼杨诚、济南贼刘珪等皆降。

九月戊午，知枢密院事老章获阿鲁辉，送于京都，伏诛。封老章为和宁王，加太傅。是月，遣兵部尚书彻彻不花等征海运于张士诚。中书平章政事定住出为陕西行省平章政事。

冬十月癸巳，察罕帖木儿为中书平章政事，兼知河南、山东等处行枢密院事。是月，关先生、破头潘、沙刘等入高丽。

十一月戊辰，河自三门碛至孟津五百余里皆清，凡七日。是月，关先生等陷高丽东都，高丽王伯颜帖木儿奔福州。

是岁，京师大饥。

二十二年春正月甲寅，诏李思齐讨四川张良弼，平襄汉。乙丑，高丽将郑世云等复东京，沙刘、关先生等俱伏诛。丁卯，太尉完者帖木儿为陕西行省左丞相。也先不花为中书右丞。

二月丁丑朔，盗杀陕西行省右丞塔不歹。乙酉，彗星见于危。

三月戊申，白气起虚危，其长竟天。戊辰，明玉珍僭称皇帝，国号大夏，改元大统。是月，孛罗帖木儿为中书平章政事，位第一，加太尉。

夏四月丙子朔，彗星见于虚危。乙未，贼陷安州。是月，辽阳行省同知高家奴获破头潘，诛之。

五月乙巳朔，赛甫丁、阿里迷丁寇福州路，行省平章政事燕只不花败之。行省参知政事陈友定复汀州路。辛未，明玉珍分兵寇兴元、巩昌等路。是月，高丽王伯颜帖木耳遣使来告捷。

六月辛巳，彗星见紫微垣。戊子，田丰、王士诚杀察罕帖木儿以叛。以察罕帖木儿养子扩廓帖木儿为中书平章政事，兼知河南、山东等处行枢密院事，一应军马，并听节制。

秋七月，河决范阳县，漂没民居。

八月，张士诚杀淮南行省左丞汪同。集贤院侍讲学士忻都使高丽，赐高丽王伯颜帖木耳龙衣、御酒。

九月癸卯朔，刘福通以兵援田丰，扩廓帖木儿大败之。甲辰，权置山北道廉访司于惠州。戊辰，也速为辽阳行省左丞相、知行枢密院事。

冬十月壬申朔，邵宗愚杀八撒刺不花。

十一月乙巳，扩廓帖木儿复益都，田丰、王士诚伏诛。庚戌，扩廓帖木儿复莒州，山东悉平。庚申，扩廓帖木儿加太尉。癸亥，明玉珍陷清州。

十二月庚子，中书平章政事佛家奴为御史大夫。是月，废

高丽国王伯颜帖木儿，立塔思帖木儿为国王。遣崔帖木儿以兵送塔思帖木儿至高丽，为高丽人所败。遣尚书张昶授朱元璋江西行省平章政事，元璋不受。

二十三年春正月乙巳，贼陷大宁路。

三月辛丑，彗星见东方。中书平章政事爱不花分省冀宁，扩廓帖木儿拒之。丙午，大赦天下。丁未，廷试进士六十二人，赐宝宝、杨輶等及第，出身有差。是月，立广西行中书省，廉访使也儿吉尼为平章政事。立胶东行中书省及行枢密院，袁宏为行省参知政事。

夏五月，爪哇国遣使贡方物。

六月壬寅，授江南下第举人为府、州儒学提举。是月，李家奴使高丽，收高丽国王印。

秋七月壬戌，朱元璋与陈友谅战于鄱阳湖，友谅败死。其子理奔武昌，僭称皇帝，改元德寿。丁丑，马良为中书参知政事。

八月丁酉朔，日本人寇高丽，蓬州守将刘暹败之。

九月丁卯朔，遣爪哇使者还，赐爪哇国王三珠虎符及文币。是月，张士诚自称吴王。遣户部侍郎李罗帖木儿征海运，士诚拒命。

冬十月己酉，削太傅太平官爵，安置吐蕃；右丞相搠思监矫诏杀之。扩廓帖木儿遣佥枢密院事任亮复安陆府。

是岁，御史大夫老的沙、知枢密院事秃坚帖木儿奔于李罗帖木儿。

二十四年春正月丙寅朔，朱元璋自称吴王。是月，崔帖

木儿与高丽人战于定州，败绩。

二月癸丑，伪汉主陈理降于朱元璋。

三月辛卯，削孛罗帖木儿官爵。

夏四月甲午朔，命扩廓帖木儿讨孛罗帖木儿。乙未，孛罗帖木儿举兵反。壬寅，孛罗帖木儿遣其将与秃坚帖木儿陷居庸。癸卯，知枢密院事。也速、太子詹事不兰奚与秃坚帖木儿战于皇后店，败绩。甲辰，皇太子奔古北口。乙巳，秃坚帖木儿至清河，京师大震。丁未，诏曰：

自至正十一年妖贼窃发，选命将相分任乃职，视同心膂。岂期搆思监、朴不花夤缘为奸，互相蒙蔽，以致在外宣力之臣，因而解体，在内忠良之士，悉陷非辜；又奋其私仇，诬构孛罗帖木儿、老的沙等同谋不轨。朕以信任之专，失于究察。今宗王伯颜帖木儿等远来控诉，朕为惻然兴念。而搆思监、朴不花犹饰虚词，簧惑朕听。其屏搆思监于岭北，窜朴不花于甘肃，以快众愤。

也速为中书左丞相。庚戌，秃坚帖木儿入京师。孛罗帖木儿加太保，秃坚帖木儿为中书平章政事。辛亥，秃坚帖木儿军还。是月，孛罗帖木儿杀搆思监、朴不花。

五月甲子，河清。戊辰，孛罗帖木儿引兵犯京师。中书参知政事危素罢为翰林学士承旨。

六月甲寅，扩廓帖木儿遣其将白锁住入卫。

秋七月丙戌，孛罗帖木儿入居庸；皇太子军于清河，也速军于昌平，皆不战而溃。丁亥，皇太子奔冀宁。戊子，孛罗帖木儿营于健德门外，与秃坚帖木儿、老的沙入觐于宣文阁。丁丑，朱元璋将徐达陷庐州，戊寅，遣别将常遇春徇江

西。庚寅，孛罗帖木儿为中书左丞相，老的沙为中书平章政事，秃坚帖木儿为御史大夫，也速知枢密院事。

八月壬辰朔，日有食之。壬寅，孛罗帖木儿为中书右丞相，节制天下兵马。是月，张士诚杀江南行台御史大夫普化帖木儿，江浙行省左丞相达识帖木儿自杀。

九月甲申，徐达陷中兴路。

冬十月乙未，召皇太子还京师。复高丽国王伯颜帖木耳官爵，槛送崔帖木儿于高丽。

十一月，高丽人杀崔帖木儿。

十二月庚寅，徐达陷辰州，遣别将陷衡州。

二十五年春正月癸亥，封李思齐为许国公。己巳，常遇春陷宝庆路。

二月己丑朔，福建行省平章政事陈友定攻处州，不克。

三月丙寅，孛罗帖木儿幽皇后奇氏于诸色总管府。丁卯，中书平章政事老的沙为右御史大夫，别帖木儿为左御史大夫。吏部侍郎王朵列秃使高丽，册高丽国王伯颜帖木耳为太尉，赐龙衣、御酒。

夏四月乙丑朔，朱元璋将胡深陷建宁松溪县。乙卯，扩廓帖木儿将关保克大同。

五月，京师天雨雹。乙亥，常遇春陷安陆府，己卯，陷襄阳。

六月戊子，黎安道为中书参知政事。辛丑，湖广行省左丞周文贵复襄阳路。乙巳，皇后奇氏还宫。乙卯，太尉火你赤为御史大夫。是月，陈友定败胡深于建宁，获之。

秋七月乙酉，孛罗帖木儿伏诛。丙戌，函孛罗帖木儿首

至冀宁，召皇太子还，大赦天下。黎安道、方脱脱等伏诛。

八月癸卯，诏皇太子承制用人，并准正授。丁未，皇后宏吉刺氏崩。壬子，洪宝宝、帖古思不花、捏烈秃并为中书平章政事。是月，中书右丞袁涣出为河南行省右丞。

九月，扩廓帖木儿扈从皇太子至京师。壬午，伯撒里为太师、中书右丞相，扩廓帖木儿为太尉、中书左丞相、录军国重事、知枢密院事，兼太子詹事。是月，方国珍为淮南行省左丞相，分省庆元。

冬十月壬寅，哈刺章知枢密院事。丁未，老的沙伏诛。秃坚帖木儿遁于八儿思之地，岭北行省左丞相山僧等以兵讨之。戊申，资政院使秃鲁为御史大夫。升中书平章政事沙蓝答儿为头平章。

闰月庚申，五十八知枢密院事。辛未，封扩廓帖木儿为河南王，代皇太子亲征，总制关陕、晋、冀、山东等处并迤南一带军马，听便宜行事。辛巳，脱脱木儿为中书右丞，达识帖睦迺为中书参知政事。

十二月乙卯，立第二皇后奇氏为皇后，改为肃良合氏。癸亥，帖林沙为中书参知政事。是月，秃坚帖木儿伏诛。

二十六年春正月己酉，崇政院使李罗沙为御史大夫。壬子，完者知枢密院事。是月，沙蓝答儿为中书左丞相。

二月癸丑朔，立河淮水军元帅府于孟津。甲戌，免天下一切泛杂差徭。是月，明玉珍死，其子升僭立，改元开熙。

三月癸未朔，罢洛阳、嵩县等处宣慰司。甲午，蛮子、脱脱知枢密院事。扩廓帖木儿遣其将关保等攻张良弼于鹿台。乙未，廷试进士七十二人，赐赫德普化、张栋等及第、出身有

差。

夏四月辛未，徐达陷安丰；平章政事竹贞来援，败绩。

五月甲辰，脱脱不花为御史大夫。

六月壬子朔，汾州介休县地震。绍兴路山阴县山裂。己未，遣知枢密院事买驴守直沽。

秋七月辛巳朔，日有食之。徐沟县地震。甲申，李思齐为太尉。

八月戊寅，李国凤为中书左丞。

九月丙戌，方国珍为江浙行省左丞相，其弟国瑛等并为行省平章政事。己亥，中书平章政事失列门为御史大夫。

冬十月甲子，扩廓帖木儿遣其弟脱因帖木儿等屯济宁。

十二月，朱元璋迎韩林儿至建康，中道杀之。

二十七年春正月癸巳朔，朱元璋始称吴元年。庚子，松江府守将王立忠叛，降于吴将徐达。

二月庚申，七十为中书平章政事，月鲁不花为御史大夫。乙丑，詹事月鲁帖木儿为御史大夫。

夏四月丙午，上海县民钱鹤皋起兵复松江府，兵败，死之。

五月乙酉，完者帖木儿为中书右丞相。辛卯，知枢密院事，失列门为岭北行省左丞相。己亥，俺普为中书平章政事。

六月丙午朔，日有食之，昼晦。丁未，有龙出皇太子寝殿井中。丁卯，沂州山崩。

秋八月丙午，命皇太子总天下兵马，扩廓帖木儿与李思齐、秃鲁、张良弼等东西并进。庚戌，扩廓帖木儿部将貂高袭陷彰德路。诏削扩廓帖木儿兵权，命貂高讨之。辛亥，封

帖木儿不花为淮王。壬子，立大抚军院，以皇太子领之。癸丑，封伯撒里为永平王。甲寅，右丞相完者帖木儿、翰林学士承旨答尔麻、平章政事完者帖木儿并知大抚军院事。丙辰，同知詹事院事李国凤为同知大抚军院事，参知政事，完者帖木儿为副使。辛酉，中书右丞帖里帖木儿为太尉、添设中书左丞相。丙寅，立行枢密院于察罕脑儿，陕西行省左丞相秃鲁兼知行枢密院事。壬辰，帖里帖木儿兼知大抚军院事。中书右丞陈敬伯为中书平章政事。

九月辛巳，吴将徐达克平江路，执张士诚以归，杀之。己丑，也速以右丞相分省山东，阿蓝答里以左丞相分省大同。乙巳，立中书分省于真定路。丁未，有事于太庙。

冬十月壬子，落扩廓帖木儿太傅、中书左丞相并兼领诸职，大赦天下。甲寅，火你赤为中书平章政事。乙丑，丁好礼为中书添设平章政事。

十一月壬午，徐达陷沂州，王宣叛降。丙戌，平章政事月鲁帖木儿，知枢密院事完者帖木儿，平章政事伯颜帖木儿、帖林沙，并知大抚军院事。戊子，徐达陷峰州。壬辰，方国珍叛，降于吴。乙未，貌高为中书平章政事，中书左丞相帖里帖木儿为大抚军院使。庚子，徐达陷滕州。辛丑，徐达陷益都路，行省平章政事保保叛降，宣慰使普颜不花、总管胡浚、知院张縯皆死之。

十二月癸卯朔，日有食之。丁未，徐达陷般阳路，戊申，陷济宁路，己酉，分兵陷莱州，遂陷济南及东平路。庚申，杨诚、陈秉直为中书平章政事。丙寅，庄家为中书参知政事。庚午，吴将汤和陷福州，行宣政院使朵朵死之。

二十八年春正月壬申朔，中书平章政事伯颜帖木儿为御史大夫。乙亥，吴王朱元璋称皇帝，定有天下之号曰大明，建元洪武。壬辰，明将汤和陷建宁府。庚子，汤和陷延平府，参知政事文殊海牙等叛降，平章政事陈友定死之。

二月壬寅朔，削扩廓帖木儿爵邑，命秃鲁、李思齐等讨之。癸卯，武库灾。癸丑，明将常遇春陷东昌，平章政事申荣、王炳元死之。甲寅，明将杨璟陷宝庆府。甲子，汀州路总管陈谷珍叛降于明。丙寅，常遇春陷棣州。

三月甲戌，江西分省右丞何真籍广东户口，叛降于明。癸未，杨璟陷常宁州，丙戌，陷武冈州。庚寅，彗星见于西北。壬辰，明将廖永忠陷潮州。丙申，明将邓愈陷南阳路。己亥，徐达陷汴梁路。

夏四月辛丑朔，明兵陷英德州及连州、肇庆等路。戊申，脱因帖木儿等与徐达战于河南塔儿湾，败绩。河南行省平章政事梁王阿鲁温叛降于明。壬子，常遇春陷嵩州。丁巳，明兵陷永州，行省右丞邓祖胜死之。庚申，福昌元帅张兴钧、许州守将谢孚、陈州守将杨崇俱叛降于明。壬戌，明兵陷陕州。癸亥，明将冯宗异入潼关，李思齐、张思道等俱败遁。

五月庚午朔，明兵陷道州。是月，廖永忠陷梧州、浔州、柳州等路。

六月壬戌，杨璟陷靖江，平章政事也儿自尼死之。

秋七月戊子，象州守将阿思兰叛降于明。丁酉，彬州守将左手杨叛降于明。

闰月己亥朔，扩廓帖木儿杀貌高、关保。庚子，徐达陷卫辉路，壬寅，陷彰德路，丁未，陷广平路。壬子，明将常

遇春陷德州。丁巳，罢大抚军院，杀知大抚军院事伯颜帖木儿，复扩廓帖木儿官爵。皇太子总天下兵马，裁决庶务如前诏。戊午，明兵陷清州，辛酉，进至直沽，右丞相也速等溃走。癸亥，平章政事俺普等与明兵战于河西务，败绩。甲子，常遇春陷通州，知枢密院事卜颜帖木儿败绩，死之。诏太常礼仪院使阿鲁浑等奉太庙列室神主，同皇太子北行。乙丑，诏淮王帖木儿不花监国，庆童为中书左丞相，同守京师。丙寅，帝御清宁殿，召见群臣，议幸上都。左丞相失列门、知枢密院事黑厮、参知政事郭庸及宦者赵伯颜不花固谏，不从。是夜，出建德门，率三宫后妃、皇太子幸上都，群臣扈从者左丞相失列门、平章政事兼知枢密院事哈刺章、平章政事臧家奴、右丞定住、参知政事哈海、翰林学士承旨李百家奴、观音奴等百余人。丁卯，车驾次居庸关，诏右丞相也速入援。

八月庚午，翰林学士承旨李百家奴兼知枢密院事。是日，徐达陷京师；淮王帖木儿不花，中书左丞相庆童，前中书平章政事丁好礼，参加政事郭庸，集贤学士闵本，翰林待制黄暉，太子司经郎拜住，大乐署令赵宏毅等俱死之。乙亥，中书左丞相失列门卒。辽阳行省丞相也速不花为中书左丞相。纳哈出为辽阳省丞相。壬申，车驾至上都。乙酉，纳哈出加太尉。壬寅，行枢密院副使乃蛮台自军中入觐。甲辰，肯将薛显出古北口，守将枢密院佥事张益奔行在。

九月乙丑，明兵陷保定路，遂陷真定路。戊午，鼎住为中书平章政事。丁卯，诏高丽王将兵入援。

冬十月辛丑，封扩廓帖木儿为齐王。

十一月丙午，封也速为梁王，加太保。万户韩札儿败明

兵于韩店。是月，诏皇太子出屯于红罗山。

十二月丁卯，扩廓帖木儿与明将徐达战于保安州，败绩。也速攻古北口，不克。

二十九年春正月丙申朔，颁新历于高丽。庚子，诸王晃火帖木儿将兵入卫，封晃火帖木儿为威定王。甲辰，命也速率所部屯全宁州，为上都屏蔽。扩廓帖木儿为中书右丞相。高丽国遣使贡方物。

二月庚辰，也速围通州，不克。

三月庚子，明兵陷奉元路，御史桑哥失里、三原县尹朱春俱死之。丙子，明兵陷凤翔府，李思齐奔临洮。

夏四月乙丑朔，诏晃火帖木儿、也速分道趋京师。辛未，也速攻永平路不克。乙亥，明兵陷巩昌，总帅汪灵、真保等俱叛降。忽都帖木儿为上都留守。丁丑，李思齐以临洮叛降于明。己卯，明主遣使赍手书来。

五月甲午朔，日有食之。辛丑，张良臣以庆阳叛降于明。

六月丁卯，也速与明将常遇春战于全宁州，败绩。甲戌，明兵陷大兴州，执中书右丞脱火赤。乙亥，车驾幸应昌府。河南王普化、中书平章政事鼎住等留守上都。丁丑，晃火帖木儿与明兵战于新开岭，败绩，晃火帖木儿死之。己卯，常遇春陷上都，河南王普化、中书平章政事鼎住俱死之。辛亥，扩廓帖木儿部将韩札儿复原州，遂复泾州。

八月癸亥朔，诏脱列伯、孔兴攻大同以图恢复。丙寅，脱列伯、孔兴败绩于大同，脱列伯被执，孔兴为部将所杀。

九月癸巳，诏扩廓帖木儿入卫。丁酉，哈刺章加太保。戊戌，郡王阿怜吉歹统五投下部众屯会州。

冬十月丁未，明主复遣使赍手书来。

十一月庚寅，扩廓帖木儿攻兰州，不克。

十二月丁酉，帝不豫。

三十年春正月壬辰，帝疾瘳。癸巳，明将徐达、李文忠、汤和分三道来伐，三宝奴赍手诏征扩廓帖木儿入卫。

二月，李文忠陷兴和，进至察罕脑儿，平章政事竹贞败绩。

夏四月乙丑，扩廓帖木儿与徐达战于沈儿峪，败绩。丙戌，帝崩于应昌，在位三十七年，年五十有一。太尉完者、知枢密院事观音奴奉梓宫葬于起辇谷。群臣上庙号曰惠宗皇帝，国语曰乌哈图汗。明祖以帝能顺天命，退避而去，上尊谥曰顺帝。

昭宗皇帝，讳爱猷识理达腊，惠宗长子也。母曰完者都皇后。至正十三年，册立为皇太子。二十八年，从惠宗奔上都。

三十年夏四月，惠宗崩于应昌，皇太子即皇帝位。五月丁酉，李文忠败太尉蛮子、平章政事沙不丁、朵儿只、八剌等于白海子之骆驼山，进次开平，平章政事上都马等叛降于文忠。太尉买驴与明将孙兴祖战于落马河，兵败，死之。辛丑，李文忠趋应昌，未至百余里，获使者，始知惠宗已崩。甲辰，应昌陷，帝以数十骑奔和林。文忠穷追至北庆州，不及而还。既而，扩廓帖木儿至和林，帝以国事任之，改元宣光。

宣光元年，明太祖洪武四年也，辽阳行省平章刘益及王右丞以金、复、海、盖等州降于高丽。十月，高丽兵陷五老山寨，枢密副使哈刺不花为所获。

二年春正月，明大将徐达来伐，由雁门趋和林。三月，明将蓝玉败扩廓帖木儿于土拉河。夏五月，扩廓帖木儿大破明徐达兵于岭北。自是，明兵不复渡漠。

三年二月，遣伯都帖木儿、玉山不花使于高丽，以玺书赐高丽王曰：“顷因兵乱，迁于北。今以扩廓帖木儿为相，几于中兴。王亦世祖之孙也，宜助朕复正天下。”是时，高丽称和林为北元。伯都帖木儿等入境，王欲杀之，群臣以为不可。于是王夜见伯都帖木儿，托言目疾，恐明人知之也，使还，附芒布以献。

四年夏四月，扩廓帖木儿遣兵攻雁门，不克。十一月，扩廓帖木儿自将攻大同，亦不克。

五年夏四月，明将蓝玉陷兴和，败国兵于白酒泉。五月，帝徙帐于金山，丞相扩廓帖木儿卒。七月，明将李文忠败国兵于大宁高州。初，明人陷应昌，获皇子买的里八剌，明太祖封为崇礼侯；至是遣归，并以手书通好。

六年春，伯颜帖木儿攻延安，为明将傅友德所败，降于明。

七年秋八月，有番僧自和林至高丽，谓高丽人曰：“帝将以沈王孙为高丽国王。”高丽人执之。后知其妄，释不问。

八年夏四月，帝崩于金山，群臣上庙号曰昭宗皇帝，国语曰必里克图汗。

弟脱古思帖木儿嗣，惠宗第二子也，改元天元，在位十

年，国语曰乌萨尔汗。自脱古思帖木儿以后世次，详《宗室世表》。

史臣曰：“惠宗自以新意制宫漏，奇妙为前所未有的，又晓天文灾异。至元二十二年，白气起虚危，扫太微垣，台官奏山东应大水。帝曰：‘不然，山东必陨一良将。’未几，察罕帖木儿果为田丰所杀。其精于推验如此。乃享国三十余年。帝淫涵于上，奸人植党于下，戕害忠良，隳其成功。迨盗贼四起，又专务姑息之政，縻以官爵，豢以土地，犹为虎傅翼，恣其抃噬。孟子有言：安其危，而利其灾，乐其所以亡者。呜呼，其帝之谓欤！然北走应昌，获保余年；视宋之徽、钦，辽之天祚，犹为厚幸焉。昭宗以下，文献无征。惟宣光八年之事，间存一二，故附载于本纪云。”

卷二十七

志第一

历 一

治历本末

自《三统术》以后七十余家，至郭守敬之《授时》，测验愈精，析理愈微，立数愈简信，可谓度越前古者矣。然日月

星辰之高远，而以一人之智力穷之，欲其事事吻合，永无差忒，此必不可得之数也。明之《大统》，实本《授时》，至成化以后，交食已往往不验。

皇朝宣城梅文鼎、婺源江永，皆深通数理。其纠《授时》疏舛凡数事：一曰增损岁余、岁差。一岁小余，古强今弱，一由日轮径差，一由最卑动移。《授时》考古，则增岁余而损岁差；推来，则增岁差而损岁余。乃未得其根，而以法迁就之。似密实疏，不足为法。一曰岁实消长。天行盈缩，进退以渐，无骤增、骤减之理。《授时》百年消长一分，是百年之内皆无所差，逾一年则骤增减一分，又积百年则平差一分，逾一年又骤增减一分，无此推算之法。一曰二十四气用恒气。当时高冲与冬至同度，最高与夏至同度，冬至为盈初，夏至为缩初，以为盈缩之常限如此。故以两冬至相距之日，均为二十四气，谓合于天之平分数也。设如五十余年之后，高卑两点各东移一度，则平冬至与定冬至不相值，及其极也，平冬至与定冬至相差两日，犹能以两定冬至相距之日，均为二十四气乎？且其求冬至也，自丙子年立冬后，依每日测景取对冬至前后日差同者为准，得丁丑年冬至在戊戌日夜半后八刻，又定戊寅冬至在癸卯日夜半后三十三刻，己卯冬至在戊申日夜半后五十七刻，庚辰冬至在癸丑日夜半后八十一刻，辛巳冬至在己未日夜半后六刻。其求岁余也，自宋大明以来得冬至时刻真数者有六，用以相距，各得其时，合用岁余，考验四年相符不差，仍自大明壬寅年距今八百一十九年，每岁合得三百六十五日二十四刻二十五分，减大明术一十二秒，其二十五分为今律岁余合用之数。以此二事考之，则《授时》当

年所定之岁实，已有微差。稽之于史，又多牴牾。夫一岁小余二十四刻二十五分，积之四岁正得九十七刻。丁丑冬至在戊戌日夜半后八刻，则辛巳冬至宜在己未夜半后五刻，不应有六刻也。如以辛巳之六刻为是，则丁丑之冬至宜在九刻，不应为八刻半也。此四年既皆实测所得，则已多半刻矣。而云相符不差，何也？又考大明五年十一月三日乙酉夜半后三十二刻七十分辰初三刻冬至。大明壬寅下距至元辛巳八百一十九年，以《授时》岁实积之，凡二十九万九千一百三十三日六十刻七十五分，以乙酉辰初三刻距己未丑初二刻，凡二十九万九千一百三十三日九十二刻，较多三十三刻。而云自大明壬寅距今每岁合得此数，何也？又云减大明术一十一秒。考大明术纪法与周天一岁小余二十四刻二十八分一十四秒。《授时》减去三分一十四秒，非一十一秒也。又古时太阳本轮、均轮半径之差，大于今日，则加减均数亦大。而冬至岁实宜更增矣。至元辛巳间高冲约与冬至同度，则岁实尤大，其小余刻下之分约有三十分。而《授时》定为二十五分，宜其自丁丑至于辛巳四年之间，即有半刻之差，而守敬未之觉也。

凡此数事，皆足订《授时》之误。今撮大要著于篇，以备治历者之参考焉。

至《授时》用平方、立方以求盈缩迟疾差，犹开方之旧术，用天元一御弧矢起数于围三径一，亦失之疏。若以弦矢求弧背，前后失均，象限以内差而多，象限以外差而少，此又不能为前人讳者也。

《历经》、《历议》，皆守敬所撰。世祖诏李谦为《历议》，润色其书而已，谦不能作也。札马鲁丁之《万年历》，实即明

人所用之回回历，《明史》详矣，不具论。

蒙古初无历法。太祖十五年，驻蹕撒马尔干城，回鹘人奏五月望月蚀。中书令耶律楚材以《大明历》推之，太阴当亏二分，食甚在子正，乃未尽初更而月已蚀。是年二月、五月朔，微月见于西南。楚材以旧历不验，遂别造《庚午元历》。据《大明历》减周天七十三秒，岁差亦减七十三秒。以中元庚午岁，国兵南伐，天下略定，推上元庚午岁天正十一月壬戌朔子正冬至，为太祖受命之符。又以西域、中原地逾万里，依唐僧一行里差之说，以增损之。东西测候，不复差忒。乃表上于行在曰：“汉、唐以来，经元创法不啻百家，其气候之早晏，朔望之疾徐，二曜之盈衰，五星之起伏，疏密无定，先后不同。盖都邑之各殊，或历年之渐远，不得不差也。唐历八徙，宋历九更，金《大明历》百年才经一改。此去中原万里，以昔程今，昔密今疏，东微西著。今二月、五月朔，微月见于西南，较之于历，悉为先天。”自汉、唐以来历算之书备矣。俱无此说。是年正月、四月虽皆为小尽，然亦未有朔日见月者也。是时，太祖方用兵西域，其书不果颁用。

楚材尝言，西域历五星密于中国，又作《麻荅历》，今不传。楚材父履在金末作《乙未元历》，楚才盖本其父之书，更名为《庚午元历》云。

至世祖至元四年，西域人札马鲁丁用回回法撰《万年历》，帝稍采用之。其法为默特纳国王马哈麻所造历，元起西域阿剌必年，即随开皇己未，不置闰月，以三百六十五日

一岁。岁十二宫，宫有闰日，凡百二十八年宫闰三十一日，以三百五十四日为一周，周十二月，月有闰日，凡三十年月闰十一日。历千九百四十一年，宫月日辰再会。此其立法之大概也。

十三年，世祖平宋，诏前中书左丞许衡、太子赞善王恂、工部郎中郭守敬，立局改治新历。先是，太保刘秉忠以《大明历》辽、金承用岁久，浸以后天，议修正之。已而秉忠卒，事遂寝。至是，世祖思用其言，遂命恂与守敬率南北日官陈鼎臣、邓元麟、毛鹏翼、刘巨源、王素、岳铉、高敬等，分掌测验、推步，以衡能推明历理，俾参预之。

守敬首言：“历之本在于测验，而测验之器莫先仪表。今司天浑仪，宋皇佑中汴京所造，不与此处天度相符，比量南北二极，约差四度。表石年深，亦复欹侧不可用。”乃尽考其失，而移置之。既又别图爽垲，以木为重棚，创作简仪、高表，用相比覆。又以为天枢附极而动，昔人尝展管望之，未得其的，作候极仪。极辰既位，天体斯正，作浑天象。象虽形似，莫适所用，作玲珑仪。以表之测天之正圆，莫若以圆求圆，作仰仪。古有经纬，结而不动，守敬则易之，作立运仪。日有中道，月有九行，守敬则一之，作证理仪。表高景虚，罔象非真，作景符。月虽有明，察景则难，作窥几。历法之验，在于交会，作日月食仪。天有赤道，轮以当之，两极低昂，标以指之，作星晷定时仪。以上凡十三等。又作正方案、九表、悬正仪、座正仪，凡四等，为四方行测者所用。又作仰规、覆矩图、异方、浑盖图、日出入永短图，凡五等，与上诸仪互相参考。

十六年，改局为太史院，以赞善王恂为太史令，守敬为同知太史院事，给印章，立官府。是年，奏进仪表式样，守敬对御指陈理致，一周悉。自朝至于日晏，上不倦。

守敬奏：唐一行开元间令天下测景，书中见者凡十三处；今疆宇比唐尤大，若不远方测验，日月交食分数时刻不同，昼夜长短不同，日月星辰去天高下不同；可先南北立表，取直测景。上可其奏。遂设监候官一十四员，分道相继而出。

先测得：南海：北极出地一十五度。夏至景在表南长一尺一寸六分，昼五十四刻，夜四十六刻。衡岳：北极出地二十五度。夏至日在表端无景，昼五十六刻，夜四十四刻。岳台：北极出地三十五度，夏至景长一尺四寸八分，昼六十刻，夜四十刻。和林：北极出地四十五度，夏至景长三尺二寸四分，昼六十四刻，夜三十六刻。铁勒：北极出地五十五度，夏至景长五尺一分，昼七十刻，夜三十刻。北海：北极出地六十五度，夏至景长六尺七寸八分，昼八十二刻，夜一十八刻。继又测得：上都：北极出地四十三度少。大都：北极出地四十二度强，夏至晷景长一丈二尺三寸六分，昼六十二刻，夜三十二刻。益都：北极出地三十七度少。登州：北极出地三十八度少。高丽：北极出地三十八度少。西京：北极出地四十度少。太原：北极出地三十八度少。安西府：北极出地三十四度半强。兴元：北极出地三十三度半强。成都：北极出地三十一度半强。西凉州：北极出地四十度强。东平：北极出地三十五度太强。大名：北极出地三十六度。南京：北极出地三十四度太强。阳城：北极出地三十四度太。扬州：北极出地三十三度。鄂州：北极出地三十一度半。吉州：北极

出地二十六度半。雷州：北极出地二十度太。琼州：北极出地十九度太。

十七年，新历告成。守敬上奏曰：

臣等窃闻帝王之事，莫重于历。自黄帝迎日推策，帝尧以闰月定四时成岁，舜在璇玑玉衡以齐七政。爰及三代，历无定法，周秦之间，闰余乖次。西汉造《三统历》，百三十年而后是非始定。东汉造《四分历》，七十余年而仪式备。又百二十一年，刘洪造《乾象历》，始悟月行有迟速。又百八十年，姜岌造《三纪甲子历》，始悟以月食冲检日宿度所在。又五十七年，何承天造《元嘉历》，始悟以朔望及弦定大小余。又六十五年，祖冲之造《大明历》，始悟太阳有岁差之数，极星去不动处一度余。又五十二年，张子信始悟日月交道有表里，五星有迟疾留逆。又三十三年，刘焯造《皇极历》，始悟日行有盈缩。又三十五年，傅仁均造《戊寅元历》，颇采旧仪，始用定朔。又四十六年，李淳风造《麟德历》，以古历章蔀元首分度不齐，始为总法，用进朔以避晦晨月见。又六十三年，僧一行造《大衍历》，始以朔有四大三小，定九服交食之异。又九十四年，徐昂造《宣明历》，始悟日食有气刻时三差。又二百三十六年，姚舜辅造《纪元历》，始悟食甚泛余差数。以上计千一百八十二年，历经七十，改其创法者十有三家。

自是又百七十四年，钦惟圣朝统一六合，肇造区夏，专命臣等改治新历。臣等用创造简仪、高表，凭其测到实数所考正者凡七事：一曰冬至。自丙子年立冬后，依每日测到晷景，逐日取对，冬至前后日差同者为准，得丁丑年冬至在戌日夜半后八刻半。又定丁丑夏至，得在庚子日夜半后七十刻。

又定戊寅冬至，在癸卯日夜半后三十三刻；己卯冬至，在戊申日夜半后五十七刻半；庚辰冬至，在癸丑日夜半后八十一刻半。各减大明历十八刻，远近相符，前后应准。二曰岁余。自刘宋《大明历》以来，凡测景验气得冬至时刻真数者有六，用以相距，各得其时合用岁余。今考验四年，相符不差。仍自宋大明壬寅年距至今日八百一十年，每岁合得三百六十五日二十四刻二十五分。其二十五分为今历岁余合用之数。三曰日躔。用至元丁丑四月癸酉望月食既推求日躔，得冬至日躔赤道箕宿十度，黄道箕九度有畸。仍凭每日测到太阳躔度，或凭星测月，或凭月测日，或径凭星度测日，立术推算。起自丁丑正月，至己卯十二月，凡三年，共得一百三十四事，皆躔于箕，与月食相符。四曰月离。自丁丑以来至今，凭每日测得逐时太阴行度推算变，从黄道求入转极迟极疾并平行处，前后凡十三转，计五十一事，内除去不真的外，有三十事。得大明历入转后天，又因考验交食加大明历三十刻，与天道合。五曰入交。自丁丑五月以来，凭每日测到太阴去极度数，比拟黄道去极度，得月道交于黄道，共得八事。仍依日食法度推求，皆有食分得入时刻，与大明所差不多。六曰二十八宿距度。自汉代初历以来，距度不同，互有损益。大明历则于度下余分附以太半少，皆私意牵就，未尝实测其数。今新仪皆细刻周天度分，每度为三十六分，以距线代管窥宿度余分，并依实测，不以私意牵就。七曰日出入昼夜刻。《大明历》日出入昼夜刻，皆据汴京为准，其刻度与大都不同。今更以本方北极出地高下、黄道出入内外度，立术推求每日日出入昼夜刻，得夏至极长，日出寅正二刻，日入戌初二刻，昼六十

二刻，夜三十八刻，冬至极短，日出辰初二刻，日入申正二刻，昼三十八刻，夜六十二刻；永为定式。

所创法凡五事：一曰太阳盈缩。用四正定气立为升降限，立招差求得每日行分初末极差积度，比古为密。二曰月行迟疾。古历皆用二十八限，今以万分日之八百二十分为一限，凡析为三百三十六限，依垛叠招差，求得转分进退，其迟疾度数逐时不同，盖前所未有的。三曰黄赤道差。旧法以一百一度相减相乘。今依算术勾股弧矢方圆斜直所容，求到度率积差率，与天道实为吻合。四曰黄赤道内外度。据累年实测内外极度二十三度九十分，以圆容方直矢接勾股为法求每日去极，与所测相符。五曰白道交周。旧法黄道变推白道，以斜求斜。今用立浑比量，得月与赤道正交，距春秋二正黄赤道正交一十四度六十六分，拟以为法，推逐月每交二十八宿度分，于理为尽。

诏赐名曰授时历。十八年，颁新历于天下。

十九年，守敬以推步之式与立成之数皆无定稿，乃著《推步》七卷、《立成》二卷、《历议拟稿》三卷、《转神选择》二卷、《上中下三历注式》十二卷，表上之。二十年，又诏太子谕德李谦就守敬之《历议稿》重加修订，以阐新历顺天求合之理。

大德三年八月朔，时加巳依新历日食二分有奇，至其时不应，台官皆惧。保章正齐履谦曰：“日当食不食，古有之。况时近午，阳盛阴微，宜当食不食。”遂考唐开元以来当食不食者凡十事以闻。六年六月朔，时加戌依新历日食五十七秒，众以涉交既浅，且近浊，欲匿不报。履谦曰：“吾所掌者常数

也。其食与否，则系于天。”独以状闻。及其时，果食。盖高远难穷之事，必积时累验，乃见端倪。《授时历》推日食之法，较前之十三家最密矣，然尚不能无数刻之差。故元之一代，日食四十有五，推食而不食者一，食而失推者一，夜食而误昼者一。履谦谓：食与否系于天，是犹泥前人当食不食，不当食而食之谬说，诬莫甚矣。

泰定间，履谦为太史院使，以《授时历》行五十年未尝推考，乃日测晷景并晨昏五星宿度，自至治三年冬至、泰定二年夏至天道加时真数，各减见行历书二刻，撰《二至晷景考》二卷。《授时》虽有经串，而经以著定法，串以纪成数；求共法之所以然，数之所从出，则略而不详；作《经串演说》八卷，以发明其蕴焉。

时鄱阳人赵友钦推演《授时》之理，著《革象新书》五卷，号为新历之学。

其《历法改革篇》曰：“历法由古及今，六十余术矣。汉太初粗为可取，然犹疏略未密。唐一行作大衍术，当时以为密矣，以今观之，犹自甚疏。盖岁浅则差少未觉，久而积差渐多，不容不改，要当随时测验，以求真数。

其《日道岁差篇》曰：“统天术谓周天赤道三百六十五度二十五分七十五秒，周岁三百六十五日二十四分二十五秒，百年差一度半，然又谓周岁渐渐不同，上古岁策多，后世岁策少，如此则上古岁差少，后世岁差多。当今术法源之，立减加岁策之法，上考往古，百年加一秒，下验将来，百年减一秒。”

其《黄道损益篇》曰：“二至之日，黄道平其度，敛狭每

度约得十之九二分，斜行赤道之交。今之授时术步得冬至日躔箕宿。以此知寅申度数最少，己亥度数最多，其余则多寡稍近。

其《积年日法篇》曰：“前代造术者，逆求往古曰上元，求其积年总会，是以必立日法。然有所谓截元术，但将推步定数为顺算逆考，不求其齐。当今授时术采旧术截元之术，凡积年日法皆所不取。

其《日月盈缩篇》曰：“月行十三度余十九之七，然或先期，或后期，有差至四五度者，后汉刘洪始考究之，知月有盈缩。隋之刘焯始觉太阳亦有盈缩，最多之时在于春秋二分，均差两度有余。李淳风有推步月孛法，谓六十二日行七度，六十二年七周天。所谓孛者，乃彗星之一种光芒，偏拂者则谓之彗，光芒四出如浑圆者乃谓之孛。然孛以月为名者，孛之所在，太阴所行最迟，太阴在孛星对冲处则所行最疾。孛星不常见，止以太阴所行最迟处测之。

其《月有九道篇》曰：“月行出入黄道之内，外，远于黄道处六度二分。月道与黄道相交处在二交之始，名曰罗喉，交之中，名曰计都。自交初至于交中，月在黄道外，名曰阳限。自交中至于交出，月在黄道内，名曰阴限。所谓九行者，当以画图比之。四图各画黄道，似一圆环，俱于环南定为夏至，环北定为冬至，环西定为春分，环东定为秋分。将一图画为青道，与黄道交于南北，南交为罗，北交为计。其青道一边入在黄道西之东，是内青道；一边出在黄道东之东，是外青道。又将一图画白道，亦与黄道交于南北，南交为计，北交为罗。其白道一边入在黄道东之西，是内白道；一边出在黄

道西之西，是外白道。又将一图画朱道，与黄道交于东西，东交为计，西交为罗。其朱道一边入黄道之南，是内朱道；一边出在黄道南之南，是外朱道。又将一图画黑道，亦与黄道交于东西，东交为罗，西交为计。其黑道一边入在黄道南之北，是内黑道；一边出在黄道北之北，是外黑道。此虽画四图，然四图之八道止是一道也。本八道而曰九行者，以北道之行，交于黄道，故道以九言也。八道常变易，不可置于浑仪上，亦不得画于星图。所可具者黄、赤二道耳。欲别于黄，故涂以赤。赤道近八道皆相交远近。朱道止十八度远，黑道至三十度远，青白二道约二十四度远。”

其《地域远近篇》曰：“古者立八尺之表，以验四时日景。地中夏至，景在表北一尺六寸，冬至，景在表北一丈三尺。南至交广，北至铁勒等处验之，俱各不同。表高八尺，似失之短。至元以来，表长四丈，诚万古之定法也。所谓土圭者，自古有之。然地上天多早晚，太阳与人相近，则景移必疾；日午与人相远，则景移必迟。世间土圭均画而已，岂免午侵己未，而早晚时刻俱差。地中差已如是，若以八方偏地验之，土圭之不可准尤为显。然偏东者，早景疾，而晚景迟，午景先至；偏西者，早景迟，而晚景疾，午景后期；偏北者，少其画，而景迟；偏南者，多其画，而景疾。若南越短，景南指，而子午反复，则又讹逆甚矣。”

其《日月薄食篇》曰：“日之圆，体大，月之圆，体小。日道之周围亦大，月道之周围亦小。日道距天较近，月道距天较远。日月之体与所行之道，虽有少广之差，然月与人相

近，日与人相远。故月体因近视而可比日道之广。日食、月食当以天度经纬而推。同经不同纬，止曰合朔。同经同纬合朔，而有食矣。人望日体，见为月之黑体所障，故云日食。然日体未尝有损，所谓食者，强名而已。日月对躔，而望若不当二交前后，则不食。望在二交前后，则必食。或既或不既，当以距交远近而推。日月之圆径相倍。日径一度，月径止得日径之半，然在于近视，亦准一度。是犹省秤比于复秤，斤两虽同，其实则有轻重之异。日之圆径倍于月，则暗虚之圆径亦倍于月。月既准一度，则暗虚广二度矣。月食分数止以距交近远而论，别无四时加减。八方所见食分并同。日食则不然，旧历云：假令中国食既戴，日之下所亏才半，化外反观，则交而不食。何以言之？日月如大小二球，共悬一索。日上、月下，相去稍远，人在其下正望之，黑球遮尽赤球，比若食既。若傍视，则分远近之差，即食数有多寡也。”

其《五纬距合篇》曰：“古者止知五纬距度，未知有变数之加减。北齐张子信仰观岁久，始知五纬又有盈缩之变，当加减常数以求其逐日之躔。所以然者，盖五纬不由黄道，亦不由月之九道。乃出入黄道内外，各自有其道。视太阳远近而迟疾者，如足力之勤倦又有变数之加减者。比如道里之径直斜曲。

其《勾股测天篇》曰：“古人测景，千里一寸之差，犹未亲切。今别定表之制度，并述元有算法。就地中各去南北数百里，仍不偏于东西，俱立一表，约高四丈。于表首下数寸作一方窍，外广而内狭，当中薄如连边，两旁如侧置漏底之碗，形圆而窍方。以南北表景之数相减余，名景差。两表相

距里路，各乘南北表景，各如景差而一即得。二表各与戴日之地相距数日，平远各以表景加之，所得各以表高乘之，各如表景而一即得。日轮顶与戴日地相距数，以南北表景各加平远所得自乘，名勾幂。日高自乘，名股幂。两幂相并，名弦幂。开为平方，名曰日远。乃南北表穹之景距日斜远也。

其《乾象周髀篇》曰：“古人谓圆径一尺，周围三尺。后世考究则不然。圆一而周三，则尚有余；围三而径一，则为不足。盖围三径一，是六角之田也。或谓圆径一尺，周围三尺一寸四分；或谓圆径七尺，周围二十二尺；或谓圆径一百一十三，周围三百五十五。径一而周三一四，犹自径多围少；径七而周二十二，却是径少周多；径一百一十三，周三百五十五，最为精密。其考究之术，画百眼茶盘一，眼广一寸，方图之内，画为圆图，径十寸，圆内又画小方图。小方以算术展为圆象，自四角之方，添为八角曲圆为第一次。若第二次，则为曲十六。第三次为，则曲三十二。第四次则为曲六十四。凡多一交，其曲必倍。至十二次，则其为曲一万六千三百八十四。其初之小方，渐加渐展，渐满渐实，角数愈多，而其为方者不复方，而变为圆矣。今先以第一次言之，内方之弦十寸，名大弦，自乘得一百寸，名大弦幂，内方之勾幂五十寸，名第一次大勾幂。以第一次大勾幂，减其大弦幂，余五十寸，名大股幂，开方得七寸七厘一毫有奇，名第一次大股。以第一次大股减其大弦，余二寸九分二厘八毫有奇，名第一较，折半得一寸四分六厘四毫有奇，名第一次小勾。此小勾之数，乃内方之四边与圆围最相远处也。以第一次小勾自乘，得二寸一分四厘四毫有奇，名第一次小勾幂。以第一次大勾

幂，折半得二十五寸，又折半得十二寸五分，名第一次小股幂，并第一次小勾幂，得一十四寸六分四厘四毫有奇，名第一次小弦幂，开方得三寸八分二厘六毫有奇，名第一次小弦，即是八曲之一。八乘第一次小弦，得三十寸六分一厘有奇，即是八曲之周围也。此以小数求之，不若改为大数，将大弦改为一千寸，然后依法而求。若求第二次者，以第一次小弦幂，就名第二次大勾幂。以第一次大股幂减其大弦幂余，为第二次大股幂。开方为第二次大股，以减其大弦余为第二较，折半名二次小勾。此小勾之数，即是八曲之边，与圆围最相远处也。以第二次小勾自乘，名第二次小勾幂。以第二次大勾幂两折，名第二次小股幂。以第二次小股幂并第二次小勾幂，名第二次小弦幂，开方为第二次小弦，即是十六曲之一。以十六乘第二小弦即是十六曲之周围也。以第二次仿第一次，若至十二次，亦递次相仿。置第十二次之小弦，以第十二次之曲数一万六千三百八十四乘之，得三千一百四十一寸五分九厘二毫有奇，即是千寸径之周围也。以一百一十三乘之，果得三百五十五。故言其法精密。要之方为数之始，圆为数之终。圆始于方，方终于圆。周髀之术，无出于此矣。

友钦阐明历理，于授时术尤有深得，传其学于龙游人朱晖。有元一代，不为历官，而知历者，友钦一人而已。

卷二十八

志第二

历 二

仪器 西域仪象

简仪之制：四方为趺，纵一丈八尺三分，去一以为广。趺面上广六寸，下广八寸，厚如上广。中布横轨三、纵轨三。南二，北抵南轨；北一，南抵中轨。趺面四周为水渠，深一寸，广加五分。四隅为础，出趺面内外各二寸。绕础为渠，深广皆一寸，与四周渠相灌通。又为础，于卯酉位广加四维，长加广三之二。水渠亦如之。北极云架柱二，径四寸，长一丈二尺八寸。下为鳌云，植于乾艮二隅。础上左右内向，其势斜准赤道合贯上规。规环径二尺四寸，广一寸五分，厚倍之，中为距，相交为斜十字，广厚如规。中心为穹，上广五分，方一寸有半，下二寸五分，方一寸，以受北极枢轴。自云架住斜上去趺面七尺二寸，为横轨。自轨心上至穹心六尺八寸。又为龙柱二，植于卯酉础。中分之北，皆饰以龙，下为山形，北向斜植，以柱北架。南极云架柱二，植于卯酉础，中分之，南广厚形制一如北架，斜向坤巽二隅，相交为十字。其上与百刻环边齐，在辰巳、未申之间。南倾之势准赤道，各长一丈

一尺五寸。自趺面斜上三尺八寸为横轸，以承百刻环。下边又为龙柱二，植于坤巽二隅，础上北向斜柱，其端形制一如北柱。

四游双环，径六尺，广二寸，厚一寸，中间相离一寸，相连于子午、卯酉。当子午为圆窍，以受南北极枢轴。两面皆列周天度分，起南极，抵北极，余分附于北极。去南极枢窍两旁四寸，各为直距，广厚如环距，中心各为横关，东西与两距相连，广厚亦如之。关中心相连，厚三寸，为窍方八分，以受窥衡枢轴。窥衡长五尺九寸四分，广厚皆如环。中腰为圆窍，径五分，以受枢轴衡。两端为圭首，以取中，缩去圭首五分，各为侧立横耳，高二寸二分，广如衡面，厚三分。中为圆窍，径六分，其中心上下一线，界之以知度分。

百刻环，径六尺四寸，面广二寸，周布十二时百刻。每刻作三十六分，厚二寸，自半已上，广三寸。又为十字距。皆所以承赤道环也。百刻环内广面卧施圆轴四，使赤道环旋转，无涩滞之患。其环陷入南极架一寸，仍钉之。赤道环径广厚皆如四游环，面细刻列舍周天度分。中为十字距，广三寸，中空一寸，厚一寸。当心为窍，窍径一寸，以受南极枢轴。界衡二，各长五尺九寸四分，广三寸。衡首斜刻五分刻度分，以对环面中腰。为窍重置赤道环南极枢轴，其上衡两端自长窍外边至衡首底厚倍之。取二衡运转，皆着环面，而无低昂之失，且易得度分也。二极枢轴，皆以钢铁为之，长六寸，半为本，半为轴。本之为分寸一如上规。距心适取，能容轴径一寸。北极轴中心为孔，孔底横穿通两旁。中出一线，曲其本，出横孔两旁，结之。孔中线留三分，亦结之。上下各穿

一线，贯界衡两端。中心为孔，下洞衡底顺衡中心为渠，以受线直入内界。长窍中至衡中腰，复为孔，自衡底上出结之。

定极环，广半寸。厚倍之，皆势穹窿，中径六度，度约一寸许。极星去不动处三度，仅容转周。中为斜十字，距广厚如环，连于上规环，距中心为孔径五厘，下至北极轴心六寸五分。又置铜板，连于南极云架之十字，方二寸，厚五分，北面刻其中心存一厘以为厚。中为圆孔，径一分，孔心下至南极轴心亦六寸五分。又为环二。其一阴纬环，面刻方位，取趺面纵横轸北十字为中心，卧置之。其一曰立运环，面刻度分，施于北极云架柱下，当卧环中心上属架之横轸下，抵趺轸之十字，上下各施枢轴，令可旋转。中为置距，当心为窍，以施窥衡，令可俯仰，用窥日月星辰出地度分。右四游环，东西运转，南北低昂，凡七政，列舍中外官去极度分皆测之。赤道环旋转与列舍距星相当，即转界衡使两线相对，凡日月五星中外官入宿度分皆测之。百刻环转界衡令两线与日相对，其下直时刻则昼刻也。夜则以星定之，比旧仪测日月五星出没而无阳经阴纬云柱之映。

其浑象之制：圆如弹丸，径六尺，纵横各画周天度分，赤道居中，去二极各周天四之一。黄道出入赤道内外，各二十四度。弱月行白道出入不常，用竹篾均分天度，考验黄道所交，随时迁徙。先用简仪测致入宿去极度数，按于上。其校验出黄赤二道远近疏密，了然易辨，仍参以算数为准，其象置于方匱之上。南北极出入匱面各四十度太强。半见半隐。机运轮牙，隐于匱中。

仰仪之制：以铜为之，形若釜，置于砖台内，画周天度，

唇列十二辰位，盖俯视验天者也。

其铭辞云：“不可体形，莫天大也。无兢维人，仰釜载也。六尺为深，广自倍也。兼深广倍，絜釜兑也。环凿为沼，准以溉也。辨方正位，曰子卦也。衡缩度中，平斜再也。斜起南极，平釜镬也。小大必周，入地画也。始周浸断，浸极外也。极入地深，四十太也。北九十一，赤道馯也。列刻五十，六时配也。衡竿加卦，巽坤内也。以负缩竿，子午对也。首旋玑板，歟纳芥也。上下悬直，与镬会也。视日透光，何度在也。昉谷朝宾，夕饒昧也。寒暑发敛，验进退也。薄蚀起自，鉴生杀也。以避赫曦，夺目害也。南北之偏，亦可概也。极浅十五，林邑界也。黄道夏高，人所载也。夏永冬短，犹少差也，深五十奇，铁勒塞也，黄道浸平，冬画晦也。夏则不没，永短最也。安浑宣夜，昕穹盖也。六天之书，言殊话也。一仪一揆，孰善悖也。以指为告，无烦喙也。暗资以明，疑者沛也。智者是之，胶者怪也。古今巧历，不亿辈也。非让不为，思不逮也。将窥天朕，造化爱也。其有浚明，昭圣代也。泰山砺乎，河如带也。黄金不磨，悠久赖也。鬼神禁诃，勿铭坏也。”

大明殿灯漏之制：高丈有七尺，架以金为之。其曲梁之上，中设云珠，左日右月。云珠之下，复悬一珠。梁之两端，饰以龙首，张吻转目，可以审平水之缓急。中梁之上，有戏珠龙二，随珠俯仰，又可察准水之均调。凡此皆非徒设也。灯球杂以金宝为之，内分四层，上环布四神，旋当日月参辰之所在，左转日一周。次为龙虎鸟龟之象，各居其方，依刻跳跃，铙鸣以应于内。又次周分百刻，上列十二神，各执时牌，

至其时，四门通报。又一人当门内，常以手指其刻数。下四隅，钟鼓钲铙各一人，一刻鸣钟，二刻鼓，三钲，四铙，初正皆如是。其机发隐于柜中，以水激之。

正方案：方四尺，厚一寸。四周去边五分为水渠。先定中心，画为十字，外抵水渠。去心一寸。画为圆规，自外寸规之，凡十九规。外规内三分，画为重规，遍布周天度。中为圆径二寸，高亦如之。中心洞底植臬，高一尺五寸，南至则减五寸，北至则倍之。

凡欲正四方，置案平地，注水于渠，眊平，乃植臬于中。自臬景西入外规，即识以墨影，少移辄识之，每规皆然，至东出外规而止。凡出入一规之交，皆度以线，屈其半以为中，即所识与臬相当，且其景最短，则南北正矣。复遍阅每规之识，以审定南北。南北既正，则东西从而正。然二至前后，日轨东西行，南北差少，即外规出入之景以为东西，允得其正。当二分前后，日轨东西行，南北差多，朝夕有不同者，外规出入之景或未可凭，必取近内规景为定，仍校以累日则愈真。

又测用之法，先测定所在北极出地度，即自案地平以上度，如其数下对南极入地度，以墨斜经中心界之，又横截中心斜界为十字，即天腹赤道斜势也。乃以案侧立，悬绳取正。凡置仪象皆以此为准。

圭表：以石为之，长一百二十八尺，广四尺五寸，厚一尺四寸。座高二尺六寸。南北两端为池，圆径一尺五寸，深二寸。自表北一尺，与表梁中心上下相直。外一百二十尺，中

心广四寸，两旁各一寸，画为尺寸分，以达北端。两旁相去一寸为水渠，深广各一寸，与南北两池相灌通以取平。表长五十尺，广二尺四寸，厚减广之半，植于圭之南端圭石座中，入地及座中一丈四尺，上高三十六尺。其端两旁为二龙，半身附表上擎横梁，自梁心至表颠四尺，下属圭面，共为四十尺。梁长六尺，径三寸，上为水渠以取平。两端及中腰各为横窍，径二分，横贯以铁，长五寸，系线合于中，悬锤取正，且防倾垫。

按表短则分寸短促，尺寸之下所谓分秒太半少之数，未易分别。表长，则分寸稍长。所不便者景虚而淡，难得实影。前人欲就虚景之中考求真实，或设望筒，或置小表，或以木为规，皆取端日光下彻表面。今以铜为表，高三十六尺，端挟以二龙，举一横梁，下至圭面，共四十尺。是为八尺之表五，圭表刻为尺寸，旧一寸，今申而为五厘，毫差易分别。

景符之制：以铜叶博二寸加长博之二，中穿一窍，若针芥然。以方框为趺，一端设为机轴，令可开阖。檣其一端，使其势斜倚，北高南下，往来迁就于虚梁之中。窍达日光仅如米许，隐然见横梁于其中。旧法：一表端测晷，所得者日体上边之景。今以横梁取之，实得中景，不容有毫末之差。至元十六年己卯夏至晷景，四月十九日乙未景一丈二尺三寸六分九厘五毫。至元十六年己卯冬至晷景，十月二十四日戊戌景七丈六尺七寸四分。

窥几之制：长六尺，广二尺，高倍之。下为趺，广三寸，

厚二寸。上框广四寸，厚如趺。以板为面，厚及寸，四隅为足，撑以斜木，务取正方。面中开明窍，长四尺，广二寸。近窍两旁一寸分画为尺，内三寸刻为细分，下应圭面。几面上至梁心二十六尺，取以为准。窥限各长二尺四寸，广二寸，脊厚五分，两刃斜枳，取其于几面相符，著限两端，厚广各存二寸，衔入几框。俟星月正中，从几下仰望，视表梁南北以为识，折取分寸中数，用为直景。又于远方同日窥测取景数，以推星高下也。

世祖至元四年，扎马鲁丁造西域仪象：

咱秃哈刺吉，汉言浑天仪也。其制：以铜为之。平设单环，刻周天度。画十二辰位以准地面。侧立双环，而结于平环之子午，半入地下，以分天度。内第二双环，亦刻周天度，而参差相交，以结于侧双环。去地平三十六度，以为南北极。可以旋转，以象天运，为日行之道。内第三、第四环，皆结于第二环，又去南北极二十四度。亦可以运转。凡可运三环，各对缀铜方钉，皆有窍，以代衡箫之仰窥焉。

咱秃朔八台，汉言测验周天星曜之器也。外圆周墙，而东面启门。中有小台，立铜表高七尺五寸。上设机轴，悬铜尺，长五尺五寸，复如窥测之箫二，其长如之。下置横尺，刻度如数。其上以准挂尺。下本开图之远近。可以左右转而周窥，可以高低举而遍测。

鲁哈麻亦渺凹只，汉言春秋分晷影堂也。屋二间，脊开东西横罅，以斜通日晷。中有台，随晷影南高北下，上仰置铜半环，刻天度一百八十，以准地上之半天。斜倚锐首铜尺，

长六尺，阔一寸六分，上结半环之中，下加半环之上，可以往来窥运，侧望漏屋晷影，验度数，以定春秋二分。

鲁哈嘛亦木思塔余，汉言冬夏至晷影堂也。屋五间，其屋下为坎，深二丈二尺，脊开南北一罅，以直通日晷。随罅立壁，附壁悬铜尺，长一尺六寸。壁仰画天度半规，其尺亦可往来规运，直望漏屋晷影，以定冬夏二至。

苦来亦撒麻，汉言浑天图也。其制：以铜为丸，斜刻日道交环度数于其腹，刻二十八宿形于其上。外平置铜单环，刻周天度数，列于十二辰位以准地。而侧立单环二。一结于平环之子午，以铜丁象南北极。一结于平环之卯酉。皆刻天度。即浑天仪而不可运转窥测者也。

苦来亦阿儿子，汉言地理志也。其制：以木为圆球，七分为水，其色绿，三分为土地，其色白。画江河湖海，脉络贯串于其中。画作小方井，以计幅员之广袤，道里之远近。

兀速都儿刺不定，汉言昼夜时刻之器也。其制：以铜如圆镜而可挂，面刻十二辰位，昼夜时刻。上加铜条缀中，可以圆转。铜条两端，各屈其首为二窍，以对望。昼则视日影，夜则窥星辰，以定时刻，以测休咎。背嵌镜片，三面刻其图凡七，以辨东西南北日影长短之不同、星辰向背之有异。故各异其图。以尽天地之变焉。

卷二十九

志第三

历 三

授时历经上

步气朔第一

至元十八年岁次辛巳为元。上考往古，下验将来，皆距立元为算。周岁消长，百年各一。其诸应等数，随时推测，不用为元。

日周，一万。

岁实，三百六十五万二千四百二十五分。

通余，五万二千四百二十五分。

朔实，二十九万五千三百五分九十三秒。

通闰，十万八千七百五十三分八十四秒。

岁周，三百六十五日二千四百二十五分。

朔策，二十九日五千三百五分九十三秒。

气策，十五日二千一百八十四分三十七秒半。

望策，十四日七千六百五十二分九十六秒半。

弦策，七日三千八百二十六分四十八秒少。

气应，五十五万〇六百分。

闰应，二十万一千八百五十分。

按《授时历》闰转交三应，后有改定之数。闰应，二十万一千八百五十分，明《大统历法通轨》作二十万二千五十分，实加二百分；是当时经朔改早二刻也。转应，一十三万一千九百四分，《通轨》作一十三万二百五分，实减一千六百九十九分，是入转改迟一十七刻弱也。交应，二十六万一百八十七分八十六秒，《通轨》作二十六万三百八十八分，实加二百分一十四秒，是正交改早二刻强也。梅文鼎谓《通轨》所述者乃《授时历》续定之数，而《历经》所存，则其未定之初稿是也。

没限，七千八百一十五分六十二秒半。

气盈，二千一百八十四分三十七秒半。

朔虚，四千六百九十四分七秒。

旬周，六十万。

纪法，六十。

推天正冬至

置所求距算，以岁实上推往古，每百年长一。下算将求，每百年消一。乘之，为中积。加气应，为通积。满旬周，去之；不尽，以日周约之为日，不满为分。其日命甲子算外，即所求天正冬至日辰及分。如上考者，以气应减中积，满旬周，去之；不尽，以减旬周。余同上。

求次气

置天正冬至日分，以气策累加之，其日满纪法，去之，外

命如前，各得次气日辰及分秒。

推天正经朔

置中积，加闰应，为闰积。满朔实，去之，不昼为闰余，以减通积，为朔积。满旬周，去之，不尽，以日周约之，为日，不满为分，即所求天正经朔日及分秒。上考者，以闰应减中积，满朔实，去之不尽，以减朔实，为闰余。以日周约之为日，不满为分，以减冬至日及分，不及减者，加纪法减之，命如上。

求弦望及次朔

置天正经朔日及分秒，以弦策累加之，其日满纪法，去之，各得弦望及次朔日及分秒。

推没日

置有没之气分秒，如没限已上为有没之气。以十五乘之，用减气策，余满气盈而一，为日，并恒气日，命为没日。

推灭日

置有灭之朔分秒，在朔虚分已下为有灭之朔。以三十乘之，满朔虚而一，为日，并经朔日，命为灭日。

步发敛第二

土王策，三日四百三十六分八十七秒半。

月闰，九千六十二分八十二秒。

辰法，一万。

半辰法，五千。

刻法，一千二百。

推五行用事

各以四立之节，为春木、夏火、秋金、冬水首用事日。以土王策减四季中气，各得其季土始用事日。

气候

正月

立春，正月节。

东风解冻，蛰虫始振，鱼陟负冰。

雨水，正月中。

獭祭鱼，候雁北，草木萌动。

二月

惊蛰，二月节。

桃始华，仓庚鸣，鹰化为鸠。

春分，二月中。

玄鸟至，雷乃发声，始电。

三月

清明，三月节。

桐始华，田鼠化为鴽，虹始见。

谷雨，三月中。

萍始生，鸣鸠拂其羽，戴胜降于桑。

四月

立夏，四月节。

蝼蝈鸣，蚯蚓出，王瓜生。

小满，四月中

苦菜秀，靡草死，麦秋至。

五月

芒种，五月节。

螳螂生，鵙始鸣，反舌无声。

夏至，五月中。

鹿角解，蜩始鸣，半夏生。

六月

小暑，六月节。

温风至，蟋蟀居壁，鹰始挚。

大暑，六月中。

腐草为萤，土润溽暑，大雨时行。

七月

立秋，七月节。

凉风至，白露降，寒蝉鸣。

处暑，七月中。

鹰乃祭鸟，天地始肃，禾乃登。

八月

白露，八月节。

鸿雁来，立鸟归，群鸟养羞。

秋分，八月中。

雷始收声，蛰虫坏户，水始涸。

九月

寒露，九月节。

鸿雁来宾，雀入大水为蛤，菊有黄华。

霜降，九月中。

豺乃祭兽，草木黄落，蛰虫咸俯。

十月

立冬，十月节。

水始冰，地始冻，雉入大水为蜃。

小雪，十月中。

虹藏不见，天气上升，地气下降，闭塞而成冬。

十一月

大雪，十一月节。

鶡鴒不鸣，虎始交，荔挺出。

冬至，十一月中。

蚯蚓结，麋角解，水泉动。

十二月

小寒，十二月节。

雁北乡，鹊始巢，雉雊。

大寒，十二月中。

鸡乳，征鸟厉疾，水泽腹坚。

推中气去经朔

置天正闰余，以日周约之，为日，命之，得冬至去经朔。以月闰累加之，各得中气去经朔日算。满朔策，去之，乃全置闰，然俟定朔无中气者裁之。

推发敛加时

置所求分秒，以十二乘之，满辰法而一，为辰数。余以刻法收之，为刻。命子正算外，即所在辰刻。如满半辰法，通

作一作辰，命起子初。

步日躔第三

周天分，三百六十五万二千五百七十五分。

周天，三百六十五度二十五分七十五秒。

半周天，一百八十二度六十二分八十七秒半。

象限，九十一度三十一分四十三秒太。

岁差，一分五十秒。

周应，三百一十五万一千七十五分。

半岁周，一百八十二日六千二百一十二分半。

盈初缩末限，八十八日九千九十二分少。

缩初盈末限，九十三日七千一百二十分少。

推天正经朔弦望入盈缩历

置半岁周，以闰余日及分减之，即得天正经朔入盈缩历。冬至后盈，夏至后缩。以弦策累加之，各得弦望及次朔入盈缩历日及分秒。满半岁周去之，即交盈缩。

求盈缩差

视入限盈者，在盈初缩末限已下，为初限，已上，反减半岁周，余为末限；缩者，在缩初盈末限已下，为初限，已上，反减半岁周，余为末限。其盈初缩末者，置立差三十一，以初末限乘之，加平差二万四千六百，又以初末限乘之，用减定差五百一十三万三千二百，余再以初末限乘之，满亿为度，不满退除为分秒。缩初盈末者，置立差二十七，以初末

限乘之，加平差二万二千一百，又以初末限乘之，用减定差四百八十七万六千，余再以初末限乘之，满亿为度，不满退限为分秒，即所求盈缩差。

又术：置入限分，以其日盈缩分乘之，万约为分，加其下盈缩积，万约为度，不满为分秒，亦得所求盈缩差。

赤道宿度

角十二一十	亢九二十	氐十六三十
房五六十	心六五十	尾十九一十
箕十四十		

右东方七宿，七十九度二十分。

斗二十五二十	牛七二十	女十一三十五
虚八九十五太	危十五四十	室十七一十
壁八六十		

右北方七宿，九十三度八十分太。

奎十六六十	娄十一八十	胃十五六
昂十一三十	毕十七四十	觜初五
参十一一十		

右西方七宿，八十三度八十五分。

井三十三三十	鬼二二十	柳十三三十
星六三十	张十七二十五	翼十八七十五
轸十七三十		

右南方七宿，一百八度四十分。

右赤道宿次，并依新制浑仪测定，用为常数，校天为密。若考往古，即用当时宿度为准。

推冬至赤道日度。

置中积，以加周应为通积，满周天分，上推往古，每百年消一。下算将来，每百年长一。去之，不尽，以日周约之为度；不满，退约为分秒。命起赤道虚宿六度外，去之，至不满宿，即所求天正冬至加时日躔赤道宿度及分秒。上考者，以周应减中积，满周天，去之，不尽，以减周天，余以日周之为度；余同上。如当时有宿度，止依当时宿度命之。

求四正赤道日度

置天正冬至加时赤道日度，累加象限，满赤道宿次，去之，各得春夏秋冬正日所在宿度及分秒。

求四正赤道宿积度

置四正赤道宿全度，以四正赤道日度及分减之，余为距后度。以赤道宿度累加之，各得四正后赤道宿积度及分。

黄赤道率

推黄道宿度

置四正后赤道宿积度，以其赤道积度减之，余以黄道率乘之，如赤道率而一。所得，以加黄道积度，为二十八宿黄道积度。以前宿黄道积度减之，为其宿黄道度及分。其秒就近为分。

黄道宿度

角十二八十七 亢九五十九 氏十六四十
 房五四十八 心六二十七 尾十七九十五
 箕九五十九

右东方七宿，七十八度一十二分。

斗二十三四十七 牛六九十 女十一一十二
 虚九分空太 危十五九十五 室十八三十二
 壁九三十四

右北方七宿，九十四度一十分太。

奎十七八十七 娄十二三十六 胃十五八十一
 昂十一〇八 毕十六五十 觜初〇五
 参十二十八

右西方七宿，八十三度九十五分。

井三十一〇三 鬼二一十一 柳十三
 星六三十一 张十七七十九 翼二十〇九
 轸十八七十五

右南方七宿，一百九度八分

右黄道宿度，依今历所测赤道准冬至岁差所在算定，以凭推步。若上下考验，据岁差每移一度，依术推变，各得当时宿度。

推冬至加时黄道日度

置天正冬至加时赤道日度，以其赤道积度减之，余以黄道率乘之，如赤道率而一。所得，以加黄道积度，即所求年天正冬至加时黄道日度及分秒。

求四正加时黄道日度

置所求年冬至日躔黄赤道差，与次年黄赤道差相减，余四而一，所得，加象限，为四正定象度。置冬至加时黄道日度，以四正定象度累加之，满黄道宿次，去之，各得四正定气加时黄道宿度及分。

求四正晨前夜半日度

置四正恒气日及分秒，冬夏二至，盈缩之端，以恒为宿。以盈缩差命为日分，盈减朔加之，即为四正定气日及分。置日下分，以其日行度乘之，如日周而一。所得，以减四正加时黄道日度，各得四正定晨前夜半日度及分秒。

求四正后每日晨前夜半黄道日度

以四正定气日距后正定气日为相距日，以四正定气晨前夜半日度距后正定气晨前夜半日度为相距度，累计相距日之行定度，与相距度相减，余如相距日而一，为日差。相距度多为加，相距度少为减。以加减四正每日行度率，为每日行定度。累加四正晨前夜半黄道日度，满宿次，去之，为每日晨前夜半黄道日度及分秒。

求每日午中黄道日度

置其日行定度，半之，以加其日晨前夜半黄道日度，得午中黄道日度及分秒。

求每日午中黄道积度

以二至加时黄道日度距所求日午中黄道日度，为二至后黄道积度及分秒。

求每日午中赤道日度

置所求日午中黄道积度，满象限，去之，余为分后。内减黄道积度，以赤道率乘之，如黄道率而一。所得，以加赤道积度及所去象限，为所求赤道积度及分秒。以二至赤道日度加而命之，即每日午中赤道日度及分秒。

黄道十二次宿度

危，十二度六十四分九十一秒。	入娶訾之次，辰在亥。
奎，一度七十三分六十三秒。	入降娄之次，辰在戌。
胃，三度七十四分五十六秒。	入大梁之次，辰在酉。
毕，六度八十八分五秒。	入实沈之次，辰在申。
井，八度三十四分九十四秒。	入鹑首之次，辰在未。
柳，三度八十六分八十秒。	入鹑火之次，辰在午。
张，十五度三十六分六秒。	入鹑尾之次，辰在巳。
轸，十度七分九十七秒。	入寿星之次，辰在辰。
氏，一度一十四分五十二秒。	入大火之次，辰在卯。
尾，三度一分一十五秒。	入析木之次，辰在寅。
斗，二度七十六分八十五秒。	入星纪之次，辰在丑。
女，二度六分三十八秒。	入玄枵之次，辰在子。

求入十二次时刻

各置入次宿度及分秒，以其日晨前夜半日度减之，余以日周

乘之，为实。以其日行定度为法，实加法而一，所得，依发敛加时求之，即入次时刻。

步月离第四

转终分，二十七万五千五百四十六分。

转终，二十七日五千五百四十六分。

转中，十三日七千七百七十三分。

初限，八十四。

中限，一百六十八。

周限，三百三十六。

月平行，十三度三十六分八十七秒半。

转差，一日九千七百五十九分九十三秒。

弦策，七日三千八百二十六分四十八秒少。

上弦，九十一度三十一分四十三秒太。

望，一百八十二度六十二分八十七秒半。

下弦，二百七十三度九十四分三十一秒少。

转应，一十三万一千九百四分。

推天正经朔入转

置中积，加转应，减闰余，满转终分，去之，不尽，以日周约之为日，不满为分，即天正经朔入转日及分。上考者，中积内加所求闰余，减转应，满转终，去之，不尽，以减转终，余同上。

求弦望及次朔入转

置天正经朔入转日及分，以弦策累加之，满转终，去之，即弦望及次朔入转日及分秒。如径求次朔，以转差加之。

求经朔弦望入迟疾历

各视入转日及分秒，在转中已下，为疾历。已上，减去转中，为迟历。

迟疾转定及积度

求迟疾差

置迟疾历日及分，以十二限二十分乘之，在初限已下为初限，已上覆减中限，余为末限。置立差三百二十五，以初末限乘之，加平差二万八千一百，又以初末限乘之，用减定差一千一百一十一万，余再以初末限乘之，满亿为度，不满退除为分秒，即迟疾差。

又术：置迟疾历日及分，以迟疾历日率减之，余以其下损益分乘之，如八百二十而一，益加损减其下迟疾度，亦为所求迟疾差

求朔弦望定日

以经缩弦望盈缩差与迟疾差，同名相从，异名相消，盈迟缩疾为同名，盈疾缩迟为异名。以八百二十乘之，以所入迟疾限下行度除之，即为加减差，盈迟为加，缩疾为减。以加减经朔弦望日及分，即定朔弦望日及分。若定弦望分在日出分已下者，退一日，其日命甲子算外，各得定朔弦望日辰。定朔干名与后朔干同者，其月大。不同者，其月小。内无中气者，为闰月。

推定朔弦望加时日月宿度

置经朔弦望入盈缩历日及分，以加减差加减之，为定朔弦望入历，在盈，便为中积，在缩，加半岁周，为中积。命

日为度，以盈缩差盈加缩减之，为加时定积度。以冬至加时日躔黄道缩度加而命之，各得定朔弦望加时日度。

凡合朔加时，日月同度，便为定朔加时月度。其弦望各以弦望度加定积，为定弦望月行定积度。依上加而命之，各得定弦望加时黄道月度。

推定朔弦望加时赤道月度

各置定朔弦望加时黄道月行定积度，满象限，去之，以其黄道积度减之，余以赤道率乘之，如黄道率而一，用加其下赤道积度及所去象限，各为赤道加时定积度。以冬至加时赤道日度加而命之，各为定朔弦望加时赤道月度及分秒。象限以下及半周，去之，为至后。满象限以及三象，去之，为分后。

推朔后平交入转迟疾历

置交终日及分，内减经朔入交日及分，为朔后平交日。以加经朔入转，为朔后平交入转。在转中已下，为疾历。已上，去之，为迟历。

求正交日辰

置经朔，加朔后平交日，以迟疾历依前求到迟疾差，迟加疾减之，为正交日及分，其日命甲子算外，即正交日辰。

推正交加时黄道月度

置朔后平交日，以月平行度乘之，为距后度。以加经朔中积，为冬至距正交定积度。以冬至日躔黄道宿度加而命之，为正交加时月离黄道宿度及分秒。

求正交在二至后初末限

置冬至距正交积度及分，在半岁周已下，为冬至后。已上，去之，为夏至后。其二至后，在象限已下，为初限。已上，减去半岁周，为末限。

求定差距差定限度

置初末限度，以十四度六十六分乘之，如象限而一，为定差。反减十四度六十六分，余为距差。以二十四乘定差，如十四度六十六分而一。所得，交在冬至后名减，夏至后名加，皆加减九十八度，为定限度及分秒。

求四正赤道宿度

置冬至加时赤道度，命为冬至正度。以象限累加之，各得春分、夏至、秋分正积度。各命赤道宿次去之，为四正赤道宿度及分秒。

求月离赤道正交宿度

以距差加减春秋二正赤道宿度，为月离赤道正交宿度及分秒。冬至后，初限加，末限减，视春正。夏至后，初限减，末限加，视秋正。

求正交后赤道宿积度入初末限

各置春秋三正赤道所当宿全度及分，以月离赤道正交宿度及分减之，余为正交后积度。以赤道宿次累加之，满象限去之，为半交后。又去之，为中交后。再去之，为半交后。视各交积度在半象已下，为初限。已上，用减象限，余为末限。

求月离赤道正交后半交日道旧名九道。出入赤道内外度及定差

置各交定差度及分，以二十五乘之，如六十一而一。所得，视月离黄道正交在冬至后宿度为减，夏至后宿度为加，皆加减二十三度九十分，为月离赤道后半交白道出入赤道内外度及分。以周天六之一，六十度八十七分六十二秒半，除之，为定差。月离赤道正交后为外，中交后为内。

求月离出入赤道内外白道去极度

置每日月离赤道交后初末限，用减象限，余为白道积。用其积度减之，余以其差率乘之，所得，百约之，以加其下积差，为每日积差。用减周天六之一，余以定差乘之，为每日月离赤道内外度。内减外加象限，为每日月离白道去极度及分秒。

求每交月离白道积度及宿次

置定限度，与初末限相减相乘，退位为分，为定差。正交、中交后为加，半交后为减。以差加减正交后赤道积度，为月离白道定积度。以前宿白道定积度减之，各得月离白道宿次及分。

推定朔弦望加时月离白道宿度

各以月离赤道正交宿度距所求定朔弦望加时月离赤道宿度，为正交后积度。满象限，去之，为半交后。又去之，为中交后。再去之，为半交后。视交后积度在半象已下，为初限。已上，用减象限，为末限。以初、末限与定限度相减相乘，退位为分，分满百为度，为定差。正交、中交后为加，半交后为减。以差加减月离赤道正交后积度，为定积度。以正

交宿度加之，以其所当月离白道宿次去之，各得定朔弦望加时月离白道度及分秒。

求定朔望加时及夜半晨昏入转

置经朔弦望入转日及分，以定朔弦望加减差加减之，为定朔弦望加时入转。以定朔弦望日下分减之，为夜半入转。以晨分加之，为晨转。昏分加之，为昏转。

求夜半月度

置定朔弦望日下分，以其入转日转定度乘之，万约为加时转度，以减加时定积度，余为夜半定积度，依前加而命之，各得夜半月离宿度及分秒。

求晨昏月度

置其日晨昏分，以夜半入转日转定度乘之，万约为晨昏转度。各加夜半定积度。为晨昏定积度。加命如前，各得晨昏月离宿度及分秒。

求每日晨昏月离白道宿次

累计相距日数转定度，为转积度，与定朔弦望晨昏宿次前后相距度相减，余以相减日数除之，为日差。距度多为加，距度少为减。以加减每日转定度，为行定度。以累加定朔弦望晨昏月度，加命，即每日晨昏月离白道宿次。朔后用昏，望后用晨，朔望晨昏俱用。

卷三十

志第四

历 四

授时历经下 步中星第五

大都北极，出地四十度太强。

冬至，去极一百一十五度二十一分七十三秒。

夏至，去极六十七度四十一分一十三秒。

冬至昼，夏至夜，三千八百一十五分九十二秒。

夏至昼，冬至夜，六千一百八十四分八秒。

昏明，二百五十分。

黄道出入赤道内外去极度及半昼夜分

求每日黄道出入赤道内外去极度

置所求日晨前夜半黄道积度，满半岁周，去之，在象限已下，为初限。已上，复减半岁周，余为入末限。满积度，去之，余以其段内外差乘之，百约之，所得，用减内外度，为出入赤道内外度。内减外加象限，即所求去极度及分秒。

求每日半昼夜及日出入晨昏分

置所求入初末限，满积度，去之，余以昼夜差乘之，百

约之，所得，加減其段半昼夜分，为所求日半昼夜分。前多后少为減，前少后多为加。以半夜分便为日出分，用減日周，余为日入分，以昏明分減日出分，余为晨分。加日入分，为昏分。

求昼夜刻及日出入辰刻

置半夜分，倍之，百约，为夜刻。以減百刻，余为昼刻。以日出入分依发敛求之，即得所求辰刻。

求更点率

置晨分，倍之，五约，为更率，又五约更率，为点率。

求更点所在辰刻

置所求更点数，以更点率乘之，加其日昏分，依发敛求之，即得所求辰刻。

求距中度及更差度

置半日周，以其日晨分減之，余为距中分。以三百六十六度二十五分七十五秒乘之，如日周而一，所得，为距中度。用減一百八十三度一十二分八十七秒半，倍之，五除，为更差度及分。

求昏明五更中星

置距中度，以其日午中赤道日度加而命之，即昏中星所临宿次，命为初更中星。以更差度累加之，满赤道宿次去之，为逐更及晓中星宿度及分秒。其九服所在昼夜刻分及中星诸率、并准随处北极出地度数推之。已上诸率，与晷漏所推自

相符契。

求九服所在漏刻

各于所在以仪测验，或下水漏，以定其处冬至或夏至夜刻，与五十刻相减，余为至差刻。置所求日黄道，去赤道内外度及分，以至差刻乘之，进一位，如二百三十九而一，所得内减外加五十刻，即所求夜刻，以减百刻，余为昼刻。其日出辰刻及更点等率，依术求之。

步交会第六

交终分，二十七万二千一百二十二分二十四秒。

交终，二十七日二千一百二十二分二十四秒。

交中，十三日六千六十一分一十二秒。

交差，二日三千一百八十三分六十九秒。

交望，十四日七千六百五十二分九十六秒半。

交应，二十六万一百八十七分八十六秒。

交终，三百六十三度七十九分三十四秒。

交中，一百八十一度八十九分六十七秒。

正交，三百五十七度六十四分。

中交，一百八十八度五分。

日食阳历限，六度。定法，六十。

阴历限，八度。定法，八十。

月食限，十三度五分。定法，八十七。

推天正经朔入交

置中积，加交应，减闰余，满交终分，去之，不尽，以日周约之为日，不满为分秒，即天正经朔入交泛日及分秒。上

考者中，积内加所求闰余，减交应，满交终，去之，不尽，以减交终，余如上。

求次朔望入交

置天正经朔入交泛日及分秒，以交望累加之，满交终日，去之，即为次朔望入交泛日及分秒。

求定朔望及每日夜半入交

各置入交泛日及分秒，减去经朔望小余，即为定朔望夜半入交。若定日有增损者，亦如之。否则因经为定，大月加二日，小月加一日，余皆加七千八百七十七分七十六秒，即次朔夜半入交。累加一日，满交终日，去之，即每日夜半入交泛日及分秒。

求定朔望加时入交

置经朔望入交泛日及分秒，以定朔望加减差加减之，即定朔望加时入交日及分秒。

求交常交定度

置经朔望入交泛日及分秒，以月平行度乘之，为交常度。以盈缩差盈加缩减之，为交定度。

求日月食甚定分

日食：视定朔分在半月周已下，去减半周，为中前。已上，减去半周，为中后。与半周相减、相乘，退二位，如九

十六而一，为时差。中前以减，中后以加，皆加减小朔分，为食甚定分。以中前后分各加时差，为距午定分。

月食：视定望分在日周四分之一已下，为卯前。已上，覆减半周，为卯后。在四分之三已下，减去半周，为酉前。已上，覆减日周，为酉后。以卯酉前后分自乘，退二位，如四百七十八而一，为时差。子前以减，子后以加，皆加减小望分，为食甚定分。各依发敛求之，即食甚辰刻。

求日月食甚入盈缩历及日行定度

置经朔望入盈朔历日及分，以食甚日及定分加之，以经朔望日及分减之，即为食甚入盈缩历。依日躔术求盈缩差，盈加、缩减之，为食甚入盈缩历定度。

求南北差

视日食甚入盈缩历定度，在象限已下，为初限。已上用减半岁周，为末限。以初末限度自相乘，如一千八百七十而一，为度，不满，退除为分秒。用减四度四十六分，余为南北泛差。以距午定分乘之，以半昼分除之，所得，以减泛差，为定差。泛差不及减者，反减之，为定差，应加者减之，应减者加之。在盈初缩末者，交前阴历减，阳历加，交后阴历加，阳历减。在缩初盈末者，交前阴历加，阳历减，交后阴历减，阳历加。

求东西差

视日食甚入盈缩历定度，与半岁周相减相乘，如一千八

百七十而一，为度，不满，退除为分秒，为东西泛差。以距午定分乘之，以日周四分之一除之，为定差。若在泛差已上者，倍泛差减之，余为定差，依其加减。在盈中前者，交前阴历减，阳历加。交后阴历加，阳历减。中后者，交前阴历加，阳历减。交后阴历减，阳历加。在缩中前者，交前阴历加，阳历减。交后阴历减，阳历加。中后者，交前阴历减，阳历加。交后阴历加，阳历减。

求日食正交中交限度

置正交、中交度，以南北东西差加减之，为正交、中交限度及分秒。

求日食入阴阳历去交前后度

视交定度，在中交限已下，以减中交限，为阳历交前度。已上，减去中交限，为阴历交后度。在正交限已下，以减正交限，为阴历交前度。已上，减去正交限，为阳历交后度。

求月食入阴阳历去交前后度

视交定度，在交中度已下，为阳历。已上，减法交中，为阴历。视入阴阳历，在后准十五度半已下，为交后度。前准一百六十六度三十九分六十八秒已上，覆减交中，余为交前度及分。

求日食分秒

视去交前后度，各减阴阳历食限，不及减者不食。余如

定法而一，各为日食之分秒。

求月食秒。

视去交前后度，不用南北东西差者。用减食限，不及减者不食。余如定法而一，为月食之分秒。

求日食定用及三限辰刻

置日食分秒，与二十分相减、相乘、平方开之，所得，以五千七百四十乘之，如入定限行度而一，为定用分。以减食甚定分，为初亏。加食甚定分，为复圆。依发敛求之，为日食三限辰刻。

求月食定用及三限五限辰刻

置月食分秒，与三十分相减、相乘、平方开之，所得，以五千七百四十乘之，如入定限行度而一，为定用分。以减食甚定分，为初亏。加食甚定分，为复圆。依发敛求之，即月食三限辰刻

月食既者，以既内分与一十分相减、相乘、平方开之，所得，以五千七百四十乘之，如入定限行度而一，为既内分。用减定用分，为既外分。以定用分减食甚定分，为初亏。加既外，为食既。又加既内，为食甚。再加既内，为生光。复加既外，为复圆。依发敛求之，即月食五限辰刻。

求月食入更点

置食甚所入日晨分，倍之，五约，为更法。又五约更法，为点法。乃置初末诸分，昏分已上，减去昏分，晨分已下，加晨分，在更法除之，为更数。不满，以点法收之，为点数。其更点数，命初更初点算外，各得所入更点。

求日食所起

食在阳历，初起西南，甚于正南，复于东南。食在阴历，初起西北，甚于正北，复于东北。食八分已上，初起正西，复于正东。此据午地而论之。

求月食所起

食在阳历，初起东北，甚于正北，复于西北。食在阴历，初起东南，甚于正南，复于西南。食八分已上，初起正东，复于正西。此亦据午地而论之。

求日月出入带食所见分数

视其日月出入分，在初亏已上，食甚已下者，为带食。各以食甚分与日出入分相减，余为带食差。以乘所食之分，满定用分而一，如月食即者，以既内分减带食差，余进一位，如既外分而一，所得以减既分，即月带食出入所见之分。不及减者，为带食既出入。以减所食分，即日月出入带食所见之分。其食甚在昼，晨为渐进，昏为已退。其食甚在夜，晨为已退，昏为渐进。

求日月食甚宿次

置日月食甚入盈缩历定度，在盈，便为定积。在缩，加半岁周，为定积。望即更加半周天度。以天正冬至加时黄道日度，加而命之，各得日月食甚宿次及分秒。

步五星第七

历度

三百六十五度二十五分七十五秒。

历中

一百八十二度六十二分八十七秒半。

历策

一十五度二十一分九十秒六十二微半。

木星

周率，三百九十八万八千八百分。

周日，三百九十八日八十八分。

历率，四千三百三十一万二千九百六十四分八十六秒半。

度率，一十一万八千五百八十二分。

合应，一百一十七万九千七百二十六分。

历应，一千八百九十九万九千四百八十一分。

盈缩立差，二百三十六加。

平差，二万五千九百一十二减。

定差，一千八十九万七千。

伏见，一十三度。

火星

周率，七百七十九万九千二百九十分。

周日，七百七十九日九十二分九十秒。

历率，六百八十六万九千五百八十分四十三秒。

度率，一万八千八百七分半。

合应，五十六万七千五百四十五分。

历应，五百四十七万二千九百三十八分。

盈初缩末立差，十千一百三十五减。

平差，八十三万一千一百八十九减。

定差，八千八百四十七万八千四百。

缩初盈末立差，八百五十一加。

平差，三万二百三十五负减。

定差，二千九百九十七万六千三百。

伏见，一十九度。

土星

周率，三百七十八万九百一十六分。

周日，三百七十八日九分一十六秒。

历率，一亿七百四十七万八千八百四十五分一十六秒。

度率，二十九万四千二百五十五分。

合应，一十七万五千六百四十三分。

历应，五千二百二十四万五百六十一分。

盈立差，二百八十三加。

平差，四万一千二十二减。

定差，一千五百一十四万六千一百。

缩立差，三百三十一加。

平差，一万五千一百二十六减。

定差，一千一百一万七千五百。

伏见，一十八度。

金星

周率，五百八十三万九千二十六分。

周日，五百八十三日九十分二十六秒。

历率，三百六十五万二千五百七十五分。

度率，一万。

合应，五百七十一万六千三百三十分。

历应，一十一万九千六百三十九分。

盈缩立差，一百四十一加。

平差，三减。

定差，三百五十一万五千五百。

伏见，一十度半。

水星

周率，一百一十五万八千七百六十分。

周日，一百一十五日八十七分六十秒。

历率，三百六十五万二千五百七十五分。

度率，一万。

合应，七十万四百三十七分。

历应，二百五万五千一百六十一分。

盈缩立差，一百四十一加。

平差，二千一百六十五减。

定差，三百八十七万七千。

晨伏夕见，一十六度半。

夕伏晨见，一十九度。

推天正冬至后五星平合及诸段中积中星

置中积，加合应，以其星周率去之，不尽，为前合。复减周率，余为后合。以日周约之，得其星天正冬至后平合中

积中星。命为日，曰中积。命为度，曰中星。以段日累加中积，即诸段中积。以度累加中星，经退则减之，即为诸段中星。上考者，中积内减合应，满周率去之，不尽，便为所求后合分。

推五星平合及诸段入历

各置中积，加历应及所求后合分，满历率，去之，不尽，如度率而一为度，不满，退除为分秒，即其星平合入历度及分秒。以诸段限度累加之，即诸段入历。上考者，中积内减历应，满历率去之，不尽，反减历率，余加其年后合，余同上。

求盈朔差

置入历度及分秒，在历中已下，为盈。已上，减去历中，余为缩。视盈缩历，在九十一度三十一分四十三秒太已下，为初限。已上，用减历中，余为末限。

其火星，盈历在六十度八十七分六十二秒半已下，为初限。已上，用减历中，余为末限。缩历在一百二十一度七十五分二十五秒已下，为初限。已上，用减历中余为末限。

置各星立差，以初末限乘之，去加减平差，得数又以初末限乘之，去加减定差，再以初末限乘之，满亿为度，不满退除为分秒，即所求盈缩差。

又术：置盈缩历，以历策除之，为策数，不尽为策余。以其下损益率乘之，历策除之，所得，益加损减其下盈缩积，亦为所求盈缩差。

求平合诸段定积

各置其星其段中积，以其盈缩差盈加缩减之，即其段定积日及分秒。以天正冬至日分加之，满纪法去之，不满命甲子算外，即得日辰。

求平合及诸段所在月日

各置其段定积，以天正闰日及分加之，满朔策，除之为月数，不尽，为入月已来日数及分秒。其月数，命天正十一月算外，即其段入月经朔日数及分秒。以日辰相距，为所在定月日。

求合平及诸段加时定星

各置其段中星，以盈缩差盈加缩减之，金星倍之，水星三之。即诸段定星。以天正冬至加时黄道日度加而命之，即其星其段加时所在宿度及分秒。

求诸段初日晨前夜半定星

各以其段初行率，乘其段加时分，百约之，乃顺减退加其日加时定星，即其段初日晨前夜半定星。加命如前，即得所求。

求诸段日率度率

各以其段日辰距后段日辰为日率，以其段夜半宿次与后段夜半宿次相减，余为度率。

求诸段平行分

各置其段度率，以其段日率除之，即其段平行度及分秒。

求诸段增减差及日差

以本段前后平行分相减，为其段泛差。倍而退位，为增减差。以加减其段平行分，为初末日行分。前多后少者，加为初，减为末。前少后多者，减为初，加为末。倍增减差，为总差。以日率减之，除之，为日差。

求前后伏迟退段增减差

前伏者，置后段初日行分。加其日差之半，为末日行分。后伏者，置前段末日行分，加其日差之半，为初日行分。以减伏段平行分，余为增减差。

前迟者，置前段末日行分，倍其日差，减之，为初日行分。

后迟者，置后段初日行分，倍其日差，减之，为末日行分，以迟段平行分减之，余为增减差。前后近留之迟段。

木火土三星，退行者，六因平行分，退一位，为增减差。

金星，前后退伏者，三因平行分，半而退位，为增减差。

前退者，置后段初日行分，以其日差减之，为末日行分。

后退者，置前段末日行分，以其日差减之，为初日行分。乃以本段平行分减之，余为增减差。

水星，退行者，半平行分，为增减差。皆以增减差加减平行分，为初末日行分。前多后少者，加为初，减为末。前少后多者，减为初，加为末。又倍增减差，为总差。以日率减一，除之，为日差。

求每日晨前夜半星行宿次。

各置其段初日行分，以日差累损益之，后少则损之，后多则益之，为每日行度及分秒。乃顺加退减，满宿次去之，即每日晨前夜半星行宿次。

求五星平合见伏入盈缩历

置其星其段定积日及分秒，若满岁周日及分秒，去之，余在次年天正冬至后。如在半岁周已下，为入盈历。满半岁周，去之，为入缩历。各在初限已下，为初限。已上，反减半岁周，余为末限。即得五星平合见伏入盈缩历日及分秒。

求五星平合见伏行差

各以其星其段初日星行分，与其段初日太阳行分相减，余为行差。若金、水二星退行在退合者，以其段初日星行分，并其段初日太阳行分，为行差。内水星夕伏晨见者，直以其段初日太阳行分为行差。

求五星定合定见定伏泛积

木、火、土三星，以平合晨见夕伏定积日，便为定合伏见泛积日及分秒。

金、水二星，置其段盈缩差度及分秒，水星倍之。各以其段行差除之，为日，不满，退除为分秒。在平合夕见晨伏者，盈减、缩加。在退合夕伏晨见者，盈加、缩减。各以加减定积为定合伏见泛积日及分秒。

求五星定合定积定星

木、火、土三星，各以平合行差除其段初日太阳盈缩积，为距合差日。不满，退除为分秒，以太阳盈缩积减之，为距合差度。各置其星定合泛积，以距合差日盈减缩加之，为其星定合定积日及分秒。以距合差度盈减缩加之，为其星定合定星度及分秒。

金、水二星，顺合退合者，各以平合退合行差，除其日太阳盈缩积，为距合差日。不满，退除为分秒，顺加退减太阳盈缩积，为距合差度。顺合者，盈加缩减其星定合泛积，为其星定合定积日及分秒。退合者，以距合差日盈加缩减、距合差度盈加缩减其星退定合泛积，为其星退定合定积日及分秒。命之，为退定合定星度及分秒。以天正冬至日及分秒，加其星定合积日及分秒，满旬周，去之，命甲子算外即得定合日辰及分秒。以天正冬至加时黄道日度及分秒，加其星定合定星度及分秒，满黄道宿次，去之，即得定合所躔黄道宿度及分秒。径求五星合伏定日：木、火、土三星，以夜半黄道日度，减其星夜半黄道宿次，余在其日太阳行分已下，为其日伏合。金、木二星，以其星夜半黄道宿次，减夜半黄道日度，余在其日金、水二星行分已下者，为其日伏合。金、水二星伏退合者，视其日太阳夜半黄道宿次，未行到金、水二星宿次，又视次日太阳行过金、水二星宿次，金、水二星退行过太阳宿次，为其日定合伏退定日。

求木火土三星定见伏定积日

各置其星定见定伏泛积日及分秒，晨加夕减九十一日三

十一分六秒，如在半岁周已下，自相乘，已上，反减岁周，余亦自相乘，满七十五，除之为分，满百为度，不满，退除为秒；以其星见伏度乘之，一十五除之；所得，以其段行差除之，为日，不满，退除为分秒；见加伏减泛积，为其星定见伏定积日及分秒；加命如前，即得定见定伏日辰及分积。

求金水二星定见伏定积日

各以伏见日行差，除其段初日太阳盈缩积，为日，不满，退除为分秒；若夕见晨伏，盈加缩减；晨见夕伏，盈减缩加；以加减其星定见定伏泛积日及分秒，为常积。如在半岁周已下，为冬至后；已上，去之，余为夏至后。各在九十一日三十一分六秒已下，自相乘；已上，反减半岁周，亦自相乘。冬至后晨，夏至后夕，一十八而一，为分；冬至后夕，夏至后晨，七十五而一，为分；以其星见伏度乘之，一十五除之；所得，满行差，除之，为日，不满，退除为分秒，加减常积，为定积。在晨见夕伏者，冬至后加之，夏至后减之；夕见晨伏者，冬至后减之，夏至后加之；为其星定见定伏定积日及分秒；加命如前，即得定见定伏日晨及分秒。

卷三十一

志第五

历 五

授时历议上 验 气

天道运行，如环无端，治历者必就阴消阳息之际，以为立法之始。阴阳消息之机，何从而见之？惟候其日晷进退，则其机将无所遁。候之之法，不过植表测景，以究其气至之始。智作能述，前代诸人为法略备。苟能精思密索，心与理会；则前人述作之外，未必无所增益。

旧法择地平衍，设水准绳墨，植表其中，以度其中晷。然表短促，尺寸之下为分秒大、半、少之数，未易分别。表长，则分寸稍长，所不便者，景虚而淡，难得实景。前人欲就虚景之中改求真实，或设望筒，或置小表，或以木为规，皆取表端日光下彻圭面。今以铜为表，高三十六尺，端挟以二龙，举一横梁，下至圭面，共四十尺，是为八尺之表五。圭表刻为尺寸，旧寸一，今申而为五，厘毫差易分。别创为景符，以取实景。其制以铜叶，博二寸，长加博之二，中穿一窍，若针芥然，以方闾为趺，一端设为机轴，令可开阖，楮其一端，使其势斜倚，北高南下，往来迁就于虚景之中，窍达日光，仅

如米许，隐然见横梁于其中。旧法以表端测晷，所得者日体上边之景，今以横梁取之，实得中景，不容有毫末之差。

地中八尺表景，冬至长一丈三尺有奇，夏至尺有五寸。今京师长表，冬至之景，七丈九尺八寸有奇，在八尺表则一丈五尺九寸六分；夏至之景，一丈一尺七寸有奇，在八尺表则二尺三寸四分。虽晷景长短所在不同，而其景长为冬至，景短为夏至，则一也。惟是气至时刻考求不易。盖至日气正，则一岁气节从而正矣。刘宋祖冲之尝取至前后二十三四日间晷景，折取其中，定为冬至，且以日差比课，推定时刻。宋皇祐间，周琮即取立冬、立春二日之景，以为去至既远，日差颇多，易为推考。《纪元》以后诸历，为法加详，大抵不出冲之之法。新历积日累月，实测中晷，自远日以及近日，取前后日率相埒者，参考同异，初非偏取一二日之景，以取数多者为定，实减《大明历》一十九刻二十分。仍以累岁实测中晷日差分寸，定拟二至时刻于后。

推至元十四年丁丑岁冬至

其年十一月十四日己亥，景长七丈九尺四寸八分五厘五毫。至二十一日丙午，景长七丈九尺五寸四分一厘。二十二日丁未，景长七丈九尺四寸五分五厘。以己亥、丁未二日之景相校，余三分五厘为晷差，进二位；以丙午、丁未二日之景相校，余八分六厘为法；除之，得三十五刻，用减相距日八百刻，余七百六十五刻；折取其中，加半日刻，共为四百三十二刻半；百约为日，得四日；余以十二乘之，百约为时，得三时，满五十又作一时，共得四时；余以十二收之，得三

刻；命初起距日己亥算外，得癸卯日辰初三刻为丁丑岁冬至。此取至前后四日景。

十一月初九日甲午，景七丈八尺六寸三分五厘五毫。至二十六日辛亥，景七丈八尺七寸九分三厘五毫。二十七日壬子，景七丈八尺五寸五分。以甲午、壬子景相减，复以辛亥，壬子景相减，准前法求之，亦得癸卯日辰初三刻。至二十八日癸丑，景七丈八尺三寸四厘五毫，用壬子、癸丑二日之景与甲午景，准前法求之，亦合。此取至前后八九日景。

十一月丙戌朔，景七丈五尺九寸八分六厘五毫。二日丁亥，景七丈六尺三寸七分七厘。至十二月初六日庚申，景七丈五尺八寸五分一厘。准前法求之，亦在辰初三刻。此取至前后一十七日景。

十一月二十一日丙午，景七丈九寸七分一厘。至十二月十六日庚午，景七丈七寸六分。十七日辛未，景七丈一寸五分六厘五毫。准前法求之，亦得辰初三刻。此取至前后二十七日景。

六月初五日癸亥，景一丈三尺八分。距十五年五月癸未朔，景一丈三尺三分八厘五毫。初二日甲申，景一丈二尺九寸二分五毫。准前法求之，亦合。此取至前后一百六十日景。

推十五年戊寅岁夏至

五月十九日辛丑，景一丈一尺七寸七分七厘五毫。距二十八日庚戌景，一丈一尺七寸八分。二十九日辛亥景，一丈一尺八寸五厘五毫。用辛丑、庚戌二日之景相减，余二厘五毫，进二位为实。复用庚戌、辛亥景相减，余二分五厘五毫

为法。除之，得九刻，用减相距日九百刻，余八百九十一刻。半之，加半日刻，百约，得四日。余以十二乘之，百约，得十一时，余以十二收为刻，得三刻。命初起距日辛丑算外，得乙巳日亥正三刻夏至。此取至前后四日景。

十四年十二月十五日己巳，景七丈一尺三寸四分三厘。距十五年十一月初二日辛巳，景七丈七寸五分九厘五毫。初三日壬午，景七丈一尺四寸六厘。用己巳、壬午景相减，以辛巳、壬午景相减，除之，亦合。此用至前后一百五十六日景。

十四年十二月十二日丙寅，景七丈二尺九寸七分二厘五毫。十三日丁卯，景七丈二尺四寸五分四厘五毫。十四日戊辰，景七丈一尺九寸九厘。距十五年十一月初四日癸未，景七丈一尺九寸五分七厘五毫。初五日甲申，景七丈二尺五寸五厘。初六日乙酉，景七丈三尺三分三厘五毫。前后互取，所得时刻皆合。此取至前后一百五十八九日景。

十四年十二月初七日辛酉，景七丈五尺四寸一分七厘。初八日壬戌，景七丈四尺九寸五分九厘五毫。初九日癸亥，景七丈四尺四寸八分六厘。距十五年十一月初九日戊子，景七丈四尺五寸二分五毫。初十日己丑，景七丈五尺三厘五毫。十一日庚寅，景七丈五尺四寸四分九厘五毫。以壬戌、己丑景相减为实，以辛酉、壬戌景相减为法，除之。或以壬戌、癸亥景相减，或以戊子、己丑景相减，若己丑、庚寅景相减，推前法求之，皆合。此取至前后一百六十三四日景。

推十五年戊寅岁冬至

其年十一月十九日戊戌，景七丈八尺三寸一分八厘五毫。

距闰十一月初九日戊午，景七丈八尺二寸六分三厘五毫。初十日己未，景七丈八尺八分二厘五毫，用戊戌、戊午二日景相减，余四分五厘为晷差，进二位，以戊午、己未景相减，余二寸八分一厘为法，除之，得一十六刻，加相距日二千刻，半之，加半日刻，百约，得十日；余以十二乘之，百约为时，满五十又进一时，共得七时；余以十二收为刻，命初起距日己亥算外，得戊申日未初三刻为戊寅岁冬至。此取至前后十日景。

十一月十二日辛卯，景七丈五尺八寸八分一厘五毫。十三日壬辰，景七丈六尺三寸一厘五毫。闰十一月十五日甲子，景七丈六尺三寸六分六厘五毫。十六日乙丑，景七丈五尺九寸五分三厘。十七日丙寅，景七丈五尺五寸四厘五毫。用壬辰、甲子景相减为实，以辛卯、壬辰景相减为法，除之，亦得戊申日未初三刻。或用甲子、乙丑景相减，推之，亦合。若用辛卯、乙丑景相减为实，用乙丑、丙寅景相减，除之，并同。此取至前后十六七日景。

十一月初八日丁亥，景七丈四尺三分七厘五毫。闰十一月二十日己巳，景七丈四尺一寸二分。二十一日庚午，景七丈三尺六寸一分四厘五毫。用丁亥、己巳景相减为实，以己巳、庚午景相减，除之，亦同。此取至前后二十一日景。

六月二十六日戊寅，景一丈四尺四寸五分二厘五毫。二十七日己卯，景一丈四尺六寸三分八厘。至十六四月初二日戊寅，景一丈四尺四寸八分一厘。以二戊寅景相减，用后戊寅、己卯景相减，推之，亦同。此取至前后一百五十日景。

五月二十八日庚戌，景一丈一尺七寸八分。至十六年四

月二十九日乙巳，景一丈一尺八寸六分三厘。三十日丙午，景一丈一尺七寸八分三厘。用庚戌、丙午景相减，以乙巳、丙午景相减，推之，亦同。此取至前后一百七十八日景。

推十六年己卯岁夏至。

四月十九日乙未，景一丈二尺三寸六分九厘五毫。二十日丙申，景一丈二尺二寸九分三厘五毫。至五月十九乙丑，景一丈二尺二寸六分四厘。以丙申、乙丑景相减，余二分九厘五毫为晷差，进二位；以乙未、丙申景相减，得七分六厘为法；除之，得三十八刻；加相距日二千九百刻，半之，加半日刻，百约，得十五日；余以十二乘之，百约，得二时；余以十二收之，得二刻；命初起距日丙申算外，得辛亥日寅正二刻为夏至。此取至前后十五日景。

三月二十一日戊辰，景一丈六尺三寸九分五毫。六月十六日壬辰，景一丈六尺九分九厘五毫。十七日癸巳，景一丈六尺三寸一分一厘。用戊辰、癸巳景相减，以壬辰、癸巳景相减，准前法推之，亦合。此取至前后四十二日景。

三月初二日己酉，景二丈一尺三寸五厘。至七月初七日壬子，景二丈一尺一寸九分五厘五毫。初八日癸丑，景二丈一尺四寸八分六厘五毫。用己酉、壬子景相减，以壬子、癸丑景相减，如前法推之，亦合。此取至前后六十一二日景。

三月戊申朔，景二丈一尺六寸一分一厘。至七月初八日癸丑，景二丈一尺四寸八分六厘五毫。初九日甲寅，景二丈一尺九寸一分五厘五毫。用戊申、癸丑景相减，以癸丑、甲寅景相减，准前法推之，亦同。此取至前后六十二三日景。

二月十八日乙未，景二丈六尺三分四厘五毫。至七月二十一日丙寅，景二丈五尺八寸九分九厘。二十二日丁卯，景二丈六尺二寸五分九厘。用乙未、丙寅景相减，以丙寅、丁卯景相减，如前法推之，亦同。此取至前后七十五六日景。

二月三日庚辰，景三丈二尺一寸九分五厘五毫。至八月初五日庚辰，景三丈一尺五寸九分六厘五毫。初六日辛巳，景三丈二尺二分六厘五毫。用前庚辰与辛巳景相减，以后庚辰、辛巳景相减，如前推之，亦同。此取至前后九十日景。

正月十九日丁卯，景三丈八尺五寸一厘五毫。至八月十八日癸巳，景三丈七尺八寸二分三厘。十九日甲午，景三丈八尺三寸一分五毫。用丁卯、甲午景相减，以癸巳、甲午景相校，如前推之，亦同。此取至前后一百三四日景。

推十六年己卯岁冬至

十月二十四日戊戌，景七丈六尺七寸四分。至十一月二十五日己巳，景七丈六尺五寸八分。二十六日庚午，景七丈六尺一寸四分二厘五毫。用戊戌、己巳景相减，余一寸六分为晷差，进二位；以己巳、庚午景相减，余四寸三分七厘五毫为法；除之，得三十六刻；以相减距日三千一百刻，余三千六十四刻；半之，加五十刻，百约，得一十五日；余以十二乘之，百约，为时满五十，又进一时，共得十时；余以十二收之为刻，得二刻；命初起距日戊戌算外，得癸丑日戌初二刻冬至。此取至前后十五六日景。

十月十八日壬辰，景七丈四尺五分二厘五毫。十九日癸巳，景七丈四尺五寸四分五厘。二十日甲午，景七丈五尺二

分五厘。至十一月二十八日壬申，景七丈五尺三寸二分。二十九日癸酉，景七丈四尺八寸五分二厘五毫。十二月甲戌朔，景七丈四尺三寸六分五厘。初二日乙亥，景七丈三尺八寸七分一厘五毫。用甲午、癸酉景相减，癸巳、甲午景相减，如前推之，亦同。若以壬申、癸酉景相减为法，推之亦同。此取至前后十八九日景。

若用癸巳与甲戌景相减，以壬辰、癸巳景相减，推之；或癸巳、甲午景相减，推之；或用甲、戌癸酉景相减，推之；或甲戌、乙亥景相减，推之；或以壬辰、乙亥景相减，用壬辰、癸巳景相减，推之，并同。此取至前后二十日景。

十月十六日庚寅，景七丈三尺一分五厘。十二月初三日丙子，景七丈三尺三寸二分。初四日丁丑，景七丈二尺八寸四分二厘五毫。用庚寅、丁丑景相减，以丙子、丁丑景相减，推之，亦同。此取至前后二十三日景。

十月十四日戊子，景七丈一尺九寸二分二厘五毫。十五日己丑，景七丈二尺四寸六分九厘。十二月初五日戊寅，景七丈二尺二寸七分二厘五毫。用己丑、戊寅景相减，以戊子、己丑景相减，推之，或用己丑、庚寅相减，推之，亦同。此取至前后二十四日景。

十月初七日辛巳，景六丈七尺七寸四分五厘。初八日壬午，景六丈八尺三寸七分二厘五毫。初九日癸未，景六丈八尺九寸七分七厘五毫。十二月十二日乙酉，景六丈八尺一寸四分五厘。用壬午、乙酉景相减，以辛巳、壬午相减，推之，壬午、癸未景相减，推之，亦同。此取至前后三十一日二景。

十月乙亥朔，景六丈三尺八寸七分。十二月十八日辛卯，

景六丈四尺二寸九分七厘五毫。十九日壬辰，景六丈三尺六寸二分五厘，用乙亥、壬辰景相减，以辛卯、壬辰景相减，推之，亦同。此取至前后三十八日景。

九月二十二日丙寅，景五丈七尺八寸二分五厘。十二月二十八日辛丑，景五丈七尺五寸八分。二十九日壬寅，景五丈六尺九寸一分五厘。用丙寅、辛丑景相减，以辛丑、壬寅景相减，推之，亦同。此取至前后四十七八日景。

九月二十日甲子，景五丈六尺四寸九分二厘五毫。至十二月二十九日壬寅，景五丈六尺九寸一分五厘。至十七年正月癸卯朔，景五丈六尺二寸五分。用甲子、癸卯相减，壬寅、癸卯景相减，推之，亦同。此取至前后五十日景。

右以累年推测到冬夏二至时刻为准，定拟至元十八年辛巳岁前冬至，当在己未日夜半后六刻，即丑初一刻。

岁余岁差

周天之度，周岁之日，皆三百六十有五。全策之外，又有奇分，大率皆四分之一。自今岁冬至距来岁冬至，历三百六十五日，而日行一周，凡四周，历千四百六十，则余一日，折而四之，则四分之一也。然天之分常有余，岁之分常不足，其数有不能齐者，惟其所差至微，前人初未觉知。迨汉末刘洪，始觉冬至后天，谓岁周余分太强，乃作《乾象历》，减岁余分二千五百为二千四百六十二。至晋虞喜，宋何承天、祖冲之，谓岁当有差，因立岁差之法。其法损岁余，益天周，使岁余浸弱，天周浸强，强弱相减，因得日躔岁退之差。岁余、天周，二者实相为用，岁差由斯而立，日躔由斯而得，一或

损益失当，讵能与天叶哉？

今自刘宋大明壬寅以来，凡测景验气得冬至时刻真数者有六，取相距积日时刻，以相距之年除之，各得其时所用岁余。复自大明壬寅距至元戊寅积日时刻，以相距之年除之，得每岁三百六十五日二十四分二十五秒，比《大明历》减去一十一秒，定为方今所用岁余。余七十五秒，用益所谓四分之一，共为三百六十五度二十五分七十五秒，定为天周。余分强弱相减，余一分五十秒，用除全度，得六十六年有奇，日却一度，以六十六年除全度，适得一分五十秒，定为岁差。

复以《尧典》中星考之，其时冬至日在女、虚之交。及考之前史，汉元和二年，冬至日在斗二十一度；晋太元九年，退在斗十七度；宋元嘉十年，在斗十四度末；梁大同十年，在斗十二度；隋开皇十八年，犹在斗十二度；唐开元十二年，在斗九度半；今退在箕十度。取其距今之年、距今之度较之，多者七十余年，少者不下五十年，辄差一度。宋庆元间，改《统天历》，取《大衍》岁差率八十二年及开元所距之差五十五年，折取其中，得六十七年，为日却行一度之差。施之今日，质诸天道，实为密近。

然古今历法，合于今，必不能通于古；密于古，必不能验于今。今《授时历》，以之考古，则增岁余，而损岁差；以之推来，则增岁差，而损岁余；上推春秋以来冬至，往往皆合；下求方来，可以永久而无弊；非止密于今日而已。仍以《大衍》等六历，考验春秋以来冬至疏密，凡四十九事，具列如后：

冬至刻

《大衍》 《宣明》 《纪元》 《统天》 《大明》
《授时》

献公十五年戊寅岁，正月甲寅朔旦冬至：

丙辰二十二乙卯八十八丁巳三十三乙卯二丁巳三十五

甲寅九十九

僖公五年丙寅岁，正月辛亥朔旦冬至：

辛亥九十四辛亥六十六壬子七十四辛亥二十七壬子八十九
辛亥十四

昭公二十年己卯岁，正月己丑朔旦冬至：

己丑四十五己丑二十庚寅二十五戊子九十二庚寅二十九
戊子八十三

宋元嘉十二年乙亥岁，十一月十五日戊辰景长：

戊辰三十五戊辰三十二戊辰三十九戊辰五十一戊辰四十一
戊辰四十七

元嘉十三年丙子岁，十一月二十六日甲戌景长：

癸酉五十九癸酉五十七癸酉六十三癸酉七十五癸酉六十五癸
酉七十一

元嘉十五年戊寅岁，十一月十八日甲申景长：

甲申八甲申六甲申十二甲申二十四甲申十四甲申十九

元嘉十六年己卯岁，十月二十九日己丑景长：

己丑三十三己丑三十己丑三十七己丑四十八己丑三十七己丑四十
四

元嘉十七年庚辰岁，十一月初十日甲午景长：

甲午五十七甲午五十五甲午六十一甲午七十二甲午六十三甲
午六十八

元嘉十八年辛巳岁，十一月二十一日己亥景长：

己亥八十二己亥七十九己亥八十五己亥九十七己亥八十七己亥九十三

元嘉十九年壬午岁，十一月初三日乙巳景长：

乙巳六乙巳四乙巳十乙巳二十一乙巳一十一乙巳一十七

大明五年辛丑岁，十一月乙酉冬至：

甲申七十甲申六十八甲申七十二甲申八十九甲申七十四甲申七十九

陈天嘉六年乙酉岁，十一月庚寅景长：

庚寅十二庚寅十三庚寅五庚寅二十四庚寅八庚寅十七

光大二年戊子岁，十一月乙巳景长：

乙巳八十乙巳八十六乙巳七十九乙巳九十七乙巳八十一乙巳九十

太建四年壬辰岁，十一月二十九日丁卯景长：

丙寅八十三丙寅七十八丙寅七十七丙寅九十五丙寅九十八丙寅八十七

太建六年甲午岁，十一月二十日丁丑景长：

丁丑三十二丁丑三十三丁丑二十五丁丑四十三丁丑二十七丁丑三十六

太建九年丁酉岁，十一月二十三日壬辰景长：

癸巳四癸巳六壬辰九十九癸巳十六癸巳空癸巳八

太建十年戊戌岁，十一月五日戊戌景长：

戊戌三十戊戌三十戊戌二十三戊戌四十戊戌二十四戊戌三十三

隋开皇四年甲辰岁，十一月十一日己巳景长：

己巳七十七己巳七十八己巳六十九己巳八十六己巳七十一己巳八十六

开皇五年乙巳岁，十一月二十二日乙亥景长：

乙亥一乙亥二甲戌九十二乙亥十一甲戌五十五乙亥一十

开皇六年丙午岁，十一月三日庚辰景长：

庚辰二十五庚辰二十六庚辰十八庚辰三十四庚辰十九庚辰三十四

开皇七年丁未岁，十一月十四日乙酉景长：

乙酉五十乙酉五十乙酉四十二乙酉五十九乙酉四十四乙酉五十九

开皇十一年辛亥岁，十一月二十八日丙午景长：

丙午四十八丙午四十九丙午四十三丙午五十七丙午四十一丙午五十六

开皇十四年甲寅岁，十一月辛酉朔旦冬至：

壬戌二十一壬戌二十二壬戌十二壬戌二十壬戌十四壬戌二十九

唐贞观十八年甲辰岁，十一月乙酉景长：

甲申四十三甲申四十五甲申三十一甲申五十甲申三十二甲申四十四

贞观二十三年己酉岁，十一月辛亥景长：

庚戌六十五庚戌六十八庚戌五十二庚戌七十二庚戌五十四庚戌六十六

龙朔二年壬戌岁，十一月四日己未至戊午景长：

戊午八十三戊午八十六戊午六十九戊午八十五戊午七十一戊午八十二

仪凤元年丙子岁，十一月壬申景长：

壬申二十五壬申二十八壬申十二壬申二十八壬申二十壬申二十二

永淳元年壬午岁，十一月癸卯景长：

癸卯七十二癸卯七十五癸卯五十七癸卯七十六癸卯五十八癸卯六十八

开元十年壬戌岁，十一月癸酉景长：

癸酉四十九癸酉五十四癸酉三十一癸酉五十癸酉三十二癸酉四十六

开元十一年癸亥岁，十一月戊寅景长：

戊寅七十四戊寅七十八戊寅五十五戊寅七十四戊寅五十六戊寅七十

开元十二年甲子岁，十一月癸未冬至：

癸未九十八甲申三癸未八十癸未九十九癸未八十一癸未九十五

宋景德四年丁未岁，十一月戊辰日南至：

戊辰十五戊辰二十六丁卯七十四丁卯八十二丁卯七十四丁卯八十

皇祐二年庚寅岁，十一月三十日癸丑景长：

癸丑六十五癸丑七十九癸丑二十二癸丑二十五癸丑二十二癸丑二十三

元丰六年癸亥岁，十一月丙午景长：

丙午七十三丙午八十五丙午二十六丙午二十六丙午二十七丙午二十六

元丰七年甲子岁，十一月辛亥景长：

辛亥九十七壬子一十辛亥五十辛亥五十一辛亥五十辛亥五十一

元祐三年戊辰岁，十一月壬申景长：

壬申九十四癸酉八壬申四十八壬申四十八壬申四十八壬申四十八

元祐四年己巳岁，十一月丁丑景长：

戊寅十九戊寅三十二丁丑七十二丁丑七十二丁丑七十二丁丑七十二

元祐五年庚午岁，十一月壬午冬至：

癸未四十四癸未五十六壬午九十六壬午九十七壬午九十六壬午九十六

元祐七年壬申岁，十一月癸巳冬至：

癸巳九十二甲午五癸巳四十五癸巳四十五癸巳四十五癸巳四十五

元符元年戊寅岁，十一月甲子冬至：

乙丑三十九乙丑五十二甲子九十一甲子九十一甲子九十一甲子九十一

崇宁三年甲申岁，十一月丙申冬至：

丙申八十六丙申九十九丙申三十七丙申三十六丙申三十七丙申三十七

绍熙二年辛亥岁，十一月壬申冬至：

癸酉十二癸酉二十七壬申五十七壬申四十七壬申五十七壬申四十六

庆元三年丁巳岁，十一月癸卯日南至：

甲辰五十九甲辰七十四甲辰三癸卯九十二甲辰三癸卯九十二

嘉泰三年癸亥岁，十一月甲戌日南至：

丙子五丙子二十一乙亥四十九乙亥三十七乙亥四十九乙亥三十七

嘉定五年壬申岁，十一月壬戌日南至：

癸亥二十五癸亥四十一壬戌六十九壬戌五十六壬戌六十八壬戌五十六

绍定三年庚寅岁，十一月丙申日南至：

丁酉六十五丁酉八十三丁酉七丙申六十三丁酉七丙申九十二

淳祐十年庚戌岁，十一月辛巳日南至：

壬午九十四壬午七十一辛巳九十六辛巳九十六辛巳九十四辛巳七十八

本朝至元十七年庚辰岁，十一月己未夜半后六刻冬至：

己未八十庚申五己未二十五己未四己未二十四己未六

右自春秋献公以来，凡二千一百六十余年，用《大衍》、《宣明》、《纪元》、《统天》、《大明》、《授时》六历推算冬至，凡四十九事。《大衍历》合者三十二，不合者十七；《宣明历》合者二十六，不合者二十三；《纪元历》合者三十五，不合者十四；《统天历》合者三十八，不合者十一；《大明历》合者三十四，不合者十五；《授时历》合者三十九，不合者十事。

今按献公十五年戊寅岁正月甲寅朔旦冬至，《授时历》得甲寅，《统天历》得乙卯，后天一日；至僖公五年丙寅岁正月辛亥朔旦冬至，《授时》、《统天》皆得辛亥，与天合；下至昭公二十年己卯岁正月己丑朔旦冬至，《授时》、《统天》皆得戊子，并先一日，若曲变其法以从之，则献、僖皆不合矣。可知《春秋》所书昭公冬至，乃日度失行之验。一也。《大衍

历》考古冬至，谓刘宋元嘉十三年丙子岁十一月甲戌日南至，《大衍》与《皇极》、《麟德》三历皆得癸酉，各先一日，乃日度失行，非三历之差。今以《授时历》考之，亦得癸酉。二也。大明五年辛丑岁十一月乙酉冬至，诸历皆得甲申，殆亦日度之差。三也。陈太建四年壬辰岁十一月丁卯景长，《大衍》、《授时》皆得丙寅，是先一日；太建九年丁酉岁十一月壬辰景长，《大衍》、《授时》皆得癸巳，是后一日；一失之先，一失之后，若合于壬辰，则差于丁酉，合于丁酉，则差于壬辰，亦日度失行之验。五也。隋开皇十一年辛亥岁十一月丙午景长，《大衍》、《统天》、《授时》皆得丙午，与天合；至开皇十四年甲寅岁十一月辛酉冬至，而《大衍》、《统天》、《授时》皆得壬戌，若合于辛亥，则失于甲寅，合于甲寅，则失于辛亥，其开皇十四年甲寅岁冬至，亦日度失行。六也。唐贞观十八年甲辰岁十一月乙酉景长，诸历得甲申，贞观二十三年己酉岁十一月辛亥景长，诸历皆得庚戌，《大衍历议》以永淳、开元冬至推之，知前二冬至乃史官依时历以书，非候景所得，所以不合，今以《授时历》考之亦然。八也。自前宋以来，测景验气者凡十七事，其景德丁未岁戊辰日南至，《统天》、《授时》皆得丁卯，是先一日；嘉泰癸亥岁甲戌日南至，《统天》、《授时》，皆得乙亥，是后一日；一失之先，一失之后，若曲变其数以从景德，则其余十六事多后天，从嘉泰，则其余十六事多先天，亦日度失行之验。十也。

前十事皆《授时历》所不合，以此理推之，非不合矣，盖类其同则知其中，辨其异则知其变。今于冬至略其日度失行及史官依时历书之者凡十事，则《授时历》三十九事皆中，

《统天历》与今历不合者仅有献公一事，《大衍历》推献公冬至后天二日，《大明》后天三日，《授时历》与天合。下推至元庚辰冬至，《大衍》后天八十一刻，《大明》后天十九刻，《统天历》先天一刻，《授时历》与天合。以前代诸历校之，《授时》为密，庶几千岁之日至，可坐而致云。按《授时历议》信僧一行日度失行之说，最为后人所非。其列十验，宋景德丁未岁戊辰、嘉泰癸亥岁甲戌二至，皆史误。唐贞观甲辰岁乙酉、己酉岁辛亥二至，非术误，即史误。隋开皇甲寅岁辛酉日冬至、陈丁酉岁壬辰日冬至，皆术误。宋大明辛丑岁乙酉日冬至，祖冲之详记测景，推冬至乙酉日夜半后三十三刻七分，当时推算稍为后天。而《大衍》以下至《授时》则皆为先天。宋元嘉丙子岁甲戌日冬至，推是年平冬至一十日十五小时三十三分五十六秒，甲戌日申初二刻四分，如均减时，不能过十五时，是亦定冬至亦在甲戌日，《授时》推前一日，癸酉，与《大衍》以下同，不能与天密合。鲁昭公己卯岁己丑日冬至，是年上距僖公五年丙寅一百三十三年，平冬至二十八日十五小时一十一分二十六秒，壬辰日申初刻十一分，约计加均及小轮，不过辛卯日、卯辰之间，不能减至己丑，以是知《春秋》时步天率先天二三日。《授时》则又先己丑日，失之远矣。僖公丙寅岁辛亥日，按至元辛巳前四年丁丑高冲与冬至同度，上距僖公五年丙戌一千九百三十一年，约四百行七度，则此至高冲在冬至前一宫三度四十八分，于今法当加均一度八分，变时一日三小时三十六分，减平冬至犹是甲寅日卯时，再约计是时小输，并径加大其加均，或能至一度二三十分之间，变时一日十余小时以减平冬至，则定冬

至亦止癸丑日、亥子之间，不能减至辛亥。则是时所推冬至先天两三日矣。献公戊寅岁甲寅日冬至，乃刘歆以四分术逆推，非有实测，不足为据。郭守敬于十事中，以八事为日行失度，其说诚失之诬。或者出于李谦等之增益，未可知也。

古今历参校疏密

《授时历》与古历相校，疏密自见，盖上能合于数百载之前，则下可行之永久，此前人定说。古称善治历者，若宋何承天，隋刘焯，唐傅仁均、僧一行之流，最为杰出。今以其历与至元庚辰冬至气应相校，未有不舛戾者，而以新历上推往古，无不吻合，则其疏密从可知已。

宋文帝元嘉十九年壬午岁十一月乙巳日十一刻冬至，距本朝至元十七年庚辰岁，计八百三十八年。其年十一月，气应己未六刻冬至，《元嘉历》推之，得辛酉，后《授时》二日，《授时》上考元嘉壬午岁冬至，得乙巳，与元嘉合。

隋大业三年丁卯岁十一月庚午日五十二刻冬至，距至元十七年庚辰岁，计六百七十三年。《皇极历》推之，得庚申冬至，后《授时》一日；《授时》上考大业丁卯岁冬至，得庚午，与《皇极》合。

唐武德元年戊寅岁十一月戊辰日六十四刻冬至，距至元十七年庚辰岁，计六百六十二年。《戊寅历》推之，得庚申冬至，后《授时》一日，《授时历》上考武德戊寅岁，得戊辰冬至，与《戊寅历》合。

开元十五年丁卯岁十一月己亥日七十二刻冬至，距至元十七年庚辰岁，计五百五十三年。《大衍历》推之，得己未冬至，后《授时》八十一刻；《授时历》上考开元丁卯岁，得己

亥冬至，与《大衍历》合，先四刻。

长庆元年辛丑岁十一月壬子日七十六刻冬至，距至元十七年庚辰岁，计四百五十九年。《宣明历》推之，得庚申冬至，后《授时》一日，《授时历》上考长庆辛丑岁，得壬子冬至，与《宣明历》合。

宋太平兴国五年庚辰岁十一月丙午日六十三刻冬至，距至元十七年庚辰岁，计三百年。《乾元历》推之，得庚申冬至，后《授时》一日；《授时历》上考太平兴国庚辰岁，得丙午冬至，与《乾元》合。

咸平三年庚子岁十一月辛卯日五十三刻冬至，距至元十七年庚辰岁，计二百八十年。《仪天历》推之，得庚申冬至，后《授时》一日，《授时历》上考咸平庚子岁，得辛卯冬至，与《仪天》合。

崇宁四年乙酉岁十一月辛丑日六十一刻冬至，距至元十七年庚辰岁，计一百七十五年。《纪元历》推之，得己未日冬至，后《授时》十九刻；《授时历》上考崇宁乙酉岁，得辛丑日冬至，与《纪元历》合，先二刻。

金大定十九年己亥岁十一月己巳日六十四刻冬至，距至元十七年庚辰岁，计一百一年。《大明历》推之，得己未冬至，后《授时》一十九刻；《授时历》上考大定己亥岁，得己巳冬至，与《大明历》合，先九刻。《大明》冬至，盖测验未密故也。

庆元四年戊午岁十一月己酉日一十七刻冬至，距至元十七年庚辰岁，计八十二年。《统天历》推之，得己未冬至，先《授时》一刻；《授时历》上考庆元戊午岁，得己酉日冬至，与

《统天历》合。

周天列宿度

列宿著于天，为舍二十有八，为度三百六十五有奇。非日躔无以校其度，非列舍无以纪其度，周天之度，因二者以得之。天体浑圆，当二极南北之中，络以赤道，日月五星之行，常出入于此。天左旋，日月五星溯而右转，昔人历象日月星辰，谓此也。然列舍相距度数，历代所测不同，非微有动移，则前人所测或有未密。古用窥管，今新制浑仪，测用二线，所测度数分秒与前代不同者，今列于左：

日躔

日之丽天，县象最著，大明一生，列宿俱熄。古人欲测躔度所在，必以昏旦夜半中星衡考其所距，从考其所当。然昏旦夜半时刻未易得真，时刻一差，则所距、所当，不容无舛。晋姜岌首以月食冲检，知日度所在。《纪元历》复以太白志其相距远近，于昏后明前验定星度，因得日躔。今用至元丁丑四月癸酉望月食既，推求得冬至日躔赤道箕宿十度，黄道九度有奇。仍自其年正月己卯岁终，三年之间，日测太阴所离宿次及岁星、太白星距度，定验参考，共得一百三十四事，皆躔箕宿，适与月食所冲允合。以金赵知微所修《大明历法》推之，冬至犹躔斗初度三十六分六十四秒，比新测实差七十六分六十四秒。

日行盈朔

日月之行，有冬有夏，言日月行度，冬夏各不同也。人徒知日行一度，一岁一周天，曾不知盈缩损益，四序有不同者。北齐张子信积候合蚀加时，觉日行有入气差，然损益未

得其正。赵道严复准晷景长短，定日行进退，更造盈缩以求亏食。至刘焯立躔度，与四序升降，虽损益不同，后代祖述用之。

夫阴阳往来，驯积而变，冬至日行一度强，出赤道二十四度弱，自此日轨渐北，积八十八日九十一分，当春分前三日，交在赤道，实行九十一度三十一分而适平。自后其盈日损，复行九十三日七十一分，当夏至之日，入赤道内二十四度弱，实行九十一度三十一分，日行一度弱，向之盈分尽损而无余。自此日轨渐南，积九十三日七十一分，当秋分后三日，交在赤道，实行九十一度三十一分而复平。自后其缩日损，行八十八日九十一分，出赤道外二十四度弱，实行九十一度三十一分，复当冬至，向之缩分尽损而无余。盈缩均有损益，初为益，末为损。自冬至以及春分，春分以及夏至，日躔自北陆转而西，西而南，于盈为益，益极而损，损至于无余而缩。自夏至以及秋分，秋分以及冬至，日躔自南陆转而东，东而北，于缩为益，益极而损，损至于无余而复盈。盈初缩末，俱八十八日九十一分而行一象；缩初盈末，俱九十三日七十一分而行一象；盈缩极差，皆二度四十分。由实测晷景而得，仍以算术推考，与所测允合。

月行迟疾

古历谓月平行十三度十九分度之七。汉耿寿昌以为日月行至牵牛、东井，日过度，月行十五度，至娄、角，始平行，赤道使然。贾逵以为今合朔、弦、望、月食加时，所以不中者，盖不知月行迟疾意。李梵、苏统皆以月行当有迟疾，不必在牵牛、东井、娄、角之间，乃由行道有远近出入所生。刘

洪作《乾象历》，精思二十余年，始悟其理，列为差率，以圜进退损益之数。后之作历者，咸因之。至唐一行，考九道委蛇曲折之数，得月行疾徐之理。

先儒谓月与五星，皆近日而疾，远日而迟。历家立法，以入转一周之日，为迟疾二历，各立初末二限，初为益，末为损。在疾初迟末，其行度率过于平行；迟初疾末，率不及于平行。自入转初日行十四度半强，从是渐杀，历七日，适及平行度，谓之疾初限，其积度比平行余五度四十二分。自是其疾日损，又历七日，行十二度微强，向之益者尽损而无余，谓之疾末限。自是复行迟度，又历七日，适及平行度，谓之迟初限，其积度比平行不及五度四十二分。自此其迟日损，行度渐增，又历七日，复行十四度半强，向之益者亦损而无余，谓之迟末限。入转一周，实二十七日五十五刻四十六分，迟疾极差皆五度四十二分。旧历日为一限，皆用二十八限。今定验得转分进退时各不同，今分日为十二，共三百三十六限，半之为半周限，析而四之为象限。

白道交周。

当二极南北之中，横络天体以纪宿度者，赤道也。出入赤道，为日行之轨者，黄道也。所谓白道，与黄道交贯，月行之所由也。古人随方立名，分为八行，与黄道而九，究而言之，其实一也。惟其随交迁徙，变动不居，故强以方色名之。

月道出入日道，两相交值，当朔则日为月所掩，当望则月为日所冲，故皆有食。然涉交有远近，食分有深浅，皆可以数推之。所谓交周者，月道出入日道一周之日也。日道距

赤道之远，为度二十有四。月道出入日道，不逾六度，其距赤道也，远不过三十度，近不下十八度。出黄道外为阳，入黄道内为阴，阴阳一周，分为四象；月当黄道为正交，出黄道外六度为半交，复当黄道为中交，入黄道内六度为半交，是为四象。象别七日，各行九十一度，四象周历，是谓一交之终，以日计之，得二十七日二十一刻二十二分二十四秒。每一交，退天一度二百分度之九十三，凡二百四十九交，退天一周有奇，终而复始。正交在春正，半交出黄道外六度，在赤道内十八度。正交在秋正，半交出黄道外六度，在赤道外三十度。中交在春正，半交入黄道内六度，在赤道内三十度。中交在秋正，半交入黄道内六度，在赤道外十八度。月道与赤道正交，距春秋二正黄赤道正交宿度，东西不及十四度三分度之二。夏至在阴历内，冬至在阳历外，月道与赤道所差者多；夏至在阳历外，冬至在阴历内，月道与赤道所差者少。盖白道二交，有斜有直，阴阳二历，有内有外，直者密而狭，斜者疏而阔，其差亦从而异。今立象置法求之，差数多者不过三度五十分，少者不下一度三十分，是为月道与赤道多少之差。

昼夜刻

日出为昼，日入为夜，昼夜一周，共为百刻。以十二辰分之，每辰得八刻二分刻之一。无间南北，所在皆同。昼短则夜长，夜短是昼长，此自然之理也。春秋二分，日当赤道出入，昼夜正等，各五十刻。自春分以及夏至，日入赤道内，去极浸近，夜短而昼长。自秋分以及冬至，日出赤道外，去极浸远，昼短而夜长。以地中揆之，长不过六十刻，短不过

四十刻。地中以南，夏至去日出入之所为远，其长有不及六十刻者；冬至去日出入之所为近，其短有不止四十刻者。地中以北，夏至去日出入之所为近，其长有不止六十刻者；冬至去日出入之所为远，其短有不及四十刻者。今京师冬至日出辰初二刻，日入申正二刻，故昼刻三十八，夜刻六十二。夏至日出寅正二刻，日入戌初二刻，故昼刻六十二，夜刻三十八。盖地有南北，极有高下，日出入有早晏，所有不同耳。今《授时历》昼夜刻，一以京师为正。

卷三十二

志第六

历 六

授时历议下 交食

历法疏密，验在交食，然推步之术难得其密，加时有早晚，食分有浅深，取其密合，不容偶然。推演加时，必本于躔离朏朧；考求食分，必本于距交远近；苟入气盈缩、入转迟疾未得其正，则合朔不失之先，则失之后。合朔失之先后，则亏食时刻，其能密乎？日月俱东行，而日迟月疾，月追及日，是为一会。交值之道，有阳历、阴历；交会之期，有中前、中后；加以地形南北东西之不同，人目高下邪直之各异，

此食分多寡，理不得一者也。今合朔既正，则加时无早晚之差；气刻适中，则食分无旨弱之失；推而上之，自《诗》、《书》、《春秋》及三国以来所载亏食，无不合焉者。合于既往，则行之悠久，自可无弊矣。

《诗》、《书》所载日食二事

《书·胤征》：“惟仲康肇位四海。乃季秋月朔，辰弗集于房。”今按：《大衍历》作仲康即位之五年癸巳，距辛巳三千四百八年，九月庚戌朔，泛交二十六日五千四百二十一分入食限。《诗·小雅·十月之交》，大夫刺幽王也。“十月之交，朔日辛卯，日有食之，亦孔之丑”

今按梁太史令虞邝云，十月辛卯朔，在幽王六年乙丑朔。《太衍》亦以为然。以《授时历》推之，是岁十月辛卯朔，泛交十四日五千七百九分入食限。

《春秋》日食三十六事

隐公三年辛酉岁，春王二月己巳，日有食之。

杜预云：“不书日，史官失之。”《公羊》云：“日食或言朔或不言朔，或日或不日，或失之前或失之后，失之前者朔在前也，失之后者朔在后也。”《谷梁》云：“言日不言朔，食晦日也。”姜岌校《春秋》日食云：“是岁二月己亥朔，无己巳，似失一闰。三月己巳朔，去交分入食限。”《大衍》与姜岌合。今《授时历》推之，是岁三月己巳朔，加时在昼，去交分二十六日六千六百三十一入食限。

桓公三年壬申岁，秋七月壬辰朔，日有食之。

姜岌以为是岁七月癸亥朔，无壬辰，亦失闰。其八月壬辰朔，去交分入食限。《大衍》与姜岌合。以今历推之，是岁八月壬辰朔，加时在昼，食六分一十四秒。

桓公十七年丙戌岁，冬十月朔，日有食之。

左氏云：“不书日，史官失之。”《大衍》推得在十一月交分入食限，失闰也。以今历推之，是岁十一月加时在昼，交分二十六日八千五百六十入食限。

庄公十八年乙巳岁，春王三月，日有食之。

《谷梁》云：“不言日，不言朔，夜食也”。《大衍》推是岁五月朔，交分入食限，三月不应食。以今历推之，是岁三月朔，不入食限。五月壬子朔，加时在昼，交分入食限，盖误五为三。

庄公二十五年壬子岁，六月辛未朔，日有食之。

《大衍》推之，七月辛未朔，交分入食限。以今历推之，是岁七月辛未朔，加时在昼，交分二十七日四百八十九入食限，失闰也。

庄公二十六年癸丑岁，冬十有二月癸亥朔，日有食之。今历推之，是岁十二月癸亥朔，加时在昼，交分十四日三千五百五十一入食限。

庄公三十年丁巳岁，九月庚午朔，日有食之。

今历推之，是岁十月庚午朔，加时在昼，去交分十四日四千六百九十六入食限，失闰也。《大衍》同。

僖公十二年癸酉岁，春王三月庚午朔，日有食之。

姜氏云：“三月朔，交不应食，在误条；其五月庚午朔，去交分入食限。”《大衍》同。今历推之，是岁五月庚午朔，加

时在昼，去交分二十六日五千一百九十二入食限，盖五误为三。

僖公十五年丙子岁，夏五月，日有食之。

左氏云：“不书朔与日，史官失之也。”《大衍》推四月癸丑朔，去交分入食限，差一闰。今历推之，是岁四月癸丑朔，去交分一日一千三百一十六入食限。

文公元年乙未岁，二月癸亥朔，日有食之。

姜氏云：“二月甲午朔，无癸亥。三月癸亥朔，入食限。”《大衍》亦以为然。今历推之，是岁三月癸亥朔，加时在昼，去交分二十六日五千九百十七分入食限，失闰也。

文公十五年己酉岁，六月辛丑朔，日有食之。

今历推之，是岁六月辛丑朔，加时在昼，交分二十六日四千四百七十三分入食限。

宣公八年庚申岁，秋七月甲子，日有食之。

杜预以七月甲子晦食。姜氏云：“十月甲子朔，食。”《大衍》同。今历推之，是岁十月甲子朔，加时在昼，食九分八十一秒，盖十误为七。

宣公十年壬戌岁，夏四月丙辰朔，日有食之。

今历推之，是月丙辰朔，加时在昼，交分十四日九百六十八分入食限。

宣公十七年己巳岁，六月癸卯，日有食之。

姜氏云：“六月甲辰朔，不应食。”《大衍》云：“是年五月在交限，六月甲辰朔，交分已过食限，盖误。”今历推之，是岁五月乙亥朔，入食限，六月甲辰朔，泛交二日已过食限，《大衍》为是。

成公十六年丙戌岁，六月丙寅朔，日有食之。

今历推之，是岁六月丙寅朔，加时在昼，去交分二十六日九千八百三十五分入食限。

成公十七年丁亥岁，十有二月丁巳朔，日有食之。

姜氏云：“十二月戊子朔，无丁巳，似失闰。《大衍》推十一月丁巳朔，交分入食限。今历推之，是岁十一月丁巳朔，加时在昼，交分十四日二千八百九十七分入食限，与《大衍》同。

襄公十四年壬寅岁，二月乙未朔，日有食之。

今历推之，是岁二月乙未朔，加时在昼，交分十四日一千三百九十三分入食限。

襄公十五年癸卯岁，秋八月丁巳朔，日有食之。

姜氏云：“七月丁巳朔，食，失闰也。”《大衍》同。今历推之，是岁七月丁巳朔，加时在昼，去交分二十六日三千三百九十四分入食限。

襄公二十年戊申岁，冬十月丙辰朔，日有食之。

今历推之，是岁十月丙辰朔，加时在昼，交分十三日七千六百分入食限。

襄公二十一年己酉岁，秋七月庚戌朔，日有食之。

今历推之，是月庚戌朔，加时在昼，交分十四日三千六百八十二分入食限。

冬十月庚辰朔，日有食之。

姜氏云：“比月而食，宜在误条。”《大衍》亦以为然。今历推之，十月已过交限，不应频食，姜说为是。

襄公二十三年辛亥岁，春王二月癸酉朔，日有食之。

今历推之，是月癸酉朔，加时在昼，交分二十六日五千七百三分入食限。

襄公二十四年壬子岁，秋七月甲子朔，日有食之，既。

今历推之，是月甲子朔，加时在昼，日食九分六秒。八月癸巳朔，日有食之。

《汉志》：“董仲舒以为比食又既”。大衍云：“不应频食，在误条。”今历推之，交分不叶，不应食，《大衍》说是。襄公二十七年乙卯岁，冬十有二月乙亥朔，日有食之。

姜氏云：“十一月乙亥朔，交分入恨，应食。”《大衍》同。今历推之，是岁十一月乙亥朔，加时在昼，交分初日八百二十五分入食限。

昭公七年丙寅岁，夏四月申辰朔，日有食之。

今历推之，是月甲辰朔，加时在昼，交分二十七日二百九十八分入食限。

昭公十五年甲戌岁，六月丁巳朔，日有食之。《大衍》推五月丁巳朔，食，失一闰。今历推之，是岁五月丁巳朔，加时在昼，交分十三日九千五百六十七分入食限。昭公十七年丙子岁，夏六月甲戌朔，日有食之。

姜氏云：“六月乙巳朔，交分不叶，不应食，当误。”《大衍》云：“当在九月朔，六月不应食，姜氏是也。”今历推之，是岁九月甲戌朔，加时在昼，交分二十六日七千六百五十分入食限。昭公二十一年庚辰岁秋，七月壬午朔，日有食之。今历推之，是月壬午朔，加时在昼，交分二十六日八千七百九十四分入食限。

昭公二十二年辛巳岁，冬十有二月癸酉朔，日有食之。

今历推之，是月癸酉朔，交分十四日一千八百入食限。杜预以长历推之，当为癸卯，非是。按郭知杜误者，法以下距至元辛巳一千八百年，于岁实内长一十九分，用以相乘，得六十五亿七千四百三十九万九千二百分，为中积。内减闰应余六十五亿七千四百一十九万七千一百五十分，满朔实，去之，余九万六千五百三十七分三十四秒，反减朔实，余一十九万八千七百六十八分五十九秒，为闰余，以日周之，即一十九日八十七刻六十八分五十九秒也。再依前法，求得本年冬至日分为三十五日一十四刻，内减闰余，存一十五日二十六刻三十一分四十三秒，算外即乙卯日二十六刻，是为是年正月经朔。再加十一朔实，即十二月朔。因闰余分满一十八万六十五朔五十二分〇九秒者，其年有闰，故须加十二朔实，依法加十二朔实，并十五日二十六刻三十一分四十一秒，共三百六十九日六十三刻〇二分五十七秒，满纪法，去之，余九日六十三刻〇二分五十七秒，算外即癸酉日也。杜言癸卯，盖少置一闰月耳。

昭公二十四年癸未岁，夏五月乙未朔，日有食之。

今历推之，是月乙未朔，加时在昼，交分二十六日三千八百三十九分入食限。

昭公三十一年庚寅岁，十有二月辛亥朔，日有食之。

今历推之，是月辛亥朔，加时在昼，交分二十六日六千一百二十八入食限。

定公五年丙申岁，春王三月辛亥朔，日有食之。

今历推之，三月辛卯朔，加时在昼，交分十四日三百三十四分入食限。

定公十二年癸卯岁，十一月丙寅朔，日有食之。

今历推之，是岁十月丙寅朔，加时在昼，交分十四日二千六百二十二分入食限，盖失一闰。

定公十五年丙午岁，八月庚辰朔，日有食之。

今历推之，是月庚辰朔，加时在昼，交分十三日七千六百八十五分入食限。

哀公十四年庚申岁，五月庚申朔，日有食之。

今历推之，是月庚申朔，加时在昼，交分二十六日九千二百一分入食限。

右《诗》、《书》所载日食二事，《春秋》二百四十二年间，凡三十有六事。以《授时历》推之，惟襄公二十一年十月庚辰朔及二十四年八月癸巳朔不入食限。盖自有历以来，无比月而食之理。其三十四食，食皆在朔，经或不书日，不书朔，《公羊》、《谷梁》以为食晦，二者非。左氏以为史官失之者，得之。其间或差一日、二日者，盖由古历疏阔，置闰失当之弊，姜岌、一行已有定说。孔子作书，但因时历以书，非大义所关，故不必致详也。

三国以来日食

蜀章武元年辛丑，六月戊辰晦，时加未。

《授时历》，食甚未五刻。

《大明历》，食甚未五刻。

右皆亲。二历推戊辰皆七月朔。

魏黄初三年壬寅，十一月庚申晦食，时加西南维。

《授时历》，食甚申二刻。

《大明历》，食甚申三刻。

右《授时》亲，《大明》次亲。二历推庚申皆十二月朔。
梁中大通五年癸丑，四月己未朔食，在丙。

《授时历》，亏初午四刻。

《大明历》，亏初午四刻。

右皆亲。

太清元年丁卯，正月己亥朔食，时加申。

《授时历》，食甚申一刻。

《大明历》，食甚申三刻。

右《授时》次亲，《大明》亲。

陈太建八年丙申，六月戊申朔食，于卯甲间。

《授时历》，食甚卯二刻。

《大明历》，食甚卯四刻。

右《授时》次亲，《大明》疏远。

唐永隆元年庚辰，十一月壬申朔食，巳四刻甚。

《授时历》，食甚巳七刻。

《大明历》，食甚巳五刻。

右《授时》疏，《大明》亲。

开耀元年辛巳，十月丙寅朔食，巳初甚。

《授时历》，食甚辰正三刻。

《大明历》，食甚辰正一刻。

右《授时》亲，《大明》疏。

嗣圣八年辛卯，四月壬寅朔食，卯二刻甚。

《授时历》，食甚寅八刻。

《大明历》。食甚卯初刻。

右皆次亲。

十七年庚子，五月己酉朔食，申初甚。

《授时历》，食甚申初二刻。

《大明历》，食甚申正初刻。

右《授时》次亲，《大明》疏远。

十九年壬寅，九月乙丑朔食，申三刻甚。

《授时历》，食甚申一刻。

《大明历》，食甚申四刻。

右《授时》次亲，《大明》亲。

景龙元年丁未，六月丁卯朔食，午正甚。

《授时历》，食甚午正二刻。

《大明历》，食甚未初初刻。

右《授时》次亲，《大明历》疏远。

开元九年辛酉，九月己巳朔食，午正后三刻甚。

《授时历》，食甚午正一刻。

《大明历》，食甚午正二刻。

右《授时》次亲，《大明》亲。

宋庆历六年丙戌，三月辛巳朔食，申正三刻复满。

《授时历》，复满申正三刻。

《大明历》，复满申正一刻。

右《授时》密合，《大明》次亲。

皇祐元年己丑，正月甲午朔食，午正甚。

《授时历》，食甚午初二刻。

《大明历》，食甚午正初刻。

右《授时》亲，《大明》密合。

五年癸巳，十月丙申朔食，未一刻甚。

《授时历》，食甚未三刻。

《大明历》，食甚未刻初。

右《授时》次亲，《大明》亲。

至和元年甲午，四月甲午朔食，申正一刻甚。

《授时历》，食甚申正一刻。

《大明历》，食甚申正二刻。

右《授时》密合，《大明》亲。

嘉祐四年己亥，正月丙申朔食，未三刻复满。

《授时历》，复满未初二刻。

《大明历》，复满未初二刻。

右皆亲。

六年辛丑，六月壬子朔食，未初亏初。

《授时历》，亏初未初刻。

《大明历》，亏初未一刻。

右《授时》亲，《大明》次亲。

治平三年丙午，九月壬子朔食，未二刻甚。

《授时历》，食甚未三刻。

《大明历》，食甚未四刻。

右《授时》亲，《大明》次亲。

熙宁二年己酉，七月乙丑朔食，辰三刻甚。

《授时历》，食甚辰五刻。

《大明历》，食甚辰四刻。

右《授时》次亲，《大明》亲。

元丰三年庚申，十一月己丑朔食，巳六刻甚。

《授时历》，食甚巳五刻。

《大明历》，食甚巳二刻。

右《授时》亲，《大明》疏远。

绍圣元年甲戌，三月壬申朔食，未六刻甚。

《授时历》，食甚未五刻。

《大明历》，食甚未五刻。

右皆亲。

大观元年丁亥，十一月壬子朔食，未二刻亏初，未八刻甚，申六刻复满。

《授时历》，亏初未三刻，食甚申初刻，复满申六刻。

《大明历》，亏初未初刻，食甚未七刻，复满申五刻。

右《授时历》亏初、食甚皆亲，复满密合。《大明》亏初。

次亲，食甚、复满皆亲。

绍兴三十二年壬午，正月戊辰朔食，申亏初。

《授时历》，亏初申一刻。

《大明历》，亏初未七刻。

右皆亲。

淳熙十年癸卯，十一月壬戌朔食，巳正二刻甚。

《授时历》，食甚巳正二刻。

《大明历》，食甚巳正一刻。

右《授时》密合，《大明》亲。

庆元元年乙卯，三月丙戌朔食，午初二刻亏初。

《授时历》，亏初午初一刻。

《大明历》，亏初午初二刻。

右《授时》亏初亲，《大明》亏初密合。

嘉泰二年壬戌，五月甲辰朔食，午初一刻亏初。

《授时历》，亏初巳正三刻。

《大明历》，亏初午初三刻。

右皆亲。

嘉定九年丙子，二月甲申朔食，申正四刻甚。

《授时历》，食甚申正三刻。

《大明历》，食甚申正二刻。

右《授时》亲，《大明》次亲。

淳祐三年癸卯，三月丁丑朔食，巳初二刻甚。

《授时历》，食甚巳初一刻。

《大明历》，食甚巳初初刻。

右《授时》亲，《大明》次亲。

本朝中统元年庚申，三月戊辰朔食，申正二刻甚。

《授时历》，食甚申正一刻。

《大明历》，食甚申初三刻。

右《授时》亲，《大明》疏。

至元十四年丁丑，十月丙辰朔食，午正初刻亏初，未初一刻食甚，未初一刻食甚，未正二刻复满。

《授时历》，亏初午正初刻，食甚未初一刻，复满未正一刻。

《大明历》，亏初午正三刻，食甚未正一刻，复满申初二刻。

右《授时》亏初、食甚皆密合，复满亲。《大明》亏初疏，食甚、复满皆疏远。

前代考古交食，同刻者为密合，相较一刻为亲，二刻为次亲，

三刻为疏，四刻为疏远。今《授时》、《大明》校古日食，上自后汉章武元年，下讫本朝，计五十五事。密合者，《授时》七，《大明》二。亲者，《授时》十有七，《大明》十有六。次亲者，《授时》十，《大明》八。疏者，《授时》一，《大明》三。疏远者，《授时》无，《大明》六。

前代月食。

宋元嘉十一年甲戌，七月丙子望食，四更二唱亏初，四更四唱食既。

《授时历》，亏初在四更三点，食既在四更四点。

《大明历》，亏初在四更二点，食既在四更五点。

右《授时》亏初亲，食既密合。《大明》亏初密合，食既亲。

十三年丙子，十二月己巳望食，一更三唱食既。

《授时历》，食既在一更三点。

《大明历》，食既在一更四点。

右《授时》密合，《大明》亲。

十四年丁丑，十一月丁丑望食，二更四唱亏初，三更一唱食既。

《授时历》，亏初在二更五点，食既在三更二点。

《大明历》亏初在二更四点，食既在三更二点。

右《授时》亏初、食既皆亲。《大明》亏初密合，食既亲。

梁中大通二年庚戌，五月庚寅望月食，在子。

《授时历》，食甚在子正初刻。

《大明历》，食甚在子正初刻。

右皆密合。

大同九年癸亥，三月乙巳望食，三更三唱亏初。

《授时历》，亏初三更一点。

《大明历》，亏初三更三点。

右《授时》次亲，《大明》密合。

隋开皇十二年壬子，七月己未望食，一更三唱亏初。

《授时历》，亏初在一更四点。

《大明历》亏初在一更五点。

右《授时》亲，《大明》次亲。

十五年乙卯，十一月庚午望食，一更四点亏初，二更三点食甚，三更一点复满。

《授时历》，亏初在一更三点，食甚在二更二点，复满在二更五点。

《大明历》，亏初在一更五点，食甚在二更二点，复满在二更五点。

右《授时》亏初、食甚、复满皆亲，《大明》亏初、复满皆亲，食甚密合。

十六年丙辰，十一月甲子望食，四更三筹复满。

《授时历》，复满在四更四点。

《大明历》复满在四更五点。

右《授时》亲，《大明》次亲。

后汉天福十二年丁未，十二月乙未望食，四更四点亏初。

《授时历》，亏初在四更五点。

《大明历》，亏初在四更一点。

右《授时》亲，《大明》次亲。

宋皇祐四年壬辰，十一月丙辰望食，寅四刻亏初。

《授时历》，亏初在寅二刻。

《大明历》，亏初在寅一刻。

右《授时》次亲，《大明》疏。

嘉祐八年癸卯，十月癸未望食，卯七刻甚。

《授时历》，食甚在辰初刻。

《大明历》，食甚在辰初刻。

右皆亲。

熙宁二年己酉，闰十一月丁未望食，亥六刻亏初，子五刻食甚，丑四刻复满。

《授时历》，亏初在亥六刻，食甚在子五刻，复满在丑三刻。

《大明历》，亏初在子初刻，食甚在子六刻，复满在丑四刻。

右《授时》亏初、食甚密合，复满亲。《大明》亏初次亲，食甚亲，复满密合。

四年辛亥，十一月丙申望食，卯二刻亏初，卯六刻甚。

《授时历》，亏初在卯初刻，食甚在卯五刻。

《大明历》，亏初在卯四刻，食甚在卯七刻。

右亏初皆次亲，食甚皆亲。

六年癸丑，三月戊午望食，亥一刻亏初，亥六刻甚，子四刻复满。

《授时历》，亏初在戌七刻，食甚在亥五刻，复满在子三刻。

《大明历》，亏初在亥二刻，食甚在亥七刻，复满在子四

刻。

右《授时》亏初次亲，食甚、复满皆亲。《大明》亏初、食甚皆亲，复满密合。

七年甲寅，九月己酉望食，四更五点亏初，五更三点食既。

《授时历》，亏初在四更五点，食既在五更三点。

《大明历》，亏初在四更三点，食既在五更二点。

右《授时》亏初、食既皆密合。《大明》亏初次亲，食既亲。

崇宁四年乙酉，十二月戊寅望食，酉三刻甚，戌初刻复满。

《授时历》，食甚在酉一刻，复满在酉七刻。

《大明历》，食甚在酉三刻，复满在戌二刻。

右《授时》食甚、复满皆次亲。《大明》食甚、密合、复满次亲。

本朝至元七年庚午，三月甲寅望食，丑三刻亏初，寅初刻食甚，寅六刻复满。

《授时历》，亏初在丑二刻，食甚在寅初刻，复满在寅六刻。

《大明历》，亏初在丑四刻，食甚在寅一刻，复满在寅七刻。

右《授时》亏初亲，食甚、复满密合。《大明》亏初、食甚、复满皆亲。

九年壬申，七月辛未望食，丑初刻亏初，丑六刻食甚，寅三刻复满。

《授时历》，亏初在子七刻，食甚在丑四刻，复满在寅一刻。

《大明历》，亏初在丑二刻，食甚在丑六刻，复满在寅二刻。

右《授时》亏初亲，食甚、复满皆次亲。《大明》亏初次亲，食甚密合，复满亲。

十四年丁丑，四月癸酉望食，子六刻亏初，丑三刻食既，丑五刻甚，丑七刻生光，寅四刻复满。

《授时历》，亏初在子六刻，食既在丑四刻，食甚在丑五刻，生光丑六刻，复满寅四刻。

《大明历》，亏初在丑初刻，食既丑七刻，食甚在丑七刻，生光在丑八刻，复满寅六刻。

右《授时》亏初、食甚、复满皆密合，食既、生光皆亲。

《大明》亏初、食甚、复满皆次亲，食既疏远，生光亲。十六年己卯，二月壬辰望食，子五刻亏初，丑二刻甚，丑七刻复满。

《授时历》，亏初在子五刻，食甚大丑二刻，复满在丑七刻。

《大明历》，亏初在子七刻，食甚在丑三刻，复满在丑七刻。

右《授时》亏初、食甚、复满皆密合。《大明》亏初次亲，食甚亲，复满密合。

八月己丑望食，丑五刻亏初，寅初刻甚，寅四刻复满。

《授时历》，亏初在丑三刻，食甚在寅初刻，复满在寅四刻。

《大明历》，亏初在丑七刻，食甚在寅二刻，复满在寅四刻。

右《授时》亏初次亲，食甚、复满皆密合。《大明》亏初、食甚皆次亲，复满密合。

十七年庚辰，八月甲申望食，在昼戌一刻复满。

《授时历》，复满在戌一刻。

《大明历》，复满在戌四刻。

右《授时》密合，《大明》疏。

已上四十五事密合者，《授时》十有八，《大明》十有一；亲者，《授时》十有八，《大明》十有七；次亲者，《授时》九，《大明》十有四；疏者，《授时》无，《大明》二；疏远者，《授时》无，《大明》一。

定朔

日平行一度，月平行十三度十九分度之七，一昼夜之间，月先日十二度有奇，历二十九日五十三刻，复追及日，与之同度，是谓经朔。经朔云者，谓合朔大量不出此也。日有盈缩，月有迟疾，以盈缩迟疾之数损益之，始为定朔。

古人立法，简而未密，初用平朔，一大一小，故日食有在朔二，月食有在望前后者。汉张衡以月行迟疾，分为九道；宋何承天以日盈缩，推定小余；故月有三大二小。隋刘孝孙、刘焯欲遵用其法，时议排抵，以为迂怪，率不能行。唐傅仁均始采用之，至贞观十九年九月后，四月频大，复用平朔。讫麟德元年，始用李淳风《甲子元历》，定朔之法遂行。淳风又以晦月频见，故立进朔之法，谓朔日小余在日法四分之三已上，虚进一日，后代皆循用之。然虞门尝曰：“朔在会同，苟躔次既合，何疑于频大；日月相离，何拘于间小。”一行亦曰：

“天事诚密，虽四大三小，庸何伤。”今但取辰集时刻所在之日以为定朔，朔虽小余在进限，亦不之进。甚矣，人之安于故习也。

初历法用平朔，止知一大一小，为法之不可易，初闻三大二小之说，皆不以为然。自有历以来，下讫麟德，而定朔始行，四大三小，理数自然，唐人弗克若天，而止用平朔。迨本朝至元，而常议方革。至如进朔之意，止欲避晦日月见，殊不思合朔在酉戌亥，距前日之卯十八九辰矣，若进一日，则晦不见月，此论诚然。苟合朔在辰申之间，法不当进，距前日之卯已逾十四五度，则月见于晦，庸得免乎？且月之隐见，本天道之自然，朔之进退，出入为之牵强，孰若废人用天，不复虚进，为得其实哉。至理所在，奚恤乎人言，可为知者道也。

不用积年日法

历法之作，所以步日月之躔离，候气朔之盈虚，不揆其端，无以测知天道，而与之吻合。然日月之行迟速不同，气朔之运参差不一，昔人立法，必推求往古生数之始，谓之演纪上元。当斯之际，日月五星同度，如合璧连珠然。惟其世代绵远，驯积其数至逾亿万，后人厌其布算繁多，互相推考，断截其数而增损日法，以为得改宪之术，此历代积年日法所以不能相同者也。然行之未远，浸复差失，盖天道自然，岂人为附会所能苟合哉。夫七政运行于天，进退自有常度，苟原始要终，候验周匝，则象数昭著，有不容隐者，又何必舍目前简易之法，而求亿万年宏阔之术哉。

今《授时历》以至元辛巳为元，所用之数，一本诸天，秒而分，分而刻，刻而日，皆以百为率，比之他历积年日法，推演附会，出于人为者，为得自然。

或曰：“昔人谓建历之本，必先立元，元正然后定日法，法定然后度周天以定分至，然则历之有积年日法尚矣。自黄帝以来，诸历转相祖述，殆七八十家，未闻舍此而能成者。今一切削去，无乃昧于本原，而考求未得其方欤”？是殆不然。晋杜预有云：“治历者，当顺天以求合，非为合以验天。”前代演积之法，不过为合验天耳。今以旧历颇疏，乃命厘正，法之不密，在所必更，奚暇踵故习哉。遂取汉以来诸历积年日法及行用年数，具列于后，仍附演积数法，以释或者之疑。

《三统历》西汉太初元年丁丑邓平造，行一百八十八年，至东汉元和乙酉，后天七十八刻。

积年，一十四万四千五百一十一。

日法，八十一。

《四分历》东汉元和二年乙酉编訢造，行一百二十一年，至建安丙戌，后天七刻。

积年，一万五百六十一。

日法，四。

《乾象历》建安十一年丙戌刘洪造，行三十一年，至魏景初丁巳，后天七刻。

积年，八千四百五十二。

日法，一千四百五十七。

《景初历》魏景初元年丁巳杨伟造，行二百六年，至宋元嘉癸未，先天五十刻。

积年，五千八十九。

日法，四千五百五十九。

《元嘉历》宋元嘉二十年癸未何承天造，行二十年，至大明七年癸卯，先天五十刻。

积年，六千五百四十一。

日法，七百五十二。

《大明历》宋大明七年癸卯宋祖冲之造，行五十八年，至魏正光辛丑，后天二十九刻。

积年，五万二千七百五十七。

日法，三千九百三十九。

《正光历》后魏正光二年辛丑李业兴造，行一十九年，至兴和庚申，先天十三刻。

积年，一十六万八千五百九。

日法，七万四千九百五十二。

《兴和历》兴和二年庚申李业兴造，行一十年，至齐天保庚午，先天九十九刻。

积年，二十万四千七百三十七。

日法，二十万八千五百三十。

《天保历》北齐天保元年庚午宋景业造，行一十七年，至周天和丙戌，后天一日八十七刻。

积年，一十一万一千二百五十七。

日法，二万三千六百六十。

《天和历》后周天和元年丙戌甄鸾造，行一十三年，至大象己亥，先天四十刻。

积年，八十七万六千五百七。

日法，二万三千四百六十

《大象历》大象元年己亥冯昱造，行五年，至隋开皇甲辰，后天十刻。

积年，四万二千二百五十五。

日法，一万二千九百九十二。

《开皇历》隋开皇四年甲辰张宾造，行二十四年，至大业戊辰，后天七刻。

积年，四百一十二万九千六百九十七。

日法，一十万二千九百六十。

《大业历》大业四年戊辰张胄元造，行十一年，至唐武德己卯，后天七刻。

积年，一百四十二万八千三百一十七。

日法，一千一百四十四。

《戊寅历》唐武德二年己卯道士傅仁均造，行四十六年，至麟德乙丑，后天四十七刻。

积年，一十六万五千三。

日法一万三千六百。

《麟德历》麟德二年乙丑李淳风造，行六十三年，至开元戊辰，后天一十二刻。

积年，二十七万四百九十七。

日法，一千三百四十。

《大衍历》开元十六年戊辰僧一行造，行三十四年，至宝应壬寅，先天一十四刻。

积年，九千六百九十六万二千二百九十七。

日法，三千四十。

《五纪历》宝应元年壬寅郭献之造，行二十三年，至贞元乙丑，后天二十四刻。

积年，二十七万四百九十七。

日法，一千三百四十。

《贞元历》贞元元年乙丑徐承嗣造，行二十七年，至长庆壬寅，先天十五刻。

积年，四十万三千三百九十七。

日法，一千九十五。

《宣明历》长庆二年壬寅徐昂造；行七十一年，至景福癸丑，先天四刻。按：宣明术不著撰人姓名，徐昂所著观象术，则已失传，且造于元和初，非长庆也。其误始于周琮，而守敬因之。

积年，七百七万五百九十七。

日法，八千四百。

《崇元历》景福二年癸丑边冈造，行十四年，后六十三年，至周显德丙辰，先天四刻。

积年，五千三百九十四万七千六百九十七。

日法，一万三千五百。

《钦天历》五代周显德三年丙辰王朴造，行五年，至宋建隆庚申，先天二刻。

积年，七千二百六十九万八千七百七十七。

日法，七千二百。

《应天历》宋建隆元年庚申王处讷造，行二十一年，至太平兴国辛巳，后天二刻。

积年，四百八十二万五千八百七十七。

日法，一万单二。

《乾元历》太平兴国六年辛巳吴昭素造，行二十年，至咸平辛丑，合。

积年，三千五十四万四千二百七十七。

日法，二千九百四十。

《仪天历》咸平四年辛丑史序造，行二十三年，至天圣甲子，合。

积年，七十一万六千七百七十七。

日法，一万一千。

《崇天历》天圣二年甲子宋行古造，行四十年，至治平甲辰，后天五十四刻。

积年，九千七百五十五万六千五百九十七。

日法，一万五百九十。

《明天历》治平元年甲辰周琮造，行一十年，至熙宁甲寅，合。

积年，七十一万一千九百七十七。

日法，三万九十。

《奉元历》熙宁十七年甲寅卫朴造，行十八年，至元祐壬申，后天七刻。

积年，八千三百一十八万五千二百七十七。

日法，二万三千七百。

《观天历》元祐七年壬申皇居卿造，行三十一年，至崇宁癸未，先天六刻。

积年，五百九十四万四千九百九十七。

日法，一万二千三十。

《占天历》崇宁二年癸未姚舜辅造，行三年，至丙戌，后天四刻。

积年，二千五百五十万一千九百三十七。

日法，二万八千八十。

《纪元历》崇宁五年丙戌姚舜辅造，行二十一年，至金天会丁未，合。

积年，二千八百六十一万三千四百六十七。

日法，七千二百九十。

《大明历》金天会五年丁未杨级造，行五十三年，至大定庚子，合。

积年，三亿八千三百七十六万八千六百五十七。

日法，五千二百三十。

《重修大明历》大定二十年庚子赵知微重修，行一百一年，至元朝至元辛巳，后天一十九刻。

积年，八千八百六十三万九千七百五十七。

日法，五千二百三十。

《统元历》后宋绍兴五年乙卯陈德一造，行三十二年，至乾道丁亥，合。

积年，九千四百二十五万一千七百三十七。

日法，六千九百三十。

《乾道历》乾道三年丁亥刘孝荣造，行九年，至淳熙丙申，后天一刻。

积年，九千一百六十四万五千九百三十七。

日法，三万。

《淳熙历》淳熙三年丙申刘孝荣造，行一十五年，至绍熙

辛亥，合。

积年，五千二百四十二万二千七十七。

日法，五千六百四十。

《会元历》绍熙二年辛亥刘孝荣造，行八年，至庆元己未，后天一十刻。

积年，二千五百四十九万四千八百五十七。

日法，三万八千七百。

《统天历》庆元五年己未杨忠辅造，行八年，至开禧丁卯，先天六刻。

积年，三千九百一十七。

日法，一万二千。

《开禧历》开禧三年丁卯鲍浣潮之造，行四十四年，至淳祐辛亥，后天七刻。

积年，七百八十四万八千二百五十七。

日法，一万六千九百。

《淳历》淳祐十年庚戌李德卿造，行二年，至壬子，合。

积年，一亿二千二十六万七千六百七十七。

日法，三千五百三十。

《会天历》宝祐元年癸丑谭玉造，行十八年，至咸淳辛未，后天一刻。

积年，一千一百三十五万六千一百五十七。

日法，九千七百四十。

《成天历》咸淳七年辛未陈鼎造，行四年，至至元辛巳，后天一刻。

积年，七千一百七十五万八百五十九。

日法，七千四百二十。

此下不曾行用，见于典籍经进者二历。

《皇极历》大业间刘焯造，阻难不行，至唐武德三年己卯，先天四十三刻。

积年，一百万九千五百一十七。

日法，一千二百四十二。

《乙未历》大定二十年庚子耶律履造，不见行用，至辛巳，后天一十九刻。

积年，四千四十三万二千一百二十六。

日法，二千六百九十。

《授时历》元至元十八年辛巳为元。

积年、日法不用。

实测到至元十八年辛巳岁。

气应，五十五日六百分。

闰应，二十日一千八百五十分。

经朔，三十四日八千七百五十分。

日法，二千一百九十，演纪上元己亥，距至元辛巳九千八百二十五万一千四百二十二算。

气应，五十五日六百二分。

闰应，二十日一千八百五十三分。

经朔，二十四日八千七百四十九分。

日法，八千二百七十，演纪上元甲子，距辛巳五百六十七万五百五十七算，日命甲子

气应，五十五日五百三十三分。

闰应，二十日一千八百八分。

经朔，三十四日八千七百二十五分。

日法，六千五百七十，演纪上元甲子，距辛巳三千九百七十五万二千五百三十七算。

气应，五十五日六百三十一分。

闰应，二十日一千九百一十九分。

经朔，三十四日八千七百一十二分。

卷三十三

志第七

历 七

立 成

至元十九年，郭守敬以《授时历》虽颁行，然立成之数尚无定稿，乃比类编次，整齐分秒，裁为二卷。《明志》据监本题：太史令臣王恂奉敕撰，谓恂之稿本，守敬卒成之。监本久佚，然《明志》所载《大统通轨》之立成，则出于守敬原书无疑也。今采附《历经》之后，以备步七政盈缩迟疾者之用焉。

太阳盈初缩未限立成；冬至前后二象限同用。

卷三十四

志第八

天文上

日食日晕珥诸变 月五星凌犯及星变上

郭守敬创制诸仪表，台官遵用百年，测验之精，远逾前代。于是日食、月五星凌犯，与夫彗孛、飞流之躔次，凡台官所测者，毕上于中书省，而载于中书之日历。虽不论占候，然元之季世，太史尚豫推休咎，因事上言。意者司天所掌，其书禁秘，故軼而不传欤？今仍旧史之文，为《天文志》，又据本纪订其疏夺。盖旧志与本纪所书者，皆出于日历也。观天察变之君子，庶几有取焉。

世祖中统二年三月壬戌朔，日有食之。三年十一月辛丑，日有背气，重晕三珥。至元二年正月辛未朔，日有食之。四年五月丁亥朔，日有食之。五年十月戊寅朔，日有食之。七年三月庚子朔，日有食之。八年八月壬辰朔，日有食之。九年八月丙戌朔，日有食之。十二年六月庚子朔，日有食之。十四年十月丙辰，日有食之。十九年六月己丑朔，日有食之。二十四年七月癸丑，日晕连环，白虹贯之。十月戊午朔，日有食之。二十六年三月庚辰朔，日有食之。二十七年八月辛未

朔，日有食之。二十九年正月甲午朔，日有食之。有物渐侵入日中，不能既，日体如金环然，左右有珥，上有抱气。三十一年六月庚辰朔，日有食之。

成宗大德元年四月癸巳朔，日有食之。三年八月己酉朔，日有食之。四年二月丁未朔，日有食之。六年六月癸亥朔，日有食之。七年闰五月戊午朔，日有食之。八年五月癸未朔，日有食之。

武宗至大二年正月丁亥，白虹贯日。八月甲寅，白虹贯日。四年正月壬辰，日赤如赭。

仁宗皇庆元年六月乙丑朔，日有食之。二年二月丁丑，日赤如赭。延祐元年三月己亥，白晕亘天，连环贯日。二年四月戊寅朔，日有食之。五月甲戌，日赤如赭。乙亥，亦如之。九月甲寅，日赤如赭。戊午，亦如之。三年五月戊申，日赤如赭。五年二月癸巳朔，日有食之。六年二月丁亥朔，日有食之。七年正月辛巳朔，日有食之。三月乙未，日有晕若连环然。八年七月丙申朔，日有食之。九月戊午朔，日有食之。

英宗至治元年三月己丑，交晕如连环贯日，六月癸卯朔，日有食之。二年十一月甲午朔，日有食之。

泰定帝泰定四年二月辛卯，白虹贯日。九月丙申朔，日有食之。

文宗天历二年七月丙辰朔，日有食之。至顺元年九月癸巳，白虹贯日。二年正月己酉，白虹贯日。八月甲辰朔，日有食之。十一月壬申朔，日有食之。三年五月丁酉，白虹并日出，长竟天。

惠宗元统元年三月癸巳，日赤如赭。闰三月丙申、癸丑、

甲寅，皆如之。二年四月戊午朔，日有食之。至元元年十二月戊午，日赤如赭。闰十二月丁亥、戊子、己丑，皆如之。二年二月壬辰，日赤如赭。乙未、丙申，亦如之。三月庚申、壬戌、癸卯，四月丁丑，皆如之。八月甲戌朔，日有食之。十二月甲戌，日赤如赭。三年正月丁巳，日有交暈，左右珥上有白虹贯之。二月壬申朔，日有食之。八月癸未，日有交暈，左右珥上有白虹贯之。十月癸酉，日赤如赭。四年八月癸亥朔，日有食之。闰八月戊戌，日赤如赭。

己亥、壬寅，亦如之。九月庚寅，皆如之。

五年正月丙寅，日有交暈，左右珥上有白虹贯之。二月辛亥，日赤如赭。三月庚申、辛酉，四月丁未，皆如之。

至正元年三月壬申，日赤如赭。

二年八月庚子朔，日有食之。十月己亥朔，日有食之。

三年四月丙申朔，日有食之。

四年九月丁亥朔，日有食之。

五年九月壬午朔，日有食之。

六年二月庚戌朔，日有食之。

七年正月甲辰朔，日有食之。

八年七月丙申朔，日有食之。

九年十一月戊午朔，日有食之。

十年十一月壬子朔，日有食之。

十二年四月癸卯朔，日有食之。

十三年九月乙丑朔，日有食之。

十四年三月癸亥朔，日有食之。

十五年二月丙子，日赤如赭。五月己酉朔，日有食之。

十六年三月，有两日相荡。

十七年正月丙子朔，日有食之。七月己丑，日有交晕，连环贯之。

十八年三月己亥朔，日色如血。六月戊辰朔，日有食之。十二月乙丑朔，日有食之。

二十年五月丁亥朔，日有食之。

二十一年四月辛巳朔，日有食之。

二十五年三月壬戌，日有晕，内赤外青，白虹如连环贯之。十月辛丑，日傍有一月、一星。

二十六年二月丁卯，日有晕，左珥上有背气一道。七月辛巳朔，日有食之。

二十七年六月丙午朔，日有食之。十二月癸卯朔，日有食之。

宪宗六年六月，太白昼见。

世祖中统元年五月乙未，荧惑入南斗，留五十余日。

二年二月丁酉，太阴掩昴。六月戊戌，太阴犯角。八月丙午，太白犯岁星。十一月庚午，太阴犯昴。十二月辛卯，荧惑犯房。壬寅，荧惑犯钩钤。

三年十一月乙酉，太白犯钩钤。

至元元年二月丁卯，太阴犯南斗。四月辛亥，太阴犯轩辕御女星。五月丙戌，太阴犯房。己亥，太阴犯昴。七月甲戌，彗星出舆鬼，昏见西北，贯上台，扫紫微、文昌及北斗，旦见东北，凡四十余日。十二月甲子，太阴犯房。

二年六月丙子，太阴犯心宿大星。

四年八月庚申，填星犯天樽距星。壬戌，太白犯轩辕大星。甲子，岁星犯轩辕大星。十一月乙巳，填星犯天樽距星。

五年正月甲午，太阴犯井。二月戊子，太阴犯天关。己丑，太阴犯井。

六年十月庚子，太阴犯辰星。

七年正月己酉，太阴犯毕。九月丁巳，太阴犯井。十月庚午，太白犯右执法。十一月壬寅，荧惑犯太微西垣上将。

八年正月辛未，太阴犯毕。三月丁亥，荧惑犯太微西垣上将。九月丙子，太阴犯毕。

九年五月乙酉，太白犯毕距星。九月戊寅，太阴犯御女。十月戊戌，荧惑犯填星。十一月丁卯，太阴犯毕。

十年三月癸酉，客星青白如粉絮，起毕，度五车北，复自文昌贯斗杓，历梗河，至左摄提，凡二十一日。

十一年二月甲寅，太阴犯井宿。十月壬辰，岁星犯垒壁阵。

十二年七月癸酉，太白犯井。辛卯，太阴犯毕。九月己巳，太白犯少民。己卯，太白犯太微西垣上将。十月癸丑，太阴犯毕。十一月丙戌，太阴犯轩辕大星。十二月戊戌，填星犯亢。戊申，太阴犯毕。

十三年九月辛亥，太白犯南斗。甲寅，太白入南斗。十二月乙卯，太阴犯填星。辛酉，荧惑掩钩钤。

十四年二月癸亥，彗出东北，长四尺余。

十五年二月丁丑，荧惑犯天街。三月丁亥，太阴犯太白。戊子，太阴犯荧惑。十一月辛亥，太白、荧惑、填星聚于房。

十六年四月癸卯，填星犯键闭。七月丙寅，填星犯键闭。

八月庚辰，太阴犯房宿距星。庚子，岁星犯轩辕大星。十月丙申，太阴犯太微西垣上将。十一月癸丑，太阴犯荧惑。

十七年四月庚子，岁星犯轩辕大星。七月戊申，太阴掩房宿距星。己酉，太阴犯南斗。八月丙子，太阴犯心宿东星。甲子，太阴犯右执法，并犯岁星。

十八年五月丙辰，岁星犯右执法。七月癸卯，太阴犯房宿距星。闰八月癸巳朔，荧惑犯司怪南第二星。庚戌，太阴犯昴。九月甲申，太阴犯轩辕大星。十一月甲戌，太阴犯五车次南星。丁丑，太阴犯鬼。丁亥，太阴掩心。十二月丙午，太阴犯轩辕大星。

二十年正月己巳，太阴犯轩辕御女。庚辰，太阴犯南斗，犯距星。二月庚寅，太阴掩昴。庚子，太白犯昴。壬寅，太白犯昴。乙巳，太阴犯心。三月己未，岁星犯键闭。庚申，太阴犯井。壬戌，太阴犯鬼。己巳，岁星犯房。癸酉，岁星掩房。四月己亥，太阴犯房。壬寅，太阴犯南斗。五月丙寅，太阴掩心。七月丙辰，太白犯井。癸亥，太阴犯南斗。乙丑，太白犯井。庚子，荧惑犯司怪。八月丙午，太白犯轩辕。丁未，岁星犯钩钤。九月壬子，太白犯轩辕少女。戊午，太阴犯斗。己巳，太白犯右执法。壬申，太阴掩井。癸酉，荧惑犯鬼。甲戌，太阴犯鬼，荧惑犯积尸气。太白犯左执法。十月丙申。太阴犯昴。十一月戊寅，太白、岁星相犯。十二月甲辰，太阴掩荧惑。

二十一年闰五月戊寅朔，填星犯斗。七月甲申，太白犯荧惑。九月癸巳，太白犯南斗第四星。乙未，太阴犯井。十月己酉，太阴犯轸。十一月丙戌，太阴犯昴。己亥，太阴掩

輿鬼。庚子，太阴犯心。

二十二年二月辛亥，太阴犯东井。癸丑，太阴犯鬼。壬戌，太阴犯心。八月癸丑，太阴入东井。十二月己亥，岁星犯填星。

二十三年正月壬午，太阴犯轩辕太民。乙酉，太阴犯氐。二月癸巳，岁星犯壁垒阵。丙午，太阴犯井。三月己巳，太阴犯娄。五月己巳，荧惑犯太微西垣上将。庚辰，赠星犯垒壁阵。乙酉，荧犯太微右执法。六月丙申朔，太白犯御女。八月乙卯，太白犯轩辕右角星。九月甲申，太阴犯天关。十月甲午朔，太白犯右执法。戊戌，太阴犯建星。辛亥，太阴犯东井。甲寅，太白犯进贤。壬寅，太白犯左执法。十一月戊辰，太白犯亢。己卯，太阴犯东井。辛巳，岁星犯垒壁阵。十二月戊戌，太白犯东咸。丁未，太阴犯东井。丁巳，太阴犯氐。

二十四年正月甲戌，太阴犯东井。乙酉，太阴犯房。二月庚子，太阴犯天关。辛丑，太阴犯东井。闰二月癸亥，太阴犯辰星。甲申，太阴犯牵牛。三月丙申，太阴犯东井。四月癸酉，太阴犯氐。甲戌，太阴犯房。七月戊戌，太阴犯南斗。辛丑，太阴犯牵牛。壬寅，荧惑犯輿鬼积尸气。甲辰，荧惑犯輿鬼。壬子，太阴犯司怪。八月癸亥，太白犯亢。丙子，填星南犯垒壁阵。己卯，太阴犯天关。辛巳，太阴犯东井。甲申，太白犯房。九月丁酉，荧惑犯长垣。庚子，太白犯天江。乙巳，太阴犯毕。辛亥，荧惑犯太微西垣上将。壬子，太白犯南斗。十月壬戌，太阴犯牵牛大星。乙酉，荧惑犯左执法。十一月壬辰，太白犯垒壁阵。太阴晕太白、填星。丙申，荧

惑犯太微东垣上将。庚子，太白昼见。丙辰，荧惑犯进贤。十二月丙寅，太阴犯毕。太白昼见。

二十五年正月乙巳，太阴犯角。戊申，太阴犯房。三月丁亥，荧惑犯太微东垣上相。戊子，太阴犯毕。己亥，太阴掩角。四月戊午，太阴犯井。五月戊申，太白犯毕。六月甲戌，太白犯井。丁丑，太阴犯岁星。七月己亥，荧惑犯氐。庚子，太白犯鬼。乙巳，太阴掩毕。八月丙辰，荧惑犯房。乙未，太白犯轩辕大星。九月癸未朔，荧惑犯天江。庚子，太阴犯毕。癸卯，荧惑犯南斗。十二月辛酉，太阴犯毕。甲子，太阴犯井。甲戌，太阴犯亢。荧惑犯垒壁阵。

二十六年正月辛丑，太阴犯氐。三月甲午，太阴犯亢。五月壬辰，太白犯鬼。七月戊子，太白经天四十五日。辛卯，太阴犯牛。乙未，太阴犯岁星。八月辛未，岁星昼见。九月戊寅，岁星犯井。乙未，太阴犯毕。辛丑，荧惑犯太微西垣上将。十月癸丑，太阴犯牛宿距星。甲寅，荧惑犯右执法。闰十月丁亥，辰星犯房。己丑，太阴犯毕，荧惑犯进贤，太阴犯井。十一月丁巳，荧惑犯亢。戊辰，太阴犯亢。

二十七年正月庚戌，太白犯牛。癸丑，太阴犯井。丁卯，荧惑犯房。壬申，荧惑犯键闭。二月戊寅，太阴犯毕。庚寅，太阴犯亢。三月壬子，荧惑犯钩钤。四月丙子，太阴犯井。壬辰，荧惑守氐十余日。五月乙丑，太阴犯填星。六月己丑，荧惑犯房。七月辛酉，荧惑犯天江。九月癸卯，岁星犯鬼。十月辛巳，太白犯斗。十一月戊申，太阴掩填星。辛酉，太阴掩左执法。十二月辛卯，太阴犯亢。

二十八年正月壬寅，太白、荧惑、填星聚奎。二月癸未，

太阴犯左执法。甲申，太白犯昴。三月丁未，太阴犯御女。己酉，太阴犯右执法。庚戌，太阴犯太微东垣上相。乙卯，太白犯五车。四月乙未，岁星犯舆鬼积尸气。五月壬寅，太阴犯少民。甲寅，太阴犯牛。六月辛卯，太阴犯毕。七月己亥，太白犯井。八月丙寅，太白犯舆鬼。丙子，太阴犯牵牛。癸未，岁星犯轩辕大星。戊子，太白犯轩辕大星，并犯岁星。癸巳，太阴掩荧惑。九月丙辰，荧惑犯左执法。戊午，太白犯荧惑。辛酉，岁星犯少民。十月丙戌，太阴犯轩辕大星并御女。己丑，太阴犯太微东垣上相。十一月甲辰，太阴犯房。丙午，荧惑犯亢。丁未，太阴犯毕。庚申，荧惑犯氐。十二月庚辰，太阴犯御女。癸未，太阴犯东垣上相。己丑，荧惑犯房。庚寅，荧惑犯钩钤。

二十九年正月戊申，太阴犯岁星及轩辕左角。二月己巳，太阴犯毕。己丑，岁星犯轩辕大星。四月丙子，太阴犯氐。六月己丑，太白犯岁星。闰六月戊申，荧惑犯狗国。七月辛未，太阴犯牛。八月丁酉，辰星犯右执法。己亥，太白犯房。乙巳，岁星犯右执法。九月壬戌，荧惑犯垒壁阵。辛巳，太白犯南斗。十月乙巳，太阴犯井。丁未，太阴犯鬼。乙卯，太阴犯氐。十一月壬戌，太阴犯垒壁阵。己卯，太阴犯太微东垣上将。十二月庚子，太阴犯井。甲辰，太阴犯太微西垣上将。

三十年正月丙寅，太阴犯毕。丁未，太阴犯氐。庚辰，岁星犯左执法。二月壬辰，太阴犯毕。乙巳，荧惑犯天街。庚戌，太阴犯牛。癸丑，太白犯垒壁阵。三月辛未，太阴犯氐。四月癸丑，太白犯填星。六月己丑，岁星犯左执法。丙申，太

阴犯斗。七月甲子，太阴犯建星。辛巳，太阴犯鬼。八月甲午，辰星犯太微西垣上将。甲辰，太阴犯毕。戊申，太阴犯鬼。九月丁卯，太阴犯毕。十月庚寅，彗星入紫微垣，抵斗魁，光芒尺许，凡一月乃灭。丙申，荧惑犯亢。己亥，太阴犯天关。辛丑，太阴犯井。十一月乙丑，太阴犯毕。丁卯，太阴犯井。庚子，太阴犯鬼。丙子，荧惑犯钩钤。戊寅，岁星犯亢。十二月乙未，太阴犯井。

三十一年四月戊申，太白昼见，又犯鬼。五月庚戌朔，太白犯舆鬼。六月丙午，太阴犯井。八月庚辰，太白昼见。戊戌，太阴犯毕。太白犯轩辕。九月丁巳，太白经天。丙寅，太阴掩填星。辛未，太阴犯轩辕。乙亥，太白犯右执法，太阴犯平道。十月壬午，太白犯左执法。癸巳，太阴掩填星。乙未，太阴犯井。十一月己酉，太阴犯亢。庚申，太阴犯毕。癸酉，太白犯房。十二月癸未，岁星犯房。丁亥，岁星犯钩钤。壬辰，太阴犯鬼。庚子，太阴犯房，又犯岁星。

成宗元贞元年正月乙卯，太阴犯填星，又犯毕。癸酉，岁星犯东咸。二月癸未，荧惑犯太阴。壬辰，太阳犯平道。癸卯，太阴犯岁星。三月庚戌，太阴犯填星。壬戌，太阴犯房。四月庚寅，太阴犯东咸。闰四月癸丑，岁星犯房。甲寅，太阴犯平道。乙卯，太阴犯亢。丁巳，太阴掩房。五月丁亥，太阴犯南斗。七月丁丑，太阴犯亢。甲申，岁星犯房。八月乙酉，太阴犯牛。壬子，太阴犯垒壁阵。九月甲午，太阴犯轩辕。戊戌，太阴犯平道。十月辛酉，辰星犯房。壬戌，辰星犯键闭。戊辰，太白昼见，太阴犯房。十一月甲戌，太白经天及犯垒壁阵。乙酉，太阴犯井。丁亥，太阴犯鬼。十二月

丙辰，太阴犯轩辕。甲子，太阴犯天江。

二年正月壬午，太阴犯舆鬼。丙戌，太白昼见。丁亥，太阴犯平道。庚寅，太阴犯钩钤。二月丁未，太阴犯井。三月乙酉，太阴犯钩钤。五月丁丑，太阴犯平道。六月乙巳，太白犯天关。丁巳，太白犯填星。癸亥，太阴犯井。七月壬午，填星犯井。太白犯舆鬼。八月庚子，太阴犯亢。太白犯轩辕。癸卯，太阴犯天江。乙卯，太阴犯天街，太白犯上将。九月戊辰，太白犯左执法。壬申，太阴掩南斗。丁丑，太阴犯垒壁阵。己丑，太阴犯轩辕。十一月丁丑，太阴犯月星，又犯天街。庚辰，太阴犯井。丁亥，太阴犯上相。戊子，太阴犯平道。壬辰，太阴犯天江。十二月丁未。太阴犯井。乙卯，太阴犯进贤。

大德元年三月戊辰，荧惑犯井。癸酉，太阴掩轩辕大星。五月癸酉，太白犯鬼积尸气。乙亥，太阴犯房。六月乙未，太白昼见。七月庚午，太阴犯房。八月丁巳，袄星出奎。九月辛酉朔，袄星复犯奎。十月戊午，太白经天。十一月戊子，太白经天。十二月甲辰，太白经天，又犯东咸。丙午，太阴犯轩辕。甲寅，太阴犯心闰。十二月癸酉，太白犯建星。丙子，太白犯建星。

二年二月辛酉，岁星、荧惑、太白聚危，荧惑犯岁星。辛未，太阴犯左执法。丙子，太阴犯心。五月戊戌，太阴犯心。六月壬戌，太阴犯角。七月癸巳，太阴犯心。八月壬戌，太阴犯箕。九月辛丑，太阴犯五车南星。癸卯，太阴犯五诸侯。己酉，太阴犯左执法。十月壬戌，太白犯牵牛。戊寅，太阴犯角宿距星。十一月己亥，太阴犯舆鬼。辛丑，辰星犯牵牛。

壬寅，太阴犯右执法。十二月戊午，太白经天。己未，填心犯舆鬼。乙丑，太白犯岁星，太阴犯荧惑。庚午，填星入舆鬼，太阴犯上将。甲戌，彗星出子孙星下。己卯，太阴犯南斗。

三年正月丙戌，太阴犯太白。丁酉，太阴犯西垣上将。戊戌，太阴犯右执法。乙巳，太白经天。三月乙巳，荧惑犯五诸侯。戊戌，荧惑犯舆鬼。四月己未，太阴犯上将。丙寅，填星犯舆鬼，太阴犯心。五月丙申，太阴犯南斗。己亥，太白犯毕。六月庚申，太阴掩房。丁卯，荧惑犯右执法。壬申，岁星昼见。七月己卯朔，太白犯井。丁未，太阴犯舆鬼。八月丁巳，太阴犯箕。戊辰，太白犯轩辕大星。己巳，太阴犯五车星。九月壬辰，流星色赤，尾长尺余，其光烛地，起自河鼓，没于牵牛之西，有声如雷。乙未，太阴犯昴宿距星。丁酉，太白犯左执法。十月丙子，太阴犯房。十一月乙酉，太白犯房。

四年二月戊午，太阴犯轩辕。五月甲午，太阴犯垒壁阵。辛丑，太白犯舆鬼，太阴犯轩辕。五月甲午，太阴犯垒壁阵。辛丑，太白犯舆鬼，太阴犯昴。六月丁巳，太白犯填星。七月辛卯，荧惑犯井。八月癸丑，太阴犯井。甲子，辰星犯灵台上星。闰八月庚辰，荧惑犯舆鬼。九月戊午，太白犯斗。壬戌，太阴犯舆鬼。甲子，太白犯斗。十二月庚寅，荧惑犯轩辕。癸巳，太阴犯房宿距星。

五年正月己酉，太阴犯五车。壬子，太阴犯舆鬼积尸气。辛酉，太阴犯心。二月己卯，太阴犯舆鬼。三月戊申，太阴犯御女。丁卯，荧惑犯填星。己巳，荧惑、填星相合。四月

壬申，太阴犯东井。五月癸丑，太阳犯南斗。乙卯，荧惑犯右执法。丁卯，太白犯井。六月甲申，岁星犯司怪。癸巳，太白犯舆鬼，岁星犯井。甲午，太白犯舆鬼。七月丙午，岁星犯井。辛亥，太阴犯垒壁阵。庚申，辰星犯太白。八月壬辰，太阴犯轩辕御女。乙未，填星犯太微上将。九月乙丑，自八月庚辰，彗出井二十四度四十分，如南河大星，色白，长五尺，直西北，后经文昌斗魁，南扫太阳，又扫北斗、天机、紫微垣、三公、贯索，星长丈余，至天市垣巴蜀之东、梁楚之南、宋星上，长盈尺，凡四十六日而灭。十月癸未，太阴犯东井。辛卯，夜有流星，大如杯，色赤，尾长丈余，光烛地，自北起，近东徐徐而行，分为二星，前大后小，相离尺余，没于危宿。十一月己亥，岁星犯东井。戊申，太阴犯昴。十二月甲戌，岁星犯司怪。辛亥，太阴犯南斗。

六年正月壬戌，填星犯太微西垣上将。二月庚午，太阴犯昴。三月壬寅，太阴犯舆鬼。癸卯，岁星犯井。甲寅，太阴犯钩钤。四月乙丑朔，太白犯东井。戊寅，太阴犯心。庚寅，太白犯舆鬼。六月癸亥朔，填星犯太微西垣上将。乙亥，太阴犯斗。七月癸巳朔，荧惑、填星、辰星聚井。庚子，太阴犯心。戊午，太阴犯荧惑。八月乙丑，荧惑犯岁星。己巳，荧惑犯舆鬼。辛巳，太阴犯昴。壬午，太白犯轩辕。九月丙午，荧惑犯轩辕。癸丑，太阴犯舆鬼。丁巳，太白犯右执法。十月壬午，荧惑犯太微西垣上将。十一月辛亥，填星犯左执法。乙未，辰星犯房。癸卯，太阴犯昴。己酉，太阴犯轩辕。十二月庚申朔，荧惑犯填星。乙丑，岁星犯舆鬼。乙未，太阴犯舆鬼。庚辰，荧惑犯太微东垣上相。癸未，太阴犯房。

七年正月戊戌，太阴犯昴。甲辰，太阴犯轩辕。二月戊寅，太阴犯心。四月癸亥，太阴犯东井。丙寅，太阴犯轩辕。乙亥，岁星犯舆鬼，太阴犯南斗。甲申，荧惑犯太微垣右执法。丁亥，岁星犯舆鬼。五月壬辰，辰星犯东井。闰五月戊辰，太阴犯心。七月戊寅，岁星犯轩辕。己卯，太阴犯井。乙酉，荧惑犯房。八月癸巳，太白犯氐。甲午，荧惑犯东咸，太阴犯牵牛。乙巳，亢星犯轩辕。辛亥，荧惑犯天江。九月丙寅，太白昼见。辛未，荧惑犯南斗。甲戌，太阴犯东井。乙亥，太白犯南斗。壬午，辰星犯氐。十月丁亥，太白经天。辛丑，太阴犯东井。十一月己未，太白经天。丙寅，填星犯进贤。戊辰，太阴犯东井。己卯，太阴犯东咸。十二月丙戌，太白经天。夜，荧惑犯垒壁阵。丙申，太阴犯东井。辛丑，太阴犯明堂。丁未，太阴犯天江。

八年三月乙丑，自去岁十二月庚戌彗星见，约盈尺，指东南，测在室十一度，渐长尺余，复指西北，扫腾蛇，入紫微垣，至是灭，凡七十四日。

九年正月丁巳，太阴犯天关。甲子，太阴犯明堂。己巳，太阴犯东咸。三月甲寅，荧惑犯氐。戊午，岁星犯左执法。四月庚辰，太阴犯井。壬辰，太白犯井。五月癸亥，岁星掩左执法。七月丙午，荧惑犯氐。甲寅，太白经天已。丁卯，荧惑犯房。八月辛巳，太阴犯东井。乙未，荧惑犯天江。九月丁巳，荧惑犯斗。十月丙戌，太白经天。十一月庚戌，岁星、太白、填星聚于亢。癸丑，岁星犯亢。丙寅，岁星昼见。十二月壬申，太白经天。丙子，太阴犯西咸。庚寅，荧惑犯垒壁阵。己亥，辰星犯建星。

十年正月丁巳，太白犯建星。闰正月癸酉，太白犯牵牛。己丑，太白犯垒壁阵。二月戊午，太阴犯氐。三月戊寅，岁星犯亢。四月辛酉，填星犯亢。六月癸丑，太阴犯罗堰上星。己未，岁星犯亢。七月庚辰，太阴犯牵牛。八月壬寅，岁星犯氐，荧惑犯太微垣上将。九月己巳，荧惑犯太微垣右执法。壬午，荧惑犯太微垣左执法。十月甲辰，太白犯斗。辛亥，太阴犯毕。甲寅，太阴犯井。十一月辛未，岁星犯房。壬申，太阴犯虚。甲戌，荧惑犯亢。戊子，荧惑犯氐。辛卯，太阴犯荧惑。十二月壬寅，太白昼见。乙巳，岁星犯东咸。戊午，太阴犯氐。

十一年六月丙午，太阴犯南斗杓星。己巳，太阴犯亢。七月壬午，荧惑犯南斗。九月癸酉，太白犯右执法。己卯，太白犯左执法。十月乙巳，太白犯亢。己酉，荧惑犯垒壁阵。甲寅，太阴犯明堂。己未，太阴犯太白。十一月丁卯，太白犯房。丙子，太阴犯东井。乙酉，太阴犯亢。辛卯，辰星犯岁星。十二月丁巳，填星犯键闭。

武宗至大元年正月辛未，太阴犯井。甲申，太阴犯填星。二月丁未，太阴犯亢。甲寅，太阴犯牛距星。三月乙丑，太阴犯井。五月癸丑，太白犯舆鬼。七月庚申，流星起自句陈，南至于太角傍，尾迹约三尺，化为白气，聚于七公，南行，圆若车轮，微有锐，经贯索灭。壬申，太白犯左执法。八月壬子，太阴犯轩辕太民。九月壬申，填星犯房。丙子，太阴犯井。癸未，太阴犯荧惑。十月辛丑，太白犯南斗。十一月庚申，太白昼见。癸亥，荧惑犯亢。己巳，太阴掩毕。甲戌，荧惑犯氐。乙亥，辰星犯填星。闰十一月壬寅，荧惑犯房。丁

未，太阴犯亢。十二月甲子，太阴犯毕。丙子，太阴犯氏。戊寅，太白掩建星。

二年二月己巳，太阴犯亢。辛未，太阴犯氏。庚辰，太阴犯太白。三月戊戌，太阴犯氏。己亥，荧惑犯岁星。丙午，荧惑犯垒壁阵。五月辛卯，太阴犯亢。六月乙卯，太白犯井。癸酉，辰星犯舆鬼。乙亥，太阴掩毕。八月乙亥，太阴犯轩辕。丁丑，太阴犯右执法。九月丙午，太阴犯进贤。十月壬申，太阴犯左执法。十一月己亥，太阴犯右执法。庚子，太阴犯上相。辛丑，荧惑犯外屏。十二月庚申，太阴犯参。癸亥，辰星犯岁星。辛未，太白犯垒壁阵。

三年正月壬辰，太阴犯轩辕御女。甲午，太阴犯右执法。丙申，太阴犯平道。二月辛亥，荧惑犯月星。庚申，荧惑犯天街，太阴犯轩辕少民。壬戌，太阴犯左执法。乙亥，太白犯月星。三月甲申，太阴犯井。庚寅，太阴犯氏。丙申，太阴犯南斗。丁未，太白犯井。甲寅，太阴犯轩辕御女。戊辰，太白昼见。五月乙酉，太阴犯平道。癸巳，荧惑犯舆鬼。六月乙卯，太阴犯氏。七月戊寅，太阴犯右执法。己卯，太阴犯上相。八月甲子，太白犯轩辕太民。乙丑，太阴掩毕大星。辛巳，太阴犯建星。辛卯，太阴犯天廩。十月甲辰朔，太白经天。丙午，太白犯左执法。癸丑，荧惑犯亢。十一月甲戌朔，太白犯亢。丁亥，太阴犯毕。十二月甲辰朔，太阴犯罗堰。庚申，太阴犯轩辕大星。辛酉，太白犯填星。丙寅，太白犯氏。

四年二月甲子，太阴犯填星。三月丙戌，太阴犯太微上将。四月甲寅，太阴犯亢。荧惑犯垒壁阵。癸未，太阴犯氏。

五月乙未，太阴犯太微东垣上相。庚戌，太阴犯氐。七月癸巳，太阴犯毕。丁酉，太阴犯鬼宿距星。闰七月丙寅，太阴犯轩辕。九月乙卯，太阴犯毕。十月丙申，太白犯垒壁阵。十一月甲寅，太阴犯舆鬼。十二月庚辰，太白经天。癸未，亦如之。甲申，太阴犯太微西垣上将。壬辰，太白经天。

仁宗皇庆元年正月癸丑，太阴犯太微东垣上相。二月壬午，太阴犯亢。三月丁酉朔，荧惑犯东井。壬寅，太阴犯东井。四月丙子，太白昼见。壬午，荧惑犯舆鬼。癸未，荧惑犯积尸气。庚寅，太白经天。六月己巳，太阴犯天关。七月戊午，太阴犯东井。八月戊辰，太白犯轩辕。辛未，太阴犯填星。壬午，辰星犯右执法。乙酉，太白犯右执法。丁亥，辰星犯左执法。九月丁巳，太白犯亢。十月丁亥，太阴犯平道。戊子，太阴犯亢。十一月己亥，太阴掩垒壁阵。十二月甲申，荧惑、填星、辰星聚井。戊子，太阴犯荧惑。

二年正月戊申，太阴犯三公。三月庚子，荧惑犯垒壁阵。丁未，彗出东井。七月己丑朔，岁星犯东井。辛卯，太白昼见。乙未、丙辰，皆如之。丁巳，太白经天。八月戊午朔，太白昼见。壬戌，岁星犯东井。壬午，太阴犯舆鬼。

延祐元年二月癸酉，荧惑犯东井。三月壬辰，太阴掩荧惑。闰三月辛酉，太阴犯舆鬼。丙寅，太阴犯太微东垣。五月戊午，辰星犯舆鬼。六月乙未，荧惑犯右执法。十月庚戌，辰星犯东咸。十二月甲子，太阴犯舆鬼。癸卯，太阴犯房。甲辰，太阴犯天江。

二年正月乙卯，岁星犯舆鬼。己未，太白昼见。癸亥，太阴犯轩辕。丁卯，太阴犯进贤。二月戊子，太白昼见。癸巳，

太白经天。丙午，亦如之。三月丙辰，太阴色赤如赭。四月庚子，太阴犯垒壁阵。五月辛酉，太阴犯天江。庚午，太白昼见。六月甲申，太白昼见。是夜，太阴犯平道。癸卯，太白犯东井。丙申，辰星犯舆鬼。九月己酉，太阴犯房。辛酉，太白犯左执法。十月丙子朔，客星见太微垣。十一月丙午，客星变为彗，犯紫微垣，历轸至壁十五宿，明年二月庚寅乃灭。

三年九月癸丑，太白昼见。丙寅，太白经天。十月甲申，太白犯斗。

四年三月乙酉，太阴犯箕。六月乙巳，太阴犯心。八月丙申，荧惑犯舆鬼。壬子，太阴犯昴。九月庚午，太阴犯斗。

六年正月戊寅，太阴犯心。二月己亥，太阴犯灵台。三月己巳，太阴犯明堂。癸酉，太阴犯日星。甲戌，太阴犯心。五月辛酉，太阴犯灵台。丁卯，太阴犯房。丙子，太阴犯垒壁阵。六月己亥，岁星犯东咸。七月壬戌，太阴犯心。丙子，太白犯太微垣右执法。八月乙酉，荧惑犯舆鬼。闰八月丙辰，辰星犯太微垣右执法。丁巳，太阴犯心。癸亥，荧惑犯轩辕。甲子，太阴犯垒壁阵。乙亥，太白犯东咸。十月癸亥，荧惑犯太微垣左执法。乙丑，太阴犯昴。戊辰，太阴犯东井。庚午，太白昼见。辛未，太阴犯轩辕。辛卯，荧惑犯进贤。庚子，太阴犯明堂。十二月丙寅，太阴犯轩辕。

七年正月乙未，太阴犯明堂上星。癸卯，太阴犯斗宿东星。二月辛酉，太阴犯轩辕御女。壬戌，太阴犯灵台。丁卯，太阴犯日星。庚午，太阴犯斗宿距星。三月戊子，太阴犯酒旗上星，荧惑犯进贤。庚寅，太阴犯明堂上星。四月甲寅，太白犯填星。壬戌，太阴犯房宿距星。五月庚寅，太阴犯心宿

东星。癸巳，太阴犯狗宿东星。丙申，太白犯毕宿距星。六月庚申，太阴犯斗宿东星。癸亥，太阴犯垒壁阵西二星。丁卯，太白犯井宿东扇第三星。辛未，太阴犯昴宿。七月丁亥，太阴犯斗宿东二星。戊戌，荧惑犯房宿上星。己亥，太阴犯昴宿距星。八月丙辰，太白犯灵台上星。乙丑，荧惑犯天江。丁卯，太白犯太微垣右执法。壬申，太阴犯轩辕御女。九月乙酉，太阴犯垒壁阵西二星。丙戌，荧惑犯斗宿。癸巳，太阴犯昴宿东星。己亥，太白犯亢星。十月庚戌，太阴犯荧惑于斗。癸亥，太阴犯井宿。十一月癸卯，荧惑犯垒壁阵。乙卯，太阴掩昴宿。戊午，太阴犯井宿东星。庚申，太阴犯鬼宿。

英宗至治元年正月乙未，太阴掩房宿距星。甲辰，辰星犯外屏西第一星，辰星、太白、荧惑、填星聚于奎宿。二月壬子，太白、荧惑、填星聚于奎宿。辛酉，太白犯荧惑。癸亥，太阴犯心宿大星，又犯心宿东星。三月丁丑，太阴掩昴宿。四月戊午，太阴犯心宿大星。庚辰，太阴犯斗宿东第三星。五月戊寅，太白犯鬼宿积尸气，太阴犯轩辕右角。庚辰，太阴犯明堂中星。六月己未，太阴犯虚梁东第二星。辛酉，太白经天。七月癸未，太阴犯昴宿。八月丁未，太阴犯心宿前星。己酉，太阴犯斗宿西第二星。壬子，荧惑犯轩辕大星。九月乙亥，荧惑犯灵台东北星。壬午，荧惑犯太微西垣上将。丁酉，荧惑犯太微垣右执法。十月甲辰，太白经天。戊申，荧惑犯太微垣左执法。十一月辛未，荧惑犯进贤。丙子，太阴犯虚梁东第一星。戊寅，辰星犯房宿上星。丙戌，太阴犯井宿东扇北第二星。己丑，太阴犯酒旗西星，又犯轩辕右角。辛

卯，太阴犯明堂中星。己亥，太白犯西咸南第一星。十二月甲辰，荧惑犯亢宿南第一星。庚戌，太阴犯昴宿东第一星。辛酉，荧惑入氐宿。

二年正月丁丑，太阴犯昴宿距星。庚辰，太白犯建星西第二星。辛巳，太白犯建星西第三星。辛卯，太阴犯心宿太星。甲午，荧惑犯房宿上星。丁酉，太白犯牛宿南第一星。二月己亥朔，荧惑犯键闭星。丙午，荧惑犯罚星南一星。戊申，太阴犯井宿东扇北第二星。庚戌，荧惑犯东咸北第二星。辛亥，太阴犯酒旗西第一星及轩辕右角星。壬子，太白犯垒壁阵西方第二星。癸丑，太阴犯明堂中星。己未，太阴犯天江南第一星。壬戌，太白犯垒壁阵第六星。五月丙子，荧惑退犯东咸南第一星。六月壬申，荧惑犯心宿距星。七月己亥，荧惑犯天江南第一星。戊午，太阴犯井宿钺星。九月己未，太阴犯明堂中星。十月庚辰，太阴犯井宿距星。辛巳，太阴犯井宿东扇北第二星及第三星。己丑，荧惑犯垒壁阵西第六星。十一月甲辰，太白犯垒壁阵第一星。乙巳，荧惑犯垒壁阵西第八星。戊申，太阴掩井宿东扇北第二星。己未，太阴犯东咸南第一星。庚申，太阴犯天江上第二星。辛酉，荧惑犯岁星。十二月乙丑，太白、岁星、荧惑聚于室，太白犯垒壁阵西第八星。乙亥，太阴掩井宿距星。戊寅，太白犯岁星。己丑，荧惑犯外屏西第三星，太阴犯建星西第二星。

三年正月壬寅，太阴犯钺星，又犯井宿距星。癸卯，太阴犯井宿东扇南第二星。二月癸亥朔，荧惑、太白、填星聚于胃宿。癸酉，太白犯昴宿。辛巳，太阴犯东咸南第一星、第二星。五月戊戌，太白经天。癸卯，太阴犯房宿第二星。庚

戌，太白犯毕宿右股第三星。六月癸未，填星犯毕宿距星。九月辛卯，填星退犯毕。十月己巳，太白犯亢。丙子，太白犯氐。十一月己丑朔，荧惑犯亢。庚寅，太白犯钩钤。乙未，太白犯东咸。壬寅，荧惑犯氐。十二月己巳，辰星犯垒壁阵。辛未，荧惑犯房。辛巳，荧惑犯东咸。

泰定帝泰定元年五月丙午，太白犯鬼宿。丁未，太白又犯鬼宿积尸气。十月丙寅，太白犯斗宿距星。己巳，太白入斗宿魁，太阴犯填星。庚午，太白犯斗。壬午，荧惑犯垒壁阵。十二月庚午，荧惑犯外屏。乙亥，太白经天。

二年正月丙戌，辰星犯天鸡。壬寅，太白犯建星。二月庚寅，荧惑、岁星、填星聚于毕宿。六月丙戌，填星犯井宿钺星。丙午，填星犯井宿。八月癸巳，岁星犯天樽。十月壬辰，荧惑犯氐宿。癸巳，填星退犯井宿。十一月戊午，填星退犯井宿钺星。十二月乙酉，荧惑犯天江，辰星犯建星。甲午，太白犯垒壁阵。

三年正月辛酉，太白犯外屏。三月丙午，填星犯井宿钺星。戊辰，荧惑犯垒壁阵，填星犯井宿。庚午，填星、太白、岁星聚于井。四月戊戌，太白犯鬼宿。壬寅，荧惑犯垒壁阵。七月戊辰，太白经天，至于十二月。八月丁酉，太白犯轩辕御女。九月壬戌，太白犯太微垣右执法。十月辛巳，太白犯进贤。

四年正月己酉，太白犯斗宿。三月丁卯，荧惑犯井宿。九月壬子，太白犯房宿。闰九月己巳，太白经天，至十二月。十月乙巳，昼有流星。戊午，辰星犯东咸。十一月癸酉，太白犯垒壁阵，荧惑犯天江。十二月己未，岁星退犯太微西垣上

将。

致和元年二月壬戌，太白昼见。五月庚辰，流星如缶大，光明烛地。七月丙戌，太白犯轩辕大星。

文宗天历元年九月庚辰，太白犯亢宿。

二年正月甲子，太白犯垒壁阵。二月己酉，荧惑犯井宿。五月庚申，太白犯鬼宿积尸气。六月丁未，太白昼见。七月癸亥，太白经天。十一月癸酉，太阴犯填星。

至顺元年七月庚午，岁星犯氏宿。八月戊辰，太白犯氏宿。九月己丑，荧惑犯鬼宿。甲午，荧惑犯鬼宿。十一月甲申，荧惑退犯鬼宿。丙戌，太白犯垒壁阵。

二年二月壬子，太白昼见。乙卯，太白昼见。乙卯，太白犯昴。三月丙子朔，荧惑犯鬼宿。己卯，荧惑犯鬼宿积尸气。五月丁丑，荧惑犯轩辕左角。甲午，太白犯毕宿。庚子，太阴犯太白。辛丑，太白经天。六月丁未，太白昼见。丁卯，太阴犯毕，太白犯井。八月乙卯，太白犯轩辕大星。庚申，太白犯轩辕左角。九月丙子，太白犯填星。十一月壬申朔，太白犯钩钤。

三年五月癸酉，荧惑犯东井。

卷三十五

志第九

天文下

月五星凌犯及星变下

惠宗元统元年正月癸酉，太白昼见。二月戊戌，复如之。己亥，填星退犯太微东垣上相。丙辰，太阴犯天江下星。三月戊寅，太阴犯太微东垣上相。五月丁酉，荧惑犯太微垣右执法。六月丁丑，太阴犯垒壁阵西第二星。七月己亥，太阴犯房宿北第二星。九月甲午，太阴犯东咸西第一星，填星犯进贤。乙未，太阴犯天江下星。丁巳，太阴犯填星。己未，太阴犯氏宿距星。十月甲子，太阴入犯斗宿魁东北星。十一月甲午，太阴犯垒壁阵西方第二星。辛亥，太阴犯太微东垣上相。壬子，太阴犯填星。癸丑，太阴犯亢宿南第一星。十二月癸酉，太阴犯鬼宿东北星。乙亥，太白犯垒壁阵西第八星，太阴犯轩辕夫人星。己卯，太阴犯进贤。癸未，太阴犯东咸西第二星。

二年正月壬寅，太阴犯轩辕夫人星。庚戌，太阴犯房宿北第二星。二月癸酉，太阴犯太微东垣上相。丁亥，太白经天。三月辛丑，太阴犯进贤，又犯填星。四月丁丑，太白经

天。戊寅，太白昼见。辛巳，壬午皆如之。壬午，太白犯鬼宿积尸气。七月己亥，太白经天。甲辰、丙午，皆如之。己酉，太白昼见。夜，流星如酒杯大，色赤，尾约长五尺余，其光烛地，起自天津之侧，没于离宫之南。庚戌，太白经天。壬子，复如之，荧惑入犯鬼宿积尸气。癸丑，太白经天。甲寅，亦如之。八月丙辰朔，太白经天。丁巳、戊午、己未，皆如之。癸亥、丙寅、戊辰、辛未、壬申、癸酉、甲戌、丁丑、己卯，皆如之。己卯，夜，太白犯轩辕御女星。庚辰，太白经天。壬午，亦如之。九月庚寅，太白经天。壬辰，太白入南斗魁。癸巳，太阴犯狗宿东星，太白犯灵台中星。甲午，太白经天。乙未、己亥、壬寅，皆如之。乙巳，太白犯太微垣右执法。壬子，太白犯太微垣左执法。十月癸亥，荧惑太微西垣上将，太白犯进贤。乙亥，太阴犯轩辕夫人星，太白犯填星。十一月乙未，填星犯亢宿距星。庚戌，荧惑犯太微东垣上相。

后至元年二月甲戌，荧惑逆行入太微垣。四月壬戌，太阴犯太微垣左执法。五月癸卯，太阴犯垒壁阵东方第四星。六月壬戌，太阴犯心宿大星。七月乙未，太阴犯垒壁阵西方第二星。八月辛亥，荧惑犯氐宿东南星。九月丁亥，太阴犯斗宿东南星。庚寅，太阴犯垒壁阵西方第二星。十月甲寅，荧惑犯斗宿西第二星。庚申，太阴犯垒壁阵东方东第二星。甲子，太阴犯昴宿西第二星。丁卯，太白犯斗宿魁第三星。戊辰，太白昼见。十一月甲申，太白经天。丙戌，亦如之。己丑，辰星犯房宿上星及钩钤星。丙申，太阴犯鬼宿东北星。己亥，太阴犯太微西垣上将。庚子，太阴犯太微垣左执法。十

二月壬子，太阴犯垒壁阵西方第二星。辛醺酉，太白犯垒壁阵东方第六星。甲子，太白经天。乙丑，太阴犯轩辕夫人星。丙寅，太白经天。丁卯，亦如之。太阴犯太微垣右执法。庚午，太白经天。壬申，亦如之。癸丑，岁星昼见。乙亥，太白、岁星皆昼见。戊寅，太白经天，岁星昼见。闰十二月乙酉，荧惑犯垒壁阵西第八星。庚子，太阴犯心宿大星。壬寅，太阴犯箕宿距星。癸卯，太阴犯斗宿东南星。

二年正月壬戌，太阴犯太微垣右执法。甲子，太阴犯角宿距星。丁卯，太阴犯房宿距星。二月辛巳，太阴犯昴宿距星。甲申，太白经天。己丑，太阴犯太微垣右执法。三月壬戌，太阴犯心宿距星。甲子，太阴犯箕宿距星。乙丑，太阴犯斗宿东南星。四月丙戌，太阴犯角宿距星。五月庚戌，太阴犯灵台第一星。五月丙辰，太白昼见。丁巳，亦如之。六月戊子，太白犯井宿东扇北第二星。七月己酉，太白犯鬼宿东南星。乙卯，太白犯荧惑。八月己卯，太阴犯心宿东第一星。辛巳，太阴犯箕宿东北星。九月庚戌，荧惑犯太微西垣上将。十月丙子，荧惑犯太微垣左执法。丁亥，太阴犯昴宿。己亥，荧惑犯进贤。十一月己酉，太阴犯垒壁阵西第八星。己未，太阴犯鬼宿积尸气。丁卯，太阴犯房宿距星。

三年三月辛亥，太阴犯灵台上星。四月甲戌，有星孛于王良，至七月壬寅没于贯索。辛卯，太阴犯垒壁阵西方第五星。庚子，太白昼见。五月壬寅，太白犯鬼宿东北星。乙巳太阴犯轩辕左角。戊申，太白昼见。己未，太阴犯垒壁阵西方第六星。辛酉，太白昼见。丁卯，彗星见于东北，如天船星大，色白，长约尺余，彗指西南，测在昴五度。六月庚午，

太白经天。辛未、甲戌，皆如之。乙亥，太白犯灵台上星。己未，太白经天。夜，太白犯太微西垣上将。壬午，太白昼见，太阴犯斗宿尖星。丁亥，太白犯太微垣右执法。己丑，太白昼见。庚寅，亦如之。七月癸卯，太白经天。乙巳，丙午，皆如之。庚戌，太白昼见。甲寅，太白经天。辛酉，太白昼见。壬戌，太白经天。癸亥、甲子，皆如之。八月庚午，彗星不见。其星自五月丁卯始见，戊辰，往西南行，日益渐远，至六月辛未，芒彗愈长，约二尺余，丁丑扫上丞，己卯光芒约三尺余，入环卫，壬午，扫华盖、杠星，乙酉扫钩陈大星及天皇大帝，丙戌贯四辅，经枢心，甲午出环卫，丁酉，出紫微垣，戊戌犯贯索，扫天纪，七月庚子扫河间，癸卯经郑晋，入天市垣，丙午扫列肆，己酉太阴光盛，微辨芒彗，出天市垣，扫梁星，至辛酉，光芒微小，在房宿键闭之上、罚星中星之西，难测，日渐南行，至是凡见六十有三日，自昴至房，凡历一十五宿而灭。甲戌，太阴犯心宿后星。九月己亥，荧惑犯斗宿西第二星。甲辰，太阴犯斗宿魁第二星。丁未，太阴犯垒壁阵西第一星。己酉，太阴犯垒壁阵西第八星。辛酉，太阴犯轩辕大星。十月庚午，太白昼见。丙子，太阴犯垒壁阵西方第七星。壬午，太阴犯昴宿上行星。丁亥，太白昼见，太阴犯鬼宿积尸气。庚寅，太白昼见。辛卯、丙申，皆如之。十一月丁酉，太白经天。戊戌，太白犯亢宿距星。己亥，太白经天。壬寅，太阴犯荧惑。

癸卯，太阴犯垒壁阵西第六星。丁未，填星犯键闭。辛亥，太阴犯五车东南星。甲寅，太阴犯鬼宿西北星。丙辰，太阴犯轩辕左角。丁巳，太白经天，太阴犯太微垣三公东南星。

戊午，太白经天。癸亥、甲子、乙丑，皆如之。十二月己巳，岁星退犯天樽东北星。填星犯罚星南一星。甲戌，荧惑犯垒壁阵东第五星，太白犯东咸上星。

四年正月癸卯，太白犯建星西第三星。丙午，太阴犯五车东南星。辛亥，太阴犯轩辕左角。己未，填星犯东咸上星。庚申，太阴入斗魁，太白犯牛宿。二月戊寅，太阴犯轩辕大星。己卯，太阴犯灵台中星，三月戊申，填星退犯东咸上星。六月辛巳，填星退犯键闭星。闰八月己亥，填星犯罚星南第一星，太阴犯斗宿南第二星。庚戌，太阴犯昴宿南第二星。乙卯，太阴犯鬼宿东南星。九月丙寅，太阴犯斗宿距星。戊辰，太白犯东咸上第二星。癸丑，奔星如酒杯大，色白，起自右旗之下，西南行，没于近浊。甲申，太阴犯轩辕御女。乙酉，太阴犯灵台南第一星。庚寅，太白犯斗宿北第二星。十月辛亥，太阴犯酒旗上星。十一月辛未，荧惑犯氐宿距星。丁丑，太阴犯鬼宿东南星。戊寅，太白犯垒壁阵西第六星。十二月庚子，荧惑犯房宿上星。癸卯，太白经天。己酉、庚戌、辛亥，皆如之。壬子，荧惑犯东咸上第二星。乙卯，太白犯外屏西第二星，太阴犯斗宿距星。丙辰，太白经天。

五年正月庚午，太阴犯井宿东扇上星。乙亥，荧惑犯天江上星。二月甲午，太阴犯昴宿上西第一星。壬寅，太阴犯灵台下星。四月壬寅，太阴犯日星及犯房宿距星。五月庚午，太阴犯心宿后星。壬申，太阴犯斗宿西第四星。丙子，太白犯毕宿右股西第三星。六月甲辰，荧惑退入南斗魁内。七月辛酉，荧惑犯南斗魁尖星。壬戌、甲子，皆如之。太阴犯房宿距星。甲戌，太白经天。乙亥、丙子、戊寅、乙酉、丙戌，

皆如之。八月戊子，太白经天。己丑、庚寅、辛卯，皆如之。甲午，太阴犯斗宿西第四星。丁酉，太白犯轩辕大星。戊戌，太白经天。己亥、壬寅、甲辰，皆如之。乙巳，太阴犯昴宿上行西第三星。九月戊午，太白经天。己未，亦如之。十月己亥，荧惑犯垒壁阵西方第六星。十一月丁巳，荧惑犯垒壁阵东方第五星。十二月甲午，太阴犯昴宿距星。癸卯，荧惑犯外屏西第三星。

六年正月丁卯，太阴犯鬼宿距星。乙亥，太阴犯房宿距星。二月己丑，太阴犯昴宿。丙申，太阴犯太微西垣上将。癸卯，太阴犯心宿大星。丁未，太阴犯罗堰南第一星。戊申，荧惑犯月星。己酉，彗星如房星大，色白，状如粉絮，尾迹约长五寸余，彗指西南，测在房七度，渐在西北行。太阴犯虚梁南第二星。三月癸丑，太阴犯轩辕右角。庚午，太阴犯房距星。壬申，太阴犯南斗杓第二星。丙子，太阴犯虚梁南第一星。戊寅，太白犯月星。辛巳，彗星不见。自二月己酉，及三月庚辰，凡见三十二日。四月己巳，太阴犯云雨西北星。五月丁卯，太阴犯斗宿西第二星。辛未，太阴犯虚梁西第二星。六月癸卯，太白昼见。己酉、辛亥，皆如之。太白又犯岁星，又太白、岁星皆犯右执法。七月甲寅，太白昼见。丁巳，复如之。庚申，太阴犯心宿距星，又犯中央大星。壬戌，太白昼见。癸亥，皆如之。甲子，太阴犯罗堰。乙丑，太白昼见。丙寅、癸酉，皆如之。九月辛酉，太阴犯虚梁北第一星。丁卯，太阴犯昴宿距星，荧惑犯岁星。甲戌，太阴犯轩辕右角。十月丁酉，太白入南斗魁。己亥，太白犯斗宿中央东星。十一月乙卯，太阴犯虚梁西第一星。戊午，荧惑犯氐宿距星。丙

寅，辰星犯东咸上第一。戊寅，辰星犯天江北第一星。十二月癸未，太阴犯虚梁北第一星。乙酉，太阴犯土公东星。丁亥，荧惑犯钩铃南星。乙未，荧惑犯东咸北第二星。戊戌，太阴犯明堂星。

至正元年正月甲寅，荧惑犯天江上星。庚申，太阴犯井宿东扇北第二星。辛未，太阴犯心宿距星。癸酉，太阴犯斗宿北第二星。甲戌，太白昼见。乙亥、丙子、丁丑，皆如之。二月己卯，太白昼见。庚辰、丙戌，皆如之。癸巳，太阴犯明堂东南星。三月癸酉，太阴犯云雨西北星。六月庚午，太阴犯井宿距星。七月乙酉，太阴犯填星。庚寅，太阴犯云雨西北星。九月庚辰，太阴犯建星南第二星。壬辰，太阴犯钺星，又犯井宿距星。十月己卯，岁星犯氏宿距星。丁巳，太阴犯月星。十一月己亥，太阴犯东咸南第一星。庚子，太阴犯天江北第二星。十二月丁巳，太白犯垒壁阵东方第五星。

二年正月戊子，太阴犯明堂北第二星。甲午，荧惑犯月星。三月戊子，太阴犯房宿北第二星。四月庚申，太阴犯罗堰上星。五月甲申，太白经天。七月乙未，太阴掩太白。丁酉，太白昼见。八月丙午，太白昼见。九月丁丑，太阴犯罗堰北第一星。戊子，太阴犯井宿东扇南第一星。十月癸丑，太阴犯建星北第三星。甲寅，太阴犯天关。十一月辛卯，岁星、荧惑、太白聚于尾宿。

三年二月甲辰，太阴犯井宿西扇北第二星。填星犯牛宿南第一星。荧惑犯罗堰南第一星。乙卯，太阴犯氏宿东南星。三月壬午，太阴又犯氏宿东南星。七月庚辰，太白犯右执法。

四年十二月壬戌，太阴犯外屏西第二星。

七年七月丙辰，太阴犯垒壁阵东第四星。十一月庚戌，太阴犯天廩西北星。

八年二月庚辰，太阴犯轩辕左角。癸未，太阴犯平道东星。三月丙辰，太阴犯建星西第一星。八月丙子，太阴犯垒壁阵西方第五星。九月己未，太阴犯灵台东北星。

九年正月庚戌，太白犯建星东第三星。辛亥，太阴犯平道西星。二月甲申，太阴犯建星西第二星。三月己亥，太白犯垒壁阵东方第六星。七月丙午，太阴犯垒壁阵东方南第一星。癸丑，太阴犯天关。九月丙戌，荧惑犯灵台上星。十一月戊辰，太阴犯毕宿左股北第三星。庚辰，太白犯垒壁阵西方第二星。十二月戊戌，太阴犯垒壁阵东方第五星。

十年正月壬申，太阴犯荧惑。二月辛丑，太阴犯平道东星。甲辰，太阴犯键闭。三月己卯，荧惑犯太微西垣上将。四月丙午，太白犯鬼宿西北星。六月，有星大如月，入北斗，震声若雷。七月辛酉，太阴犯房宿北第一星。辛未，太白昼见。壬申、丁丑、壬午，皆如之。八月癸未朔，太白昼见。丁酉，复如之。九月癸丑朔，太白昼见。壬戌，荧惑犯天江南第二星。十月癸巳，岁星犯轩辕大星。丙申，太阴犯昴宿东第二星。十一月戊辰，太阴犯鬼宿东北星。十二月乙未，太阴犯鬼宿西北星。

十一年正月丙辰，辰星犯牛宿西南星。二月庚寅，太阴犯鬼宿东北星。乙未，太阴犯太微东垣上相。丁酉，太阴犯亢宿距星。三月丁卯，太阴犯东咸第二星。戊辰，太阴犯天江西第一星。七月己未，太阴犯斗宿东第三星。壬戌，太白犯右执法。甲子，太阴犯垒壁阵东方第一星。己巳，太白犯

太微垣左执法。荧惑入犯鬼宿积尸气。八月乙酉，太阴犯天江南第二星。九月乙卯，辰星犯太微垣左执法。丁巳，太白犯房宿第二星。戊辰，太阴犯鬼宿东北星。十月戊寅，荧惑犯太微西垣上将。辛巳，太阴犯斗宿距星。乙酉，太白犯斗宿西第一星。己丑，太白昼见。荧惑犯岁星。辛卯，太白犯斗宿西第四星。癸巳，岁星犯右执法。丙午，荧惑犯太微垣左执法。十一月辛亥，孛星见于奎宿。癸丑，孛星见于娄宿。甲寅，孛星见于胃宿，乙卯，亦如之。丙辰，孛星见于昴宿。丁巳，太阴犯填星，孛星微见于毕宿。丁卯，太白昼见。庚午，岁星昼见。十二月丙子，太白昼见。丁丑，太白经天。庚辰，亦如之。太白犯垒壁阵西方第六星。甲申，太阴犯填星。丙戌，太白经天，太白犯垒壁阵西方第七星。辛卯，太白经天。壬辰、甲午，皆如之。丁酉，太白昼见，太阴犯荧惑。庚子，太白经天。辰星犯天江西第二星。辛丑，太白经天。壬寅，太白昼见。

十二年正月乙丑，太阴犯荧惑。己巳，岁星犯右执法。二月庚寅，太阴犯太微东垣上相。癸巳，太阴犯氐宿距星。三月戊午，太阴犯进贤。壬戌，太阴犯东咸西第一星。戊辰，太白昼见。五月癸酉，太白犯填星。六月辛亥，太白犯井宿东第二星。七月丁酉，辰星犯灵台北第二星。八月丁卯，太白犯岁星。九月壬辰，太阴犯轩辕南第三星。十月戊午，太阴犯鬼宿东北星。甲子，太阴犯岁星。乙丑，太阴犯亢宿南第一星。十一月庚寅，太阴犯太微东垣上相。

十三年正月乙酉，太阴犯太微东垣上相。戊戌，荧惑、太白、辰星聚于奎宿。二月乙酉，太阴犯轩辕南第三星。庚戌，

太白犯荧惑。壬子，太阴犯太微东垣上相。四月辛丑，太白犯井宿东扇北第一星。辛亥，太阴犯房宿北第二星。五月乙亥，太阴犯岁星。七月戊辰，太白昼见。九月庚寅，太阴犯荧惑。壬辰，太白经天，荧惑犯左执法。十月庚子，太白经天。甲辰，岁星犯氐宿距星。癸亥，太白犯亢宿距星。十一月壬申，太阴犯垒壁阵东方第四星。十二月丁酉，太白犯东咸北第一星。庚子，荧惑入氐宿。丁巳，太阴犯心宿距星。

十四年正月乙丑，荧惑犯岁星。丁卯，太阴犯建星西第二星。癸酉，荧惑犯房宿北第一星。二月戊午，太白犯垒壁阵西方第八星。六月甲辰，太阴入斗宿。七月乙丑，太阴犯角宿距星。壬午，太阴犯昴宿距星。十月壬子，太阴犯太微垣右执法。十一月丙子，太阴犯鬼宿东北星。十二月己亥，太阴掩昴宿。

十五年正月戊辰，太阴犯五车东南星。辛未，太阴犯鬼宿东北星。闰正月丁未，太阴犯心宿后星。丙辰，太白经天。三月庚寅，太阴犯五车东南星。五月丙申，太阴犯房宿距星。癸丑，太白经天。六月癸亥，太白经天。八月戊寅，太白昼见。九月己丑，太白昼见，太白入犯太微垣左执法。庚寅，太白昼见。十月己未，太阴犯垒壁阵西方第二星。癸酉，太阴犯轩辕大星。十一月乙酉，荧惑犯氐宿距星。庚寅，填星退犯井宿东扇北第二星。己亥，太阴犯鬼宿东北星。十二月癸丑，荧惑犯房宿北第一星。

十六年正月己丑，太阴犯昴宿西第一星。四月癸亥，荧惑犯垒壁阵西方第四星。五月壬辰，太白犯鬼宿西北星。癸巳，太白犯鬼宿积尸气。甲午，太阴入犯斗宿南第二星。丁

西，太阴犯垒壁阵西方第一星。秋七月丁酉，太阴犯垒壁阵星。八月丁卯，太阴犯昴宿西北星。甲戌，彗星见于正东，如轩辕左角大，色青白，彗指西南，约长尺余，测在张宿十七度十一分，至十月戊午灭迹，西北行四十余日。十一月丁亥，流星如酒杯大，色青白，尾迹约长五尺余，其光烛地，起自西北，东南行，没于近浊，有声如雷。壬辰，太阴犯井宿东扇上星。

十七年二月癸丑，太阴犯五车东南星。三月甲申，太阴入鬼宿积尸气，又犯东南星。壬申，岁星犯垒壁阵西南第六星。七月癸未，太白入犯鬼宿积尸气。甲申，太阴入犯斗宿距星。丁亥，填星入犯鬼宿距星。八月癸卯，填星犯鬼宿东南星，太白犯轩辕大星。己酉，岁星犯垒壁阵西方第六星。甲子，太阴犯五车尖星。闰九月，飞星如酒杯大，色青白，其光烛地，尾迹约长尺余，起自王良，没于钩陈之下。丙午，太阴犯斗宿南第三星。庚申，太阴犯井宿东扇北第一星。十月乙亥，荧惑犯氐宿距星。甲申，太阴掩昴宿。十二月庚午朔，荧惑犯天江北第一星。戊寅，太阴犯岁星。庚辰，太白犯垒壁阵东方第五星。甲申，太阴犯鬼宿距星。丁亥，岁星犯垒壁阵东方第五星。癸巳，太阴犯心宿后星，己亥，流星如金星大，尾迹约长三尺余，起自太阴，往南行，没后化为青白气。

十八年正月辛丑，填星退入，犯鬼宿积尸气。丙午，太阴犯昴宿。二月乙亥，填星入守鬼宿积尸气。三月丁卯，太白在井宿，失行于北，生芒角。荧惑犯垒壁阵东方第六星。四月辛卯，太白入犯鬼宿积尸气。五月壬寅，太白犯填星。壬

子，太阴犯斗宿东第三星。七月丁未，太阴犯斗宿南第三星。戊申，太白昼见。八月壬申，太阴掩心宿大星，甲申，太阴掩昴宿距星。十月己卯，太阴犯昴宿距星，十一月丙午，太阴犯昴宿距星，太白犯房宿上第一星。辛酉，太阴掩心宿大星。十二月戊寅，太白生黑芒，环绕其星，忽动忽静。癸未，复如之。戊子，太阴犯房宿南第二星。

十九年正月辛丑，太阴犯昴宿东第一星。癸丑，流星如酒杯大，色赤，尾迹约长五尺余，起自南河，没于腾蛇，其星落处有声如雷。三月庚戌，太阴犯房宿距星。五月丙申，荧惑入犯鬼宿积尸气。丙午，太阴犯天江南第一星。丁未，太阴犯斗宿北第二星。七月丁酉，太白犯上将。甲辰，太白犯右执法。己酉，太白犯左执法。九月甲寅，太白入犯天江南第一星。十月，太白入犯斗宿南第三星。辛巳，流星如桃大，色黄，后离一尺，又一小星相随，色赤，尾迹约长三尺余，起危宿之东，没于毕宿之西。十二月戊辰，太白犯垒壁阵西方第七星。

二十年正月己亥，太阴犯井宿东扇北第二星。丙辰，荧惑犯牛宿东角星。三月戊子朔，彗星见东扇。四月丁卯，太阴犯明堂中星。癸酉，太阴犯东咸西第一星。五月癸卯，太阴犯建星西第二星。闰五月乙亥，流星如桃大，色赤，尾迹约长丈余，起自房宿之侧，没于近浊。六月癸巳，太白犯井宿东扇北第二星。戊戌，太白犯建星西第三星。七月乙丑，太阴犯井宿距星。八月辛卯，太阴犯天江北第二星。壬寅，填星犯太微西垣上将。甲辰，太阴犯井宿钺星。十月戊子，荧惑犯井宿东扇北第一星。

二十一年正月庚申，太阴犯岁星。二月癸未，填星退犯太微西垣上将。壬寅，太阴犯天江北第一星。三月丙辰，太阴犯井宿西扇第二星。庚辰，荧惑入犯鬼宿西北星。五月壬戌，太阴犯房宿北第二星。癸酉，太白犯轩辕左角。甲戌，荧惑犯太白。六月乙未，荧惑、岁星、太白聚于翼宿。戊戌，太阴犯云雨上二星。甲辰，太白昼见。七月丙辰，太阴犯氏宿东南星。十月甲申，太阴犯牛宿距星。十一月庚戌，太阴犯建星西第四星。癸亥，太阴犯井宿东扇北第四星。壬申，太阴犯氏宿东南星。

二十二年正月戊申朔，太白犯建星西第二星。乙卯，填星退犯左执法。二月己卯，太白犯垒壁阵西方第二星。乙酉，彗星见危宿七度二十分，色青白。丁酉，彗星犯离宫西星。三月戊申，彗星不见星形，惟有白气，形曲，竟天西指，扫大角。壬子，彗星行过太阳前，惟有星形，无芒，如酒杯大，昏濛色白，测在昴宿六度，至戊午始灭。四月丙子朔，客星见于虚危之间，后四十余日乃灭。丁亥，荧惑离太阳三十九度，不见，当出不出。五月辛酉，太阴犯建星西第四星。六月辛巳，彗星见于紫微垣，测在牛宿二度九十分，色白。戊子，彗星光芒扫上宰。七月乙卯，彗星灭。丙辰，荧惑见西方，须臾成白气，如长蛇横亘中天，移时乃灭。八月癸巳，太阴犯毕宿右股第二星。九月丁未，太白犯亢宿南第一星。己酉，太阴犯斗宿北第一星。癸亥，岁星犯轩辕大星。丙寅，荧惑犯鬼宿西北星。己巳，流星如酒杯大，色青白，其光烛地。荧惑入犯鬼宿积尸气。十月己卯，太阴犯牛宿距星。丁亥，辰星犯亢宿南第一星。戊子，太阴犯毕宿距星。十二月壬辰，太

阴犯角宿距星。

二十三年正月庚戌，岁星退犯轩辕大星。二月戊戌，太白昼见。庚子，亦如之。三月辛丑，彗星见于东方。丙辰，太阴犯氏宿距星。四月辛丑，荧惑犯岁星。庚申，岁星犯轩辕大星。五月壬午，太白昼见。甲午，复如之。乙未，荧惑犯右执法。六月乙卯，太白犯井宿西扇北第二星。壬戌，太白昼见。夜，太白入犯井宿东扇南第二星。七月乙酉，太白昼见。再戌、辛卯，皆如之。八月壬寅，太白入犯轩辕大星。乙巳，太阴犯建星东第二星。丁未，太白犯轩辕左角。己酉，太白昼见。壬子，复如之。丙辰，太阴入犯毕宿北第二星。己未，太白昼见。辛酉，太白犯岁星。乙丑，太白入犯右执法。九月辛未，太白入犯左执法。乙亥，岁星入犯右执法。丁丑，辰星犯填星。丁亥，太白犯填星，辰星犯亢宿南第一星。十月癸卯，太白犯氏宿距星。戊午，太白犯房宿北第一星。十一月癸未，太阴犯轩辕右角，岁星犯太微垣左执法。

二十四年正月癸酉，太阴犯毕宿大星。戊寅，太阴犯轩辕右角。二月壬子，岁星自去年九月九日东行，入右掖门，犯右执法。出端门，留守三十余日，犯左执法，今逆行入端门，西出右掖门，又犯右执法。太阴犯西咸南第一星。四月丁未，太阴犯西咸南第一星。癸丑，太白入犯井宿东扇北第一星。五月甲戌，太白犯鬼宿西北星。乙亥，又犯积尸气。岁星入犯右执法。六月丁巳，太白犯右执法。七月癸亥，太白、岁星合于翼宿二星，相去八寸余。甲子，岁星犯左执法。八月丁未，荧惑入犯鬼宿积尸气。九月乙丑，太白昼见。甲申，太阴犯轩辕右角。戊子，荧惑犯轩辕大星。十月丙午，太阴犯

毕宿大星。己酉，太阴犯井宿东扇南第一星。丙辰，太白犯斗宿第二星。十二月乙卯，太阴犯太白。

二十五年正月丁卯，太白昼见。戊辰，复如之。太阴犯毕宿右股东第四星。甲戌，太白犯建星西第四星。二月丙午，太阴犯填星。三月戊辰，太白犯垒壁阵东方第五星。四月壬子，荧惑犯灵台东北星。五月辛酉，荧惑犯太微西垣上将。流星如酒杯大，色青白，其光烛地。起自房宿之侧，缓缓西行，没于太微垣右执法之下。七月丁丑，填星、岁星、荧惑聚于角亢。己卯，太阴犯毕宿左股北第二星。八月乙未，太阴犯建星东第三星。己亥，太阴犯垒壁阵东方第六星。九月丁丑，太阴犯井宿东扇南第一星。十月辛卯，荧惑犯天江东第二星。己酉，荧惑犯斗宿杓星西第二星。太阴犯右执法。庚戌，太阴犯太微东垣上相。闰十月戊辰，太白、辰星、荧惑聚于斗宿。太阴犯毕宿右股北第四星，又犯左股北第三星。壬申，太白犯辰星。十一月己丑，太白犯荧惑，太阴犯垒壁阵东方第五星。丙申，太阴犯毕宿大星。癸卯，太阴犯太微西垣上将。十二月丙辰，太阴犯太白。癸亥，太阴犯毕宿右股第二星。庚午，岁星掩房宿北第一星。辛未，太阴犯太微垣右执法。

二十六年正月戊戌，太阴犯太微西垣上将。辛丑，太阴犯亢宿距星。二月戊午，太阴犯毕宿大星。丁丑，岁星退行，犯房宿北第一星。岁星守钩钤。三月甲午，太阴犯左执法。四月己未，太阴犯轩辕大星。乙丑，太阴犯西咸西第一星。丙子，太白入犯鬼宿积尸气。六月癸酉，流星如酒杯大，色青白，尾迹约长尺余，起自心宿之侧，东南行，其光烛地，没于近浊。七月丁酉，荧惑犯鬼宿积尸气。甲辰，太白昼见。丙

午、丁未、戊申，皆如之。八月辛亥，太白昼见。己未，太阴掩牛宿南三星。庚午，岁星犯钩钤。乙亥，太阴掩轩辕大星。九月壬辰，太白犯太微垣右执法。庚子，孛星见于紫微垣北斗权星之侧，色如粉絮，约斗大，往东南行，过犯天棓星。辛丑，孛星测在尾十八度五十分。壬寅，孛星测在女二度五十分。癸卯，孛星测在女九度九十分。甲寅，孛星测在虚初度八十分。太阴犯太微西垣上将。乙巳，孛星出紫微北斗权星、玉衡之间，在于轸宿，东南行，过犯天棓，经渐台、犂道，去虚宿、垒壁阵西方星，始消灭焉。丙午，荧惑犯太微西垣上将。十一月乙酉，太白犯填星。丁亥，太白犯房宿北第一星。戊子，荧惑犯太微东垣上相，太白犯键闭。己酉，流星如酒杯大，分为三星，紧相随。前星色青，后二星色赤，尾迹约长二丈余，起自东北，缓缓往西南行，没于近浊。庚寅，太阴犯毕宿右股北第四星，丙申，太白、岁星、辰星聚于尾宿。庚子，太阴犯太微东垣上相。辛丑，填星犯房宿北第一星。甲辰，太白犯岁星。十二月戊午，太阴犯毕宿大星。庚申，太阴犯井宿西扇北第二星。乙丑，太阴犯轩辕左角。丙寅，太阴犯太微西垣上将。辛未，太阴犯西咸西第一星。甲戌，太阴犯建星西第三星。

二十七年正月癸巳，太阴犯太微垣上将。二月乙卯，太阴犯井宿西扇北第二星。三月辛巳，填星退犯键闭星。四月丙寅，太阴犯垒壁阵西方第四星。六月乙卯，太阴犯氐宿东北星。辛未，太阴犯井宿西扇北第二星。七月壬辰，荧惑犯氐宿东南星。丙申，太阴犯毕宿大星。己亥，太阴犯井宿东扇南第二星。八月庚戌，荧惑犯房宿北第二星。癸丑，太阴

犯建星西第二星。九月丁丑，岁星犯房宿北第一星，荧惑犯天江南第二星。乙酉，太阴犯垒壁阵东方第六星。辛卯，填星犯键闭，太阴犯毕宿大星。癸巳，太阴犯井宿西扇北第二星。丁酉，荧惑犯斗宿西第二星。十月戊午，太阴犯毕宿右股西第二星。辛酉，太阴犯井宿东扇南第三星。癸亥，太阴犯鬼宿西南星。丁卯，岁星、太白、荧惑聚于斗宿。十一月戊寅，太白昼见。庚辰，太阴犯垒壁阵东方东南第一星。

二十八年正月庚寅，彗星见于毕、昴之间，三月庚寅，又见于西北。

卷三十六

志第十

五行上

太祖十四年夏，西征，大雨雪。帝疑之，耶律楚材进曰：“克敌之征也。”明年冬，震雷。帝又疑之，楚材曰：“西域主将死矣。”已而，皆然。夫天之垂戒，无分于夷夏。夷夏虽殊族姓，又无不知天变之可畏者。或乃疑其附会失实，不亦妄乎！抑吾观楚材之占候，虽验于已事，然准以《洪范》五行之说，皆不合。于是又知机祥术数之学，或别有所承，而不必尽轨于经传也。然考天变以征人事，则岂有外于《洪范》之大义者哉！作《五行志》。

《洪范》曰：“水曰润下。”失润下之性时，则有水潦及霜

雪、冰雹、震雷之变，鱼孽、龙蛇之孽，鼓妊人，痾豕祸，其征为恒寒，其色黑，是为黑眚黑祥。

至元元年，真定、顺天、河间、顺德、大名、东平、济南等路大水。

四年五月应州大水。

五年八月，亳州大水。

六年十二月，献、莫、清、沧四州及丰州、浑源县大水。

九年九月，南阳、怀孟、卫辉、顺天等路，洺、磁、泰安、通、滦等州淫雨，河水并溢，圯田庐，害稼。

十三年十二月，济宁及高丽沈州水。

十四年六月，济宁路雨水，平地丈余，损稼。曹州定陶、武清二县，濮州、堂邑县雨水，没禾稼。十二月，冠州、永年县水。

十六年十二月，保定等路水。

十七年正月，磁州、永年县水。八月，濮州、东平、济宁、磁州水。

十八年二月，辽阳懿州、盖州水。十一月，保定清苑县水。

十九年，江南水。

二十年六月，太原、怀孟、河南等路，沁河水涌溢，坏民田一千六百七十余顷。卫辉路清河溢，损稼。南阳府唐、邓、裕、嵩四州河水溢，损稼。十月，涿州巨马河溢。

二十一年六月，保定、河间、滨、棣大水。

二十二年秋，南京、彰德、大名、河间、顺德、济南等路河水坏田三千余顷。高邮、庆元大水，伤人民七百九十五

户，坏庐舍三千九十区。

二十三年三月，雄、霸二州及保定诸县水。六月，安西路华州华阴县大雨，潼谷水涌。平地三丈余。杭州、平江二路属县水，坏民田一万七千二百顷。大都涿、瀛、檀、顺、蓟五州，汴梁、归德七县水。十月，河决开封、祥符、陈留、杞、太康、通许、鄆陵、扶沟、洧川、尉氏、阳武、延津、中牟、原武、睦州十五处。

二十四年三月，汴梁河水溢。六月，霸州益津县雨水。九月，东京谊、静、威远、婆娑路等路水。十一月，大都路水。

二十五年二月，大都水。四月，浑河决。杭州、平江、湖州、秀州大水。五月，河决襄邑。平江路水。七月，御河溢，胶州大水，民采橡为食。十二月，太原、汴梁二路河溢，害稼。

二十六年二月，绍兴大水。五月，御河溢。六月，平滦路水，坏田稼一千一百顷。八月，霸州大水。

二十七年正月，甘州、无为路大水。五月，江阴州大水。六月，河溢太康县，没民田三十一万九千亩。七月，泉州及怀孟路武陟、汴梁路祥符县皆大水。江西赣、吉、袁、瑞、建昌、抚水、皆溢。魏县御河益。八月，沁水溢。广州清远县水。九月，御河决。十月，江阴、宁国大水。十一月，河决祥符义唐湾，太康、通许二县，陈、颍二州，大被其患。易水溢，雄、莫等州皆受其患。

二十八年二月，常德路水。八月浙东婺州水。九月，平滦、保定、河间三路大水。

二十九年五月，龙兴路南昌、新建、进贤三县水。闰六

月，镇江、常州、平江、嘉兴、湖州、松江、绍兴等路府水。扬州、宁国、太平三路大水。岳州华容县水。河西务水。

三十年五月，深州静安县大水。九月，恩州水。十月，平滦路水。

三十一年五月，峡州路大水。八月，赵州宁晋县水。十月，辽阳路水。

元贞元年五月，建康溧阳州，太平当涂县，镇江金坛、丹徒等县，常州无锡州，平江长洲县，湖州乌程县，鄱阳余干州，常德沅江、澧州安乡等县水。六月，泰安州奉符、曹州济阴、兖州磁阳等县水。历城县大清河水溢，坏民居。七月，辽东利州、大都武卫屯田水。八月，平江、安丰等路大水。九月，庐州、平江二路大水。

二年五月，太原平晋县，献州交河、乐寿二县，莫州任丘、莫亭等县，湖南醴陵州水。六月，大都路益津、保定、大兴三县水，坏民田七千余顷。晋州鼓城、获鹿、藁城等县，保定葛城、归信、新安、束鹿等县，汝宁颍州，济宁沛县，扬、庐、岳、澧四路，建康、太平、镇江、常州、绍兴五路水。七月，彰德、真定、曹州、滨州水。八月，棣州、曹州水。九月，河决河南杞、封丘、祥符、宁陵、襄邑五县。十月，河决开封县。十二月，江陵潜江县，沔阳玉沙县，淮安海宁胸山、盐城等县水。

大德元年三月，归德、徐州，邳州宿迁、睢宁，鹿邑三县，河南许州临颖，鄆城等县，睢州襄邑，太康、扶沟、陈留、开封、杞等县河水大溢，漂没田庐。五月，河决汴梁，发民夫三万五千塞之。漳水溢，害稼。龙兴、南康、澧州、南

雄、饶州五路水。六月，和州历阳县江水溢，漂庐舍一万八千五百区。七月，彬州耒阳县、衡州酃县大水，溺死三百余人。九月，温州平阳、瑞安二州水，溺死六千八百余人。十一月常德武陵县大水。

二年六月，河决蒲口，凡九十六所，泛滥汴梁路、归德府，并大名、东昌、平滦等路水。

三年八月，河间路水。

四年五月，保定、真定二路、通、蓟、二州水。六月，归德睢州大水。

五年五月，宣德、保定、河间属州水。宁海州水。六月，济宁、般阳、益都、东平、济南、襄阳、平江七路水。七月，江水暴风大溢，高四五丈，连崇明、通、泰、真州定江之地，漂没庐舍，被灾者三万四千五百余户。辽阳大宁路水。八月，平、滦二州雨，滦河溢。顺德路水。

六年四月，上都水。五月，济南路大水。归德府徐州、邳州睢宁县雨五十日，沂、武二河合流，水大溢。东安州浑河溢，坏民田一千八十余顷。六月，广平路大水。

七年五月，济南、河间等路水。六月，辽阳、大宁、平滦、昌国、沈阳、开元六路雨水，坏田庐，男女死者百十有九人。修武、河阳、新野、兰阳等县赵河、湍河、白河、七里河、沁河、辽河皆溢。台州风水大作，宁海、临海二县死者五百五十人。

八年五月，太原阳武县、卫辉获嘉县、汴梁祥符县河溢，大名滑州、浚州雨水，坏民田六百八十余顷。八月潮阳飓风海溢，漂民庐舍。

九年六月，汴梁武阳县思齐口河决。东昌博平、堂邑二县水。潼川绵江、中江溢，水决入城。龙兴、抚州、临川三路水。七月，沔阳玉沙县江溢。峰州水。扬州泰兴县、淮安山阳县水。八月，归德府宁陵，陈留、通许、扶沟、太康、杞县河溢。大名元城县大水。

十年五月，雄州、灤州水。平江、嘉兴二路水，害稼。六月，保安满城、清苑二县水。大名、益都等路大水。定兴县水。七月，平江路大风，海溢。吴江州大水。

十一年六月，静海、容城、束鹿、隆平、新城等县水。七月，冀宁文水县汾水溢。十一月，杭州、平江水。卢龙、滦河、迁安、昌黎、抚宁等县水。

至大元年五月，宁夏水。六月，益都水。七月，济宁路雨水，平地丈余，暴决入城，漂庐舍，死者十有八人。真定路大水，入南门，下注藁城，死者百七十人。彰德、卫辉二路水，损稻田五千三百七十顷。九月，泰安大水。十一月，河南水。

二年七月，河决归德府，又决汴梁封丘县。

三年六月，洧州、鄆城、汶上三县水。峡州大雨，水溢，死者万余人。七月，循州、惠州大水，漂庐舍二百九十区。

四年六月，大都三河县、潞县，河东祁县、怀仁县，永平丰盈屯大水。七月，东平、济宁、般阳、保定等路大水。江陵松滋县、桂阳临武县水。

皇庆元年五月，归德睢阳县河溢。六月，大宁，水达达路水，宋瓦江溢，民避居亦母儿乞岭。八月，松江府大风，海水溢。宁国路泾县水。

二年五月，辰州沅陵县水。六月，涿州范阳县，东安州、宛平县，固安，霸州益津、永清，藁城等县水，坏田七千六百九十余顷。河决陈、亳、睢三州，开封、陈留等县。八月，崇明、嘉定二州大风，海溢。

延祐元年五月，常德路武陵县雨水，坏庐舍，溺死者五百人。六月，涿州范阳、房山二县浑河溢，坏民田四百九十余顷。七月，沅陵、卢溪二县水。八月，肇庆、武昌、岳州、建康、杭州、建德、南康、江州、临江、袁州、建昌、赣州、安丰、抚州、台州等路水。十二月，汴梁、南阳、归德、汝宁、淮安水。

二年正月，浑河决。六月，河决郑州，坏汜水县治。七月，郑州，昌平、香河、宝坻等县水。全州、永州江水溢，害稼。

三年四月，颍州泰和县河溢。七月，婺源州大水，溺死者五千三百余人。

四年正月，解州盐池水。二月，曹州水。

五年四月，庐州合肥县大水。

六年六月，河间路漳河水溢，坏民田二千七百余顷。益都、般阳、济南、东平、济宁等路，曹、濮、泰安、高唐等州大水。害稼。辽阳，广宁、沈阳、开元等路水。大名路属县水，坏民田一万八千顷。归德、汴梁府，汝宁、彰德、真定、保定、卫辉、南阳等路大水。

七年四月，安丰、庐州淮水溢，损禾麦一万顷。城父县水。六月，棣州、德州大水，坏田四千六百余顷。七月，江陵县水。上蔡、汝阳、西平等县水。八月，霸州文安、大城

二县滹沱河溢，害稼。河间路水。汾州平遥县水。是岁，河决汴梁原武县。

至治元年六月，霸州大水，浑河溢，被灾者三万余户。七月，蓟州平谷、渔阳二县，顺州邢台、沙河二县，大名魏县，永平义丰县大水。彰德临漳县漳水溢。大都固安州、东安州、宝坻县，真定元氏县，淮安清河、山阳等县水。东平、东昌二路，高唐、曹、濮等州水，害稼，乞里吉思部江水溢。八月，安陆府雨七日，江水大溢，被灾者三千五百户。雷州海康、遂溪二县海水溢，坏民田四千顷。九月，京山，长寿二县汉水溢。十月，辽阳、肇庆等路水。

二年二月，濮州大水。五月仪封县河溢。闰五月，睢阳县亳社屯大水，六月，奉元郿县，邠州新平、上蔡二县水。八月，庐州六安、舒城二县水。十一月，平江路大水，损民田四万九千六百顷。

三年五月，东安州水，坏民田一千五百余顷。真定武邑县水害稼。六月，大都永清县雨水，损田四百顷。七月灤州雨水害稼。九月，漳州、建昌、南康等路水。

泰定元年五月，灤州、固安州水。陇西县大雨水，漂死者五百余家。龙庆路雨水伤稼。六月，益都、济南、般阳、东昌、东平、济宁等路三十有二县，曹、濮、高唐、德州等处十县淫雨，水深丈余，漂没田庐。大同浑源河溢，陈、汾、顺、晋、恩、深六州雨水害稼。真定滹沱河溢，漂民庐舍。陕西大雨，渭水及黑水河溢，损民庐舍。渠州江水溢。七月，真定、河间、保定、广平等路三十有七县大雨水五十余日，害稼。大都路固安州清河溢。顺德路任县洺水溢。奉元朝邑县、

曹州楚丘县、开州濮阳县河溢。九月，延安路洛水溢。奉元长安县大雨，沔水溢。濮州馆陶县水。十二月，杭州盐官州海水大溢，坏堤堦，侵城郭，有司以石囤木柜捍之不止。

二年正月，大都宝坻县、肇庆高要县雨水。巩昌路水。闰正月，雄州归信县大水。二月，甘州路大雨水，漂没行帐孳畜。三月，咸平府清、澠二河合流，失故道，隳提堰。四月，涿州房山、范阳二县水。岷、洮、文、阶四州雨水。五月，檀州大水，平地深丈有五尺。高邮兴化、江陵公安水。浙西江湖水溢。河溢汴梁，被灾者十有五县。六月，通州三河县大雨，水丈余。冀宁路汾河溢。潼江府绵江、中江水溢入城，深丈余。卫辉汲县、归德宿州大水。济宁路虞城、砀山、单父、丰、沛五县水。七月，睢州河决。八月，霸州、涿州，永清、香河二县大水，伤稼九千五十余顷。九月，开元路三河溢，没民田，坏庐舍。十月，宁夏鸣沙州大雨水。曹州属县水。十月，常德路水。

三年正月，恩州水。二月，归德府河决。六月，大同县大水。汝宁光州水。大昌屯河决。七月，河决郑州，漂没阳武等县民一万六千五百余家。东安、檀、顺、灤四州雨，浑河决，温榆水溢，伤稼。延安路肤施县水。漂民居九十余户。八月，盐官州大风海溢，捍海堤崩，广三十余里，袤二十里，徙居民千二百五十家以避之。真定蠡州，奉元蒲城县，无为州，历阳、含山等县水。九月，平遥县汾水溢。扬州、宁国、建德诸属县水。十一月，崇明州三沙镇海溢，漂民居五百家。十二月，辽东大水。大宁路瑞州大水，坏民田五千五百顷，庐舍八百九十所，溺死者百五十人。

四年正月，盐官州潮水大溢，捍海堤崩二千余步。三月，浑河决。五月，睢州河溢。六月，大都东安、固安、通、顺、蓟、檀、漵七州，永清、良乡等县雨水。七月，上都云州大雨。北山黑水河溢。云安县水。衢州大水。八月，汴梁扶沟、兰阳二县河溢，漂民居一千九百余家。济宁虞城县河溢，伤稼。滹沱河溢。崇明州海门县海溢。十二月，夏邑县河溢。汴梁中牟、开封、陈留三县，归德邳、宿二州雨水。

致和元年三月，盐官州海堤崩，遣使祷祀，造浮图二百十六，用西僧法厌之。河决碭山、虞城二县。四月，盐官州海溢，益发军民塞之，置石囤二十九里。广宁路大水。崇明州海溢。六月，南宁、开元、永平等路水。河间临邑县雨水。益都、济南、般阳、济宁、东平等路三十县，濮、德、泰安等州九县，雨水害稼。七月，广西两江诸州水。

天历元年八月，杭州、嘉兴、平江、湖州、建德、镇江、池州、太平、广德九路水。没民田万四千余顷。

二年六月，大都东安、通、蓟、霸四州，河间靖海县雨水害稼。永平昌国诸屯水。

至顺元年六月，河决大名路长垣、东明二县，没民田五百八十余顷。曹州、高唐等州水。前后武卫屯田水。七月，海潮溢，漂没河间运司盐二万六千七百引。闰七月，平江、嘉兴、湖州、松江三路一州大水，坏民田三万六千六百余顷，被灾者四十万五千五百余户。杭州、常州、庆元、绍兴、镇江、宁国等路，望江、铜陵、长林、宝应、兴化等县水，没民田一万三千五百余顷。大都、保定、大宁、益都属州县水。

二年四月，潞州潞城县大雨水。五月，河间莫亭县、宁

夏河渠县、绍庆彭水县及德安屯田水。六月，大都、保安、真定、河间、东昌诸路水。彰德属县漳水决。十月，吴江州大风，太湖水溢，漂民居一千九百七十余家。十二月，深州、晋州水。

三年三月，奉元朝邑县洛水溢。五月，汴梁河水溢。江都、泰兴、云梦、应城等县水。滹沱河决，没河间清州等处屯田。汾州大水。六月，无为州、和州水。九月，莒、沂二州及泰安奉符县、济宁鱼台县，曹州楚邱县，平江、常州、镇江三路皆大水。

元统元年五月，汴梁阳武县河溢，害稼。六月，京畿大霖雨水，平地丈余。泾河溢，关中水灾。黄河大溢，河南水灾。泉州霖雨，溪水暴涨，漂民居数百家。七月，潮州大水。

二年正月，东平须城县、济宁济州、曹州济阴县水灾。二月，滦河、漆河溢，永平路属县皆水。瑞州路水。三月，山东霖雨，水涌。四月，东平、益都水。五月，镇江路水。宣德府大水。六月，淮水涨，漂山阳县境内民畜房舍。九月，吉安路水。

至元元年，河决汴梁封丘县。

二年五月，南阳邓州大水。六月，泾水溢。八月，大都至通州霖雨，大水。

三年二月，绍兴大水。五月广西贺州大水害稼。六月，卫辉淫雨至七月，丹沁、二河泛涨，与城西御河通流，平地深二丈余，漂没人民房舍田禾甚众。民栖于树上，达鲁花赤僧家奴以舟载饭食之，移老弱居城上，日给廩食，月余水方退。汴梁兰阳、尉氏二县，归德府皆河水泛滥。黄州及衢州常山

县皆大水。

四年正月，河决曹州，又决汴梁。五月，吉安永丰县大水。黄河溢，平地水二丈，决白茅堤、金堤。六月，邵武大水，城市皆洪流，漂沿溪民居殆尽。

五年五月庚戌，汀州路长汀县大水，平地深三丈许，损民居八百家，坏民田二百顷，溺死者八千余人。七月，沂州沂、沐二河暴涨，决堤防，害田稼。邵武光泽县大水。常州宜兴州山水出，高一丈，坏民居。

六年二月，京畿五州十一县及福州路福宁州皆大水。五月甲子，庆元奉化州山崩，水涌出平地，溺死人甚众。六月，衢州西安、龙游二县大水。庚戌，处州松阳、龙泉二县积雨，水涨入城中，深丈余，溺死五百余人。遂昌县尤甚，平地三丈余。桃源乡山崩，压溺人民五十三家，死者三百六十余人。秋，河北大水。七月壬子，延平南平县淫雨，水泛涨，溺死百余人，损民居三百余家，坏民田二顷七十余亩。乙卯，奉元路盩厔县河水溢，漂溺居民。八月甲午，卫辉大水，漂民居一千余家。十月，河南府宜阳县大水，漂民居，溺死者众。

至正元年，汴梁钧州大水，扬州路崇明、通、泰等州海潮涌溢，溺死一千六百余人。

二年四月，睢州仪封县大水害稼。六月癸丑夜，济南山水暴涨，冲东西二关，流入大清河，黑山、天麻、石固等寨及卧龙山水通流入大清河，淹没上下民居千余家，溺死者无算。

三年二月，巩昌宁远、伏羌、成纪三县山崩，水涌，溺死者无算。五月，黄河决白茅口，七月，汴梁中牟、扶沟、尉

氏、洧川四县，郑州荥阳、汜水、河阴三县大水。

四年五月，霸州大水。六月，河南巩县大雨，伊、洛水溢。漂民居数百家。济宁路兖州，汴梁鄆陵、通许、陈留、临颖等县，大水害稼，人相食。七月，滦河水溢，出平地丈余，永平路禾稼庐舍漂没甚众。东平路东阿、阳谷、汶上、平阴四县，衢州西安县大水。温州飓风大作，海水溢，漂民居，溺死者甚众。

五年七月，河决济阴，漂官民亭舍殆尽。十月，黄河泛溢。

七年五月，黄州大水。八月壬午，杭州、上海浦中午潮退而复至。

八年正月辛亥，河决，淹济宁路。四月，平江、松江大水。五月庚子，广西山水涌，漓江溢，平地水深二丈余，屋宇人畜漂没。壬子，宝庆大水。乙卯，钱塘江潮比之八月中高数丈余，沿江民皆迁居以避之。六月己丑，中兴路松滋县骤雨，水暴涨，平地深丈五尺余，漂没六十余里，死者一千五百人，是月，胶州大水。七月，高密县大水。

九年七月，中兴路公安、石首、潜江、监利等县及沔阳府大水。夏秋，蕲州大水，伤稼。

十年五月，龙兴瑞州大水。六月乙未，灵州灵石县雨水暴涨，决堰，漂民居甚众。七月，汾州平遥县汾水溢。静江荔浦县大水害稼。

十一年夏，龙兴南昌、新建二县大水。安庆桐城县雨水泛涨，花崖、龙源二山崩，冲决县东大河，漂民居四百余家。七月，冀宁路平晋、文水二县大水，汾河泛溢东西两岸，漂

没田禾数百顷。河决归德府永城县，坏黄陵冈岸。静江路大水，决南北二渠。

十二年六月中兴路松滋县骤雨，水暴涨，漂民居千余家，溺死七百人。七月，衢州西安县大水。

十三年夏，蓟州丰润、玉田、遵化、平谷四县大水。七月丁卯，泉州海水日三潮。

十四年六月，河南府巩县大雨，伊、洛水溢，漂没民居，溺死三百余人。秋，蓟州大水。

十五年六月，荆州大水。

十六年，河决郑州河阴县，官署民居尽废，遂成中流。山东大水。

十七年六月，大雨，漳河溢，广平路皆水。秋，蓟州五县皆大水。

十八年秋，京师及蓟州、广东惠州、广西贺州皆大水。

十九年九月，济州任城县河决。

二十年七月，通州大水。

二十二年三月，邵武光泽县大水。

二十三年，孟州济源、温县水。七月，河决东平寿张县，圯城墙，漂田庐，人溺死甚众。

二十四年三月，益都县井水溢而黄。怀庆路孟州、河内、武陟县水。七月，益都路寿光县、胶州高密县水。

二十五年秋，东平须城、东阿、平阴三县，河决小流口，达于清河，坏民居，伤禾稼。

二十六年二月，河北徙，上自东明、曹、濮，下及济宁，皆被其害。六月，河南府大霖雨，瀍水溢，深四丈许，漂东

关居民数百家。秋七月，汾州介休县汾水溢。蓟州四县、卫辉、汴梁钧州俱大水害稼。八月，棣州大清河决，滨、棣二州之界，民居漂流者众。济宁路肥城县西黄水泛滥，漂没田禾民居百有余里，德州齐河境七百余里亦如之。

至元十五年十二月，黄河清，自孟津东柏谷至汜水县蓼子谷，上下八十余里，澄莹见底，数月始如故。

元贞元年闰四月，兰州上下三百余里，河清三日。

至正十四年正月甲子朔，汴梁城东汴河冰作五色花草，三月方解。

十九年，郑州黄河清，长数里。

二十年十一月，汴梁原武、荥泽二县，黄河清三日。

二十一年十一月，河南孟津县至绛州垣，曲县二百里，河清七日，新安县亦如之。十二月，冀宁路石州河水清，至明年春冰泮始如故。

二十四年夏，卫辉路黄河清。

中统二年五月，西京、宣德陨霜杀禾。

三年五月，宣德、咸宁等路陨霜。八月，河间、平滦等路陨霜害稼。

四年四月，武州陨霜杀麦禾。

至元二年八月，太原陨霜害稼。四月，檀州陨霜。

八年七月，巩昌会、兰等州霜杀稼。

十七年四月，海宁州及益都路陨霜。

二十一年三月，山东陨霜，杀桑蚕尽死，被灾者三万余

家。

二十六年七月，济南棣州损霜杀菽。

二十七年七月，大同、平阳、太原陨霜杀禾。十一月，兴、松二州及兴隆路亦如之。

二十九年三月，济南、般阳等路及恩州属县霜杀桑。

元贞二年八月，金、复州陨霜杀禾。

大德五年三月，汤阴县霜杀麦。五月，商州霜杀麦。

六年八月，大同、太原霜杀禾。

七年四月，济南路陨霜杀麦。五月，般阳路陨霜。

八年三月，济阳、滦城二县霜杀桑。八月，太原交城、阳曲、管州、岚州，大同怀仁陨霜杀稼。

九年三月，河间、益都、般阳属县陨霜杀桑。清、莫、沧、献四州霜杀桑一百四十一万七十余本，坏蚕一万二千七百余箔。

十年七月，大同浑源县霜杀禾。八月，绥德州米脂县霜杀禾二百八十顷。

至大元年八月，大同陨霜杀禾。大名路陨霜。

四年七月，大宁等路陨霜。

皇庆二年三月，济宁霜杀桑。

延祐元年三月，东平、般阳等路，泰安、曹、濮等州大雨雪三日，陨霜杀桑。闰三月，济宁、汴梁等路，及陇州、开州、青城、渭源诸县霜杀桑，无蚕。七月，冀宁陨霜杀禾。

四年夏，六盘山陨霜杀禾五百余顷。

五年五月，雄州归信县陨霜。

六年三月，奉元路同州陨霜。七年八月，益津县雨黑霜。

至治二年五月，辽东路陨霜。

三年七月，冀宁曲阳县、大同路大同县、兴和路咸宁县陨霜。八月，袁州宜春县陨霜杀禾。

泰定二年三月，云需府大雪，民饥。

至顺元年二月，京师大霜，昼雾。闰七月，奉元西和州，宁夏应理州、鸣沙州，巩昌静宁、邠、会等州，凤翔麟游，大同山阴，晋宁潞城、隰州等县陨霜杀禾。

三年八月，浑源、云内二州陨霜杀禾。

至正六年九月，彰德雨雪，结冻如琉璃。

七年八月，卫辉陨霜杀禾。九月三日，温州大雪。

十年春，彰德大寒，近清明节，雨雪三尺，民多冻馁而死。

十一年三月，汴梁路钧州大雨雪，密县平地雪深三尺余。

十三年秋，邵武光泽县陨霜杀禾。

二十三年三月，东平路须城、东阿、阳谷三县陨霜杀桑，废蚕事。八月，钧州密县陨霜杀菽。

二十七年三月，彰德大雪，寒甚于冬，民多冻死。五月辛巳，大同陨霜杀麦。秋，冀宁路徐沟、介休二县雨雪。十二月，奉元路咸宁县井水冰。

二十八年四月，奉元陨霜杀菽。

中统二年四月，雨雹。

三年五月，顺天、平阳、真定、河南等郡雨雹。

四年七月，燕京昌平县，景州蓟县，上都路兴、松、云三州雨雹害稼。

至元二年八月，彰德、大名、南京、河南、济南、太原等路雨雹。

四年三月，夏津县大雨雹。

五年六月，中山大雨雹。

六年二月，兴国雨雹，大如马首，杀禽兽。七月，西京大同县雨雹。

七年五月，河内县大雨雹。

十五年闰十一月，海州赣榆县雨雹伤稼。

十六年，保定等二十余路雨雹。

十九年八月，雨雹，大如鸡卵。

二十年四月，河南风雷雨雹害稼。五月，安西路风雷雨雹。八月，真定元氏县大风雹，禾尽损。

二十二年七月，冠州雨雹。

二十四年九月，大定、金源、高州、武平、兴中等处雨雹。是岁，西京、北京、隆兴、平滦、南阳、怀孟、巩昌等路雨雹。

二十五年三月，灵璧、虹县雨雹，如鸡卵，害麦。五月，孟州乌河川雨雹。十二月，灵寿、阳曲、天成等县雨雹。

二十六年夏，平阳、在同、保定等路大雨雹

二十七年四月，灵寿、元氏二县大风雹。六月，棣州厌次、济阳二县大风雹，伤禾黍菽麦桑枣。

二十九年闰六月，辽阳、沈州、广宁、开元等路雨雹。

三十年六月，易州雨雹。

三十一年四月，即墨县雨雹。五月，密州路诸城、大都路武清雨雹。七月，阳信县雨雹。真定路南宫、新河、易水、

涑水等县雨雹。八月，德州德安县大风雨雹。

元贞元年五月，巩昌金州、会州、和州雨雹大，无麦禾。七月，隆兴路雨雹。

元贞二年五月，河中猗氏县雨雹。六月，大同、隆兴咸宁县，顺德邢台县，太原交河、离石、寿阳等县雨雹。七月，太原、怀孟、武陟县雨雹。

大德元年六月，太原崞州雨雹害稼。

二年二月，檀州雨雹。八月，彰德安阳县雨雹。

三年八月，隆兴、平滦、大同、宣德等路雨雹。

四年三月，宣州泾县、台州临海县风雹。五月，同州、平滦、隆兴雹。

五年七月，雨雹。

八年五月，大宁路建州，蔚州灵仙县雨雹。太原、大同、隆兴属县阳曲、天成、怀安、白登风雹害稼。八月，管州、岚州、交城、阳曲、怀仁等县雨雹。

九年六月，晋宁、冀宁、宣德、隆兴、大同等路大雨雹，害稼。

十年四月，郑州管城县风雹，大如鸡卵，积厚五寸。五月，大雨雹。七月，宣德县雨雹。

十一年五月，建州雨雹。

至大元年四月，般阳新城县、济南厌次县、益都高苑县大风雨雹。五月，管城县大雹，深一尺，无麦禾。八月，大宁县雨雹害稼，毙人畜。

二年三月，济阴、定陶等县雨雹。六月，崞州、源州、金城县雨雹。延安神木县大雹一百余里，毙人畜。

三年四月，灵寿、平阴等县雨雹。四年四月，南阳雨雹。闰七月，大同宣宁县雨雹。

皇庆元年四月，大名浚州、彰德安阳县、河南孟津县雨雹。六月，开元路风雹害稼。

二年七月，冀宁平定州雨雹。景州阜县风雹。八月，大同怀仁县雨雹。

延祐元年五月，肤施县大风雹，损稼并伤人畜。六月，宣平、仁寿、白登等县雨雹。

二年五月，大同、宣德等路雹害稼。

三年五月，蓟州雹，深一尺。

五年四月，凤翔府雹伤麦禾。

六年六月，大同雨雹，大如鸡卵。晋阳、西凉、钧州、阳翟、新郑、密等县大雨雹。七月，巩昌陇西县雹害稼。

七年八月，大同路雷风雨雹。

至治元年六月，武州雨雹害稼。永平路大雹，深一尺，害稼。七月，真定、顺德、大同等路雨雹。

二年四月，泾州泾川县雨雹。六月，思州大风雨雹。

三年五月，大风雨雹，拔柳林行宫大木。十三月，辽阳雨雹。

泰定元年五月，冀宁阳曲县雨雹伤稼。思州龙泉县雨雹伤麦。六月，顺元、太平军、定西州、宣德府、巩昌县及八番等处雨雹。七月，龙庆路雨雹，大如鸡卵，平地深三尺余。八月，大同白登县雨雹。十二月，延安路雹。

二年四月，奉元白水縣雨雹。五月，洮州路可当县、临洮府狄道县雨雹。六月，兴州、邠州、静宁州及成纪、通渭、

白水、肤施、安塞等县雨雹。七月，檀州，延安鄜州、绥德、巩昌等路，八月，大都路檀州、巩昌府静宁县、延安州路安塞县，九月，檀州，并雨雹。

三年六月，巩昌路大雨雹。中山府安喜县、乾州永寿县雨雹。七月，完州，房山、宝坻、玉田等县大风雹，折木伤稼。八月，龙庆州雨雹一尺，大风损稼。

四年五月，常州、淮安二路，宁海州大雨雹。六月，中山雨雹。七月彰德汤阴县，冀宁定襄县，大同武、应州雨雹害稼。

致和元年四月，浚州、涇州大雹伤麦禾。五月，冀宁阳曲县、威州井陘县雨雹。六月，涇川、汤阴等县大雨雹。大宁、永平属县雨雹。

天历二年七月，大宁惠州雨雹。八月，冀宁阳曲县大雹，如鸡卵，害稼。

三年七月，顺州、东安州及平棘、肥乡、曲阳、行唐等县风雹害稼。开元路雨雹。

至顺二年七月，冀宁路雨雹。十二月，冀宁清源县雨雹。是年，黄梅县雨雹。

三年五月，甘州雨雹。

元统元年三月戊子，绍兴萧山县大风雨雹。拔木仆屋，杀麻麦，毙伤人民。

二年二月甲子，塞北东凉亭雨雹。

后至元年七月，西和州、徽州雨雹。

二年八月甲戌朔，高邮宝应县大雨雹。是时，淮浙皆旱，唯本县濒河田禾可刈、悉为雹所害，凡田之旱者，无一雹及

之。四年四月癸巳，清州八里塘雨雹，大过于拳，其状有如龟者，有如小儿形者，有如狮象者，有如环玦者，或椭如卵，或圆如弹，玲珑有窍，色白而坚，长老云：“大者固常见之，未有形状若是者。”

至正二年五月，东平路东阿县雨雹，大者如马首。

三年六月，东平阳谷县雨雹。

六年二月辛未，兴国路雨雹，大如马首小者如鸡子，毙禽畜甚众。五月辛卯，绛州雨雹，大者二尺余。

八年四月庚辰，钧州密县雨雹，大如鸡子，伤麦禾。龙兴奉新县大雨雹，伤禾折木。八月己卯，益都临淄县雨雹，大如杯孟，野无青草，赤地如赭。

九年二月，龙兴大雨雹。

十年五月，汾州平遥县雨雹。

十一年四乙巳，彰德雨雹，大如斧，时麦熟将刈，顷刻亡失，田畴坚如筑场，无秸粒遗留，其地广三十里，长百余里，树木皆如斧所劈，伤行人、毙禽畜甚众。五月癸丑，文水县雨雹。

十三年四月，益都高苑县雨雹伤麦禾及桑。

十四年六月，蓟州雨雹。

十七年四月，济南大风雨雹。八月，庆阳镇原州大雨雹。

十九年四月，莒州蒙阴县雨雹。五月，通州及益都临朐县雨雹害稼。

二十年五月，蓟州遵化县雨雹终日。

二十一年五月，东平雨雹害稼。

二十二年八月，南雄雨雹如桃李实。

二十三年五月，鄜州宜君县雨雹，大如鸡子，损豆麦。七月，京师及隰州永和县大雨雹害稼。

二十五年五月，东昌聊城县雨雹，大如拳，小如鸡子，二麦不登。

二十六年六月，汾州平遥县雨雹。

二十七年二月乙丑，永州城中昼晦，鸡栖于埘，人举灯而食，既而大雨雹，逾时方明。五月，益都大雷雨雹。七月，冀宁徐沟县大风雨雹。拔木害稼。

二十八年六月，庆阳府雨雹，大如盂，小者如弹丸，平地厚尺余，杀苗稼，毙禽兽。

太祖五年冬，大雷。

至顺三年五月己巳，天鼓鸣于西北。

至正三年秋，兴国路永兴县雷，击死粮房帖书尹章于县治。

七年五月庚戌，台州路黄岩州海滨无云而雷。冬，卫辉路天鼓鸣。

十年六月戊申，广西临桂县无云而雷，震死邑民廖广达。十二月庚子，汾州孝义县雷雨。

十一年十二月，台州大雨震雷。

十二年三月丙午，宁国路无云而雷。

十三年十二月庚戌，京师无云而雷，少顷有火坠于东南。怀庆路河内县及河南府天鼓鸣于东北。是日，怀庆之修武、潞州之襄垣县皆无云而雷，声震天地。是月，汾州雷雨。

十四年十二月，孝义县雷雨。

十九年二月，台州大雷电。

二十一年十一月戊申，温州乐清县雷。

二十二年十月，大雨雷电。

二十四年，雷击延春阁西脊。

二十七年乙未夜，晋宁路绛州天鼓鸣空中，如闻战斗之声。十月，奉元路雷电。

至正二十五年六月戊申，京师大雨，有鱼随雨而落，长尺许，人取而食之。

至元二十年，有苍龙见卫辉农家。

后至元五年六月庚戌，汀州长汀县蛟出，大雨骤至，平地涌水，深三丈余，漂没民居八百余家，坏田二百余顷。

至正十五年七月，嘉兴城东，白龙见，烈风暴雨。

十七年六月癸酉，温州有龙斗于乐清江中，飓风大作，所至有光如球，死者万余人。八月癸丑，祥符县西北有青白二龙见，若相斗之势，良久而散。

二十三年正月甲辰，广西贵州江中有物登岸，蛇首四足而青色，长四尺许，军民聚观杀之。

二十四年六月，保德州有黄龙见于咸宁井中。

二十七年六月丁巳，皇太子寝殿新斡井成，有龙自井而出，光焰烁人，宫人震慑仆地。又宫墙外长庆寺所掌成宗斡耳朵内大槐树有龙缠绕其上，良久飞去，树皮皆剥。七月，益都临朐县有龙见于龙山，巨石重千斤，浮空而起。

二十八年十一月，大同路怀仁县河岸崩，有蛇大小相绾结，可载数车。

中统二年九月，河南民王四妻靳氏，一产三男。

至元元年，黄冈民妇生男狗头。

二年正月，武城县王甲妻崔，一产三男。

八年，昌黎县民生子，中夜有光，或以为非常。帝曰：“何幸生一好人，毋嫉也。”

十年八月，甲寅，凤翔宝鸡县刘铁牛妻，一产三男。

二十年二月，高州张丑妻李氏，一产四子，三男一女。四月，固安州王得林妻张氏，怀孕五月，生一男，四手四足，圆头三耳，一耳附脑后，生而即死，具状有司上之。

二十二年四月，江陵县民张二妻，一产三男。

二十八年九月，襄阳南漳县民李氏妻黄，一产三子。

大德元年五月，遂宁州军户任福妻，一产三男。十一月，辽阳打雁孛兰奚户那怀妻和里迷。一产四男。

四年，宝应县民孙奕妻朱氏，一产三男。

十年正月，江州湖口县赵丙妻甘氏，一产四男。

泰定元年十月乙卯，秦州成纪县赵思直妻张氏，一产三子。

致和元年三月壬辰，太平当涂县杨太妻吴氏，一产三子。

至元元年正月，云南妇人一产三男。又广西师宗州步生妻适和，一产三男。汴梁祥符县市中一乞丐妇人，忽生髭须。

二年四月，黄冈县周氏妇，产一男，狗头人身，即死。

至正九年四月，枣阳民张氏妇，生男，甫及周岁，长四尺许，容貌异常，皤腹臃肿，见人辄嬉笑，如世俗所画布袋和尚云。

二十三年五月，霸州民王马驹妻赵氏，一产三男。六月，

亳家务李润妻张氏，一产三男。

至正三年秋，建宁浦城县民豕生豚，二尾八足。

十一年，镇江民家豕生豚，如象形。

十二年，江宁陆氏家一猪生十四豚，内一豚，人首豕身。二十四年正月，保德州民家豚生豚，一首二身八蹄二尾。又海盐赵氏宰猪，小肠忽如蛇，宛延而走，及里许方止。

至元七年四月壬午，檀州雨黑霜。

元贞二年，处州天雨米，黑色。

大德十年二月，大同路黑霜。

延祐七年八月，益津路雨黑霜。

至正元年四月戊寅，彰德有赤风自西北来，忽变为黑，昼晦如夜。

十一年十月，天雨黑子于饶州，衢州亦如之。十二月，建宁浦城雨黑子。

十三年正月二十三日，黑气亘天。冬，袁州路每日暮，有黑气环绕郡城。

十七年正月己丑，杭州降黑雨，河池水皆黑。

二十八年，七月乙亥，京师黑雾，昏暝不辨人物，自旦近午始消，如是者旬有五日。

卷三十七

志第十一

五行中

《洪范》曰：“火曰炎上”。失炎上之性，时则有火灾、草妖、羽虫之孽、羊祸。其征恒燠，其色赤，是为赤眚赤祥。

定宗三年戊申，野草自焚，牛马十死八九，民不聊生。

至元十一年十二月，淮西正阳火，庐舍、铠仗悉毁。十八年二月，扬州火。

元贞二年，杭州火，燔七百七十家。

大德八年五月，杭州火，燔四百家。九年三月，宜黄、兴国之大冶等县火。十年十一月，武昌路火。

延祐元年二月，真州扬子县火。三年八月，重庆路火，郡舍十焚八九。六年四月，扬州火，燔官民庐舍一万三千三百余区。

至治二年四月，扬州、真州火。十二月，杭州火。三年五月，奉元路行宫正殿火。上都利用监库火。九月，扬州江都县火，燔四百七十余家。

泰定元年五月，江西袁州火，燔五百余家。三年六月，龙兴路宁州高市火，燔五百余家。七月，龙兴奉新州、辰州辰溪县火。八月，杭州火，燔四百七十余家。四年八月，龙兴路火。十二月，杭州火。燔六百七十家。

天历二年三月，四川绍庆彭水县火。四月，重庆路火，延二百四十余家。七月，武昌路江夏县火，延四百家。十二月，江夏县火，燔四百余家。三年四月，河内诸县火。

至顺元年五月丁酉，杭州火，池州火。

元统元年六月甲申，杭州火。

至正元年四月辛卯，台州火。乙未，杭州火，燔官舍民居公廨寺观凡一万五千七百余间，死者七十有四人。二年四月，杭州又火。六年八月己巳，延平路火，燔官舍民居八百余区，死者五人。十年，兴国路自春及夏，城中火灾不绝，日数十起。二十年，惠州路城中火灾屡见。二十三年正月乙卯夜，广西贵州火，同知州事韩贴木不花、判官高万章及家人九口俱死焉，居民死者三百余人，牛五十头，马九匹、公署仓库案牒焚烧皆尽。二十八年二月癸卯，京师武器库灾。己巳，陕西有飞火自华山下流入张良弼营中，焚兵库器仗。六月甲寅，大都大圣寿万安寺灾。是日未时，雷雨中有火自空而下，其殿脊东鳌鱼口火焰出，佛身上亦火起。帝闻之泣下，亟命百官救护，唯东西二影堂神主及宝玩器物得免，余皆焚毁。

至元二年八月丙寅，济南邹平县进芝一本。八年八月癸酉，益都济州进芝二本。是年，武安文庙大成殿产芝，九茎金色，叩之有金玉声。十五年四月，济南历城县进芝。十九年六月，芝生眉州青神县景德寺。二十二年十月，长葛、鄆城各产芝草。二十三年四月丁未，江东宣慰司进芝一本。十月，济宁进芝二本。二十六年三月癸未，东流县献芝。四月，

池州贵池县民王逸进紫芝十二本。六月，汲县民朱良进紫芝。二十八年三月，芝生钧州阳翟县。二十九年六月，芝生贺州。

大德五年十二月，兴元西乡县进芝一本，色如珊瑚。六年正月，济南邹平县进芝一本，五枝五叶，色皆赤。

至大四年八月，芝生国学大成殿。

延祐二年三月，芝生大成殿。五年七月，芝生大成殿。

后至元元年十二月，芝草生于荆门州当阳县覆船山，一本五千，高尺有二寸，一本二千，高五寸有半，干皆两歧；二本相依附，扶疏瑰奇，如珊瑚枝，其高者结为华盖庆云之状。五年十二月，芝草生于中书工部之屋梁，一本七干。

至正六年夏，西湖书院生瑞草。

至元十一年十月，衢州东北雨米如黍。十一月，建宁浦城县雨黑子如稗实。邵武大雨震电，雨黑黍如芦稭。信州雨黑黍。鄱阳县雨菽豆，郡邑多有饥民，皆取而食之。十六年六月，彰德路苇叶顺次倚叠而生，自编成若旗帜，上尖叶聚粘如枪。民谣云：“苇生成旗，民皆流离。苇生成枪，杀伐遭殃。”又有百黍自生成文，红秸黑字，其上节云：“天下太平”，其下节云：“天下刀兵”。十八年，处州山谷中，小竹结实如小麦，饥民采食之。二十一年，明州象山县竹穗生实，如小米，可食。

至正十一年，广西庆远府有异鸟飞见于述昆乡，飞鸟千百随之，盖凤凰云。其一飞去，其一留止者为獐人射死，首长尺许，毛羽五色。有藏之以献于帅府者，久而其色鲜明如

生云。五月，兴国有大鸟百余，飞至郡西白朗山颠，状如人立，去而复至者数次。十九年，京师鸛鶒夜鸣达旦，连月乃止。有杜鹃啼于城中，居庸关亦如之。二十三年，野鸽巢兴圣宫，数年蕃息数千，驱之不去。二十七年三月丁丑朔，莱州招远县大社里黑风大起，有大鸟自南飞至，其色苍白，展翅如席，状类鹤，俄顷飞去，遗下粟黍稻麦黄黑豆荞麦于张家屋上，约数升许。是岁大稔。至元十五年四月，济南无棣县献白雉。

中统二年正月辛未，御帐殿受朝贺，是夜东北有赤气照人，大如席。

元统二年正月庚寅朔，河南省雨血。众官晨集，忽闻燔柴烟气，既而黑雾四塞，咫尺不辨，腥秽逼人，逾时方息。及行礼毕，日过午，骤雨随至，沾洒垂墙及裳衣皆赤。

至元四年四月辛未，京师雨红沙，昼晦。

至正五年四月，镇江丹阳县雨红雾，草木叶及行人裳衣皆濡成红色。十三年三月丙戌，彰德路西南，有火自天而下，如在城外，觅之无有。十二月庚戌，京城有火见于东南。潞州襄垣县有火坠于东南。十四年，卫辉路有天光见于西方。十二月辛卯，绛州有红气起自北方，蔽天几半，移时方散。十五年春，蓟州雨血。十八年三月辛丑夜，大同路有黑气蔽于西方，声如雷然。俄顷，有云如火，交射中天，遍地俱见火光，以物触地，辄以火起。至夜半，空中如有兵戈相击之声。二十一年七月己巳，冀宁路忻州西北，有赤气蔽空如血，逾时方散。八月壬午，棣州夜半有赤风亘天，起西北至于东北。癸未，彰德西北，夜有红气亘天，至明方息。乙酉，大同路

北方，夜有赤气蔽天，直过天庭，自东而西，移时方散，如是者三。十月癸巳昧爽，绛州有红气见于北方，如火。二十三年三月壬戌，大同路夜有赤气亘天，中侵北斗。六月丁巳，绛州日暮有红光见于北方，如火，中有黑气相杂，又有白虹二，直冲北斗，逾时方散。庚申，晋宁路北方，日暮天赤，中有白气如虹者三，一贯北斗，一贯北极，一贯天横，至夜分方灭。八月丙辰，忻州东北，夜有赤气亘天，中有白色如蛇形，徐徐而行，逾时方散。十月丙申朔，大名路向青、齐一方，有赤气照耀千里。二十四年九月癸酉，冀宁平晋县西北方，至夜天红半壁，有顷，从东而散。二十八年六月壬寅，彰德路天宁寺塔忽变红色，自顶至踵，表里透彻，如煅铁初出于炉，顶上有光焰迸发，自二更至五更乃止。癸卯、甲辰亦如之。先是，河北有童谣云：“塔见黑，北人作主南人客。塔儿红，朱衣人作主人公。”七月癸酉，京师赤气满天，如火照人，自寅至辰，气焰方息。

《洪范》曰：“木曰曲直。”失曲直之性，时则有木冰、木妖、狂人鼠孽，时则有鸡祸。其征恒雨，其色青，是为青眚青祥。

至元三十年正月，雨木冰三日。

大德七年十一月辛酉，木冰。

至顺二年十一月丁巳，雨木冰。十二月癸亥，雨木冰。

后至元五年十一月癸酉，瑞州路新昌州雨木冰，至明年二月壬寅，冰始解。

至正四年正月，汴梁路郑州尉氏、洧川、河阴三县及龙

兴靖安县雨木冰。十一月，东平雨木冰。十二年九月壬午，冀宁保德州雨木冰。十四年冬，龙兴雨木冰。二十五年二月辛亥，汴梁雨木冰，状如楼阁、人物、冠带、鸟兽、花卉，百态具备，羽幢珠葆，弥望不绝，凡五日始解。

至元十九年，处州丽水县樟树生梨，可食。

元贞元年，太平路芜湖县进榆木，有文曰“天下太平年。”后至元三年夏，上都、大都桑果叶皆有黄色龙文。

九年秋，奉元桃杏实。十一年夏，松江普照寺敝帚开花。嘉兴儒学阍人陶氏，磨上木肘发青条，开白花。又吴江分湖里，柳树枯桩生长条如苇。进贤县瑞竹生。十二年五月，汴梁祥符县椿树结实如木瓜。十六年七月，彰德李树结实如小黄瓜。民谣云：“李生黄瓜，民皆无家。”二十一年，明州松树结实，其大有盈尺者。八月，汴梁祥符县邑中树木，一夕皆有湿泥涂之。

宪宗七年九月，霖雨连月。九年夏四月，大雷雨，凡二十日。

至元七年八月，保定路霖雨害稼。九年六月丁亥，京师大雨。十年，霖雨害稼。十二月，河间霖雨。二十三年九月乙丑朔，雨坏太庙。二十四年六月，霸州益津县霖雨伤稼。九月，太原、河间、河南等路霖雨害稼。二十五年五月，汴梁大霖雨。六月，睢阳霖雨。七月，保定路霸、瀛二州淫雨害稼。八月，嘉祥、鱼台、金乡三县淫雨。九月，莫、献二州淫雨。保定路淫雨。二十六年六月，济宁、东平、汴梁、济南、顺德、真定路，滨、棣州霖雨害稼。七月辛巳，雨坏都

城。八月，大都路霖雨。九月，昌国亦如之。二十七年二月，晋陵、无锡二县霖雨。四月，芍陂屯田霖雨。七月，终南屯田霖雨，江西淫雨。二十八年八月，大名、清河、南乐诸县霖雨为灾。九月，河间淫雨。

元贞二年八月，宁海州霖雨。

大德二年七月，大雨。五年八月平滦路霖雨。是年，峡州、随州、安陵、荆门、泰州、光州、扬州、滁州、高邮、安丰霖雨。六年五月，归德、徐州、邳州、睢宁县雨五十日。十月，济南、滨、棣、泰安、高唐州霖雨害稼。七年，浙西淫雨。八年五月，大名、滑、浚、德州、齐河霖雨。六月丁酉，汴梁祥符、开封、陈州霖雨。九年六月，潼川霖雨。十年六月，景州霖雨。十一年九月，襄阳霖雨。

至大二年德州霖雨害稼。四年七月，河间、顺德、大名、彰德、广平等路，德、濮、恩、通等州及冀宁祁县霖雨害稼。

皇庆元年，龙兴路新建县雨害稼。

延祐元年五月，武陵县霖雨。二年七月，潭州、金州、永州、茶陵霖雨。四年四月，辽阳盖州雨水害稼。六年七月，霸州文成县雨害稼。七年五月，汝宁府霖雨。

至治元年，江州、赣州淫雨。二年闰五月，安丰路雨伤稼。三年五月，大名魏县淫雨。保定定兴县，济南无棣、厌次县，济宁砀山县，河间齐东县霖雨害稼。

泰定元年七月，真定、广平、庐州十一路雨伤稼。德州、曹州淫雨。八月，汴梁考城、仪封，济南沾化、利津等县霖雨，损禾稼。二年五月，浙西诸路霖雨。六月，奉元、卫辉路及永平屯田雨伤稼。九月，汉中道文州霖雨。三年十一月，

广宁路霖雨伤稼。四年十月，大都路霖雨。是年，开封霖雨。

至顺二年九月，湖州安吉县霖雨。三年六月，京师霖雨。

元统二年三月，山东霖雨。

至元元年六月，大霖雨。二年五月乙卯，南阳邓州大霖雨，自是日至于六月甲申乃止。八月，大都至通州霖雨。三年六月辛巳，卫辉路淫雨。四年六月邵武路大雨。

至正二年秋，彰德路霖雨。三年四月至七月，汴梁路荧泽县，钧州新郑、密县霖雨害稼。四年夏，汴梁藺阳县，许州长葛、鄆城、襄城，睢州，归德府亳州之鹿邑，济宁之虞城淫雨害蚕麦，禾皆不登。八月，益都霖雨，饥民有相食者。五年夏秋，汴梁祥符、尉氏、洧川，郑州、钧州、亳州久雨害稼，二麦禾豆俱不登。河间路淫雨，妨害盐课。八年五月，京师大霖雨，都城崩圯。钧州新郑县淫雨害麦。九年七月，高唐州大霖雨，坏官署民居。归德府淫雨浹十旬。十年二月，彰德路大雨害麦。二十年七月，益都高苑县、陕州颍池县大雨害稼。二十三年七月，怀庆路河内、修武、武陟三县及孟州淫雨害稼。二十四年秋，密州安丘县大雨。二十五年秋，密州安丘县，丘潞，汴梁许州及钧州之密县淫雨害稼。二十七年秋，彰德路淫雨。

至正六年八月，龙兴进贤县甘露降。二十年十月，国子学大成殿松柏树有甘露降其上。

至正十年春，丽正门楼斗栱内，有人伏其中不知何自而至，远近聚观之。门尉以白留守，达于都堂，上闻，有旨令

取付法司鞠问。但云蓟州人。问其姓名，诘其所从来，皆惘若无知，唯妄言祸福而已。乃以不应之罪笞之，忽不知所在。

至元二十二年六月，马湖田鼠食稼。大德二年二月，沙州鼠伤稼。至正二十年八月，庆阳，延安，宁、安等州野鼠食稼，初由鹑卵化生，既成牝牡，生育日滋，百亩之田，一夕俱尽。二十六年，泗州濒淮两岸，有灰黑色鼠，暮夜出穴，成群覆地食禾。

至正十七年三月，上海李胜家伏鸡七雏，一雏作牝鸡鼓翼长鸣。十八年正月，钱塘卢子明伏鸡一雏，有四足。二十二年，龙泉县一鸡二形，能鸣能伏。二十五年，瑞安县郑氏家有雄鸡生子。

《洪范》曰：“金曰从革”。失从革之性，时则有金石之妖、诗妖、毛虫之孽。其征恒眊，其色白，是为白眊白祥。

大德二年六月，抚州崇仁县辛陂村有星陨于地，为绿色员石，邑人张椿以状闻。

泰定四年八月，天全道山崩，飞石击人，中者辄死。

至正十年正月甲戌，棣州白昼空中有声，自西北而来，距州二十里陨于地，化为石，其色黑，微有金星散布其上。有司以进，遂藏之司天监。十一月冬至夜，陕西耀州有星坠于西原，光耀烛地，声如雷鸣者三，化为石，形如斧，一面如铁，一面如锡，削之有屑，击之有声。十六年冬十一月，大名路大名县有星如火，自东南流，尾如曳，彗，坠入于地，化

为石，青黑光莹，状如狗头，其断处类新割者。有司以进，太史验视云：“天狗也。”命藏于库。十九年四月己丑，建宁路瓯宁县有星坠于营山前，其声如雷，化为石。二十三年六月庚戌，益都临朐县龙山有星坠入于地，掘之深五尺，得石如砖，褐色，上有星如银，破碎不完。

至元元年，龙兴靖安县山石迸裂，涌水，人多死者。十年三月，庆元奉化州南山石裂，其碎而大者，有山川、人物、禽鸟、草木之文。二十七年六月丁卯，沂州东苍山有巨石，大如屋，崩裂坠地，声震如雷。七月丙戌，广西灵川县临江石崖崩。

庶征之恒肠，刘向以为春秋大旱也。

太宗十年八月，旱。

定宗三年，大旱。

中统元年八月，泽州、潞州旱。三年五月，滨、棣二州旱。四年八月，真定路及洺、磁等州，彰德旱。十一月，东平、大名等路旱。

至元元年二月，东平、太原、平阳旱，分命西僧祷雨。二年，西京、北京、益都、真定、东平、顺德、河间、徐、邳、宿旱。三年夏，黄州京北鹰朔旱。四年，顺天束鹿旱。五年，京兆大旱。六月，真定等路旱。七年三月，益都、登、莱旱。七月，山东、南京旱。八年四月，蔚州灵仙、广灵二县旱。九年六月，高丽旱。十二年，太原等路旱。十三年十二月，平阳路旱。十五年，奉圣州及彰德等路旱。十六年七月，赵州旱。十八年二月，辽阳、广宁、北京大定县旱。十九年八月，

真定以南旱。二十二年五月，广平、洺梁、钧州、郑州、怀孟、濮州、东昌、广平、平阳、彰德、卫辉旱。二十三年五月洺梁旱。京畿旱。二十四年春，平阳旱，二麦枯死。二十五年，东平路须城等六县，安西路商、耀、乾、华等十六州旱。二十六年，绛州大旱。二十七年，真定、平山、枣强三县旱。二十八年二月，山东棣州旱。

元贞元年六月，环州、葭州及咸宁、伏羌、通渭等县旱。七月，太原、安丰及河间肃宁、乐寿二县旱。九月，泗州、贺州旱。二年七月，大名开州、怀州武陟县、河间肃宁县旱。九，莫、献州旱。十月化州旱。十二月，辽东、开元二路及河南芍陂旱。

大德元年六月，洺梁、南阳大旱。七月，怀州武陟县旱。八月扬州、淮安、宁海州、真定、顺德、河间旱。九月，镇江丹阳、金坛二县旱。十一月，常州路宜兴州旱。十二月，平阳曲沃县旱。二年二月，浙西嘉兴、江阴，江东池州、建康、溧阳旱。五月，卫辉、顺德、平滦等路旱。三年五月，荆湖诸路及桂阳、宝庆、兴国三路旱。九月，大都、扬州、淮安旱。十月，扬、庐、随、黄等州旱。四年三月，宁国、太平旱。五月，扬州、南阳、顺德、东昌、归德、汝宁、徐、濠等州旱。平棘、白马二县旱。五年六月，洺梁、南阳、卫辉、大名等路旱。九月，江陵旱。六年正月，陕西旱。七年，台州诸路旱。八年六月，凤翔扶风、岐山、宝鸡三县旱。九年五月，道州旱。七月，晋州饶阳县，汉阳汉川县旱。八月，象州、融州、柳州属县旱。十年五月，京畿旱。安西春夏大旱，二麦枯死。十一年，台州自夏不雨，至秋九月。

至大元年二月，汝宁、归德旱。五月，渭源县旱。三年夏，广平亢旱。四年六月，河间、陕西诸路旱。

皇庆元年六月，滨、棣、德三州及蒲台等县旱。二年九月，京畿大旱。

延祐二年春，檀、蓟、濠三州旱。夏，巩昌兰州旱。济宁、益都旱。四年四月，德安府旱。五年六月，荆州旱。七月，真定，河间、广平、中山大旱。七年六月，黄、蕲二路及荆门州旱。九月，沈阳旱。

至治元年四月，袁州、建昌及广德路旱。五月，高邮州旱。六月，大同路、临江路旱。二年二月，扬州、淮安路旱。十一月，岷州旱。三年夏，土番岷州、顺德、真定、冀宁大旱。

泰定元年三月，临洮狄道，石州、离石、宁乡旱。六月，景、清、沧、莫等州，临汾、涇川、灵台、寿春、六合等县旱。九月，建昌路旱。十二月，两浙及江东诸路旱。二年三月，荆门州旱。五月，潭州、茶陵州、兴国永兴县旱。七月，随州、息州旱。三年五月，庐州、郁林州旱。燕南、河南州县十有四亢阳不雨。七月，关中，大名、永平、奉元诸路旱。九月，南思州旱。十一月，怀庆、修武路旱。四年五月，奉元醴泉、顺德唐山、邠州淳化等县旱。五月，大都、南阳、汝宁、庐州等路旱。六月，潞、霍、绥德三州旱。七月，江南、延安诸路旱。八月，真定、晋宁、延安、河南及滕州旱。十月，龙兴路旱。十一月，永平路旱。十二月，大都、保定、真定、东平、济南、怀庆等路旱。

致和元年二月，广平、彰德等路旱。五月，涇州旱。六

月，江陵路旱。

天历元年八月，陕西大旱，人相食。二年夏，真定、河间、大名、广平等四州四十一县旱。峡州二县旱。七月，大都之东安、蓟州、永清、益津诸县旱。八月浙西湖州，江东池州，饶州旱。十二月，冀宁路旱。

至顺元年七月，肇州、兴州、东胜州及榆次、潞阳等十三县旱。十月，武昌，湖广常德、潭州诸路旱。十一月，冠州、庐州，江西龙兴、南康、抚、瑞、袁、吉、饶州及大名、真定、河间诸路旱。二年三月，浙西旱。四月，霍、隰、石三州，阜城、平地二县旱。八月，黄州旱。三年八月，真定路，冀宁路之阳曲、河曲二县及荆门州、河南府之洛阳县旱。四年夏，绍兴旱。淮东、西亦旱。

元统元年夏，绍兴旱。自四月不雨，至于七月。淮东、淮西皆旱。二年三月，湖广旱，自是月不雨，至于八月。四月，河南旱，自是月不雨至于八月。秋，南康旱。

至元元年三月，益都路旱。夏，河南及邵武大旱。二年，蕲州、黄州，浙东衢州、婺州、绍兴，江东信州，江西瑞州等路，及陕西皆旱。是年四月，黄州黄冈县周氏妇产一男，未几死，狗头人身，咸以为旱魃云。六年夏，大宁、广宁、辽阳、开元、沈阳、懿州旱。广东南雄路旱，自二月不雨至于五月，种不入土。

至正二年，彰德、大同二路及冀宁平晋、榆次、徐沟县，汾州孝义县，沂州皆大旱，自春至秋，不雨，人有相食者。秋，卫辉大旱。三年秋，兴国大旱。四年，福州大旱，自三月不雨至于八月。兴化、邵武、镇江及湖南之桂阳皆旱。五年，曹

州禹城县大旱。夏，胶州高密县旱。六年，镇江及庆元奉化州旱。七年，怀庆、卫辉、河东及凤翔之岐山，汴梁之祥符，河南之孟津，皆大旱。八年三月，益都临淄县大旱。五月，四川旱。十年夏秋，彰德旱。十一年，镇江旱。十二年，蕲州、黄州大旱，人相食。浙东绍兴旱。台州自四月不雨，至于七月。十三年，蕲州、黄州及浙东庆元、衢州、婺州，江东饶州，江西龙兴、瑞州、建昌、吉安、广东南雄，湖南永平、桂阳，皆大旱。十四年，怀庆河内县，孟州，汴梁祥符县，福建泉州，湖南永州、宝庆，广西梧州，皆大旱。祥符旱魃再见。泉州种不入土，人相食。十五年，卫辉大旱。十六年，婺州、处州皆大旱。十八年春，蓟州旱。莒州、滨州、般阳滋州县、霍州、鄆州、凤翔，岐山县，春夏皆大旱。莒州家人自相食。岐山人相食。十九年，晋宁、凤翔，广西梧州、象州，皆大旱。二十年，通州旱。汾州介休县自四月至秋不雨。广西宾州大旱，自闰五月不雨至于八月。二十二年，河南洛阳、孟津、偃师三县大旱，人相食。二十三年，山东济南，广西贺州皆大旱。

后至元五年八月，京师童谣云：“白雁望南飞，马札望北跳。”至正五年，淮楚间童谣云：“富汉莫起楼，穷汉莫起屋。但看羊儿年，便是吴家国。”十年，河南北童谣云：“石人一双眼，挑动黄河天下反。”十五年，京师童谣云：“一阵黄风一阵沙，千里万里无人家。回头雪消不堪看，三眼和尚弄瞎马。”十六年正月，松江民谣曰：“满城多是火，官府四散躲，城里无一人，红军府上点。”

太宗九年，左翼部讹言括民女。至元十一年四月，诛西京讹言惑众者。后至元三年，郡邑皆相传朝廷欲括童男女，于是市井乡里竞相嫁娶，仓卒成婚，贫富长幼多不得其宜者。此民讹言也。

元贞三年正月，海州牟平县获白鹿于圣水山以献。至正十年，彰德境内狼狽为害，夜如人形，入人家哭，就人怀抱中取小儿食之。二十三年正月，福州连江县有虎入于县治。二十四年七月，福州白昼获虎于城西。二十九年正月，上都有狐数头入行殿，直至御殿下。

皇庆二年八月，皇梅县天雨毛。元统二年六月彰德雨白毛，俗呼云：“老君髯”。民谣曰：“天雨牦，事不齐。”至元三年三月，彰德雨毛，如绵而绿，俗呼云：“菩萨绵。”民谣云：“天雨线，民起怨，中原地，事必变。”六年七月，延安路鄜州雨白毛，如马鬃，所属邑亦如之。至正十三年四月，冀宁榆次县雨白毛，如马鬃。七月泉州如雨白丝。十八年五月，益都雨白牦。十九年三月，遵化路连日雨牦。八月，安仁县怪物见空中，白色，头黑，尾锐。二十五年五月甲子，京师雨牦，长尺许，如马鬃。二十七年五月，益都雨白牦。

至元二十四年七月癸丑，日晕连环，白虹贯之。至大元年七月，流星起句陈，化为白气，员如车轮，至贯索始灭。皇庆元年六月丁卯，天雨毛。延佑元年二月己亥，白晕亘天，连环贯日。至顺三年五月丁酉，白虹并日出，其长竟天。后至元四年八月丁丑，京师白虹亘天。至正二十二年，京师有白

气如小索，起危宿，长五百丈，扫太微。二十四年六月癸卯，冀宁路保德州三星昼见，有白气横突其中。二十六年三月丁亥，白虹五道亘天，其第三道贯日。又气横贯东南，良久乃灭。二十七年五月，大名路有白气二道。二十八年闰七月乙丑，冀宁文水县有白虹贯日，自东北直绕西南，云影中似日非日，如镜者三色青白，逾时方散。

至正二十一年，昆明县生赤小犬，色如火，群吠遍野。二十八年，上海金寿家雄犬生小狗八，其一嘴爪红如鲜血。

卷三十八

志第十二

五行下

《洪范》曰：“土爰稼穡。”失土之性，稼穡不成，时则有饥谨，为地震山崩，天雨土，花妖虫孽牛祸。其征恒风，其色黄，是为黄眚黄祥。

中统元年五月，泽州饥。二年六月，塔察儿部饥。七月，桓州饥。三年五月，甘州饥。闰九月，济南路饥。

至元二年四月，辽东饥。五年九月，益都饥。六年十一月，济南及固安、高唐二州饥。七年五月，东京饥。七月，山东淄、莱等州饥。

八年正月，西京、益都饥。九年四月，京师饥。七月，水达达部饥。十七年三月，高邮州饥。十八年二月，浙东饥。四

月，通、泰、崇明等州饥。十九年九月，真定路饥，民流徙鄂州。二十三年七月，宣宁县饥。二十四年九月，平滦路饥。十二月，平江、嘉兴路，湖、秀二州饥。二十五年四月，浦台县饥。十一月，兀良合部饥。二十六年二月，合木里部饥。三月，安西、甘州等路饥。四月，辽阳路饥。闰十月，武平路饥，檀州饥。十二月，蠡州饥。河间、保定二路饥。二十七年二月，开元路宁远等县饥。四月，浙东婺州饥。河间任丘、保定定兴二县饥。九月，河东山西道饥。二十八年三月，真定、河间、保定、平滦、太原、平阳等路饥。杭州、平江、镇江、广德、太平、徽州饥。九月，武平路饥。十二月，洪宽女直部饥。大都饥。二十九年正月，清州、兴州饥。三月，大宁之龙山县、里州之和中县饥。东安、固安、蓟、棣四州饥。三月，咸宁、昌州饥。闰六月，南阳、怀孟、卫辉等府路饥。三十年十月，京师饥。

元贞二年四月，平阳绛州、太原阳曲、台州黄岩饥。

大德元年六月，广德路饥。七月，宁海州文登、牟平等县饥。三年八月，扬州、淮安等路饥。四年二月，湖北饥。三月，宁国、太平二路饥。九月，建康、常州、江陵等路饥。六年五月，福州饥。六月，杭州、嘉兴、湖州、广德、宁国、饶州、太平、绍兴、庆元、婺州等路饥。大同路饥。七月，建康路饥。十一月，保定路饥。七年二月，真定路饥。五月，太原、龙兴、南康、袁州、瑞州、抚州等路，高唐、南丰等州饥。六月，浙西饥。七月，常德路饥。八年六月，乌撒、乌蒙、忙部、东川等路饥。九年三月，常宁州饥。五月，宝庆路饥。八月，扬州饥。十年三月，济州任城饥。四月，汉阳、

淮安、道州、柳州饥。七月，黄州、沅州、永州饥。八月，成都饥。十一月，扬州、辰州饥。十二月，山东饥。

至大元年二月，益都、般阳、济宁、济南、东平、泰安大饥。六月，山东、河南、江淮等路大饥。二年七月，徐州、邳州饥。

皇庆元年六月，巩昌、河州路饥。二年三月，晋宁、大同、东川、巩昌、甘肃等路饥。四月，真定、保定、河间等路饥。五月，顺德、冀宁二路饥。六月，上都饥。

延佑元年六月，衡州饥。七月，台州饥。十二月，归德、汝宁、沔阳、安丰等府路饥。二年正月晋宁、宣德、怀孟、卫辉、益都、般阳等路饥。汉阳路饥。三年二月，河间、济南滨、棣等处饥。四月，辽阳盖州及南丰州饥。五月，宝庆、桂阳、澧州、潭州、永州、道州、袁州饥。四年正月，汴梁饥。五年四月，上都及辽阳饥。六年八月，山东济宁饥。七年四月，上都、济南蒙古军饥。五月，大同、云内、丰州、东胜州饥。沈阳路饥。八月，广东新州新兴县饥。

至治元年正月，蕲州蕲水县饥。二月，河南汴梁、归德、安丰等路饥。是春，般阳饥。五月，胶、濮、二州饥。七月南恩、新州饥。十一月，巩昌成州饥。十二月，庆远、真定二路饥。二年三月，河南、淮东、淮西诸路饥。延安延长、宜川二县饥。奉元路饥。四月，东昌、霸州饥。九月，临安河西县饥。三年二月，京师饥。三月，平江嘉定州饥。崇明、黄岩二州饥。十一月，镇江丹徒、沅州黔阳县饥。十二月，归、澧二州饥。

泰定元年正月，惠州、新州、南恩州，信州上饶县，广

德路广德县，岳州临湘、华容等县俱饥。二月，庆元、绍兴二路，绥德州米脂、清涧二县饥。三月，临洮狄道县、石州离石县饥。四月，江陵、荆门州、监利县饥。五月，赣州、吉安、临江等路，昆山、南恩等州饥。八月，冀宁、延安、江州、安陆、杭州、建昌、常德、全州、桂阳、辰州、南安等路属州县饥。九月，绍兴、南康二路饥。十一月，泉州饥。中牟、延津二县饥。二年正月，梅州饥。禄劝、英德二州饥。闰正月，河间真定、保定、瑞州路饥。二月，凤翔路饥。三月，蓟、瀛、徐、邳四州饥。济南、肇庆、江宁、惠州饥。四月，杭州、镇江、宁国、南安、浔州、潭州等路饥。五月，广德、袁州、抚州饥。六月，宁夏路饥。九月，琼州、成州饥。德庆路饥。十二月，济南、延川等路饥。三年三月，河间、保定、真定、卫辉、中山、顺德、宁夏、建昌、大都、永平、奉元饥。四月，济南饥。十一月，沈阳、大宁、永平、广宁、金、复州，甘肃亦集乃路饥。四年正月，辽阳诸路饥。二月，奉符、长清、莱芜三县饥。建康、淮安、蕲州属县饥。四月，通、蓟等州，渔阳、永清等县饥。七月，武昌江夏县饥。

致和元年二月，乾州饥。三月，晋宁、冀宁、奉元、延安等路饥。四月，保定、东昌、般阳、彰德、大宁五路属县饥。五月，河南、东平、大同等路饥。七月，咸宁、长安、泾州灵台饥。

天历二年正月，大同及东胜州饥。涿州房山、范阳等县饥。四月，奉元耀州、乾州、华州及延安、邠、宁诸县饥，流民数十万。大都、兴和、顺德、大名、彰德、怀庆、卫辉、汴梁、中兴等路，泰安、高唐、曹、冠、徐、邳等州饥。江东、

浙西二道饥。八月，忻州饥。十月，汉阳、武昌、常德、澧州等路饥。凤翔府大饥。三年正月，宁海州文登、牟平县饥。怀庆、衡州二路饥。真定、汝宁、扬、庐、蕲、黄、安丰等路饥。二月，河南大饥。三月，东昌须城、昌邑县饥。沂、莒、胶、密、宁海五州，临清、定陶、光山等县饥。巩昌兰州、定西州饥。四月，德州清平县饥。

至顺元年，秦州饥。二年二月，集庆、嘉兴二路及江阴州饥。檀、顺、潍、密、昌平五州饥。六月，兴和路高原，咸平等县饥。九月，思州镇远府饥。十二月，河南大饥。三年四月，大理、中庆路饥。五月，常宁州饥。七月，滕州饥。八月，大都宝坻县饥。

元统元年夏，两淮大饥。二年春，淮西饥。七月，池州饥。十一月，济南、莱芜县饥。至元元年春，益都路沂水、日照、蒙阴、莒四县及龙兴路饥。夏，京师饥。是岁，沅州、道州、宝庆及邵武、建宁饥。二年，顺州及淮西安丰，浙西松江州，台州，江西江、抚、袁、瑞四州，湖北沅州卢阳县饥。三年，大都及济南、蕲州、杭州、平江、绍兴、溧阳、瑞州、临江饥。五年，上都开平县、桓州，兴和宝昌，濮州之鄆城，冀宁之文州，益都之胶、密、莒、潍四州，辽东沈阳路，湖南衡州，江西袁州，八番顺元等处皆饥。六年，顺德之邢台，济城之历城，大名之元城，德州之清平，泰安之奉符、长清，淮安之山阳等县，归德邳州，益都、般阳、处州、婺州四路皆饥。

至正元年春，京畿州县、真定、河间、济南及湖南饥。夏，彰德及温州饥。二年，保德州大饥。三年，卫辉、冀宁、忻

州大饥，人相食。四年，霸州大饥，人相食。东平路东阿、阳谷、汶上、平阴四县皆大饥。冬，保定、河南饥。五年春，东平路须城、东阿、阳谷三县及徐州大饥，人相食。夏，济南、汴梁、河南、邠州、瑞州、温州、邵武饥。六年五月，陕西饥。七月，彰德、怀庆、东平、东昌、晋宁等处饥。九年春，胶州大饥，人相食。钧州新郑、密县饥。十四年春，浙东台州，江东饥。闽海福州、邵武、汀州，江西龙兴、建昌、吉安、临江、广西静江等路皆大饥，人相食。十七年，河南大饥。十八年春，莒州蒙阴县大饥，斗米金一斤。冬，京师大饥，人相食。彰德、山东亦如之。十九年正月至五月，京师大饥，银一铤得米仅八斗，死者无算。通州民刘五杀其子而食之。保定路莩死盈道，军士掠孱弱以为食。济南及益都之高苑，莒之蒙阴，河南之延津、新安、浍池等县皆大饥，人相食。二十一年，霸州饥，民多莩死。

太宗五年癸巳十二月，大风霾七昼夜。

至元十六年，保定二十余路大风害稼。二十年正月，汴梁延津、封丘二县大风，麦苗尽拔。二十四年，西京、北京、隆兴、平滦、南阳、怀孟等路大风。三十一年七月，棣州阳信县大风，拔木发屋。

元贞元年，金、复州大风损禾。三年，顺德大风。

大德二年五月，卫辉、彰德大风损禾。八年九月，潮州飓风，海溢。十年二月，大同路暴风。

至大元年秋，归德大风。

延祐七年八月，延津县大风，昼晦，桑陨者十八九。

至治元年三月，大同路大风，走沙土，壅没麦田一百余

顷。二年十二月，大同、卫辉、江陵属县皆大风。三年三月，卫辉路大风，桑陨蚕死。

泰定元年八月，永嘉县大风，海溢。三年七月宝坻、房山二县大风折木。八月，盐官州海溢。大都昌平等县大风一昼夜，坏民居九百余家。四年五月，卫辉路辉州大风九日，禾尽偃。是年，通州、崇明州大风。

天历三年二月，胙城县、新乡县大风。

至顺元年，卫辉路大风。七月，广平、真定、肥城、保定曲阳大风。二年十月，吴江州大风。是年，柳林行宫大风拔木。

元统元年三月，绍兴萧山县大风拔木。

至正元年七月，广西雷州飓风大作，涌潮水，拔木害稼。二年十月，海州飓风作，海水溢，溺死人民。四年七月，温州飓风大作。七年正月朔，大都大风。十三年五月乙丑，浚州飓风大作，坏官舍民居，屋瓦门扉皆飘扬七里之外。十四年七月甲子，潞州襄垣县大风拔木。十六年，温州大风。十七年六月，温州飓风。十八年正月，大风起自西北，仆益都万岁碑。二十一年正月癸酉，石州大风拔木，六畜皆鸣，人持枪矛忽生火焰，抹之即无，摇之即有。二十四年，台州路黄岩州海溢，飓风拔木，禾尽偃。二十七年三月庚子，京师有大风，起自西北，飞砂扬砾，昏冥蔽天，逾时风势八面俱至，终夜不止。如是者连日。自后每日寅时风起，万窍争鸣，戌时方息。至五月癸未乃止。二十八年正月，上都风霾。二月，上都大风昼晦。

至元四年六月，中都、顺天、东平等处蚕灾。七年五月，东平、大名等处蚕灾。十七年二月，真定七路桑有虫食之。二十二年五月，真定、广平、河间、大名、济南蚕灾。二十三年五月，广平等路蚕灾。二十五年七月乙巳，保定路唐县野蚕成茧。二十九年，真定之中山、新乐、平山、获鹿、元城、灵寿；河间之沧州无棣，景州之阜城、东光；益都之潍州北海县，有虫食桑皆尽。

元贞元年四月，真定平山、灵寿二县有虫食桑。二年五月，随州野蚕成茧。

大德元年六月，平滦路虫食桑。五年四月，大都、彰德、广平、真定、顺德、大名、濮州虫食桑。七年五月，济宁等处虫食桑。

至大元年五月，大名、广平、真定三路虫食桑。

至治元年五月，保定路飞虫食桑。

致和元年六月，河南德安屯蠖食桑。

天历二年二月，真定平山县，河间临津等县、大名魏县虫食桑。四月，濮州鄆城县、大名路，六月，卫辉蚕灾。三月，沧州、高州及南皮、盐山、武城等县虫食桑。

至顺元年三月，濮州诸县虫食桑。五月，沧州、高唐州虫食桑。二年二月，深、冀二州虫食桑。三月，真定、汴梁二路，恩、冠、晋、冀、深、蠡、景、献等州亦如之。五月，东昌、保定二路，濮、高唐等州虫食桑。六月，济宁路虫食桑。七月，辰州、兴国二路虫食桑、伤禾。三年三月，高唐、深、冀等州，大名、汴梁、广平三路虫食桑。四月，东昌、济宁二路及曹、濮等州虫食桑。

至元八年六月，辽州和顺县、解州闻喜县好𧈧生。十八年，高丽，夏津、武城县蝥。二十三年五月，霸州、灤州蝥。十月，兴化路仙游县虫伤禾。二十四年，巩昌好𧈧为灾。二十七年四月，婺州螟害稼，雷雨大作，螟尽死，岁乃大稔。

元贞元年六月，利州龙山县、盖州明山县螟。二年五月，济州任城县螟。

大德七年五月，济南、东昌、般阳、益都等路虫食麦。闰五月，汴梁开封县虫食麦。九年七月桂阳郡蝥。

至大元年五月，东平、东昌、益都等路蝥。

皇庆二年五月，檀州及获鹿县蝥。

延佑七年七月，霸州及高邑县蝥。

泰定二年七月，奉元路咸阳、兴平、武功蝥。三年，凤翔府岐山等县好𧈧害稼。

天历二年，淮安、庐州、安丰三路属县蝥。

至顺元年七月，宝庆等路田生青虫，食稼。

至正三年六月，梧州青虫食稼。十年七月，同州虫食稼。知州石亨祖禱于元妙观，雨三日，虫尽死。十九年五月，济南章丘、邹平二县蝥，五谷不登。二十二年春，卫辉路螟。六月，胶水县好𧈧生。七月，掖县好𧈧生，害稼。二十三年六月，宁海文登县好𧈧生。七月，莱州招远、莱阳二县，文登州、宁海州好𧈧生。

太宗十年八月蝗。

中统三年五月，真定、顺天、邢州等路蝗。四年六月，燕京、河间、益都、真定、东平蝗。八月，滨、棣等州蝗。至

元二年七月，益都大蝗。十二月，西京、北京、顺德、徐、宿、邳等州、路蝗。三年，东平、济南、益都、平滦、洺磁、顺天、邢州、中都、河间、北京、真定路蝗。四年，山东、河南北诸路蝗。五年六月，东平等路蝗。六年六月，河南北、山东诸路蝗。七年三月，益都、登、莱蝗。七月，南京、河南诸路蝗。八年六月，上都、中都、大名、河间、益都、顺天、怀孟、彰德、济南、真定、卫辉、平阳、归德、顺德等路，淄、莱、洺、磁等州蝗。十五年，濮州蝗。十六年四月，大都十六路蝗。十七年五月，真定、咸平、沂州及涟、海、邳、宿等州蝗。十九年四月，别十八里部东三百余里蝗害麦。二十一年六月，中卫屯田蝗。二十二年四月，大都、汴梁、益都、庐州、河间、济宁、归德、保定蝗。七月，京师蝗。二十五年七月，真定、汴梁蝗。八月，赵、晋、冀三州蝗。二十六年六月，东平、济宁、东昌、益都、真定、广平、归德、汴梁、怀孟蝗。二十七年四月，河北蝗。二十九年六月，东昌、济南、般阳、归德等路蝗。三十年六月，大兴县蝗。九月，登州蝗。三十一年六月，东安蝗。

元贞元年六月，汴梁陈留、太康、考城等县，睢、许等州蝗。二年六月，济宁任城、鱼台县，东平须城、汶上县，开州长垣、清丰县，德州齐河县，滑州，内黄县，颍州太和县蝗。七月，平阳、大名、归德、直定等处蝗。八月，德州、彰德、太原蝗。

大德元年六月，归德、邳州、徐州蝗。二年二月，归德等处蝗。四月，江南、山东、两淮、江浙、燕南属县百五十处蝗。六月，山东、河南、燕南、山北五十处，辽东、大宁

路金源县蝗。三年五月，扬州及淮安属县蝗，有鬻食之。十月，陇、陕蝗。四年五月，扬州、南阳、顺德、东昌、归德、济宁、徐、濠、芍陂蝗。五年六月，顺德路淇州蝗。七月，广平、真定等路蝗。八月，河南、睢、陈、唐、和等州，新野、汝阳、江都、兴化等县蝗。六年四月，真定、大名、河间等路蝗。七月，大都涿、顺、固安三州及濠州钟离、镇江丹徒蝗。七年五月，益都、济南等路蝗。六月，大宁路蝗。八年四月，益都临朐、德州齐河县蝗。六月，益津县蝗。九年六月，通、泰、靖海、武清等州县蝗。八月，涿州良乡、河间南皮、泗州天长等县及东安、海盐等州蝗。十年四月，大都、真定、河间、保定、河南等路蝗。六月，龙兴、南康等路蝗。十一年五月，真定、河间、顺德、保定等路，六月，保定属县，七月，德州，八月，河南、真定等路蝗。

至大元年二月，汝宁、归德二路蝗。五月，晋宁路蝗。六月，真定、保定二路蝗。八月，淮东蝗。二年四月，益都、东平、东昌、顺德、广平、大名、汴梁、卫辉等路蝗。六月，檀、霸、曹、濮、高唐、泰安等州，良乡、舒城、历阳、合肥、大安、江宁、句容、溧水、上元等县蝗。七月，济南、济宁、般阳、河中、解、绛、耀、同、华等州蝗。八月，真定、保定、河间、怀孟等路蝗。三年四月，宁津、堂邑、茌平、阳谷、平原、齐河、禹城七县蝗。五月，合肥、历阳、蒙城、霍邱、怀宁等县蝗。七月，磁州、威州，饶阳、元氏、平棘、滏阳、元城、无棣等县蝗。

皇庆元年，彰德、安阳县蝗。

延祐七年六月，益都蝗。

至治元年五月，霸州蝗。六月，卫辉、汴梁等处蝗。七月，江都、泰兴、通许、临淮、盱眙、清流等县蝗。十二月，宁海州蝗。二年，汴梁祥符县蝗，有群螯食蝗，既食而复吐之，积如丘垤焉。十二月，汴梁、顺德、河间、保定、济宁、濮州、益都诸路蝗。三年五月，保定路归信县蝗。七月，真定诸路蝗。

泰定元年六月，大都、顺德、东昌、卫辉、保定、益都、济宁、彰德、真定、般阳、广平、大名、河间、东平等路蝗。二年五月，彰德等路蝗。六月，德、濮、曹、景等州，历城、章丘、淄川、茌平等县蝗。九月，济南、归德等路蝗。三年六月，东平须城县、兴国永兴县蝗。七月，大名、顺德等路，赵州，曲阳、满城、庆都、修武等县蝗。淮安、高邮二路，睢、泗、雄、霸等州蝗。八月，永平、汴梁、怀庆等路蝗。四年五月，大都、南阳、汝宁、庐州等路蝗。洛阳县有蝗五亩，群鸟尽食之，越数日，蝗又集，又食之。六月，大都、河间、济南、大名、陕州蝗。七月，藉田蝗。八月，冠州、恩州、大都、河间、奉元、怀庆诸路蝗。十二月，保定、济南、卫辉、济宁、庐州五路，南阳、河南二府蝗。博兴州，临淄、胶西等县蝗。

致和元年四月，大都蓟州、永平路石城县蝗。凤翔岐山县蝗，无麦苗。五月，颍州及汲县蝗。六月，武功县蝗。

天历二年四月，大宁兴中州、怀庆孟州、庐州无为州蝗。六月，益都路莒、密二州蝗。七月，真定、汴梁、永平、淮安、卢州、大宁、辽阳等路属县蝗。八月，保定行唐县蝗。三

年五月，广平、大名、般阳、济宁、东平、汴梁、南阳、河南等路，辉、德、濮、开、高唐五州蝗。

至顺元年六月，漵、蓟、固安、博兴等州蝗。七月，解州、华州及河内、灵宝、延津等二十二县蝗。二年三月，陕州诸路蝗。六月，孟州济源县蝗。七月，河南阌乡、陕县，奉元蒲城、白水等县蝗。

元统二年六月，大宁、广宁、辽阳、开元、沈阳、懿州蝗。八月，南康诸县蝗。

后至元二年七月，黄州蝗。三年六月，怀庆、温州、汴梁阳武县蝗。七月，武陟县鹰食蝗。五年七月，胶州即墨县蝗。是年秋七月，螟生牧野南，有鸛鸽自西北来，啄螟食之尽。

至正四年，归德府永城县及亳州蝗。十二年六月，大名路开、滑、浚三州，元城十一县蝗。十七年，东昌在平县蝗。十八年夏，蓟州、辽州、潍州昌邑县、胶州高密县蝗。秋，大都、广平、顺德及潍州之北海、莒州之蒙阴、汴梁之陈留、归德之永城皆蝗。顺德九县民食蝗，广平人相食。十九年，大都霸州、通州，真定，彰德，怀庆，东昌，卫辉，河间之临邑，东平之须城、东阿、阳谷三县，益都路之益都、临淄二县，潍州、胶州、博兴州，大同、冀宁二路，文水、榆次、寿阳、徐沟四县，沂、汾二州及孝义、平遥、介休三县，晋宁潞州及壶关、潞城、襄垣三县，霍州赵城、灵石二县，隰之永和，沁之武乡，辽之榆社、奉元，及汴梁之祥符、原武、鄆陵、扶沟、杞、尉氏、洧川七县，郑之荥阳、汜水，许之长葛、鄆城、临颖，钧之襄城、新城、密县皆蝗，食禾稼草木

俱尽，所至蔽日，碍人马不能行，填坑堑皆盈。饥民捕蝗以为食，或曝干而积之。又罄，则人相食。七月，淮安清河县飞蝗蔽天，自西北来，凡经七日，禾稼俱尽。八月，大同路蝗。二十年，益都临朐、寿光二县，凤翔岐山县蝗。二十一年六月，河南巩县蝗，食稼俱尽。七月，卫辉及汴梁荥泽县、郑州蝗。二十二年秋，卫辉及汴梁开封、扶沟、洧川三县，许州及钧之新郑、密二县蝗。二十五年，凤翔岐山县蝗。绩溪县蝗。

至元十六年四月益都乐安县朱五十家，牛生犝犢，两头四耳三尾，其色黄，既生即死。

大德九年二月，大同平地县迷儿的斤家，牛生麒麟而死。

至大四年，大同宣宁县民灭的家，牛生一犝，其质有鳞无毛，其色青黄，类若鳞者，以其鞞上之。

泰定三年九月，湖州长兴州民王俊家，牛生一兽，鳞身牛尾，口目皆赤，坠地即大鸣，母不乳之。具图以上，不知何兽，或曰“此瑞也，宜俾史臣纪录。”

至正九年三月，陈州杨家庄牛生黄犝，火光满室，麻顶绿角，间生绿毛，不食乳，二日而死。十年秋，襄阳车城民家，牛生犝，五足，前三、后二。二十六年春，汴梁祥符县牛生犝，双首，不及二日死。二十八年五月，东昌聊城县钱镇抚家，牛生黄犝，六足，前二后四。

至元二十四年，诸王薛彻都部雨土七昼夜，没死牛畜。

大德十年二月，大同平地县雨沙黑霾，毙牛马二千。

至治三年二月丙戌，雨土。

致和元年三月壬申，雨霾。

天历二年三月丁亥，雨土霾。

至顺元年三月丙戌，雨土霾。

后至元五年二月，信州雨土。

至正三年三月至四月，忻州风霾昼晦。二十六年四月乙丑，奉元路黄雾四塞。

至元元年十一月，兴国路地震。四年八月，汉阳地震。二十一年八月，松滋、枝江地震。九月戊子，京师地震。二十六年正月丙戌，地震。二十七年二月癸未，泉州地震。丙戌，泉州地复震。八月癸未，武平路地大震。二十八年八月乙丑，平阳路地震，坏庐舍万八百区。

元贞元年三月壬戌，地震。

大德六年十二月辛酉，云南地震。戊辰，亦如之。七年八月辛卯夕，地震。太原、平阳尤甚，坏官民庐舍十万计。平阳赵城县范宣义郇堡徙十余里。太原徐沟、祁县及汾州平遥、介休、西河、孝义等县地震成渠，泉涌黑沙。河州北城陷，长一里，东城陷七十余步。八年正月，平阳地震不止。九年四月己酉，大同路地震，有声如雷，坏庐舍五千八百，压死者一千四百余人。怀仁县地震，二所涌水尽黑，其一广十八步，深十五丈，其一广六十六步，深一丈。五月癸亥，以地震，改平阳路为晋宁，太原路为冀宁。十一月壬子，大同地震。十二月丙子，又震，十年闰正月，晋宁、冀宁地震不止。三月，道州营道县暴雨，山裂百三十余处。八月壬寅，开城路地震。

至大元年六月丁酉，巩昌陇西、宁远县地震。云南乌撒、乌蒙地三日而大震者六。九月己酉，蒲县地震。十月癸丑，蒲县、陵县地震。二年十二月壬戌，阳曲县地震有声。三年十二月戊申，冀宁路地震。四年三月己亥，宁夏路地震。七月癸未，甘州地震，大风，有声如雷。闰七月甲子，宁夏地震。

皇庆二年六月己未朔，京师地震。丙寅，又震。七月壬寅，又震。

延佑元年二月戊辰，大宁路地震。四月甲申朔，大宁地震，有声如雷。八月丁未，冀宁、汴梁等路，陟县、武安等县地震。十一月戊辰，大宁地震如雷。二年五月乙丑，秦州成纪县北山移至夕川河，明日再移，平地突如土阜，高者二三丈，陷没民居。十一月乙卯，宣德县屡震。三年八月己未，冀宁、晋宁等路地震。十月壬午，河南地震。四年正月壬戌，冀宁地震。七月己丑，成纪县山崩。辛卯，冀宁地震。九月，岭北地震三日。五年正月甲戌，懿州地震。二月癸巳，和宁路地震。丁酉，泰安县山崩。五月己卯，德庆路地震。七月戊子，宁远县山崩。八月，伏羌县山崩，秦州成纪县山崩，朽壤坟起，没畜产。

至治二年九月癸亥，地震。十一月癸卯，地震。

泰定元年八月，成纪县山崩水溢，壅土至来谷河成丘阜。十月庚申，奉元路同州地震。三年十二月丁亥，宁夏路地震。四年三月癸卯，和宁路地震如雷。八月，巩昌通渭县山崩，碛门地震，有声如雷，昼晦。凤翔、兴元、成都、陕州、江陵等路地同日震。九月壬寅，宁夏地震。

致和元年七月辛酉朔，宁夏地震。己卯，大宁路地震。十

月壬寅，大宁路地震。

至顺二年四月丁亥，真定涉县一日五震或三震，月余乃止。三年四月戊申，大宁路地震。五月戊寅，京师地震有声。八月己酉，陇西地震。九月丁酉夜，京师地震有声。

元统元年八月，巩昌、徽州山崩。九月庚申，泰州山崩。十月丙寅，凤州山崩。十二月丙申，巩昌成纪县地裂山崩。癸卯，安庆潜山县地震。辛亥，秦州地裂山崩。十二月，饶州德兴县，余干、乐平二州地震。二年五月，信州地震。八月辛未，京师地震。鸡鸣山崩，陷为池，方百里，人死者众。

至元元年十一月壬寅，兴国路地震。十二月丙子，安庆路地震，所属宿松、太湖、潜山三县同时俱震。庐州、蕲州、黄州亦如之。是月，饶州亦地震。二年正月乙丑，宿松地震。五月壬申，秦州山崩。三年八月辛巳夜，京师地震。壬午，又震，损太庙神主，西湖寺神御殿壁倾，祭器皆坏。顺州、龙庆州及怀来县皆以辛巳夜地震，坏官民庐舍，伤人及畜牧。四年春二月乙酉，奉圣州地震，保安州及瑞州路新昌州地震。六月，新州路灵山裂。七月己酉，保安州地大震。丙辰，巩昌府山崩。八月辛丑，宣德府地大震，改宣德为顺宁府。丙子，京师地震，日凡二、三，至乙酉乃止。密州安丘县地震。六年六月己亥，秦州成纪县山崩地裂。

至正元年二月，汴梁路地震。二年四月辛丑，冀宁路平晋县地震，声如雷鸣，裂地尺余，民居皆倾仆。五月，济南山崩水涌。七月，惠州罗浮山崩，心二十七处，坏民居无算。十二月乙酉，京师地震。三年二月，钧州之新郑、密县地震。六月乙巳，秦州秦安县南坡崩裂，压死人畜。七月戊辰巩昌

山崩，人畜死者众。十二月，胶州及属邑高密地震。四年八月，莒州蒙阴县地震。十二月，东平路东阿、阳谷、平阴三县及汉阳地震。五年春，蓟州地震，所领四县及东平汶上县亦如之。十二月乙丑，镇江地震。六年二月，益都路益都、昌乐、寿光三县，潍州北海县，胶州即墨县地震。三月，高苑县地震，坏民居。六月，广州增城县罗浮山崩，水涌溢，溺死百余人。九月戊午，邵武地震，翌日地中有声如鼓，夜复如之。七年二月，益都临淄、临朐，潍州之昌邑、胶州之高密、济南之棣州地震。三月，东平路东阿、阳谷、平阴三县地震，河水动摇。五月，临淄地又震，七日乃止。河东地坼泉涌，崩城陷屋，伤人民。十一月，镇江丹阳县地震。九年六月，台州地震。七月庚寅，泉州大风雨。永春县南象山崩，压死者众。十年，冀宁徐沟县地震。五月甲子，龙兴宁州大雨，山崩数十处。丙寅，瑞州上高县蒙山崩。十月乙酉，泉州安溪后山鸣。十一年四月，冀宁路汾、忻二州，文水、平晋、榆次、寿阳四县，辽州之榆社，怀庆之河内、修武二县及孟州同时地震，声如雷霆，圯房屋，压死者甚众。八月丁丑，中兴路公安、松滋、枝江三县，峡、荆门二州地震。十二年二月丙戌，霍州灵石县地震。闰三月丁丑，陕西地震，庄浪、定西、静宁、会州尤甚，移山湮谷，陷没庐舍，有不见其迹者。会州公廨墙圯，得弩五百余张，长丈余，短者九尺，人莫能开挽。十月丙午，霍州赵城县霍山崩，涌石数里，前三日，山鸣如雷，禽兽惊散。十三年三月，庄浪、定西、静宁、会州地震。七月，汾州白彪山坼。十四年四月，汾州介休县地震，泉涌。七月，孝义县地震。十一月，宁国路地震，

所领宁国、旌德二县亦如之。淮安路海州地震。十二月己酉，绍兴地震。十五年四月，宁国敬亭、麻姑、华阳诸山崩。六月丁丑，冀宁之德州地震。十六年春，蓟州地震，凡十日，所领四县亦如之。六月，雷州地大震。十七年十月，静江路东门地陷，城东石山崩。十二月丁酉，庆元路象山县鹅鼻山崩，有声如雷。十八年二月乙酉，冀宁临州地震。五月，益都地震。十九年正月甲午，庆元地震。二十年二月，延平顺昌县地震。二十二年三月，南雄路地震。二十三年十二月丁巳，台州地震。二十五年十月壬申，兴化路地震，有声如雷。十二月洛阳山鸣。二十六年三月，海州地震如雷，赣榆县吴山崩。六月，汾州介休县地震。绍兴山阴县卧龙山裂。七月辛亥，冀宁路徐沟县，石、忻、临三州，汾之孝义、平遥二县同日地震，有压死者。丙辰，泉州同安县三秀山崩。是月，河南府巩县大霖雨，地震山崩。十一月辛丑，华州蒲城县洛岸崩，壅水，绝流三日。十二月庚午，华州之蒲城县洛水和顺崖崩，其崖戴石，有岩穴可居，是日压死辟乱者七十余人。二十七年五月，山东地震。六月，沂州山石崩裂，有声如雷。七月丙戌，静江灵川县大藏山石崖崩。十月丙辰，福州雷雨，地震。十二月庚午，又震，有声如雷。二十八年六月，冀宁文水、徐沟二县，汾州孝义、介休二县，临州、保德州，隰之石楼县及陕西皆地震。七月，辽阳鸡鸣山崩。十月辛巳，陕西地又震。二十九年正月，中都地震。

至元元年十月壬子，恩州历亭县进嘉禾，一茎九穗。十一月丁酉，太原临州进嘉禾二茎。四年十月辛未，太原进嘉

禾二本，异亩同颖。六年九月癸巳，恩州进嘉禾，一茎三穗。七年夏，东平府进瑞麦，一茎二穗。三穗、五穗者各一本。十一年，兴元凤州进麦，一茎七穗；谷一茎三穗。十四年八月，嘉禾生襄阳。十七年十月，太原坚州进嘉禾六茎。十八年八月壬寅，瓜州屯田进瑞麦，一茎五穗。二十年癸巳，幹端宣慰司刘恩进嘉禾，同颖九穗、七穗、六穗者各一。二十三年五月，广元路阆中麦秀两歧。二十四年八月，浚州进瑞麦，一茎九穗。九月，中兴路生嘉禾，一穗九茎。二十五年八月，袁州萍乡县进嘉禾。二十六年十二月，宁州民张世安进嘉禾一本。二十九年二月壬申，泽州献嘉禾。三十一年，嘉禾生京畿，一茎九穗。

大德元年十一月辛未，曹州禹城县进嘉禾，一茎九穗。九年，嘉禾生应州山阴县。

至大三年九月，河间路献嘉禾，有异亩同颖及一茎数穗者，敕绘为图。

皇庆二年八月，嘉禾生浑源州，一茎四穗。

延祐四年九月，南城产嘉禾。七年五月，鄱阳进嘉禾，一茎六穗。

至治元年十月壬子，左丞相拜住献嘉禾，两茎同穗。二年八月，蔚昌府献嘉禾。

泰定元年十月，成都县谷一茎九穗。

后至元四年五月，彰德临彰县麦秀两歧，有三穗者。

至正元年，延平顺昌县嘉禾生，一茎五穗。冀宁太原县有嘉禾，异亩同颖。三年八月，晋宁临汾县嘉禾生，有五穗

至八穗者。六年，洛阳产瑞麦，一茎三、四穗。十年，彰德路谷、麦双穗。十六年，大同路秦城乡嘉禾生，一茎二穗、五穗，有九穗者，有异茎而同穗者。二十六年五月，洛阳县康家庄有瑞麦，一茎五穗、双穗、三穗者甚众。

卷三十九

志第十三

地理一

自唐末疆域分袭，历五代至宋，辽与西夏尚据边垂。金灭辽克宋，赵氏南迁，划分南北。又历百余年，而元兴。迨世祖取江南，中国始统于一姓焉。元之疆域，九州而外，幅员尤广。世祖以前，阿母河、别失八里俱置尚书行省。至元初，别失八里、火州、斡端等处俱置宣慰司。又太祖分东边之地封诸弟，分西北边之地封诸子。其后，皇孙旭烈兀建国波斯，与术赤、察合台之后，并为三大藩。职方之志，宜考其山川与其疆域之沿革，以次于十一行省之后，不应如旧史《地理志》之褊狭也。然旧志实本于《大一统志》与《经世大典》，官修之籍既不足征，其局于褊狭宜哉。今为《地理志》亦仍前史之旧，订其舛讹，补其夺漏而已。其所不知，盖阙如也。

中书省，统河北、山东西之地，谓之腹里，领路二十九，

州八，属府三，属州八十三，属县三百四十四。

大都路。金之中都曰大兴府。太祖十年，克中都，改燕京路，总管大兴府。世祖中统元年，车驾幸燕京。五年，建为中都，大兴府仍旧。至元四年，始于中都之东北筑新城而迁都焉。京城方六十里，十一门：正南曰丽正，南之右曰顺承，南之左曰文明，北之东曰安贞，北之西曰建德，正东曰崇仁，东之右曰齐化，东之左曰光熙，正西曰和义，西之右曰肃清，西之左曰平则。大内南临丽正门，正衙曰大明殿，曰延春阁。宫城周回九里三十步，分六门：正南曰崇天，崇天之左曰星拱，右曰云从，东曰东华，西曰西华，北曰厚载。崇天门外有石桥三，中为御道星拱门，南有御膳亭，亭东有拱辰堂，为百官会集之所。厚载门北为御苑，外周垣红门十有五，内苑红门五，御苑红门四。大明门在崇天门内，大明殿之正门也。日精门在大明门左，月华门在其右。大明殿为登极、正旦、寿节会朝之正衙。寝殿后连香阁，文思殿在寝殿东，紫檀殿在寝殿西，宝云殿在寝殿后。凤仪门在东庑中，麟瑞门在西庑中。凤仪门外有内藏库二十所。嘉庆门在后庑宝云殿东，景福门在殿西，延春门在殿后，延春阁之正门也。懿范门在延春左，嘉则门在延春右。延春阁寝殿后有香阁。慈福殿又曰东暖殿，在寝殿东。仁明殿又曰西暖殿，在其西。景耀门在左庑中，清灏门在右庑中。玉德殿在清灏门外，有东西香殿。宸庆殿在玉德殿后，有东西更衣殿。隆福殿在大内西兴圣之前。光天门，光天殿正门也，崇华门在光天门左，膺福门在其右。光天殿后有寝殿。青阳门在左庑中，明辉门在

右庑中。寿昌殿又曰东暖殿，嘉禧殿又曰西暖殿。文德殿在明辉门外，又曰枌北殿，皆枌木为之。盪顶殿在光天殿西北，后有盪顶小殿。香殿在宫垣西北隅，有前后寝殿。文宸库在宫垣西南隅，酒房在东南隅，内庖在酒房北。兴圣宫在大内西北万寿山正西。后有寝殿。兴圣门，殿之北门。明华门在左，肃章门在右。宏庆门在殿之东庑中，宣则门在西庑中。凝晖楼在宏庆南，延颢楼在宣则南。嘉德殿在寝殿东，宝意殿在其西。山字门在兴圣宫后，延华阁之正门也，东西殿在阁西左右。芳碧亭在延华阁后圆亭东，徽青亭在圆亭西。兴哥儿殿在延华阁右，木香殿在殿后。东盪顶殿在延华阁东版垣外，后有寝殿。盪顶之制，三掾其顶，如筭之平，故名。西盪顶殿在延华阁西版垣外。学士院在延华阁后。万寿山在大内西北太液池之阳，金人名琼华岛，至元八年赐今名。广寒殿在山顶，中有小玉殿。仁智殿在山之半。金露亭在广寒殿东方。壶亭，又曰线珠亭，自金露亭前复道登焉。瀛洲亭在温石浴堂后，荷叶殿在方壶亭前。温石浴室在瀛州亭前。圆亭，又曰胭脂亭，在荷叶殿稍西，为后妃添妆之所。八面介福殿在仁智殿东，延和殿在西。更衣殿在山东。太液池在大内西，仪天殿在池中圆坻上。半山台在仪天殿前。御苑在隆福宫西，香殿在石假山上，殿后有石堂。红门外有太子斡耳朵荷叶殿，上有香殿，左有圆殿，在山前圆顶上。歇山殿在圆殿前，东西亭在殿后东西，水心亭在殿池中。棕毛殿在假山东，偏后有盪顶殿。仪鸾局在殿前三红门外西南隅。九年，改为大都。十九年，置留守司。二十一年，置大都路总管府。二十七年，改都总管府。至大中，本路达鲁花赤莫吉，买灵

椿里周氏地十九亩，建公署。旧领通、蓟、涿、霸、雄、保、遂、安肃、檀、顺、易十一州，太宗十一年析保、雄、易、遂、安肃五州为顺天路，后又升安次、同安二县为州，灤阴县为灤州，与雄、易二州并来属。至元二十三年，又析雄、易二州隶保定路。延佑三年，升缙山县为龙庆州来属。旧领大兴、宛平、安次、灤阴、永清、宝坻、香河、昌平、武清、良乡十县，太宗七年析安次县隶霸州，至元十三年升灤阴县为灤州，以武清、香河二县隶之。户十四万七千五百九十，口四十一万一千三百五十。领院五：左、右警巡院二，初设警巡院三，至元四年省其一，以左右二院分领坊市。南城警巡院，大德九年，增置。分治四隅警巡院二。至大三年，增置。

县六：

大兴，赤。金改辽析津县为大兴县，元因之。宛平，赤。金故县与大兴分治郭下。良乡，下。永清，下。宝坻，下。昌平，下。皇庆二年徙县治于新店。

州十：

涿州。下。金故州，属中都路。太宗八年，升涿州路。中统四年，复降为州，旧领范阳、固安、新城、定兴、奉先五县。固安升为州，新城后隶雄州，定兴后隶易州。领县二：

范阳，下。倚郭。有盭顶殿。房山。下。金万宁县，后改奉先。至元二十七年改今名。

霸州。下。宋故州，治文安县，属河北东路。金改治益津县，属中都路。旧领益津、文安、大城、信安四县。金升信安县为镇安府，元初并入本州。至元四年，置保定县。旧志：金置信安军。乃镇安府之误。领县四：

益津，下。倚郭。中统四年省。至元四年复置。有平曲水寨。文安，下。大城，下。保定，下。金隶雄州，至元二年省入益津，四年复置，改隶霸州。

通州。下。金故州，属中都路。领县二：

潞县，下。倚郭。三河。下。

蓟州。下。金故州，属中都路。领县五：

渔阳，下。倚郭。丰润，下。本玉田县之永济务，金大定二十七年升为县，后避讳改丰润。太祖十年，升为润州，至元二年省入玉田。未几，以当冲要，复置。后又废，十三年再置。玉田，下。遵化，下。平谷。下。本渔阳县大王镇，金升为平峪县。至元二年，省入渔阳县。十三年复置，省峪为谷。

灤州。下。金灤阴县，属大兴府。至元十三年，升灤州，灤阴县旧治在城南隅，升州后迁治于河西务，至正间复移旧治。以大兴府之武清、香河二县来属。领县二：

香河，下。本武清县地，辽析置。武清。下。

顺州。下。金故州，属中都路，旧领温阳、密云二县，元初省县入州。

檀州。下。辽故州，金初省入顺州，元初复置。

东安州。下。金安次县，属大兴府。太宗七年，改属霸州；中统四年，升为东安州。

固安州。下。金固安县，属涿州。宪宗九年，改属霸州。又改隶大兴府。中统四年，升为固安州。下。

龙庆州。下。金缙山县，属德兴府。至元三年，省入怀来县。五年，复置，改属宣德府奉圣州。延祐三年，升为龙

庆州，改隶大都路。皇庆元年，建行宫凉殿。至治元年，又作行殿于流怀池。领县一：

怀来。下。金怀来县，后更名妫川，属德兴府。元初复旧名，延佑二年改属本州。

上都路。金恒州地。元初为札刺儿、兀鲁特两部分地。宪宗六年，世祖命刘秉忠建城于恒州东、滦水北之龙冈。中统元年，赐名开平府。五年，建为上都。有重城。外城周十六里三百三十四步，南、北各有一门，东、西各二门。内城周六里三百三十步，东、西、南各一门。正南门曰明德门，内有大明殿，门左曰星拱，右曰云从。有仪天殿，门左曰日精，右曰月华。宝云殿，侧有东西暖阁。宸丽殿，侧有东西香殿。玉德殿，后有寿昌堂、慈福殿。有紫檀阁，连香阁、延春阁。其前拱辰堂，为百官议政之所。后御膳房、凝晖楼，侧有绿珠、瀛州二亭。有金露台。世祖又迁宋汴京之熙春阁于上都，为大安阁。阁后为鸿禧、睿思二殿。城东南又有东、西凉亭，为驻蹕之处。至元二年，置留守司。五年，置上都路总管府。十八年，升上都留守司，兼行本路总管府事。户四万一千六十二，口十一万八千一百九十一。领院一：

警巡院。

县一：

开平。上。金清塞县，中统元年改今名。

府一：

顺宁府。金宣德州，属西京路。元初为宣宁府，太宗七年改山东路总管府。中统四年改宣德府，仍隶上都路。延佑

五年，改隶大都路。泰定元年，复隶上都留守司。后至元三年，以地震改顺宁府。旧领录事司，宣德、宣平二县。元初以宏州之顺圣县来属。至元二年，省录事司入宣德县。领县三：

宣德，下。倚郭。至元二年，省德兴府之龙门县入之。二十八年，又割龙门县地属云州。宣平，下。金置县于大新镇。元初移治辛南庄。顺圣。下。

府领州二：

保安州，下。金德兴府，属西京路。至元三年，改奉圣州，后至元二年以地震改保安州。旧领德兴、妫川、缙山、望云、矾山、龙门六县。中统四年升望云县为云州，至元二年省矾山县入永兴，元初改金德兴为永兴县。龙门县入宣德府之宣德，三年省缙山县入怀来，元初改金妫川为怀来县。五年复置缙山县，改隶宣德府，延祐三年徙怀来隶龙庆州。领县一：

永兴。下。倚郭。至元六年省入本州，未几复置。延祐六年并入奉圣州。

蔚州。下。金故州，属西京路。至元二年，省州入灵仙县，隶弘州。是年复为蔚州。至大元年升蔚昌府。后复为蔚州，隶宣德府。领县五：

灵仙，下。灵邱，下。飞狐，下。定安，下。广灵。下。州五：

兴州。下。金故州，属北京路。至元三年改属上都路。旧领兴安、宜兴二县。天历元年，升宜兴为州。后至元五年，省兴安县入本州。

宜兴州。中。金宜兴县，属兴州。元初省入兴州。至元二年，复置。天历元年，升为州。俗称小兴州。以兴州为大兴州。

松州。下。金松山县，属大定府。中统三年，升为松州，仍存县。至元二年，省县入州。

桓州。上。金故州，属西京路。元初省。至元二年，复置。

云州。下。金望云县，属德兴府。中统四年，升为云州，仍存县，改属宣德府。至元二年，省县入州。二十八年，复析宣德之龙门镇置望云县，隶本州。领县一：

望云。下。金龙门县，属德兴府。至元二年，废为镇。二十八年，置县。

兴和路。上。金抚州，属西京路。元初省，宪宗四年复置。中统三年以州为内辅，升为隆兴府，建行宫。至元四年析隆兴府自为一路，行总管府事。至大元年降隆兴路为源州，隶中都留守司。四年，罢留守司，复置隆兴路总管府。皇庆元年，改隆兴路为兴和路。户八千九百七十三，口三万九千四百九十五。旧领柔远、集宁、丰利、威宁四县。集宁县升为路，丰利县并入高原。中统三年，析大同府之怀安、天成二县来属。领县四：

高原，下。倚郭。金柔远县。中统二年改今名，隶宣德府，三年来属。怀安，下。金属大同府。中统三年来属，后废。至元中复置怀安县于阳门站。天成，下。金属大同府，中统三年来属。威宁。下。金威宁县。旧志作咸宁，误。元初

属宣德府，中统三年来属。

州一：

宝昌州。下。金昌州，领宝山县，属西京路。元初隶宣德府。中统三年，改隶本路，置盐使司。后省州，存县。延祐六年，改宝山县为宝昌州。

永平路。下。金平州，属中都路。太祖十年，改为兴平府。后又改兴平路。中统元年，又改平滦路，置总管府。大德四年，以水患，改永平路。旧领卢龙、迁安、抚宁、昌黎、海山五县。至元四年，省海山县入昌黎。户一万三千五百一十九，口三万五千三百。领司一：

录事司。中统元年置。

县四：

卢龙，下。倚郭。迁安，下。至元二年省入卢龙县，后复置。抚宁，下。至元二年与海山县俱省入昌黎。三年复置。四年，又与海山县俱省。七年复置，仍省昌黎县入之。昌黎。下。至元十一年复置。十二年以海山县故地来属，改隶滦州。后复隶本路。

州一：

滦州。下。金故州，属中都路。元初属永平路。旧领义丰、马城、石城、乐亭四县。至元二年省石城县入乐亭，三年改入义丰。四年又省马城县入义丰。延祐七年并永平滦县于石城，是石城至元后复置，本路又有滦县，均不可考。领县二：

义丰，下。倚郭。至元二年省入本州。三年复置。乐亭。

下。元初尝置漠州，寻废，复为乐亭县。

德宁路。下。大德九年以黑水新城为静安路，延祐五年改为德宁路。领县一：

德宁。下。大德九年置静安县，延祐五年改今名。赵王不鲁纳食邑沙、静、德宁等处。

净州路。下。金故州。太宗八年置，属西京路。后升为净州路。延祐七年丰州修路碑有德宁天山分司宣慰使。是旧无净州路，置路在仁宗以后。领县一：

天山。下。本榷场。金大定十八年置县。元因之。

泰宁路。下。金泰州，属北京路。元初隶辽阳行省。延祐二年改为泰宁府，四年升泰宁府为泰宁路。是年四月仍以泰宁路隶辽阳省。后改隶中书省。领县一：

泰宁。下。延祐四年置。按金泰州属县一，为长春。其省并年分阙。

集宁路。下。金集宁县，属抚州。元初升为路。领县一：集宁。下。本市场。金明昌三年置县。元因之。

应昌路。下。至元七年，斡罗陈万户及其妃囊加真公主请于上都东北三百里答儿海子本藩驻夏之地，建城邑以居，遂名其城为应昌府。二十二年，改为应昌路。至正初罢之，拨属鲁王马某沙王傅府。十四年复置，领县一：

应昌。下。

全宁路。下。元贞元年，囊家真公主请以应昌路东北七里驻冬之地，建城邑，名曰全州。大德元年，升全州为全宁府。七年，又升为全宁路。至正初罢之。十四年复置。领县一：

全宁。下。

宁昌路。下。延祐五年，置宁昌府。至治二年，升宁昌府为下路。增置一县。领县一：

宁昌。下。至治二年置。

沙井总管府。领县一：

沙井。丰州西北有沙井故城，驸马赵王分地。

保定路。下。金保州，又改顺天军，属中都路。太宗十一年，升顺天路总管府。至元十二年，改保定路。旧领清苑、满城二县。太宗十一年，析中山府之庆都来属。后又以行唐、唐县、曲阳、新安、博野隶之。户七万五千一百八十二，口十三万九百四十。领司一：

录事司。至元十二年置。

县八：清苑，中。附郭。满城，中。唐县，下。金隶中山府，后来属。庆都，下。金隶中山府。后来属。行唐，下。金隶真定府。后来属。曲阳，下。金隶中山府。元初改恒州，置元帅府，以阜平、灵寿、行唐、唐县隶之。元帅府罢，仍为典阳县，改属保定路。新安，下。金新安州附郭置渥城县。

至元二年，州、县俱废，改为新安镇，入归信县。四年，割入容城。九年，复置新安县，来属。博野，下。金隶蠡州。至元三年，省入蒲阴县。十一年，复置，改属本路。

州七：

易州。中。金故州，属中都路。太宗十一年，改隶顺天府。至元十年，隶大都路。二十三年，还隶保定。旧领易、涑水二县。元初析涑州之定兴县来属。领县三：

易县，中。倚郭。元初存州废县。至元三年复置。涑水，下。定兴，下。金析范阳县黄村，一名皇甫镇，置定兴县。本属涑州。后来属。

祁州。中。金故州，属河北西路。元初隶真定路。后改隶保定路。旧领蒲阴、鼓城、深泽三县。太宗十年，升鼓城为军民万户所。至元三年，以深州之束鹿县来属。领县三：

蒲阴，中。倚郭。金旧县。旧志至元三年置，误也。深泽，下。至元二年并入束鹿县，三年复置。束鹿。中。

雄州。下。金故州，属中都路。旧领归信、容城、保定三县。太宗十一年，析雄州三县隶顺天路。至元二年，省保定入霸州益津县，归信、容城二县与涑州之新城县俱改隶大都路。十年，改本州隶大都路。十二年，改隶保定路。二十三年，以本州隶保定路，复以归信、容城、新城三县来属。领县三：

归信，下。容城，下。金已隶本州。旧志金隶安肃州，误也。新城。下。金属涑州。太宗二年，升新泰州。七年，复为县，隶大都路。十一年，改隶顺天路。至元二年，隶雄州。十年，改隶大都。二十三年，复来属。

安州。下。金故州，治高阳县，后徙治渥城县，属中都路。旧领渥城、葛城、高阳三县。至元二年，省州与渥城入归信县。寻复置安州，治葛城县。领县二：

葛城。下。依郭。金升高阳之葛城乡为县。高阳。下。元初改属河间路，后隶本州。

遂州。下。金故州，领遂城一县，属中都路。至元二年省州与遂城入安肃州为镇。后复置州，隶本路。

安肃州。下。金故州。属中都路。元初改隶保定路。旧领安肃一县，元初省。

完州。下。金永平县属中山府，又改完州。至元二年，降永平县。后复为完州。初隶真定路，改隶本路。

燕京河北道肃政廉访司。

真定路。上。金真定府，属河北西路。元初，升真定路总管府。旧领中山府，赵、邢、洺、磁、滑、浚、卫、辉、祁、威、完十一州。后割磁、威隶广平，浚、滑隶大名，祁、完隶保定，邢隶顺德，洺隶广平，卫辉自为一路。又以冀、深、晋、冀四州来属。旧领真定、藁城、平山、栾城、获鹿、行唐、阜平、灵寿、元氏九县。至元中，析行唐县隶保定路，以潞州之涉县来属。户十三万四千九百八十六，口二十四万六百七十。领司一：

录事司。

县九：

真定，中。倚郭。玉华宫在衙城之北，为睿宗神御殿，奉安御容。有新城镇。藁城，中。金故县。太祖十七年，升永

安州，以无极、宁晋、新乐、平棘四县隶之。太宗七年，复为藁城县。栾城，下。元氏，中。获鹿，中。金故县，后升镇宁州。太宗七年，复为获鹿县。平山，下。灵寿，下。阜平，下。涉县。下。金隶潞州。元初升崇州，改隶真定。后废州，仍为涉县。至元二年，省入磁州。后复置。

府一：

中山府。金故府，属河北西路，领祁、完二州。太宗十一年，析二州隶顺天府。后为散府，隶真定路。旧领安喜、新乐、无极、永平、庆都、曲阳、唐县七县。永平升为完州，与庆都、曲阳、唐县俱改隶保定路。领县三：

安喜，中。新乐，下。无极。下。

州五：

赵州。中。金改宋赵州为沃州，属河北西路。元初仍为赵州。旧志太祖十五年割所属栾城、元氏隶真定。按二县本隶真定路，旧志误也。领县七：

平棘，中。宁晋，下。隆平，下。临城。中。柏乡，下。高邑，下。赞皇。下。至元二年，并入高邑。七年，复置。

冀州。上。金故州，属河北东路。旧领录事司，信都、南宫、衡水、武邑、枣强五县。元初析衡水隶深州，复置新河县。后又省录事司入信都。领县五：

信都，中。倚郭。至元初，兴录事司俱省入本州。后复置。三年，省录事司入之。南宫，上。枣强。中。武邑，中。新河。中。太宗四年，析南宫县地置。

深州。下。金故州，属河北东路。元初，隶河间路，置元帅府。太宗十年，改隶本路。旧领饶阳、安平、武强、束

鹿、静安五县。后析安平、饶阳、武强隶晋州，束鹿隶祁州，以冀州之衡水来属。领县二：

静安，中。倚郭。本下博县，宋改静安。衡水。下。

晋州。金鼓城县，属祁州。太祖十年，升为晋州。太宗十年，改鼓城等处军民万户所。中统二年，复为晋州。领县四：

鼓城，中。倚郭。饶阳，中。安平，下。太祖十九年，为南平州行千户总管府事，领饶阳一县。太宗七年，复改为县，隶深州。宪宗潜邸，隶鼓城军民万户所。中统二年，仍为安平县，隶本州。武强。下。元初置东武州，领武邑、静安。太宗六年，降州为县，隶深州。十一年，析属祁州。中统二年，改隶本州。

蠡州。下。金故州，属河北东路。元初，改隶真定路。旧领司候司、博野一县。至元三年，俱省入本州。后复置博野县，改隶保定路。十七年直隶中书省，二十一年还隶本路。

顺德路。下。金邢州，属河北西路。元初，置元帅府。后改安抚司。中统三年，升顺德府。至元元年，以洺州、磁州来属。二年，析洺磁自为一路，改本府为顺德路总管府。旧领邢台、唐山、内邱、平乡、任、沙河、南和、钜鹿八县。宪宗五年，析平乡县道武镇置广宗县。旧志作武道镇，误倒。户三万五百一，口十二万四千四百六十五。领司一：

录事司。

县九：

邢台，中。倚郭。钜鹿，中。内邱。中。平乡，中。广

宗，中。宋故县。金改宗城，属洺州。元初复为广宗。后省入平乡县。宪宗五年，复置，属本路。至元二年，又省入平乡。寻复置。沙河，下。南和，下。至元二年，省入沙河县。寻复置。唐山，下。至元二年省入内邱县。寻复置。任县，下。至元二年，省入邢台。寻复置。

广平路。下。金洺州，属河北西路。太宗八年，置邢洺路总管府，以邢、磁、威隶之。宪宗二年，改洺磁路，止领磁、威二州。至元十五年，改广平路总管府。旧领永年、广平、宗城、新安、成安、肥县、鸡泽、曲周、洺水九县。元初，省宗城入洺水县，新安入威州，又析洺水隶威州，成安隶磁州。户四万一千四百四十六，口六万九千八十二。领司一：

录事司。

县五：

永年，中。倚郭。曲周，中。肥乡，中。鸡泽，下。元初省入永年。后复置。广平。下。

州二：

磁州。中。金故州，属河北西路。太祖十年，升为滏源军节度使，隶真定路。太宗八年，仍为磁州，改隶邢洺路。旧领隶事司，滏阳、武安、邯郸三县。至元二年，省真定之涉县及成安县入滏阳，省武安县入邯郸。后复置武安、成安二县。至元三年，省录事司入滏阳。领县四

滏阳，中。倚郭。武安。中。元统二年，移石山寨巡检司于清水寨。邯郸，下。成安。下。

威州。中。金故州，属河北西路，治井陉县。太宗六年，

改隶邢洺路，以洺水县来属。宪宗二年，徙州治于洺水。旧领洺水、井径、威三县。至正间，省威县入本州。领县二：

洺水，中。倚郭。本隶洺州。定宗二年，改隶本州。宪宗二年，徙州治于此。井陘，下。宪宗二年，徙县治于天长入镇。

彰德路。下。金彰德府，属河北西路。太宗四年，置彰德总帅计，领卫、辉二州。宪宗二年，降彰德为散府，与卫、辉二州并隶真定路。至元元年，复立彰德路总管府，领怀、孟、卫、辉四州。二年，又析怀孟为一，卫辉为一。旧领安阳、林虑、汤阴、临漳、辅岩五县。至元四年，升林虑为州。六年，并辅岩入安阳县。户三万五千二百四十六，口八万八千二百六。领司一：

录事司。

县三：

安阳，上。汤阴，中。临漳，中。

州一；

林州。下。金林虑县。后升林州。太宗七年，行县事。宪宗二年，复为州。至元二年，复为县，省辅岩县入之。六年，复为州，割辅岩入安阳县。

大名路。中。金大名府，属大名府路。元初因之，置大名路总管府。旧领元城、大名、魏县、冠氏、南乐、馆陶、夏津、朝城、清平、莘县十县。冠氏升为州，馆陶、朝城析隶濮州，夏津析隶高唐州，莘县析隶东昌路，清平析隶德州。以恩州之清河县来属。户六万八千六百三十九，口十六万三千

六十九领司一：

录事司。

县五：

元城，中。倚郭。至元二年，并入大名县。后复置。大名，中。倚郭。太宗六年，立县治。宪宗二年，迁县治于府城内。至元九年，置县治于旧所。南乐，中。魏县，中。清河，中。金故县，属恩州。太宗七年，改属本路。

州三：

开州。上。金故州，属大名府路。旧领濮阳、清丰、观城、长垣四县。元初，析观城隶濮州。至元二年，又析大名路之长垣、东明来属。领县四：

濮阳，上。倚郭。东明，中。太宗七年，割隶大名路。至元七年来属。长垣，中。初隶大名路。至元二年来属。清丰。中。

滑州。中。金故州，属河北西路。元初，改隶大名路。领县二：

白马，上。倚郭。内黄。中。

浚州。下。金故州，属河北西路。至元二年，改隶大名路。旧领黎阳、卫县。后并黎阳入本州；升卫县为州，隶卫辉路。

怀庆路。下。金怀州，属河东南路，以与临潢府怀州同，改南怀州，后又去南字。元初因之。太宗六年，行怀孟州事。宪宗七年，改怀孟路总管府。中统二年，仍为州，隶真定路。至元元年，以怀孟隶彰德路。二年，复自为一路，以淇州隶

之。三年，又以淇州隶卫辉路。延祐六年，以仁宗潜邸，改怀庆路。户三万四千九百九十三，口十七万九百二十六。领司一：

录事司。

县三：

河内，中。清化镇有庙学。修武，中。武陟，中。

州一：

孟州。下。金故州，属河东南路，以水患徙治今城。故城谓之下孟州，新城谓之上孟州。元初，治下孟州。宪宗八年，复徙上孟州。旧领司候司，河阳、济源、王屋、温县四县。至元三年，省王屋入济源，并司候司入河阳。领县三：

河阳，下。济源，下。太宗六年，升为源州。七年，复为县。温县。下。

卫辉路。下。金卫州，属河北东路。旧治汲县，以水患徙治于宜村新城，以胙城为倚郭县。宪宗元年，还州治于汲县。中统元年，升卫辉路总管府。户二万二千一百一十九，口十二万七千二百四十七。领司一：

录事司。中统元年置。

县四：

汲县，下。倚郭。新乡，中。获嘉，下。胙城。下。

州二：

辉州。下。金河平县，又改苏门县，升为辉州，属河北东路。元因之，改隶本路。旧领山阳县。至元三年，废山阳为镇，入本州。

淇州。下。本卫县之鹿台乡。宪宗五年，以大名、彰德、卫辉籍余之户，置为淇州。又置临淇县为倚郭。中统元年，隶大名路。至元三年，改隶卫辉路，省县入本州。

河间路。下。金河间府，属河北东路。至元二年，升河间路总管府。自河间路以下四路、七州，旧隶山东东西道宣慰司，至大二年改直隶中书省。旧领河间、肃宁二县。至元二年，割济南路之临邑来属。又析济南路之齐东，景州之宁津，陵州之青城来属。户七万九千二百六十八，口十六万八千五百三十六。领司一：

录事司。

县六：

河间，中。倚郭。肃宁，下。至元二年，废为镇，入河间县。后复置。齐东，下。金齐东镇。刘豫置夹河巡检司。金乱，大兵南下，城之。宪宗三年，置县，属河间路。四年，又属济南路。至元二年，仍隶本路。县管鸾户郊外皆章邱、邹平地。宁津，下。金属景州。至元二年，改隶本路。临邑，下。金属济南府。太宗七年，改隶本路。宪宗三年，还属济南。至元二年，复属本路，析县南之新市入济阳。青城。下。太宗七年，析临邑、宁津地置，属济南路。中统间，改隶陵州。至元二年，改隶本路。

州六：

沧州。中。金故州，属河北东路。元初，改隶河间路。延祐元年，徙州治于长芦镇。领县五：

清池，中。乐陵，中。县治咸平镇，至正末迁治棣州旧城。南皮，下。无棣，下。至元二年，省入乐陵县，以县治

入棣州。寻复置，又分其西界于故城置县，仍属本州，谓之西无棣县。盐山。下。至元二十五年，以沧州之军营城为沧溟县。其省、罢年分阙。

景州。中。金故州，又改观州，治东光县，属河北东路。元初，改隶本路。至元二年，复为景州。元初，徙治蓟县。旧领东光、阜城、将陵、吴桥、蓟、宁津六县。宪宗三年，升将陵为陵州，宁津改隶河间路。领县五：

蓟县，中。元初升为元州。后复置。故城，中。元初隶河间路。至元三年省为故城镇，入陵州。是年，复析陵州西南界置故城县来属。阜城，下。东光，下。吴桥。中。金升将陵县之吴川镇为县。

清州。下。金故州，属河北东路。太宗二年，升清宁府。七年，复为清州。旧领司候司，会川、兴济、靖海三县。至元二年，省司候司及靖海、兴济入会川县。后复置二县。领县三：

会川，中。靖海，下。兴济。下。

献州。下。金寿州，又改献州，属河北东路。旧领乐寿、交河二县。至元二年，省州及交河入乐寿，改隶河间路。未几，复置。领县二：

乐寿，中。附郭。交河。中。金析乐寿县置。

莫州。下。金故州，属河北东路。旧领任邱一县。至元中，复置莫亭县。领县二：

莫亭，下。倚郭。金析任邱地，置县。后省。至元中复置。任邱。下。至元二年。省入河间县。后复置。

陵州。下。金将陵县，属景州。宪宗三年，改隶河间府。

是年，又升为陵州，隶济南路。至元二年，复为县。三年，仍为州，还隶本路。移建州治于旧治西北七里。

东平路。下。金东平府，属山东西路。太祖十五年，国王木华黎承制授严实东平行台。太宗二年，以实为东平路行军万户。实卒，子忠济嗣为万户行总管府事。至元五年，始以东平为散府。九年，升下路总管府。户四万四千七百三十一，口五万一百四十七。领司一：

录事司。

县六：

须城，下。倚郭。东阿，中。宋徙县治于金桥镇。阳谷，中。以水患，宋徙县治于孟店。汶上，中。金太和八年，改汶阳县为汶上。寿张，下。金迁县治于竹口镇。后复旧治。平阴。下。至元十三年迁今治。

东昌路。下。金博州，属山东西路。元初，改隶东平路。至元四年，升为博州路总管府。十三年，改东昌路。旧领聊城、堂邑、博平、茌平、高唐五县。至元七年，升高唐为州，直隶中书省，析大名路莘县来属。二十六年，析堂邑属地置邱县。户三万三千一百二，口十二万五千四百六。领司一：

录事司。

县六：

聊城，中。倚郭。初随博州隶东平路。至元四年，析为博州总管府治。十三年，改东昌路总管府治。堂邑，中。宋以水患，徙城于旧治东十里。莘县，中。博平，中。宋以水患徙县治于宽平镇，又割明灵砦隶清平。茌平，中。邱县。下。

本为平恩镇，隶曲周，后升为县。至元二年，省入堂邑。二十六年，宣慰司言：“差税词讼，距堂邑二百余里，往返不便。平恩有户二千七百，升县为宜。”乃复置邱县隶本路。

济宁路。下。金济州，属山东西路。旧治钜野，后徙治任城。太宗七年，割隶东平府。至元六年，还治钜野。八年升为济宁府，治任城。寻仍治钜野。十二年，复置济州。是年，又以钜野为府治，济州仍治任城为散州。十六年，升济宁府为路，置总管府。至正八年，迁济宁路于济州。十一年，置中书分省于济宁。旧领任城、金乡、嘉祥、郛城四县。后析任城县隶济州，嘉祥县隶单州。至元六年，复置钜野县。八年，以济州之郛城、砀山、丰县来属。十二年，置肥城县。户一万五百四十五，口五万九千八百十八。领司一：

录事司。

县七：

钜野，中。倚郭。金废县，分其地隶嘉祥、郛城、金乡三县。至元六年，复置。郛城，上。金以水患，徙治盘沟村。至元八年，复还旧治。肥城，下。至元十二年，以平阴辛镇寨东北十五里旧城置此县，以平阴县孝德等四乡隶之。金乡，下。旧隶济州。至元二年来属。砀山，下。金隶单州，又改隶归德府。后圯于水。宪宗七年，复置，改隶东平路。至元二年，省入单父县。三年，复置属济州。八年，改隶本路。虞城，下。金属归德府，后圯于水。宪宗二年，复置，改隶东平路。至元二年，省入单父县。三年，复置，属济州。八年，改隶本路。丰县。下。金属徐州。宪宗二年，改隶济州。至

元八年，直隶本路。

州三：

济州。下。至元十二年，别立济州于任城，省县入州。十五年，迁济宁府于济州，以钜野行济州事。是年，复于钜野置济宁府，州仍如旧。二十二年，复置任城县，隶本州。领县三：

任城，下。倚郭。鱼台，下。金隶单州。太宗七年，改隶济州。至元三年，省入金乡县。三年，复置。八年，隶济宁府。十三年来属。沛县。下。金隶滕州。太宗七年，移滕州治此。宪宗二年，省州入县。至元二年，省入丰县。三年，复置。八年，隶济宁路。十三年，来属。

兖州。下。金故州，属山东西路。元初，改隶济州。宪宗二年，分隶东平路。至元五年，复属济州。十六年，隶本路。领县四：

嶧阳，下。曲阜，下。泗水，下。至元二年，省入曲阜。三年，复置。宁阳。下。至元二年，省入嶧阳。大德元年，复置。

单州。下。金故州，属南京路。元初，改隶济州。宪宗二年，属东平府。至元五年，复属济州。十六年，隶本路。旧领单父、成武、鱼台、砀山、楚邱五县。成武、楚邱改隶曹州，鱼台改隶济州，砀山改隶归德府。至元后，析济州之嘉祥县来属。领县二：

单父，下。倚郭。元初与单州并属济州。宪宗二年，隶东平府。后省入本州。至元二年，复置。三年，还属济州。后改隶本州。嘉祥。下。金属济州。宪宗二年，隶东平府。至

元二年，还属济州。后又改隶本州。旧治山口镇。后迁横山之南。金大定中，徙治萌山，城之。

曹州。上。金故州，属山东西路。元初，隶东平路。至元二年，直隶中书省。旧领济阴、定陶、东明三县。至元三年，析济南路禹城来属，又析单州之成武、楚邱二县来属，改东明县隶开州。户三万七千一百五十一，口十九万五千三百三十五。领县五：

济阴，上。成武，中。定陶，中。禹城，中。楚邱，中。金初隶曹州，后改属归德府。又以限河不便，改属单州。元初，还隶本州。

濮州。上。金故州，属大名府路。元初，隶东平路。至元五年，直隶中书省。旧领鄆城、范县。元初析开州之观城，恩州之临清来属。至元三年，析东平路之馆陶，至元五年析东平路之朝城来属。户一万九千一百四，口二万三千一百二十一。领县六：

鄆城，上。朝城，中。馆陶，中。有永济镇。临清，下。观城，下。范县，下。旧志：原属东平府，至元二年来属。按此县金已属濮州，旧志误也。

高唐州。中。金高唐县，属博州。元初，隶东平路。至元七年，升州，直隶中书省。置高唐县为州治，析东平路之夏津、武城来属。户一万九千一百四，口二万三千一百二十一。领县三：

高唐，中。倚郭。夏津，中。武城，中。宋以卫河决，徙城于旧治东十里。泰安州。中。金故州，属山东西路。元初，隶东平路。至元五年，直隶中书省。旧领奉符、莱芜、新泰

三县。至元七年，析济南府之长清来属。户九千五百四十，口一万七百九十五。领县四：

奉符，中。长清，中。莱芜，下。新泰。下。至元二年省入莱芜。三十一年，复置。

德州。中。金故州，属山东西路。元初，隶东平路。旧领安德、平原、德平三县。至元二年，析济南府之齐河，大名府之清平来属，直隶中书省。户二万四千四百二十四，口十五万六千九百五十二。领县五：

安德，中。治洳冈。平原，下。齐河，下。清平，下。德平。下。

恩州。中。金故州，属大名府路。元初，隶东平路。至元七年，直隶中书省。旧领司候司，历亭、武城、清河、临清四县。元初，析清河隶大名府，武城隶高唐州，临清隶濮州。至元二年，又省司候司及历亭入本州。户一万五百四十五，口三万七千四百七十九。

冠州。金冠氏县，属大名府。元初，隶东平路。至元六年，升冠州，直隶中书省。户五千六百九十七，口二万三千四十。

山东东西道宣慰司。至大二年，以益都、济南、般阳三路，宁海一州，隶宣慰司，余并令直隶中书省。按河间、东平、东昌、济宁四路，曹、濮、高唐、泰安、德、恩、冠七州为山东西道，至大以前宣慰司兼辖山东东西道，以河间路为治所。《方輿胜览》：河间路领以山东东西道，可证也。刊本作河东山西道，乃字误。至大二年以后，宣慰司始专辖山

东东路，移治益都路矣。又至正六年，改为山东东西道宣慰司都元帅府。

益都路。金益都府，属山东东路。太祖二十一年，李全以益都降，授全益都路行中书省。全败死扬州，其妻北还，仍为行省，传其子李璫。中统三年，璫反，伏诛，仍置益都路行中书省及益都路总管府。至元三年，罢行省。二十四年，移宣慰司治益都。旧领益都一府，潍、胶、密、莒、沂、滕、峄、博兴、登、莱、宁海、行泰安州、行淄州十三州。至元二年，析登、莱二州入般阳路，省行淄州入益都县，行泰安州入沂水县。三年，省益都府入本路。九年，析宁海州直隶中书省。旧领益都、临朐、寿光、博兴、监淄、穆陵、乐安七县。后穆陵并入临朐，博兴升州，又割淄州之高苑县来属。户七万七千一百六十四，口二十一万二千五百二。领司一：

录事司。

县六：

益都，中。倚郭。至元二年，省行淄州淄川县入之。淄川县置于颜神县，废为巡检司。县旧治北城，俗称东阳城，金移治南城，俗称南阳城。临淄，下。至元三年，并入益都。十五年，复置。临朐，下。金析临朐，置穆陵县。元省穆陵，仍入临朐。至元二年，并入益都。二十五年，复置。高苑，下。宪宗七年，省行长山县入之，本属行淄州，来属本路。乐安，下。寿光，下。

州八：

潍州。下。金潍州，属山东东路。元初，隶益都路。旧

领司候司，北海、昌邑、昌乐三县。宪宗三年，省司候司入北海。是年，省各州录事司、司候司入倚郭县。至元三年，省昌乐县入北海，领县二：

北海，下。州治改。昌邑。下。

胶州。下。金胶西县，属密州。至元二十四年，旧志作太祖二十四年，误甚。据《齐乘》改。于县置胶州，析莱州之即墨县、密州之高密县来属。领县三：

胶西，中。州治所。即墨，下。高密。下。后至元三年，立潍川乡景芝社巡检司。

密州。下。金故州，属山东东路。元初，隶益都路。旧领司候司，诸城、安邱、高密、胶西四县。后胶西、高密二县析隶胶州。宪宗三年，又省司候司入诸城县。领县二：

诸城，下。州治所，有中外二城。安邱。下。

莒州。下。金故州，属山东东路。元初，隶益都路。旧领司候司，莒、日照、沂水三县。宪宗三年，省司候司入莒县。皇庆二年，析沂水地，置蒙阴县。领县四：

莒，下。州治所。后至元间，参政马睦火以城大难守，截去西南北三面，止修东北隅为今治。沂水，下。至元二年，省行泰安州泰安县入之。后至元二年，立穆陵关巡检司。日照，下。蒙阴。下。皇庆二年，析沂水之龙寨镇置。旧志：旧名新泰。中统二年，省入沂水。按新泰省入莱芜在至元二年，后复置，旧志误也。

沂州。下。金故州，属山东东路。元初，隶益都路。领县二：

临沂，中。州治所。宪宗三年，省司候司入之。至正十

六年，置河南廉访司。费。下。治祚城。

滕州。下。金故州，属山东西路。元初，隶益都路。旧领滕、邹、沛三县。至元初，析沛县入济宁路。领县二：

滕县，下。州治所。宪宗三年，省司候司入之。至正戊子，升徐州为路，割滕、峄、邳、宿四州隶之，迁滕县于薛城，割滕之西南四乡治之。东南六乡，州自治之。邹县。下。

峄州。下。金兰陵县，属邳州。元初，于县置峄州。至元二年，又省县入州。李璫为益都路行省，以其姻亲胡甲知沂州，峄州畏其逼，尽割州东二十里外与之，后遂因而不改。

博兴州。下。金博兴县，属益都府。元初，升为州。

山东东西道肃政廉访司

济南路。上。金济南府，属山东东路。元初，改济南路。旧领淄、陵二州。至元二年，析淄州隶淄莱路，陵州隶河间路，以滨、隶二州来属。户六万三千二百八十九，口十六万四千八百八十五。旧领历城、临邑、齐河、章邱、禹城、长清、济阳七县。至元二年，析临邑隶河间路，长清隶泰安州，禹城隶曹州，齐河隶德州，析淄州之邹平县来属。领司一：

录事司。

县四：

历城，中。倚郭。金末，土人阻水立县，号曰水寨。元初，始移置今县。章邱，上。邹平，上。济阳。中。新市镇，旧属临邑。至元二年，并入本县。拨户一千二百四十，置长

官司，管抚下差税，直隶本路。曲阳镇，有庙学。

州二：

棣州。上。金故州，属山东东路。元初，滨棣自为一路。中统三年，改置滨棣路安抚使司。至元二年，与滨州俱隶济南路。旧领司候司，厌次、商河、阳信三县。元初，析沧州无棣县之半来属。其半仍属沧州。至元二年，省司候司入厌次县。领县四：

厌次，中。倚郭。商河，中。信阳，中。宋大中祥符间，与厌次县互易其地，元因之。无棣。下。元初，析无棣县半入沧州，以县之三乡来属。沧州亦有无棣县，故此县又称东无棣。

滨州。中。金故州，属山东东路。旧领司候司，渤海、利津、蒲台、沾化四县。至元二年，省司候司入沾化县，析蒲台县隶般阳路。领县三：

渤海，中。倚郭。利津。下。本渤海县之永利镇，金置县，元初因之。沾化。下。宋升招安镇为县，金改为沾化。

般阳路。下。金淄州，属山东东路。元初，隶济南路。中统四年，升淄州路，以淄、登、莱三州隶之，治淄州。至元二年，改淄莱路。二十四年，改般阳路。旧领淄川、长山、邹平、高苑四县。太宗在潜，置新城县。旧史本纪作至元十九年事。至元二年，析邹平隶济南路，高苑隶益都路，以滨棣路之蒲台县来属。户二万一千五百三十，口十二万三千一百八十五。领司一：

录事司。

县四：

淄川，中。倚郭。长山，中。新城，中。本长山县驿台镇。太宗以人民完聚，置县曰新城，以田镇、索镇隶之。至元十九年，并淄莱路田索二镇，仍于驿台立新城县。蒲台，中。本下县。至元二年，升中。

州二：

莱州，中。金故州，属山东东路。元初，隶益都路。至元元年，改隶本路。旧领录事司，掖、莱阳、即墨、胶水、招远五县。至元二年，省录事司入掖县。二十四年，析即墨县入胶州。领县四：

掖，中。倚郭。西田场有庙学。招远，下。本掖县地。金初，置青峰县。后改今名。莱阳，下。

登州，下。金故州，属山东东路。元初，隶益都路。至元元年，改隶本路。至正十一年，立山东分元帅府于本州。领县四：

蓬莱，下。州治所。黄县，下。福山，下。伪齐刘豫以登州之雨水镇为福山县，杨疃镇为栖霞县。栖霞，下。

宁海州，下。金故州，属山东东路。元初，隶益都路。至元九年，直隶中书省。户五千七百十三，口一万五千七百四十二。领县二：

牟平，中。州治所。文登，下。

河东山西道宣慰使司

大同路。上。金西京大同府，属西京路。元初因之。至元十九年罢。后复置。二十五年，改大同路总管府。至大元年，省宣慰司，以大同路隶中都留守司。司罢，复置宣慰司，隶中书省。旧领大同、云中、宣宁、怀安、天城、白登、怀仁七县。元初，析怀安、天城二县隶宣德府。至元二年，省云中入大同县。三年，置平地县。金大同府旧有宁边州、宁边县。至元中，分其地入武、朔二州。户四万五千九百四十五，口十二万八千四百九十六。领司一。

录事司。

县五：

大同中。倚郭。白登，下。至元二年，废为镇，隶大同县，寻复置。宣宁，下。平地，下。本平地寨。至元二年，省入丰州。二年复置。怀仁。下。

州八：

弘州。下。金故州，属西京路。元初因之。旧领司候司。襄阴、顺圣二县。金贞祐二年，置大宁县，旋废。至元中，析顺圣县隶宣德府，又省司候司及襄阴县入本州。

浑源州。下。金浑源县，属应州。后升为州，仍置浑源县及司候司。元初，改浑源县为恒阴。至元四年，司候司与县俱省入本州。

应州。下。金故州，属西京路。元初因之。领县二：

京城，下。州治所。山阴。下。至元二年，省入金城县。后复置。

朔州。下。金故州，属西京路。元初因之。旧领录事司，至元四年省入鄯阳县。领县二：

鄯阳，下。至正末，孛罗帖木儿使其将姚伯颜不花截旧城西北，筑新城。马邑，下。金置固州。元初省。

武州，下。金故州，属西京路。元初因之。旧领司候司及宁远一县。至元二年，析宁边州之半来属。四年，司及宁远县俱省入本州。

丰州，下。金故州，属西京路。元初因之。旧领录事司及富民一县。至元四年，俱省入本州。

东胜州，下。金故州，属西京路。元初因之。旧领东胜一县。元初置录事司。至元二年，析宁边州之半来属。四年，省录事司及东胜县入本州。

云内州，下。金故州，属西京路。元初因之。旧领柔服、云川二县。元初，废云川县，置录事司。至元四年，省司及柔服县入本州。延佑六年，置南云县隶本州。其省罢年分阙。

河东山西道肃政廉访司

冀宁路，上。金太原府，属河东北路。太祖十三年，置太原路总管府。大德九年，以地震，改冀宁路。本隶中书省。至大元年，与晋宁路俱改隶肃政廉访司。旧领阳曲、太谷、平晋、清源、徐沟、榆次、祁县、文水、交城、孟县、寿阳十一县。金割寿阳县之西张寨置晋州，元初升孟县为州。至元二年，又省晋州入寿阳县。户七万五七千四百四，口十五万五千三百二十一。领司一：

录事司。

县十：

阳曲，中。倚郭。文水，中。平晋，下。祁县，下。旧隶宁州。至元二年，州废，隶本路。榆次，下。旧隶晋州，至元二年，隶本路。太谷，下。清源，下。金晋州治此县。州废，隶本路。寿阳，下。交城，下。徐沟。下。

州十四：

汾州，中。金故州，属河东北路。元初，置汾州元帅府，后罢。至元二年，复行州事。旧领西河、孝义、介休、平遥、灵石五县。元初，析灵石县隶霍州，仍置小灵石县。后省小灵石县入介休。领县四：

西河，中。孝义，下。至元三年，析温泉县之半置巡检司，隶本路。平遥，下。元初，改隶太原路。至元二年，仍属本州。介休。下。元初改隶太原路。至元二年，仍属本路。

石州。下。金故州，属河东北路。元初，隶太原路。旧领司候司，离石、方山、孟门、温泉、临泉、宁乡六县。至元二年，省温泉县入孝义，升临泉县为临州。后司候司与孟门、方山二县俱省入离石。领县二：

离石，下。倚郭。中统二年，省入本州。三年，复置。宁乡。下。太宗九年，改隶太原府。定宗二年，改隶石州。宪宗九年，又隶太原府。至元三年，仍属本州。

忻州。下。金故州，属河东北路。元初，隶太原路。太宗元年，升为九原府。后复为州。按至元三年以崞、代、坚、台四州隶忻州，其时忻为九原府，故有属州。领县二：

秀容，下。倚郭。至元二年，省入本州。四年，复置。定襄。下。

平定州。下。金故州，属河东北路。元初，隶太原路。旧

领平定、乐平二县。至元二年，省平定县入本州。领县一：

乐平。下。倚郭。至元二年，与平定县俱省入本州，立巡检司。七年，复置。

临州。下。元初，徙治于旧城北四十里。金临水县，属石州。中统二年，改临泉县，直隶太原路。三年，升为州。

保德州。下。本岚州地。宋置保德州。金因之，属河东北路。元初，又析置芭州。宪宗七年，省倚郭保德县入本州。至元二年，省芭州及隰州河曲县入之。三年，又以省入管州之岢岚州故地来属。四年，析岢岚之地复隶管州。

崞州。下。金崞县，属代州。乃马真皇后称制三年，升为州。大德元年，又升为隰州，巡检司为河曲县，至元二年，隰州与所属之河曲县，均省入保德州为巡检司。大德元年，又复置河曲县。隶本州。后复省。

管州。下。金故州，属河东北路。元初，隶太原路。旧领静乐一县。太祖十六年，省静乐入本州，并省岢岚州及岚州之楼烦县、宁化州之宁化县入之。至元三年，析岢岚入保德州。四年，复隶本州。

代州。下。大德五年，兴屯田于太和岭，分山阴、雁门、马邑、鄯阳、洪济、金城、宁武为七屯。金故州，属河东北路。元初，隶太原路。旧领雁门、崞县、广武三县。元初，崞县升为州。中统四年，省雁门县入本州，省广武县入崞州。

台州。下。金升代州五台县为台州，元初因之。

兴州。下。金升岚州合河为兴州，元初因之。

坚州。下。金升代州繁崎县为坚州，元初因之。

岚州。下。金故州，属河东北路。至元二年，省入管州。

五年，复置。

孟州。下。金升太原府孟县为孟州，元初因之。

晋宁路。上。金平阳府，属河东南路。元初，置平阳路总管府。大德九年，改晋宁路。旧领临汾、襄陵、洪洞、赵城、汾西、岳阳、浮山、和川、冀氏九县。赵城改隶霍州。至元三年，省和川、冀氏入岳阳县。四年，复置冀氏，并岳阳入之。后复改冀氏为岳阳县。旧志作猗氏，误。户十二万六百二十，口二十七万一百二十一。领司一：

录事司。

县六：

临汾，中。倚郭。襄陵，中。洪洞，中。浮山，下。后至元二年，立十八盘巡检司。汾西，下。岳阳，下。

府一：

河中府。金故府，属河东南路。宪宗在潜，置河解万户府。领河中府及解州府，置录事司。旧领河东、临晋、虞乡、猗氏、万泉、河津、荣河七县。至元三年，省虞乡入临晋，省万泉入猗氏，并录事司入河东，罢万户府，本府仍领解州。八年，解州直隶平阳路。十五年，复置万泉县。领县六：

河东，下。府治所。万泉，下。至元十四年，县尹皇甫祐改建新城，废旧治。猗氏，下。荣河，下。金升为河州。元初，复为荣河县。临晋，下。河津，下。

州九：

绛州。中。金故州，属河东南路，又升晋安府。元初。置绛州行元帅府。后罢元帅府，仍为绛州，隶平阳路。旧领录事司。正平、曲沃、稷山、翼城、太平、垣曲、绛、平水八

县。至元二年，省录事司入正平县。平水，金徙置汾水之西，国初省入何县，阙。领县七：

正平，下。倚郭。太平，中。曲沃，下。翼城，下。金升翼州，下。元初，复为县。稷山，下。絳县，下。垣曲，下。至元二年，省入絳县。十六年，复置。

潞州。下。金故州，属河东南路。元初，为隆德府行都元帅府事。太宗三年，复为潞州，隶平阳路。旧领录事司，上党、壶关、屯留、长子、潞城、襄垣、黎城、涉八县。金末，升涉县为州。至元三年，复为涉县，析隶真定路，并隶事司入上党。领县七：

上党，下。倚郭。壶关，下。长子，下。潞城，下。屯留，下。至元三年，省入襄垣县。十五年，复置。襄垣，下。黎城，下。至元二年，并涉县、偏城等十三村入之。

泽州。下。金故州，属河东南路。以与北京泽州同，加南字，后又去南字。元初因之。旧领司候司，晋城、端氏、陵川、阳城、高平、沁水六县。至元三年，省司候司、陵川县入晋城，省端氏入沁水。后复置陵川县。领县五：

晋城，下。高平，下。阳城，下。沁水，下。陵川，下。

解州，下。至元二十九年，运使那海建运城，名凤凰城。金故州，属河东南路。元初，隶平阳路。旧领司候司，至元四年省入解县。领县六：

解，下。安邑，下。闻喜，下。夏，下。平陆，下。芮城，下。

霍州。下。金升平阳府霍县为霍州，元初因之。旧领赵城、汾西、灵石三县。后汾西改隶平阳府，又置霍邑为附郭

县。领县三：

霍邑，下。倚郭。赵城，下。灵石，下。旧隶汾州，后改隶。

隰州。下。金故州，属河东南路，又改南隰州，后复去南字。元初因之。旧领隰川、大宁、忤城、永和、石楼五县。元初，以忤城本隰州之忤城镇，仍省入隰川，蒲县本隰州属县，金兴定时升为蒲州，仍降为县来属。领县五：

隰川，中。州治所。大宁，下。至元三年，省入隰川。二十三年，复置。石楼，下。永和，下。蒲县，下。

沁州。下。金故州，属河东南路。元初，隶平阳路。旧领隶事司。铜鞮、武乡、沁源、绵上四县。至元三年，省隶事司入铜鞮。十年，省绵上县入沁源。领县三：

铜鞮，下。倚郭。沁源，下。元初，改建县城，据紫金山之半。武乡，下。至元三年，省入铜鞮。后复置。

辽州。下。金故州，属河东南路，又改南辽州，后复去南字。元初因之。旧领辽山、榆社、和顺、仪城四县。至元三年，省仪城县入和顺。领县三：

辽山，下。倚郭。榆社，下。至元三年，省入辽山。六年，复置。和顺，下。至正十四年，达鲁花赤木不剌徙县城于旧治西南。

吉州。下。金故州，属河东南路。元初属平阳路。旧领司候司，十二乡、乡宁二县。中统二年，省司候司入十二乡。至元二年，省十二乡入本州。领县一：

乡宁，下。至元三年，省入本州。后复置。

中都开宁路。大德十一年六月，筑行宫于旺兀察都之地，建为中都。至大元年，置中都留守司，兼开宁路都总管府。是年十二月，置开宁县，以大同路隶中都留守司。四年，罢中都留守司，开宁路及所属开宁县均废。

岭北等处行中书省，领和宁路。

和宁路。上。始名和林，亦名哈刺和林。本乃蛮故地。太祖灭乃蛮，建四大斡儿朵于其地。二十年，分封诸子，以哈刺和林之地与少子拖雷。太宗始定都于此。七年，城和林，作万安宫。九年，营迦坚茶寒殿，在和林北七十余里。十年，营图苏胡迎驾殿，在和林北三十余里。鲁卜鲁克和林纪行书：宪宗三年，奉命至和林，为哈刺阙栾之都。有大街二：其一撒刺先人所住，中为市场；其一支那人居之，皆工匠。二街之外，为朝贵之大邸第。又佛堂十二，回回教寺二，基都教寺一。四围以土为城，开四门。傍城外有大离宫，内有殿，又有仓廩库。定宗、宪宗皆都之。世祖中统元年，迁都大兴，置和林宣慰司都元帅府。后又分都元帅府于金山之南，和林止设宣慰司。至元二十七年，复置和林等处都元帅府。大德二年，改和林宣慰司都元帅府。四年，以都元帅府并行宣慰司事。十一年，罢宣慰司都元帅府，置和林总管府。皇庆元年，改和林路总管府为和宁路总管府。

卷四十

志第十四

地理二

辽阳等处行中书省，领路七、府一，属州十二，属县十。至元二十四年置。

辽阳路。上。金辽阳府，领辽阳、鹤野、宜丰、石城四县。后改为东京，领澄、复、盖、沈、贵德、来远六州，婆娑府一路。元初，澄州《事文类聚》：辽阳路有澄州，知澄州当废于大德以后。及所属临溟、析木二县，复州及所属永康、化成二县，贵德州及所贵德、奉集二县，沈州、来远州，宜丰县、石城县俱废，以婆娑府、广宁府、盖州、懿州为四路，直隶中书省。至元六年，置东京总管府，降广宁路为散府，懿州路为州，以隶之。省鹤野县入辽阳。十五年，析广宁，仍自行路事。十七年，又以婆娑府来属。二十五年，改东京为辽阳路。后废婆娑府为巡检司。户三千七百八，口万三千二百三十一。壬子年抄籍数。领县一：

辽阳。下。倚郭。至元六年，省警巡院及鹤野县入之。州二：

盖州。下。金故州，属东京路。元初，升盖州路。至元六年，降为州，隶东京总管府，省所属熊岳、汤池、秀岩三县入建安。八年，又省建安县入本州。旧史《成宗纪》：元贞

元年六月，盖州明山县螟。旧志无明山，未知何时省并。

懿州。下。金故州，属北京路。元初，升懿州路。至元六年，降为州，隶东京总管府，省所领顺安、灵山二县及义州之同昌县入本州。至正二年，又升懿州为路，以兴中、义州属之。

广宁府路。下。金广宁府，属北京路。元初，置广宁行帅府事。后以地远，迁治临潢，改总管府。至元六年，以户口少，降为散府，隶东京路。十五年，复分为路，行总管府事。旧领广宁、望平、闾阳、钟秀金志无此县。据王圻《续文献通考》增。四县。广宁已废。至元六年，省钟秀县入望平。户四千五百九十五。至顺钱粮户数。领县二：

闾阳，下。初立千户所。至元十五年，以户口繁，复立行千户所。后改为县。望平。下。至元十五年，改为望平军民千户所。后复为县。

旧志广宁府路下有肇州。按《金史·地理志》，肇州属上京路，领县一：始兴。《寰宇通志》与《明一统志》均引元志：开元城西南曰宁远县，又西南曰南京，又南曰合兰府，又南曰双城，直抵伊丽王都。正西曰谷州，西北曰上京。上京之南曰建州，西曰滨州。又西曰黄龙府，金改为利涉军。又西曰信州，治信武县。北曰肇州，治始兴县。东曰永州，曰昌州，曰延州。东北曰哈州，曰奴儿干城。皆渤海、辽、金所建，元废。是肇州入元已废。世祖于阿八剌忽立城名曰肇州，特以肇州为城名，非置经制州也。旧史载之，非是。

山北辽东道肃政廉访司

山北辽东道开元等路宣慰司。元初置行中书省于北京路，又置开元路宣抚司隶北京行省。中统四年，罢开元路宣抚司。至元二年，罢北京行省，置山北辽东道开元等路宣抚司。十五年，改宣抚司为宣慰司。二十三年罢。是年七月，复置。至正十一年，罢海西辽东道巡防捕盗所，立镇宁州。

大宁路。上。金大定府，属北京路。元初为北京路总管府。旧领兴中府及义、瑞、兴、高、锦、利、惠、川、建、和十州。中统三年，割兴州及松山县属上都路。至元五年，并和州入利州，为永和乡。七年，兴中府降为州，仍隶北京，改北京为大宁路。二十五年，改武平路。后复为大宁路。旧领大定、长兴、富庶、松山、神山、惠和、金源、和众、武平、静封、三韩十一县。神山、静封二县久废。中统二年，省长兴县入大定，升三韩县为高州，升松山县为松州。户四万六千六，口四十四万八千一百九十三。壬子年数。领司一：

录事司。初置警巡院。至元二年改置录事司。

县七：大定，下。龙山，下。至元四年，改属利州。后复来属。富庶，下。至元三年，省入中兴州。后复置。和众，下。金源，下。惠和，下。武平。下。

州九：

义州。下。金故州，属北京路。至元七年，改隶婆娑府。后府废，仍隶本路。至正二年，改属懿州路。旧领宏政、开义、同昌三县。至元六年，省同昌县入懿州，宏政、开义二

县省入本州。

又置兴中州。旧领兴中、承德、兴城、宣氏四县。元初，俱省入本州。至正二年，改隶懿州路。

瑞州。下。金故州，属北京路。元初因之。旧领瑞安、海阳、海滨三县。元初，俱省入本州。

高州。下。金三韩县，属大定府。中统二年，升为高州，隶大宁路。

锦州。下。金故州，属北京路。元初因之。旧领永乐、安昌、神水、兴城四县，元初俱省入本州。

利州。下。金故州，属北京路。元初因之，旧领阜俗、龙山二县。元初，省阜俗县入本州，龙山县改隶大宁路。

惠州，下。辽故州，属大定府。金皇统三年，废。元初，复置。

川州。下。辽故州，金废。元初复置。

建州。下。金故州，属北京路。元因之。旧领建平、永霸二县。元初，俱省入本州。

东宁路。本高丽西京。至元六年，高丽人崔垣等以西京府州县镇六十馀城来降。八年，置东宁府，兴高丽画慈悲岭为界。十三年，升东宁路总管府，设录事司，以静州、义州、麟州、威远镇隶婆娑府。二十七年，罢东宁路，悉归本路所属诸城于高丽。此事旧史遗之。据《高丽史》补。本路领司一：

录事司。

县二：土山，下。中和。下。

镇一：

归化镇。按洪福源之叛，高丽徙余民于海岛，西京遂为邱墟。至崔垣以西京内属，所献六十余城，以徙民之故，多湮废。然据《高丽史》所载，龙州、灵州、铁州等处守臣皆为垣等所杀；则诸州尚置官吏，不尽为废郡也。

崔垣等所献之六十余城，其地名之可考者，曰：定远府，郭州、抚州、黄州、领安岳、三和、龙冈、咸从、江西五县，长命一镇。灵州、慈州、嘉州、辽隶显州。顺州、辽头下城，在显州东北。殷州、宿州、德州、领江东、永清、通海、顺化四县，宁远、柔远、安戎三镇。昌州、铁州、领定戎一镇。唐安市州，辽隶东京道。泰州、辽隶上京道，金移治长春州。价州、朔州、宣州、辽隶会州，领宁朔、席岛二镇。成州、辽头下城，领树德一镇。熙州、孟州、领三登一县，椒岛、椴岛、宁得三镇。延州，领阳严一镇。云州。

沈阳路。金为沈州，属东京路。旧领乐郊、章义、辽滨、挹娄四县，因兵乱俱废。太宗四年，高丽人洪福源率西京都护龟州四十余城来降，立镇守司以抚其众。六年，徙其众于辽阳，侨治辽阳故城，中统二年，改为安抚高丽军民总管府，三年，又立沈州，以高丽质子为安抚高丽军民总管，分领二千余户，治沈州。元贞二年，并为沈州等路安抚高丽军民总管府，仍治辽阳故城，领总管五，千户二十四，百户百二十五。户五千一百八十。至顺钱粮户数。

总管府所辖者曰：新城州，辽城州，哥忽州，建安州，南苏州，木底州，盖羊州，代那州，沧藤州，磨米州，积利州，黎山州，延津州，安市州。以上十四州，并无城郭，是高丽

降众，各以其酋长领之。

开元路。金会宁府，属上京路。旧领会宁、曲江、宜春三县，后俱废。太宗七年，即其地置开元、南京二万户府。至元四年，改辽东路总管府。二十三年，又改开元路，领咸平府。后析咸平为散府，俱隶辽东道宣慰司。至元二十七年，开元路宁远县饥。是本路有宁远一属，其省并年分阙。户四千三百六十七。至顺钱粮户数。

咸平府。金旧府，属咸平路。旧领平郭、铜山、新兴、庆云、清安、荣安、归仁、玉山八县，兵乱俱废。元初隶开元路。后改隶宣慰司。至正二年，降为咸平县。

合兰府水达达等路。金蒲与、合懒、恤品、曷苏馆、胡里改五路之地。元初设军民万户府五：一曰桃温，距上都四千里；一曰胡里改，距上都四千二百里，大都三千八百里；一曰斡朵怜；一曰孛苦江；分领混同江南北之地。其人皆水达达，无城郭，逐水草为居。户二万九百六。至顺钱粮户数。

河南江北等处行中书省，领路十一、府七、州一，属州三十四，属县一百八十三。

河南江北道肃政廉访司。

汴梁路。上。宋开封府，为东京，属京畿路。金为南京，属南京路。太宗五年，崔立以南京降，仍为南京路。至元二十五年，改汴梁路。旧领归德府，延、许、裕、唐、陈、亳、

邓、汝、颍、徐、邳、嵩、宿、申、郑、钧、睢、蔡、息、庐氏行襄樊二十州。至元八年，升归德府直隶行省，割亳、徐、邳、宿四州隶之，升申州为南阳府，割裕、唐、汝、邓、嵩、庐氏行襄樊七州隶之。九年，废延州入延津县。三十年，升蔡州为汝宁府，直隶行省，割息、颍二州隶之。旧领开封、祥符、阳武、通许、太康、中牟、杞、鄢陵、尉氏、扶沟、陈留、延津、洧川、封邱十四县。至元初，析郑州之荥泽、原武二县，析曹州之兰阳县来属。户三万一千一百一十八，口十八万四千三百六十七。壬子年数。领司一：

录事司。旧设警巡院，至元十四年改录事司。

县十七：

开封，下。倚郭。祥符，下。倚郭。中牟，下。原武，下。鄢陵，中。荥泽，下，旧隶郑州，至元二年来属。封邱，中。金大定中，以河患，迁治新城。元初，又为河水所湮，复迁于故城。扶沟，下。阳武，下。杞，中。中统初，河决城北面，为水所圯，乃筑新城于河北岸置县。后又修故城，号南杞县。延津，下。兰阳，下。金析东明六乡为兰阳县，取首乡兰阳乡为名。旧隶曹州，至元初来属。通许，下。尉氏，下。太康，下。洧川，下。陈留，下。

州五：

郑州。下。金故州，属南京路。元初因之。旧领管城、荥阳、汜水、河阴、原武、密、荥泽七县。后析密县隶钧州，荥泽、原武二县隶开封府。领县四：

管城，下。倚郭。元初省司候司入之。荥阳，下。汜水，下。河阴，下。

许州。下。金故州，属南京路。元初因之。领县五：

长社，下。长葛，下。鄆城，下。襄城，下。临颖。下。

陈州。下。金故州，属南京路。元初因之。领县五：

宛邱，下。西华，下。商水，下。至元二年，省南顿、项城入之。后复置。南顿，下。延祐二年，复商水镇为南顿县。项城。下。至大二年，复置。

钧州。下。金故州，属南京路。元初因之。至元二年，析郑州之密县来属。领县三：

阳翟，下。新郑，下。密县。下。

睢州。下。金故州，属南京路。元初因之。旧领襄邑、考城、柘城三县。元初，置仪封县于东明县之通安堡，隶本州。领县四：

襄邑，下。倚郭。考城，下。仪封，下。柘城。下。

河南府路。金河南府，属南京路。元初改河南府路。旧领洛阳、宜阳、永宁、登封、巩、偃师、孟津、新安、浍池九县。金升浍池县为韶州，至元八年仍为浍池县，改隶陕州。户九千五百二，口六万五千七百五十一。壬子年数。领司一：

录事司。

县八：

洛阳，至正二十六年，罢洛阳嵩县宣慰司，嵩县当是至正间析洛阳县地置之。宜阳，下。永宁，下。登封，下。巩县，下。至正二十年，改立军州万户府。孟津，下。新安，下，偃师。下。

州一：

陕州。下。金故州，又改西安军，属河南路。元初，仍

为陕州。旧领陕、灵宝、湖城、阌乡四县。至元二年，省湖城县入阌乡，降韶州渑池县来属。领县四：

陕县，下。灵宝，下。至元三年，省入陕县。八年，废虢州为虢略县，治灵宝。后复置灵宝县，以虢略为巡检司，并虢州之朱阳县入之。渑池，下。金韶州，置渑池司侯司。至元二年，省司侯司。八年，降州为县，隶本州。阌乡，下。

南阳府。金申州，属南阳路，以南阳县为治所。金志漏申州，不载。至元八年，升为南阳府，以唐、邓、裕、嵩、汝五州隶之。二十五年，改属汴梁路。后直隶行省。户六百九十二，口四千八百九十三。壬子年数。领县二：

南阳，下。倚郭。有三鸦巡检司。镇平，下。本阳管镇，金末置县。

州五：

邓州，下。金故州，属南京路。至元八年，改隶南阳府。旧领穰县、南阳、内乡、淅川、顺阳五县。金末析南阳县，置申州。元初，省淅川、顺阳二县入内乡县，升穰县之新野镇为县。旧设录事司，至元二年并入穰县。领县三：

穰县，下。倚郭。内乡，下。新野，下。

唐州，下。金故州，属南京路。至元八年，改隶南阳府。旧领泌阳、比阳、湖阳、桐柏四县。至元三年，以民力不及，废湖阳、比阳、桐柏三县。领县一：

泌阳，下。倚郭。元初废。至元九年，复置。大德五年，省入本州。至元十六年，知南阳府梁曾以唐、邓二州为襄阳府所夺，争之，复隶南阳府。唐、邓二州改隶襄阳府年分阙。

嵩州，下。金故州，属南京路。至元八年，改隶南阳府。

旧领伊阳、福昌二县。后福昌改隶河南府。至元三年，省伊阳县入本州。领县一：

卢氏。下。至元二年，隶南京路。八年，隶南阳府。十一年来属。

汝州。下。金故州，属南京路。至元八年，改隶南阳府。旧领梁、郟城、鲁山、宝丰四县。至元三年，废郟城、宝丰入梁县。后复置郟县。领县三：

梁县，下。鲁山，下。郟县。下。

裕州。下。金故州，属南京路。至元八年，改隶南阳府。旧领方城、舞阳、叶三县。后即叶县行随州事，就置昆阳县为属邑。至元三年，罢州，并昆阳、舞阳二县入叶县。后复置舞阳县。领县三：

方城，下。倚郭。叶县，下。舞阳。下。

汝宁府。金蔡州，属南京路。至元七年，改隶汴梁路。三十年，行省平章政事伯颜言：“蔡州去汴梁远，凡事稽误，宜升散府。”遂升为汝宁府，直隶行省，以息、颍、信阳、光四州隶之。旧领汝阳、遂平、上蔡、西平、确山、平舆六县。至元七年，省遂平、平舆二县入汝阳。后复置遂平县。抄籍户口阙。至顺钱粮户数七千七十五。领县五：

汝阳，下。倚郭。元初废，后置。上蔡，下。西平，下。确山，下。遂平。下。

州四：

颍州。下。金故州，属南京路。至元三十年，改隶汝宁府。旧领汝阴、泰和、沈邱、颍上四县。至元二年，省四县及录事司入本州。后复置县三：

太和，下。沈邱，下。颍上，下。

息州。下。金故州，属南京路。中统三年废，四年复置。至元三年，罢息州安抚司，以其民隶南京路。至元三十年，改隶汝宁府，旧领新息、新蔡、真阳、褒信四县。至元三年，省四县入本州。后又置二县：

新蔡，下。至元四年置。真阳。下。

光州。下。宋故州，属淮南西路。至元十二年，归附，隶蕲黄宣慰司。二十二年，同蕲、黄等州直隶湖广行省。三十年，改隶汝宁府。领县三：

定城，下。固始，下。宋末兵乱，徙治无常。至元十一年，复旧治。光山。下。兵乱地荒，至元十二年复置县。

信阳州。下。宋信阳军，属京西北路。至元十四年，改信阳府，隶蕲黄宣慰司。十五年，降为州，属湖广行中书省。二十九年，改隶河南行省。三十年，来隶汝宁府。旧领罗山、信阳二县。至元二十年，以罗山当驛置要冲，徙州治此，而移县治于西南，号曰罗山新县。户三千四百一十四，口三万三千七百五十一。至元七年数。领县二：

罗山，下。倚郭。信阳。下。

归德府。宋应天府。金改归德府，属南京路。金亡，宋复取之。元初，与亳州之酇县同时归附，置京东行省。未几，罢。宪宗二年，置司、府、州、县官以抚定新附之民。至元八年，升为散府，直隶行省，以宿、亳、徐、邳四州隶之。旧领睢阳、宁陵、夏邑、虞城、谷熟、砀山六县。至元二年，析虞城、砀山二县属济宁府，并谷熟县入睢阳，酇县入永州，又降永州为永城县，与宁陵、夏邑二县俱隶本府。抄籍之数阙。

至顺钱粮户二万三千三百一十七。领县四：

睢阳，下。倚郭。永城，下。夏邑，下。旧隶永州。至元二年，来属。未几，废。至元八年，复置，以砀山入之。宁陵。下。

州四：

徐州。下。金故州，属山东西路。至元二年降为下州。旧领彭城、萧、永固三县及录事司。至是省永固县入萧县，省彭城县、录事司入本州。领县一：

萧县。下。至元二年，并入徐州。十二年，复置。至正八年，升徐州为总管府，以邳、宿、滕、峰四州隶之。十三年，降为武安州，以所辖县隶归德府，峰、滕二州仍隶益都路。

宿州。中。金故州，属南京路。元初，废。中统三年，复置，改隶本府。旧领临淮、蕲、灵璧、符离四县及司候司。至元二年，省临淮、蕲、灵璧三县，并司候司入本州。四年，析灵璧县地入泗州。十七年，复置灵璧县来属，领县一：灵璧。下。

邳州。下。金故州，属山东西路。元初，废。中统三年，复置。至元八年，改隶本府。旧领下邳、兰陵、宿迁三县。元初以户少，省三县入本州。至元十二年，复置睢宁、宿迁两县，隶淮安路。十五年，复来属，领县三：

下邳，下。州治所。城北有黄垆城。宿迁，下。睢宁。下。

亳州。下。金故州，属南京路。宪宗二年，改隶归德府。旧领谯、酇、鹿邑、城父、卫真五县。后省城父县入谯，卫真县入鹿邑，酇县入永城。未几，复置城父。领县三：谯，下。

鹿邑，下。城父。下。

襄阳路。下。宋襄阳府，属京西南路。至元十年，宋守将吕文焕以城降，改襄阳府为散府。十一年，升襄阳路总管府。旧领襄阳、邓城、宜城、谷城、南漳五县。元初，省邓城县入襄阳。至元十九年，割均、房二州，南阳府光化、枣阳二县来属。至顺钱粮户数五千九十。领司一：

录事司。

县六：

襄阳，下。倚郭。兵乱废，至元十四年复置。南漳，下。旧纪：至元十四年，均州复立南漳县。南漳改隶均州及省并年分均无考。宜城，下。谷城，下。光化，下。枣阳。下。

州二：

均州。下。宋故州，属京西南路。至元十二年，宋行均州事徐鼎以城降，改隶湖北宣慰司。十九年，来属本路。领县二：

武当，下。兵乱，侨治无常。至元十四年，复置。

郢县。下。宋郢乡县。至元十四年改。

房州。下。宋故州，属京西南路。至元十二年，知州李鉴以城降。十九年，改隶襄阳路。领县二：

房陵，下。竹山。下。

蕲州路。下。宋故州，属淮南西路。至元十二年归附，置淮西宣抚司。十四年，改总管府，设录事司。户三万九千一百九十，口二十四万九千三百二十一。自此以后至德安府，皆用至元二十七年数。领司一：

录事司。

县五：蕲春，中。倚郭。蕲水，中。广济，中。宋嘉熙兵乱，徙治江中洲。归附后，复旧治。黄梅，中。嘉熙兵乱，侨治江中州。后复置。罗田。下。兵乱县废。至元十二年，复置。大德中，迁县治于官渡沙。

黄州路。下。宋故州，属京西北路。至元十二年归附。十四年，升为总管府。旧纪：至元十四年，置宣慰司。疑误。十八年，又置黄蕲州宣慰司，治黄州路。二十三年，罢宣慰司，直隶湖广行省。二十九年，复置淮西道宣慰司，以蕲州、黄州二路隶之。大德三年，罢淮西道宣慰司，蕲、黄二路改隶河南江北行省。户一万四千八百七十八，口三万六千八百七十九。领司一：

录事司。

县三：黄冈，中。州治所。黄陂，下。兵乱，侨治蕲州青山矶。归附，还旧治。麻城。下。兵乱，徙治什子山。归附，还旧治。

淮西江北道肃政廉访司。

庐州路。上。宋故州，属淮南西路。至元十三年，归附。十四年，升为总管府，隶淮西江北道。户三万一千七百四十六，口二十二万九千四百五十七。领司一：

录事司。

县三：合肥，上。倚郭。梁县，中。舒城。中。

州三：和州。中。宋故州，属淮南西路。至元十四年，置安抚司。明年，升和州路。二十八年，降为州，隶庐州路。旧设录事司，后省入历阳。领县三：

历阳，上。倚郭。含山，中。乌江。中。

无为州。中。宋无为军，属淮南西路。至元十四年，升无为路。二十八年，降为州，罢巢州为县隶之。领县三：

无为，上。倚郭。庐江，中。巢县。下。至元十四年，置镇巢府。二十三年，降为巢州。二十八年，复为县。

六安州。下。宋六安军，属淮南西路。至元十二年归附。二十二年，改隶黄蘄州宣慰司。二十八年，降为县，隶庐州路。后又升为州。领县二：

六安，中。英山。中。

安丰路。下。宋寿春府，又以安丰县为安丰军，并属淮南西路。至元十四年，改安丰路总管府。十五年，降为散府。二十八年，复升为路，降临濠府为濠州以隶之。至正十二年，置安丰分元帅府。户一万七千九百九十二，口九万七千六百一十一。领司一：

录事司。

县五：寿春，中。倚郭。安丰，下。霍邱，下。寿春、安丰、霍邱三县，宋隶寿春府。至元十八年，来属本路。元统二年，立淮乡临水山巡检司。下蔡，下。与蒙城俱隶安丰府。二十八年，罢府，来属本路。蒙城。下。金属寿州。至元十八年，来属本路。

州一：

濠州。下。宋故州，属淮南西路。至元十三年归附，置安抚司，十五年，升为临濠府，二十八年，复为濠州，隶本路。旧领钟离、定远二县。至元二十八年，降怀远州为县，隶之。领县三：

钟离，下。倚郭。定远，下。怀远。下。宋为怀远军，领荆山一县。至元二十八年，以军为县，省荆山入之。

安庆路。下。宋安庆府，属淮南西路。至元十二年，宋将范文虎以城降。十三年，置安抚司。十四年，改安庆路总管府，属黄蘄州宣慰司。二十三年，罢宣慰司，直隶行省。旧领怀宁、宿松、望江、太湖、桐城五县。至元二年，析怀宁县境置潛山县。户三万五千一百六，口二十一万九千四百九十。领司一：

录事司。大德元年置。

县六：

怀宁，中。宿松，中。天历初，立铁柱于小孤山，号海门第一关。望江，下。太湖，中。桐城，中。宋末徙治枞阳，又徙于李阳河。元初，始还旧治。潛山。下。本怀宁县之清朝、玉照二乡地。宋立四寨，仍隶怀宁县。至无中，置野人原寨。至治间，始析置潛山县，以山为名。

淮东道宣慰使司。皇庆二年，改淮东淮西道宣慰使司为淮东道宣慰使司。

江北淮东道肃政廉访司。

扬州路。上。宋扬州，属淮南东路。至元十三年归附，置

淮东都元帅府。十四年，改扬州路总管府。十五年，置淮东道宣慰司，本路属焉。十九年，省宣慰司，本路直隶行省。二十六年，改浙西道宣慰司为淮东淮西道宣慰司，仍治扬州路，升本路高邮府为散府，直隶宣慰司。户二十四万九千四百六十六，口一百四十七万一千一百九十四。领司一：

录事司。

县二：

江都，上。倚郭。泰兴。上。

州五：

真州。下。宋故州，属淮南东路。至元十三年，置真州安抚司。十四年，改真州路总管府。二十一年，降为州，隶扬州路。领县二：

扬子，上。倚郭。宋永正县。至元二十八年，改扬子县，移治新城，省录事司入之。六合。下。

滁州。下。宋故州，属淮南东路。至元十五年，改滁州路总管府。二十年，仍为州，隶扬州路。领县三：

三除州。下。宋故州，属淮南东路处。至元十五年，改三除州路总管府。二十年，仍为州，隶扬州路。领县三：

清流，中。至元十四年，省录事司入之。来安，下。全椒。下。

泰州。上。宋故州，属淮南东路。至元十四年，改泰州路总管府。至二十一年，仍为州，隶扬州路。领县二：

海陵，上。倚郭。宋端平后，去县城五里别筑新城。后张土诚据之。如皋。下。

通州。中。宋故州，属淮南东路。至元十五年，改通州

路总管府。二十一年，仍为州，隶扬州路。领县二：静海，上。倚郭。海门。中。

崇明州。下。本通州海滨沙洲，宋建炎中有升州句容县姚、刘二姓避兵于沙上，其后遂称姚刘沙。宋嘉定中，置天赐监场。至元十四年，置崇明州。

淮安路。上。宋楚州。又升属县山阳县为淮安军，又改军为州。属淮南东路。至元十三年，置行淮东安抚司。十四年，改总管府。二十年，置淮安府路总管府，以临淮府，海宁、泗、安东三州隶之。二十七年，罢临淮府。旧领山阳、盐城、淮安、新城、淮阴、新城、清河、桃园七县。设录事司。至元二十年，省淮安、新城、淮阴三县入山阳县。户九万一千二十二，口五十四万七千三百七十七。领司一：

录事司。

县四：

山阳，上。宋淮安县，至元十二年，以本县马罗军寨为山阳县。十三年，淮安路归附，仍存淮安县。二十年。省淮安及新城县入之。盐城，上。桃园，下。本淮阳军之桃园镇，金置淮滨县，后废。至元中置桃园县。清河，下。本泗州之清河口，宋置清河军，至元十五年改为县。

州三：

海宁州。下。宋故州，属淮南东路。金志亦有海州，后复为宋地。至元十二年，归附。十五年，升海州路，为总管府。又改为海宁府，旋降为州，隶淮安路。旧领录事司，胸山、东海、怀仁、沐阳四县。至元二十年，省东海县与录事

司入朐山。领县三：

朐山，中。沐阳，下。赣榆。下。宋怀仁县，金改赣榆。

泗州。下。宋故州，属淮南东路。金志亦有泗州，后复为宋地。至元十三年，降为下州。旧领临淮、淮平、虹、灵璧、睢宁五县。至元十六年，析睢宁县属邳州。十七年，析灵璧县属宿州，以临淮府五河县来属。二十一年，省淮平县入临淮。二十七年，废临淮府，以盱眙、天长二县来属。领县五：

临淮，下。虹县，下。宋故县，金废。元初复置。五河，下。盱眙，上。宋招信军。至元十三年，行招信军安抚司事，领盱眙、天长、招信、五河四县。十四年，升招信路总管府。十五年，改临淮府。十七年，以五河县在淮北，改属泗州。二十年，并招信县入盱眙。二十七年，废临淮府入盱眙。天长。中。至正十五年，置淮东等处宣慰使司都元帅于本县。

州一，安东州。下。宋涟水军，后改安东州，属淮南东路。至元十二年，置安东分元帅府。后改隶淮安路，领县一：涟水。下。

高邮府。宋高邮军，属淮南东路。至元十四年，升为高邮路总管府。二十年，降高邮路为府，隶扬州路，后改为散府，隶宣慰司。旧领录事司及高邮、兴化二县。至元二十年，废安宜府为宝应县来属，又省录事司入高邮县。户五万九千有八。至顺钱粮户数。领县三：

高邮，上。倚郭。兴化，中。宝应。上。旧为宝应军。至元十六年，改为安宜府。二十年，废府为县，来属。

荆湖北道宣慰司。至正十一年，兼都元帅府。

山南江北道肃政廉访司

中兴路。上。宋为江陵府，属荆湖北路。至元十二年，归附。是年，置怀远、灵武二县，分处新民。未详何时裁并。十三年，改上路总管府，设录事司。天历二年，以文宗潜藩，改为中兴路。户一十七万六百八十，口五十九万九千二百二十四。领司一：

录事司。

县七：

江陵，上。公安，中。石首，中。松滋，中。枝江，下。潜江，下。旧治白汭。至元二十七年，水圯城，迁今治。监利。中。

峡州路。下。宋峡州，属荆湖北路。至元十三年，归附。十七年，升为峡州路。户三万七千二百九十一，口九万二千九百四十七。领县四：

夷陵，中。宋末随州迁治不常。归附后，还江北旧治。宜都，下。宋旧县。长阳，下。远安。下。至正初，达鲁花赤沙班迁县治于亭子山下。

安陆府。宋郢州，隶京西南路。至元十三年，归附。十五年，升为安陆府。隶宣慰司。户一万四千六百六十五，口三万三千五百五十四。领县二：

长寿，中。京山。中。兵乱，移治汉滨。至元十二年，还旧治。

沔阳府。宋复州，属荆湖北路。至元十三年，归附，升为复州路。十五年，改为沔阳府。户一万七千七百六十六，口三万九百五十五。领县二：

玉沙，中。倚郭。景陵。中。宋旧县。兵乱，徙治无常。归附后，还旧治。

荆门州。下。宋荆门军，属荆湖北路。至元十二年，归附。十四年，升为荆门府。十五年，迁府治于古城，降为州。户二万九千四百七十一，口一十六万五千四百三十五。领县二：

长林，上。当阳。中。

德安府。宋旧府，属荆湖北路。宋咸淳七年，徙治汉阳。至元十三年，归附，还旧治，隶湖北道宣慰司。十八年，罢宣慰司，直隶行省。为散府。三十年，改隶黄州路。后复隶宣慰司。旧领安陆、孝感、应城、云梦、应山五县。至元十五年，析应山县，隶随州。户一万九百二十三，口三万六千二百一十八。领县四：

安陆，下。孝感，下。宋建炎中迁县治于紫资寨。至元十六年，还旧治。应城，中。云梦，下。

州一：

随州。下。宋故州，属京西南路。至元十二年，归附。十三年，以兵乱，迁徙无常，即黄仙洞为州治。旧领随县。十五年，以德安府应山县来属。户一万五千九百六十六，口五万二千六十四。领县二。

随县，下。应山下。

卷四十一

志第十五

地理三

陕西诸道行御史台。大德三年罢，延祐二年复置。

陕西等处行中书省，领路三、府五、州十八，属州十一，属县七十九。

奉元路。上。金为京兆府，属京兆府路。宪宗三年，置从宜府于京兆。至元十五年，改京兆府为安西府。十六年，升安西府为安西路。皇庆元年，改为奉元路。旧领长安、咸宁、兴平、泾阳、临潼、蓝田、云阳、高陵、终南、栎阳、郿、咸陽十二县。至元元年，省云阳县入泾阳。旧志：并耀州之云阳。案云阳，宋隶耀州，金隶京兆府。四年，省栎阳县入临潼。七年，又以盩厔县来属，省终南入之。户三万三千九百三十五，口二十七万一千三百九十九。壬子年数。领司一：录事司。

县十一：

咸宁，下。长安，下。咸陽，下。兴平，下。临潼，下。至元四年，并栎阳县入之。蓝田，下，泾阳，下，至元元年，省云阳县入之。高陵，下。至正末，李思齐筑鹿台城于县西

南二十五里。熬屋，下。金故县，隶凤翔府，后升为恒州。至元初，降为县来属。郿县。下。金故县，隶凤翔府，后隶恒州。元初，升为州，增置栲林县。至元元年，复降郿州为县，省栲林入之。

州五：

同州。下。金故州，属京兆府路。旧领冯翊、朝邑、白水、郃阳、澄城、韩城六县。元初，省冯翊县入本州。领县五：

朝邑，下。白水，下。郃阳，下。宋旧隶同州，金改隶祜州。至元初废祜州，仍隶本州。澄城，下。韩城，下。金贞祐三年，升为祜州。至元元年废，二年再置，六年降为韩城县。

华州，下。金故州，属京兆府路。旧领郑、华阴、下邳、蒲城、渭南五县。元初，省郑县入本州，至元十二年，复置郑州，后省并。年分阙。省下邳县入渭南。领县三：

华阴，下。蒲城，下。渭南。下。

耀州。下。金故州，属京兆府路。旧领华原、同官、美原、三原四县。至元元年，省华原县入州，复置富平县，省美原县入富平。领县三：

三原，下。富平。下。宋故县，金省入美原。至元元年，复置。同官。下。

乾州。下。金故州，属京兆府路。旧领奉天、醴泉、武功、好畤四县。至元元年，省奉天县入本州。五年，复置奉天，省好畤入之，又析邠州之永寿来属。后又改奉天县为醴泉。领县三：

醴泉，下。至正初，改筑新城于城西三十里。武功，下。金以嫌显宗讳，改为武功武亭。元复。后废。至正四年，复置。永寿，下。至元十五年，徙县治于麻亭。

商州，下。金故州，属京兆府路。领县一：
洛南，下。

延安路，下。金延安府，属鄜延府路。元改延安路。旧领肤施、延川、延长、临真、甘泉、敷政、门山七县。元初析甘州之宜川来属，又省丹州入宜川县。户六千五百三十九，口九万四千六百四十一。壬子年数。领县八。

肤施，下。甘泉，下。宜川，下。元初，置司候司。至元六年，省入宜川。按金志，丹州县一：宜川。宋志，鄜州县一：宜川。宋志夺鄜州所属之四县，又夺丹州，误以宜川属鄜州也。旧志无丹州，以并丹州入宜川也。延长，下。延川，下。安定，下。本宋旧堡。宪宗二年，升为安定县。至元元年，析置丹头县。四年，并入本县。安塞，下。本金旧堡。宪宗二年，升为县。至治三年，徙县治于龙安镇。保安，下。金为保安州。至元六年，降为县。

州三：

鄜州，下。金故州，属鄜延路，旧领洛交、直罗、鄜城、洛川四县。至元四年，省鄜城入洛川，又省洛交、直罗入州。六年，废坊州，以中部、宜君二县来属。领县三：

洛川，下。中部，下。宜君，下。

绥德州，下。金故州，属鄜延路。旧领清涧一县，旧志：金领八县。误以城寨为县。十寨、一城、一堡。归附后，升

米脂寨为县，省嗣武城入之，升怀宁寨为县，省绥平寨入之。至元四年，又省定戎寨入米脂，怀宁县入清涧，义合寨、绥德寨入本州。领县二：

青涧，下。米脂，下。

葭州。下。金故州，属河东北路。后改属鄜延路。旧领八寨、九堡。至元六年，省通泰堡、弥川堡入州，省太和寨入神木县，建宁寨入府谷县。领县三：

神木，下。元初，置灵州于古鄜州之神木寨。至元六年，改灵州为神木县。吴堡，下。旧为吴堡寨。府谷。下。宋为府州。元初，建州治。至元六年，改为府谷县。

兴元路。下。宋为兴元府，属利州路。元初，改兴元路总管府。至正十五年，改兴元等处宣慰司都元帅府。旧领南郑、城固、褒城、西县四县。元初，以凤、金、洋三州来属，析本路所属西县隶沔州，以洋州西乡县隶本路。户二千一百四十九，口一万九千三百七十八。至元二十七年数。领县四：

南郑，下。宋析置廉水县。元初并廉水入之。城固，下。褒城，下。元徙治于山河堰东南五里。西乡。下。宋端平中县废，元复置。

州三：

凤州。下。宋故州，属秦凤路，后改隶利州路。元初，改隶兴元路。至元五年，以倚郭梁泉县省入本州。后至元二年，立留坝镇巡检司。

洋州。下。宋故州，属利州路。元初，改隶兴元路。旧领兴道、真符、西乡三县。元初，析西乡县隶兴元路。至元

二年，并兴道、真符二县入本州。

金州。下。宋故州，属京西南路，后改隶利州路。元初，隶兴元路。旧领西城、汉阴、洵县、石泉、平利、上津六县。元初，俱省入本州。

陕西汉中道肃政廉访司。旧治安西路。延祐三年，徙治凤翔。

凤翔府。金故府，属凤翔府路。元初，属兴元路。寻置凤翔路总管府。至元九年，改为散府。旧领凤翔、宝鸡、虢、郿、盩厔、扶风、岐山、普润、麟游九县。元初，以郿、盩厔二县改隶安西路，虢、普润二县并废。户二千八十一，口一万四千九百八。壬子年数。领县五：

凤翔，下。扶风，下。岐山，下。宝鸡，下。有益门城，元末李思齐所筑。麟游。下。

邠州。下。金故州，属庆原路。元初，直隶行省。旧领宜禄、新平、淳化、永寿、三水五县。至元七年，省宜禄入本州，省三水入淳化县，永寿改隶乾州。领县二：

新平，下。淳化。下。

泾州。下。金故州，属庆原路。元初，隶都元帅府，又隶巩昌都总帅府，又隶平凉府，后直隶行省。旧领泾川、长武、良原、灵台四县。至元十一年，省良原县入灵台，长武县入泾川。领县二。

泾川，下。倚郭。灵台。下。至元七年，并入泾川。十一年，复置。

开成州。下。金为镇戎州，属凤翔路。元初为原州。镇

戎州，本唐原州高县之地。至元十年，皇子西安王分治秦蜀，置开成府视上都，号为上路。至治三年，降开成州。旧领东山、三川二县，后改隶镇原州。置开成为附郭县。领县一：开成。下。

州一：

广安州。下。金升宋东山寨为广安县，隶镇戎州，后废。至元十年，复置广安县。十五年，升为州，仍隶本路。开成路降州，广安州应直隶行省。无明文可证。仍依旧志，隶开成州之下。

庄浪州。下。本庄浪路。大德八年，降路为州。领县一：

庄浪。下。延祐六年，升庄浪巡检司为庄浪县，移巡检司于比卜渡。

巩昌等处总帅府。元初为巩昌路便宜都总帅府，统巩昌、平凉、临洮、庆阳、隆庆五府及秦、陇、会、环、金、德顺、徽、金洋、安西、河、洮、岷、利、巴、洿、龙、大安、褒、泾、邠、宁、定西、镇原、阶、成、西和、兰二十七州。至元五年，析安西州属脱思麻路。六年，析河州属吐番宣慰司。七年，省洮州入安西州。八年，析岷州属脱思麻路。十三年，置巩昌路总管府。十四年，复行便宜都总帅府事。是年，析隆庆府，利、巴、大安、褒、洿、龙等州隶广元路。二十年，又析泾、邠二州隶陕西汉中道宣慰司。帅府所统者：巩昌、平凉、临洮、庆阳四府，秦、陇、宁、定西、镇原、阶、成、西和、兰、会、环、金、德顺、徽、金洋十五州。二十一年，仍置便宜都总帅府。二十五年，改为宣慰使司兼便宜都总帅府。

二十六年，行省言：“巩昌便宜都总帅府已升为宣慰司，以旧兼府事，别立散府，调官分治。”从之。

巩昌府。金为巩州，属临洮路。元初，改巩昌府。旧领陇西、通渭、定西、通西、安西五县。金升定西为州，析通西、安西隶之。至元十三年，以金之宁远寨置宁远县，伏羌寨置伏羌县，盐川镇置漳县。户四万五千一百三十五，口三十六万九千二百七十二。壬子年数。领司一。

录事司。

县五：

陇西，下。宁远，下。伏羌，下。通渭，下。宋通渭寨，金升渭县。漳县。下。宋名盐川寨，金为镇。至元十三年，置县。

平凉府。金故府，属凤翔路。元初，属巩昌帅府。旧领平凉、潘原、崇信、华亭、化平五县。后省潘原县入平凉，化平县入华亭。领县三：

平凉，下。崇信，下。华亭。下。

临洮府。金故府，属临洮路。元初，隶巩昌帅府。泰定元年，更置临洮总管。旧领狄道、当川、康乐三县。元初，省当川、康乐二县入狄道。至元十三年，升渭原堡为渭源县。领县二：

狄道，下。渭源。下。

庆阳府。金故府，属庆原路。元初，隶巩昌帅府。旧领安化、彭原、合水三县。至元七年，并安化、彭原二县入合水。领县一。

合水。下。

秦州。中。金故州，属凤翔路。元初，隶巩昌帅府。旧领成纪、治坊、甘谷、清水、鸡川、陇城、秦安七县。至元七年，省鸡川、陇城二县入秦安，治坊县入清水，甘谷县入通渭。领县三：

成纪，中。清水，中。秦安，中。

陇州。中。金故州，属凤翔路。元初，隶巩昌帅府。旧领汧阳、汧源、陇安三县。至元七年省陇安县入汧源。延祐四年，又省汧源县入本州。领县一：

汧阳。下。

宁州。下。金故州，属广源路。元初，隶巩昌帅府。旧领安定、定平、真宁、襄乐四县。至元七年，省襄乐、安定、定平入本州。领县一：

真宁。下。

安定州。下。宋为定西城，属兰州。金为定西县，升为州，属秦凤路。元初，隶巩昌帅府。至正十二年，以地震，改安定州。十五年，又置军民安抚司。旧领通西、安西二县。至元三年，省二县入本州。

镇原州。下。金原州，属广源路。元初，改镇原州，隶巩昌帅府。旧领临泾、彭阳二县。元初，以镇戎州之东山、三川二县来属。至元七年，省四县俱入本州。

西和州。下。宋岷州，徙治于长道县之白石镇，改西和州，属秦凤路。元初，隶巩昌帅府。旧领祐川、大潭、长道三县。大潭、祐川，军兴久废。至元七年，省长道入本州。

环州。下。金故州，属庆原路。元初，隶巩昌总帅府。旧领通远一县，至元七年，省入本州。

金州。下。本宋兰州龛谷寨。金升为龛谷县，又置金州，以龛谷县为治所。至元七年，省县入本州。

静宁州。下。金为德顺州，属凤翔路。元初，隶巩昌帅府。旧领陇干、永洛、威戎、隆德、通边、治平六县。元初，省治平、永洛县二县入陇干。后复省陇干入本州。改为静宁州。领县一：

隆德。下。威戎、通边二县，金末已废。

兰州。下。金故州，属临洮路。元初，隶巩昌帅府。旧领定远、阿干二县。元初，置司候司。至元七年，省司候司入本州。至大中，以定远县改隶金州，后废入金州，。领县一：阿干。下。

会宁州。下。金会州，属临洮路。元初，隶巩昌帅府。至正十二年，以地震，改会宁州。旧领保川一县。金末，州陷于河西，侨治州西南百里会川城，名新会州。元初，迁于保川县，改保川县为西宁。至元七年，并县入州。

徽州。下。元初，置南凤州于凤州之河池县，又升永宁乡为县，析凤州之两当县，同隶南凤州。至元元年，改为徽州，七年，省河池、永宁二县入本州。领县一。

两当。下。宋徙治于广乡镇。元因之。

阶州。下。宋故州，属秦凤路。元初，隶巩昌帅府。旧领福津、将利二县，至元七年，省入本州。新州治在柳树城，距旧城东八十里。

成州。下。宋故州，属秦凤路。元初，隶巩昌帅府。旧领同谷、栗亭二县。太宗十三年，宋成都将田世显来降，命迁于栗亭管民司事，不隶成州。析秦州之天水县来属。至元

七年，省同谷、天水二县入本州。太宗十年，宋雷、李二将来降，命迁于成州，行金洋州事，隶巩昌帅府。旧志别立金洋州，误。此是行金洋二州事，非又置金洋州。

吐番等处宣慰司都元帅府。以下宣慰司三、宣抚司二，俱隶宣政院。

河州路。下。金河州，属临洮路。元初，置河州路军民总管府。旧领枹罕、宁河二县。元初，省枹罕入本州，升定羌城为定羌县，安乡关为安乡县。领县三：

定羌，下。安乡，下。宁河。下。

洮州路。下。金故州，属临洮路。元初，升洮州路，置元帅府。领县一：

可当。下。金故县，元初因之。金志阙。

贵德州。下。本金积石州西界之地。元初，置贵德州，隶宣慰司。后废。

积石州。下。宋积石军溪哥城。金升为州，属临洮路。元初置元帅府。

雅州。下。宋故州，属成都路。宪宗八年，攻拔其城，改隶马湖路。后改隶吐番宣慰司。领县五：

石山，下。泸山，下。百丈，下。荣经，下。严道。下。石山、严道二县，别隶六番招讨使司。

黎州。下。宋故州，属成都路。元初，隶马湖路，后改隶吐番宣慰司。领县一：

汉源。下。

十八族元帅府。

帖成河里洋脱元帅府。

当阳元帅府。以上属吐番宣慰司。

脱思麻路宣慰司都元帅府。本为元帅府。至元三年，以西安州来属。五年，又以岷州来属。大德十一年，升为宣慰司，以礼店文州万户府隶之。领州三：

西安州。宋故州，属秦凤路。至元三年，来属。

岷州。宋岷州，改西和州。元初，于祐川县故地置岷州。至元七年，来属。后置元帅府。

铁州。沿革阙。

礼店、文州蒙古汉儿军民元帅府。至元九年置。后改隶吐番宣慰司。大德十一年，以属吐番宣慰司不便，命仍隶脱思麻路。以上属脱思麻路宣慰司。

松潘、客叠、威、茂等处军民安抚司。至大二年，改为宣抚司，迁治茂州汶川县。

茂州。宋故州，属成都路。领县二：文山，下。汶川，下。

静州茶上必里溪安乡等二十六族军民千户所。

龙木头都留等二十二族军民千户所。

岳希蓬萝匐村二十二族军民千户所。

析藏军民万户府。以上属松潘等处宣抚司。

碉门、鱼通、黎、雅、长河西、宁远等处军民宣抚司。至元十九年，移成都宣慰司于碉门。大德二年，并土番碉门安抚司、运司，改为碉门、鱼通、黎、雅、长河西、宁远军民宣抚司。旧史《百官志》作安抚司，误。

鱼通路军民万户府。

碯门、鱼通等处管军守镇万户府。

长河西管军万户府。

朵甘思哈答李唐鱼通等处钱粮总管府。

亦思马儿甘军民万户府

朵甘思管军民万户府。

刺马儿刚等处招讨司。

奔不思招讨司。

奔不儿亦思刚百姓达鲁花赤。

唆尼招讨司。

征沔招讨司。

天全招讨司。

六番招讨司。以上属碯门渔通宣抚司。

乌思藏纳里迷古鲁孙等三路宣慰使司都元帅府

乌思藏管蒙古军都元帅府。

纳里迷古鲁孙元帅府。

担里管军招讨使司。

沙鲁思管民万户。

搽里八管民万户。

速儿麻加瓦管民官。

撒刺管民官。

出密万户府。

磬笼荅刺万户府。

思荅笼刺万户府。

伯木古鲁万户府。

汤卜赤八千户所。

加麻瓦万户府。

札由瓦万户府。

牙里不藏思八万户府。

迷儿万户府。以上属乌思藏宣慰司。

四川等处行中书省，领路十一、府二、属府三，属州三十九，军一，属县九十四。蛮夷土官，不在此数。

西蜀四川道肃政廉访司

成都路。上。宋为成都府路。元初置成都路总管府。至元十三年，设录事司。旧领嘉定、崇庆二府，眉、邛、黎、雅、威、茂、简、汉、彭、绵十一州。后嘉定自为一路，以眉、黎、雅、邛隶之。二十年，又析黎、雅属吐番招讨司，茂州属松潘等处安抚司，降崇庆为州，省隆州入仁寿县。旧领成都、华阳、郫、新都、温江、新繁、双流、灵泉、广都九县。至元二十年，析灵泉县隶简州，省广都县入双流，以仁寿、金堂二县来属。户三万二千九百一十二，口二十一万五千八百八十八。至元二十七年数。领司一：

录事司。

县九：成都，下。宋为府治所。至元十三年，以本县元管大城内西北隅，并入录事司。华阳，下。新都，下。郫县，下。温江，下。双流，下。新繁，下。仁寿，下。本宋隆州，领仁寿、井研二县。至元二十年，省隆州、井研入仁寿县来属。金堂。下。本宋怀安军，领金水、金堂二县。元初，升

为怀州。至元二十年，省怀州、金水入金堂县来属。

州七：

彭州。下。宋故州，属成都府路。元初因之。旧领九陇、濛阳、崇宁三县。至元中，省九陇县入本州。领县二：

濛阳，下。崇宁。下。

汉州。下。宋故州，属成都府路。元初因之。旧领洛、什仿、绵竹、德阳四县。中统初，省洛县入本州。领县三：

什邡，下。德阳，下。至元八年，升为德州。十三年，仍为县，隶成都路。十八年来属。按旧纪：十八年以汉州德阳县属成都路。纪、志抵牾，未审孰是。绵竹。下。至元十三年，省入州。后复置。

安州。下。宋石泉军，属成都府路。中统五年，升为州。旧领石泉、神泉、龙安三县。是年，又省神泉、龙安二县入本州。领县一：

石泉。下。

灌州。下。宋永康军，属成都府路。后废为灌口寨。元初，复置灌州。至元十三年，省所属导江、青城二县入本州。

崇庆州。下。宋崇庆府，属成都府路。至元十二年，置总管府。二十年，降为崇庆州。旧领晋原、江原、新津、永康四县。至元二十年，省江原县入本州。领县三：

晋原，下。新津，下。永康。旧志漏此县。《明一统志》：“本朝省永康入崇庆州”，可证。

威州。下。宋故州，属成都府路。旧领保宁、通化二县。至元十九年，省保宁县入本州。领县一：

通化。下。

简州。下。宋故州，属成都府路。旧领阳安、平泉二县。至元二十年，省阳安入本州。二十二年，又并成都府所属灵泉县入之。平泉县以地荒，亦废不置。

嘉定府路。下。宋嘉定府，属成都府路。至元十三年，升为路，置总管府。后罢。二十二年，复置。旧领龙游、夹江、犍为、峨眉、洪雅五县。二十五年，省洪雅县入夹江。领司一：

录事司。

县四：

龙游，下。夹江，下。峨眉，下。犍为。下。

州二：

眉州。下。宋故州，属成都府路。至元十四年，改隶嘉定府路。旧领眉山、彭山、丹棱、青神四县。至元二十年，省州治眉山县用丹棱县，并入本州。领县二：

彭山，下。青神。下。

邛州。下。宋故州，属成都府路。至元十四年，置安抚司，兼行州事。旧领临邛、火井、蒲江、依政、安仁、大邑六县。元初，省火井、安仁入大邑。至元二十一年，省州治临邛县及依政、蒲江二县入本州。领县一：

大邑。下。

广元路。下。宋为利州路端平，后地荒民散者十有七年。宪宗二年，命汪特格城利州。三年，置都元帅府。至元十四年，罢帅府，改为广元路总管府。十六年，以广元等路为四

川北道，置宣慰司。十九年，罢，仍为总管府。旧领绵谷、葭萌、昭化、嘉川四县。至元十四年，省葭萌县入昭化，省嘉川入绵谷。户一万六千四百四十二，口九万六千四百六。至元二十七年数。领县二：

绵谷，下。昭化，下。

府一：

保宁府。下。宋为阆州，属利州路，以兵乱，移治大获山。宪宗八年，宋守将杨大渊降，置东川路元帅府。至元十三年，升保宁府。二十年，罢元帅府，改保宁路。后仍改为府，属本路。旧领阆中、苍溪、南部、新井、奉国、新政、西水七县。又置新得、小宁二州来属。后并二州入阆中县，又省奉国入苍溪县，新井、新政、西水入南部县。领县三：

阆中，下。倚郭。苍溪，下。南部，下。

州四：

剑州。下。宋为龙庆府，属利州路。至元二十年，改剑州。旧领普安、武连、阴平、梓潼、普成、剑门六县。武连、阴平二县久废。至元二十年，省普成、剑门二县入普安。领县二。

普安，下。梓潼，下。

龙州。下。宋为政州，又改龙州，属利州路。宪宗八年，宋守将王知府以城降。至元二十二年，省所属江油县入本州。

巴州。下。宋故州，属利州路。旧领化城、恩阳、曾口、难江、通江五县。至元二十年，省难江、恩阳二县入化城。领县三：

化城，下。曾口，下。通江。至元二十年，省通江入曾

口县。二十九年，废新得州，又置通江县。

沔州。下。宋故州，属利州路。至元十四年，隶广元路。旧领略阳、长举二县。至元二十年，废褒州，置铎水县，迁州治于铎水，又降大安州为县来属，省所属长举县及兴元府之西乡县入略阳。领县三：

铎水，下。倚郭。本西县旧镇，世祖始以其地升为褒州，改镇为县。大安，下。略阳。下。沔州旧治略阳，元移治铎水县。

顺庆路。下。宋为顺庆府。属潼川府路。以兵乱，徙治青居山。宪宗八年，宋裨将刘渊以城降。中统元年，置征南都元帅府。至元四年，置东川路统军司。后改东川府。十五年，复改顺庆府。十六年，置四川东道宣慰司。十九省所属流溪县入西充。户二千八百二十一，口九万五千一百五十六。至元二十七年数。领司一：录事司。

县二：

南充，下。至元二十年，并合州之汉初县入之。西充。下。

府一：

广安府。宋为广安军，又改宁西军，属潼川府路，后城大良平为治所。宪宗八年，宋守将蒲元圭以城降。至元十五年，废宁西军。二十年，置广安府。旧领和溪、新明、渠江、岳池四县。至元二十年，省和溪、新明二县入岳池。领县二：

渠江。下。倚郭。岳池。下。

州二：

蓬州。下。宋故州，属利州路。元初，置宣抚司都元帅

府，后罢。至元二十年，又置蓬州路总管府。后复为蓬州。旧领蓬池、良山、仪陇、伏虞、营山、相如六县。至元二十年，省良山县入营山，并蓬池、伏虞二县入仪陇。领县三：

相如，下。倚郭。省金城寨入之。宋州治蓬池，至元二十年，蓬池省并，移治相如。仪陇，下。营山。下。

渠州。下。宋故州，属潼川府路，中统三年，置渠州路军民总帅府。至元十三年，置安抚司。二十年，罢安抚司为渠州来属。旧领流江、酆水、酆山、大竹四县。至元二十年，并酆水、酆山二县入大竹。领县二。

流江，下。至元二十六年，省入本州。后复置。大竹。下。

潼川府。宋故府，属潼川府路。兵后地荒。中统元年，置潼川都元帅府。至元十五年，置宣慰司。后仍为散府。旧领郪、中江、涪城、射洪、通泉、盐亭、铜山、飞鸟、东关、永泰十县。元初，增置安岳县。至元二十年，省涪城县入郪县，通泉县入射洪，铜山、飞鸟二县入中江，东关、永泰二县入盐亭。领县五：

郪县，下。倚郭。中江，下。射洪，下。宋末，县省。元初，复置。盐亭，下。安岳。下。宋普州，领安岳、乐至、安居三县，后州县俱废。元初，复置安岳县，并安居、乐至二县地入之。

州二：

遂宁州。下。宋为遂宁府，属潼川府路。兵乱，权治蓬溪。元初，改为州，旧领小溪、长江、蓬溪、青石、遂宁五县。至元十九年，并遂宁、青石二县入小溪，长江县入蓬溪。领县二：

小溪，下。蓬溪。下。宋末县省，元复置。

绵州。下。宋故州，属成都府路。至元二十年，改隶潼川府。旧领巴西、彰明、魏城、罗江、盐泉五县。盐泉久废。至元二十年，省巴西、魏城二县入本州。领县二：

彰明，下。罗江。下。

永宁路。下。宋为泸州江安、合江二县之境。元初置西南番总管府。至元二十五年，改为永宁路。领县一：

定川。下。

州一：

筠连州。下。宋羁縻州筠州、连州。元初，合为一。州领县一：

腾川。下。

九姓罗氏党蛮夷长官千户所。元初立夷民罗氏党九人为总把。至元中，改为长官千户。

四川南道宣慰司。至元十六年置。

重庆路。上。宋为重庆府，属夔州路。以兵乱，迁治无常。至元十六年，置重庆路总管府。二十一年，升为上路，析忠、涪二州为属郡。二十二年，又以泸、合二州来属。旧领巴、江津、璧山三县。至元二十年，以南川县来属，废南平军入之。二十二年，省璧山县入巴县。后至元四年，又置垫江县。户二万二千三百九十五，口九万三千五百三十五。至元二十七年数。领司一：

录事司。

县四：

巴县，下。倚郭。江津，下。至元十六年，赐四川行省参政咎顺田民百八十户于江津县。南川，下。至十二年，省重庆府隆化县入之。垫江，下。

州六：

泸州。下。宋故州，属潼川府路。宋守将刘整以城归附。宋人复取之，改江安州，徙治江南。至元十六年，复改泸州，还故治。二十二年，来属重庆路。旧领潼川、合江、江安、纳溪四县。至元二十年，省泸川县入本州。领县三：

江安，下。纳溪，下。合江。下。宋治安乐故城，元升为合江州，移治神臂江南。至元二十八年，复为县。

忠州。下。宋为忠州，又升咸淳府，属夔州路。元初，仍为忠州。旧领临江、丰都、垫江、南宾、龙渠五县。龙渠县久废。至元中，省临江县入本州，省垫江县入丰都。领县三：

临江，下。南宾，下。丰都下。

合州。下。宋故州，属夔州路，后迁州治于钓鱼山。至元十五年，宋将王立以城降，复还旧治。二十二年，来隶重庆路。旧领录事司，石照、汉初、赤水、铜梁、巴川五县。至元二十年，省录事司及巴川县入铜梁，赤水县入石照，汉初县入顺庆路之南充；又省昌州及永昌、昌元二县入大足县来属。领县五：

铜梁，下。旧治在县北列宿坝，后移治涪江南岸东溪坝。元初，移今治，省巴江县入之。定远，下。本宋地名女菁平。至元四年，便宜都总帅汪良臣立寨于母章德山。五年，改为定远城，置武胜军，行和溪安抚司事。后复改定远州。二十

四年，降为县。石照，下。《明一统志》：元省石照县入本州。其省入年分阙。大足，下。旧隶昌州，至元二十年，州废来属。昌宁，下。本昌元县。至元二十年，省入大足县。后复置今县。

涪州。下。宋故州，属夔州路，后移治三台山。元初，复旧治。旧领涪陵、宾化、乐温、武龙四县。宾化县久废。至元二十年，省涪陵、乐温二县入本州。领县一：

武龙。下。

资州。下。宋故州，属潼川府路。元初，省入简州。后复置。旧领盘石、宾阳、内江、龙水四县。盘石、宾阳、龙水三县久废。领县一：

内江。下。

珍州。下。宋故州，属夔州中。领县二：

乐源，下。绥阳。下。

绍庆路。下。宋绍庆府，属夔州路。至元二十八年，置总管府。泰定四年，绍庆路四洞酋何者等降，并命为蛮夷长官，仍设巡检司以抚之。户三千九百四十四，口一万五千一百八十九。至元二十七年数。领县二：

彭水，下。黔江。下。

绍熙路。下。宋绍熙府，元初废。至正初，置绍熙路总管府。领县四：

营怀，下。威远，下。资官，下。应灵。下。

怀德府宣抚司。至顺二年，四川行省招谕怀德府驴谷什用等四洞及生蛮十二洞内附。诏升怀德府为宣抚司以领之，诸洞各设长官司及巡检司。

领州四：

来宁州。下。

柔远州。下。

酉阳州。下。宋思州，又改酉阳州，元初因之。领县三：务川，下。中水，下。宁夷。下。

服州。下。

石柱军民宣抚司。宋石柱安抚司，元初改宣抚司。

石耶洞军民府。本石柱宣抚司地，元初析置军民府。

邑梅沿边溪洞军民府。元初改并乡洞，置军民府。

夔州路。下。宋为夔州都督府。至元四年，置夔府路总帅府，戍开州。十五年，改夔州路总管府，以施、万、云安、大宁四州来属。二十二年，又以开、达、梁山三州来属。二十五年，析施州清江县地入本路。户二万二十四，口九万九千五百九十八。至元二十七年数。领司一：

录事司。

县二：奉节，下。巫山。下。

州七：

施州。下。宋故州，属夔州路。旧领清江、建始二县。至元二十二年，省清江县入本州。领县一：

建始。下。

达州。下。宋故州，属夔州路。至元十五年，隶四川东道宣慰司。二十二年，改隶夔州路。旧领通川、永睦、新宁、巴渠、东乡、明通六县。永睦、巴渠、明通、东乡四县，至元中并省。领县二：

通川，下。新宁。下。宋志作新兴，误。

梁山州。下。宋为梁山军，属夔州路。至元二十二年，改为州。领县一：

梁山。下。

万州。下。宋故州，属夔州路。旧领南浦、武宁二县。至元二十年，省南浦县入本州。领县一：

武宁。下。

云阳州。下。宋为云安军，属夔州路，又析置安义县，寻为云安监。至元十五年，置云安军。二十年，升云阳州，省云安监入之。

大宁州。下。宋为大宁监，属夔州路，至元二十年，升为州。省所属大昌县入之。

开州，下。宋故州，属夔州路。旧领开江、清水二县，元初，俱省入本州。

叙南等处蛮夷宣抚司。大德七年，改叙州宣抚司为叙南等处宣抚司。后至元三年，立横江巡检司。

叙州路。下。宋戎州，属潼川府路，后改叙州。宋末，城登高山为治所。至元十二年，宋将郭汉杰以城降。十三年，置安抚司，未几徙治三江口。罢安抚司，仍为叙州。十八年，升

为路。二十二年，复置安抚司。二十三年，复为路，旧纪：降叙州为县，误。隶蛮夷宣抚司。领县四：

宜宾，下。有宪宗神御殿。庆符，下。南溪，下。宣化。下。宋旧县，后废为镇。元初，复置县。

州二：

富顺州。下。宋富顺监，属潼川府路。至元十二年，置富顺监安抚司。二十年，罢安抚司，置富顺州。

高州。下。宋为羁縻州，后属长宁军。熙宁八年，夷人得箇祥献十州，内有高州。至元十五年，云南行省遣使招谕内附。十七年，知州郭安复行州事。

马湖路。下。本马蛮地。宋时，蛮主屯于湖内。至元十三年内附。十九年，置总管府，迁于夷部溪口，濒马湖之南岸为府治。二十五年，以沐川等五寨析隶嘉定者，还隶本府。领州二：

长宁州。下。本羁縻州，宋政和中建为长宁军。至元十二年，守将黄立以城降。二十二年，设录事司，后与所属安宁县俱省入本军。泰定二年，又改军为州。

戎州。下。宋晏州，为羁縻州。熙宁八年，夷人得箇祥献。至元十三年，蛮夷部宣抚司遣使招谕。十七年，部长得兰纽来见，授大坝都总管。二十二年，升为戎州，州治在箐前。所领长官司六：

泥溪长官司

平夷长官司。

蛮夷长官司。

夷都长官司。

雷波长官司。

沐川长官司。以上六长官司，宋俱为马湖部落。后至元二年，并为三长官司。

镇安路。下。领州一：

上林州。下。

长官司三：

鹿林蛮夷长官司。

鹿长蛮夷长官司。

诸部蛮夷长官司。

上罗计长官司。领蛮地罗计、罗星，乃古夜郎境，为西南种族。宋设长宁军，十州族姓俱效顺，长宁晏奉高薛巩洧思峨等十州。各授以官。其后分姓他居，遂有上、下罗计之分。至元十三年，宣抚咎顺引本部夷酋得赖阿当归顺。授得赖阿当千户。十八年，黎州同知李奇以武略将军来充罗星长官。二十二年，夷人叛，诱诛罗星夷，行枢密院讨平之。

下罗计长官司。本唐珙州，领蛮地，与叙州、长宁军相接。至元十二年，长宁知军率之内附。十三年，咎顺引夷酋得颜箇诣行枢密院降，奏充下罗计蛮夷千户。二十二年，诸蛮皆叛，惟本部无异志。后复为珙州。

四十六围蛮夷千户所，领豕蛾夷地，在庆符县南抵定川，唐羁縻定州之支江县也。至元十四年收附，宣慰使咎顺招抚滕串豕蛾昔霞等部。于庆符县侨置千户所，领四十六围，曰：“黄水口上下落骨，山落牟许满吴，么落财，么落贤，腾息奴，屯莫面，落搔，么落梅，么得辛，上落松，么得会，么得恶，

落魂，落昧下村，落岛，么得亨，落燕，落得虑，么得了，么腾斛，许宿，么九色，落搔屯右，么得晏，落能，山落寡，水落寡，落得雷，么得具，么得渊，腾日影，落昧上村，赖扇，许焰，腾朗，周头，卖落炎，落女，爱答落，爱答速，么得奸，阿郎头，下得辛，上得辛，爱得娄，落鸥。

诸部蛮夷：

秦加大散等洞。以下各设蛮夷官。

斜崖冒朱等洞。

陇堤纣皮等洞。

石耶洞。

散毛洞。元初为柔远州。至元三十一年，散毛洞主覃顺来贡方物，升其洞为府。至正元年，降诏谕死可伐，散毛洞蛮覃全在叛，招降之，以为散毛誓崖等处军民宣抚使，置官属。按《百官志》有散毛洞安抚司，疑宣抚为字误也。

彭家洞。

黑土石等处。

市备洞。至元十七年，施州市备大盘散毛等洞款纳。

乐化兀都刺布白享罗等处。

洪望册德等族。

大江九姓罗氏。泰定三年湖广行省奏九姓长官招降叛蛮，当即罗氏也。

水西。

鹿朝。

阿永蛮部。至元二十一年，酋长阿泥入觐，自言阿永邻境乌蒙等蛮悉隶皇太子位，请依例附属。诏从其请隶官府。

师壁洞安抚司。至元二十八年，赐师壁洞安抚司、师壁镇抚所、师罗千户所印。至正十一年，师壁安抚司土官田驴什用、盘顺府土官墨奴什用降，立长官司四，巡检司七。

永顺等处军民安抚司。至大二年，以永顺保靖南渭安抚司改永顺等处安抚司。至正十一年，改宣抚司。按旧志以南渭州、保靖州属新添葛蛮，隶湖广行省，当是至大三年改永顺安抚司后之制。

阿者洞。延祐七年，慈利州贼结怀德府阿者洞驴各什用、谢甲洞巨仙什用、恩石洞没尔什用、安坝洞重达义等入寇。阿者洞、谢甲洞又隶怀德府，未审何时改属。

谢甲洞。至正十二年，向亚甲洞主墨得什用出降，立盘顺府。向亚甲即谢甲。

上安下坝。

阿渠洞。

下役洞。

驴虚洞。

钱满等处。

水洞下曲等寨。

必藏等处。

酌宜等处。

雍邦等处。

崖笋等处。

冒朱洞。

麻井柘歌等寨。

新附崑罗金井。

沙溪等处。

宙窄洞。

新容米洞。至正十年，立四川容美洞军民总管府。容美即容米也。至大元年，唐伯圭言：“十七洞之众，惟容米洞、冈吉洞、抽拦洞有兵一千余，皆不足惧，可分四道进兵：其一自红沙寨直趋容米坑珍珠惹谢加阿惹石驴等洞，其一从苦竹寨抵桑厨上桑厨抽拦洞，其一由绍庆至沙手摩大科阳蔓师大翁迦洞，其一征叉巴等洞兵接应，如此可平。”按伯圭所言，各洞，多旧志所无。今附载容米洞下，以资参考。

甘肃等处行中书省，领路七、州二，属州五。至元十八年，置行中书省。二十二年，罢，置宣慰司，隶宁夏行省。二十三年，复行省，罢宣慰司。

河西陇北道肃政廉访司。本为巩昌道。大德六年，移治甘州。至正三年，改河西陇北道。

甘州路。上。西夏改唐甘州为宣化府。元初，仍为甘州。至元元年，置甘肃路总管府。三年，置宣慰司。五年，罢宣慰司。旧纪作宣抚司，乃字误。八年，改甘州路总管府。户一千五百五十，口二万三千九百八十。至元二十七年数。

永昌路。下。宋为西凉府，西夏因之。太祖二十一年，克西凉府及所属槃罗、河罗等县。至元十五年以永昌王宫殿所

在，置永昌路，降西凉府为州。领州一：

西凉州。下。

巡检司一：

古浪城巡检司。唐和戎城故地。

肃州路。下。宋为肃州。西夏因之。太祖二十一年，克肃州。至元七年，置肃州路总管府。户一千二百六十二，口八千六百七十九。至元二十七年数。

沙州路。下。宋为沙州。西夏因之。太祖二十二年，克沙州，隶拔都大王。至元十四年，复置沙州。十七年，升沙州路总管府。以贫民乞粮，须白于肃州路，往来甚远，故升沙州为路。领州一：

瓜州。下。宋为瓜州，西夏因之。西夏亡，州废。至元十四年，复立。二十八年，徙居民于肃州，但名存而已。

亦集乃路。下。在肃州东北五百里，城东北有大泽，西北俱沙磧。西夏立威福军。太祖二十一年，归附。至元二十三年，置总管府。旧领山丹、西宁二州，后并直隶行省。

宁夏府路。下。西夏为兴州，升兴庆府，又改中兴。太祖二十二年，西夏主李睨以城降。中统二年，置行省于中兴府。至元八年，立西夏中兴等路行尚书省。九年，改为行中书省。十年罢。二十四年，以中兴府隶甘肃行省。二十五年，置宁夏路总管府。三十一年，分省按治宁夏。寻并归甘肃行

省，领州三：按至元十二年，于中兴路改置怀远、灵武二县，分处新民。省并年分阙。

灵州。下。宋为灵州，西夏改翔庆军，元初，仍立州。

鸣沙州。下。宋灵州鸣沙县，西夏因之。元初，升鸣沙州。

应理州。下。西夏为应理县。太祖二十一年，克应理县。后升为州。

山丹州。下。宋为删丹县。西夏取之。置甘肃军。元初，为阿只吉大王分地。至元六年，行山丹城事，讹删为山字。二十二年，升为州。直隶行省。

西宁州。下。吐番青唐城。宋改为西宁州。元初，章吉驸马分地。至元二十三年，置西宁州等处拘榷课程所。

兀刺海路。太祖二年，伐西夏，克兀刺海城。故城在龙骨山与山丹州接界。

卷四十二

志第十六

地理四

云南诸路行中书省，领路四十二、府七，属府三，属州五十六，属县五十三。甸寨军民等府，不在此数。

云南诸路道肃政廉访司。治中兴路。至元二十七年，置云南行御史台。二十九年，徙行御史台于西川，设云南道肃政廉访司。三十年，复立行台。大德二年，罢，复置肃政廉访司。又至顺二年，置云南等处宣慰司都元帅府；旧志不书，当为元统后所罢。

中庆路。上。唐姚州。南诏蒙氏为善阐府。至大理段氏，以高智升领善阐牧，世有其地。宪宗三年，世祖征大理，收府八，善阐其一也。宪宗五年，置万户府十有九，分善阐为万户府四。至元七年，改为路。八年，分大理国三十七部为南北中三路，路设达鲁花赤并总管。十三年，置云南行中书省，分置州县，改善阐为中庆路。领司一：

录事司。

县三：

昆明，中，倚郭。宪宗四年，分其地立千户二。至元十二年，改善州，领昆明、官渡二县。二十一年，废州存县。寻又省官渡县入焉。富民，下。唐匡州。乌蛮酋些门些禾即其地筑马举笼城，号梨灊甸。至元四年，立梨灊千户所。十二年，改为富民县。宜良，下。唐匡州。蛮酋啰氏即其地筑啰哀笼城。宪宗六年，立宜良匡城及大池千户所。隶嵩盟万户府。至元十三年，升宜良州，领大池、匡地二县。二十一年，州罢为县，省二县入焉。

州四：

嵩盟州。下。旧志作嵩明，误脱盟字下半；《明一统志》可证。治沙札卧城。乌蛮车氏等居此，后为枳氏所夺，因名

枳砮。汉人尝立长州，筑金城及阿葛城，与蛮盟，故又名其地曰嵩盟。蒙氏置长州。段氏改嵩盟郡。宪宗六年，置嵩盟万户府。至元十二年，复改长州。十五年，升嵩盟府。廿二年，降为州。领县二：

杨林，下，杂种蛮枳氏、车氏、斗氏、么氏所居。城东门内有石如羊，因名羊林。宪宗七年，立羊林千户所。至元十二年，改为杨林县。邵甸。下。治白邑村。车蛮、斗蛮旧名为东甸，土音以东为邵。宪宗七年，立邵甸千户。至元二十二年，改为县。

晋宁州。下。蒙氏改唐宁县为阳城堡部，段氏因之。宪宗七年，置阳城堡万户府。至元十二年，改晋宁州。旧领三县：晋宁、呈贡、归化。后并晋宁县入本州。领县二：

呈贡，下。世为乌白些门些莫徒阿茶爨五种蛮所居，号晟贡城。宪宗六年，立呈贡千户所。至元十二年，析诏营、切龙、呈贡、雌甸、塔罗、和罗忽六城及乌纳山立呈贡县。归化，下。旧为安江城，有吴氏居之，因名大吴龙，后为些莫徒蛮永偈所据，世隶善阐。宪宗六年，分隶呈贡千户。至元十三年，割大吴龙、安江、安溯立归化县。

昆阳州。下。南宁夷爨旰降，隋拜昆州刺史即此地，至唐没于南诏，其后大理以高氏治之，名巨桥城。宪宗并罗富等十二城，立巨桥万户府，至元十三年，改昆阳州，旧领三县：三泊、易门、河西，后并河西县入本州。领县二：

三泊，下。爨、獠所居之地，后为大理所有，以隶善阐。至元十三年，于那龙城置三泊县。易门。下。治市坪村。乌蛮酋绅磨由男所居之地。段氏时，高智升治善阐，以高福世

守其地。至元四年，立洹门千户所。十二年，改为县。县西有泉曰洹源，讹为易门。

安宁州。下。唐安宁县。蒙氏以蛮酋苏阿褒治之，段氏以善阐猷孙氏为安宁城主。后袁氏、高氏互有其地。宪宗七年，隶阳城堡万户府。至元三年，置安宁千户所。十二年，改安宁州。旧领三县：禄丰、罗次、大甫。后省大甫县入本州。领县二：

禄丰，下。旧为禄琫甸白村，乌爨蛮居之，以地瘴热，迁徙不常。段氏时，高智升子义胜治其地。至元十三年，割宁安千户所之禄琫、化泥、驥宗龙三处立禄丰县。因江中有石如甑，蛮语石为禄，甑为琫，讹为禄丰也。罗次。下。治压磨吕白村，本乌蛮罗部地。至元十二年，置罗次州，隶中庆路。二十四年，改为县，隶本州。

威楚开南等路。下。夷名俄碌睽。爨蛮筑城居之，城名威楚。蒙氏以此地属银生节度。段氏以银生属姚州，又名当筋睑，又改为白鹿郡，又为威楚郡。高升泰执大理国柄，封其侄量成于威楚，筑外城号德江城，传至裔孙长寿。宪宗三年，归附。六年，立威楚万户府。至元八年，改威楚路，置总管府。后改宣慰司，又仍为总管府。旧领威楚、定远、南宁三县。后省南宁县入定远，改嶧嘉千户为嶧嘉县。领县三：

威楚，下。倚郭。唐故县，为爨蛮所据。元初，立千户所。至元十五年，升为威州。立富民、净乐二县。二十一年，降为威楚县，并二县入之。定远，下。唐髻州。夷名直睽。蒙氏改牟州，以爨酋抬萼守之，筑新城曰耐笼。高氏又命云南

些莫徒酋夷羨徙二百户于黄蓬戍。宪宗四年，立牟州千户所，黄蓬戍为百户。至元十二年，改定远州，黄蓬戍改南宁县。后改州为县，并南宁县入之。𪔐嘉。下。

州四：天历二后，威楚路黄州土官哀放入贡，乃羁縻州。

镇南州。下。濮落蛮所居川名欠舍，中有城曰鸡和，蒙氏置石鼓县，又于沙却置俗富郡，即今州治也。大理时，欠舍、沙却之地俱为高氏所有。宪宗三年内附。七年，置欠舍千户、石鼓百户。至元二十二年，改欠舍千户为镇南州，立定边、石鼓二县。二十四年，省二县入本州。州属尚有安远一县，省并年分阙。

南安州。下。黑爨蛮所居寨名摩楚，大理时为高氏所据。宪宗立摩刍千户，隶威楚万户府。至元十二年，改为南安州，隶本路。领县一：

广通。下。夷名路睽。蒙氏立路睽县，大理时为高氏属地。其后宜州酋些莫徒裔易哀等附之，至高长寿遂移居路睽，筑城曰龙戏新栅。宪宗七年，内附，立路睽千户。至元十二年，改为广通县。

开南州。下。蒙氏为银生府，分十二甸，昔濮、和泥二种蛮所居。后为金齿白蛮所据，蒙氏、段氏皆莫能复。中统三年，讨平之，以所部隶威楚万户府。至元十二年，置为开南州。

威远州。下。其川有六，昔濮、和泥二种蛮所居。后为白夷酋阿只步等所据。中统三年，讨平之。至元十二年，置为威远州，与开南并隶威楚路。

武定路军民总管府。下。本獠鹿等蛮所居之地。至大理，

使乌蛮阿剌治此，其裔孙法瓦浸盛，并纳洩泥共笼等地，以其远祖罗婺为部名。宪宗四年内附。七年，置罗婺万户府。至元八年，并所隶仁德、于矢二部入罗婺，为北路总管府。十一年，割出仁德、于矢二部，改本路为武定。领县一：

南甸。下。本路所治蛮名囊甸。又曰洩泥笼。至元二十六年置县。

州二：

和曲州。下。僰獠诸种蛮所居名叵箐甸。蒙氏时，白蛮据其地。至段氏，以乌蛮阿剌并吞诸蛮聚落三十余处，分兄弟子侄治之，皆隶罗婺部。宪宗六年，改叵箐甸曰和曲，至元二十六年，升为州。领县一：

元谋。下。旧名华竹，又曰环州。至元十六年，改为县。

禄劝州。下。旧名洪农碌劝甸，易笼蛮所居。至元二十六年，置禄劝州。领县二：

易笼，下。地名培场，有二水，合流绕城而东。蛮语洩为水，笼为城，故又名易笼。罗婺部大酋居之，为群蛮会集之地。至元二十六年，置易笼县。石旧。下。旧有四甸：曰掌鸠，曰法块，曰抹捻，曰曲蔽。后讹掌鸠为石旧。至元二十六年，置县。

鹤庆路军民总管府。下。夷名其地为白鹤川及样共川，隶于越析诏。蒙氏合六诏为一，于样共置统谋郡。宪宗三年内附，为鹤州。七年，立二千户所，仍称统谋，隶大理万户府。至元十一年，罢统谋千户，复为鹤州。二十年，为燕王分地，隶行省。二十三年，升为鹤庆府。寻改为路。领县一：

剑川。下。夷名义督罗鲁城，一名剑川。昔浪穹诏与南

诏战败，走保剑川，改称剑浪诏。后为南诏所并，置剑川节度。大理时，改为义督睑。宪宗四年，内附。七年，立义督千户所。至元十一年，罢千户，立剑川县。

云远路军民总管府。本南诏乞蓝夷地。元贞二年，云南省臣也先不花征乞蓝，拔瓦农、开阳二寨，其党荅刺率诸蛮来降，乞蓝悉平，以其地为云远路军民总管府。

彻里军民总管府。为倭泥、貉獠、蒲刺、黑角诸蛮杂居之地。世祖命兀良合剌伐交趾，经其地，悉降之。至元中，置彻里军民总管府，领六甸。按大德中，云南行省言：乞别立彻里军民宣抚司。泰定二年，又立车里军民总管府。疑废置不常，故罢而复立也。

广南西路宣抚司。宋特么道依智高后裔居之。至元中，立广南西路宣抚司。旧领路城、上林、罗佐、安宁、富州五州。后析路城、上林、罗佐三州隶来安路。本路领州二：

安宁州，下。富州。下。

丽江路军民宣抚司。乌蛮么、些所居之地，为越析诏之属部。后隶南诏，置丽水节度。宋时，为蛮酋蒙醋醋所据，段氏莫能制。宪宗三年，世祖征大理，自卡头济金沙江，么、些酋拒守。四年春，讨平之，置茶罕章管民官。至元八年，置宣慰司。十三年，改丽江路，置军民总管府。二十二年，府罢，立宣抚司。领府一：

北胜府。旧为施蛮之地。南诏异牟寻取之，名北方賧，徙潞河白蛮及罗落、么、些诸蛮以实其地，号成偈賧，又改名

善巨郡。大理段氏使高大惠治此郡，改名成纪镇。宪宗三年，其酋高俊内附。至元十五年，立为施州。十七年，改为北胜州。二十五年，升为府。云南行省言：“金沙江西通安兰五城，宜依旧隶茶罕章宣抚司，金沙江东永宁等处五城宜废，以北胜施州为北胜府。本府领州三：

顺州。下。夷名牛睽。南诏异牟寻徙诸浪人居之，与罗落、么、些蛮杂处。后罗落蛮酋成斗族渐大，自为一部，迁于牛睽，至十三世孙自睦，犹隶大理。宪宗三年，内附。至元十五年，改牛睽为顺州。

蒗渠州。下。夷名罗共睽，。罗落、么、些三种蛮世居之。至元九年，内附。十四年，立宝山、蒗渠二县。十六年，改宝山、蒗渠二县为州。本属丽江路，后改属北胜府。

永宁州。下。夷名楼头睽，接吐番东徼，地名荅蓝、么、些蛮泥月乌逐出吐番，居此地。宪宗三年，其三十三世孙和字内附。至元十六年，改为州，属北胜府。

州四：

通安州。下。夷名三睽，为越析么些诏地，并于南诏，仆緌蛮居之，其后么、些蛮又据之，世属段氏。宪宗三年，其裔孙麦良内附。中统四年，以麦良为三睽管民官。至元九年，其子麦兀袭父职。十四年，改为通安州。

兰州。下。南诏獠蛮地，名罗眉川，段氏始置兰沧郡，以董庆者治之。后周氏疆盛。与董氏分为二部，以兰沧江为限。宪宗四年内附，隶茶罕章管民官。至元十二年，改兰州。

宝山州。下。么、些蛮地。其先自楼头徙此。世祖征大理，自卡头济江，围大匭等寨。其酋内附，名其寨曰察罕忽

鲁罕。至元十四年，以大匭七处置宝山县。十六年，升州。

巨津州。下。濮、獠之地，名罗波九睽。后为么、些蛮所夺，又为蒙氏所并，属丽水节度。宪宗三年，内附。至元十四年，于九睽置巨津州，以桥为南诏、吐番来往之通津，故名。领县一：

临西。下。大理极边之地，夷名罗哀间。居民皆么、些二种蛮。至元十四年，立临西县，以西临吐番，故名。

东川府路。下。本大理国闷畔部。宪宗时，置万户。至元十五年，改军民府。二十八年，罢云南四州，置东川府。至元十一年，立云南邓、川、赵、姚四州。当是罢此四州，置东川府。

茫部路军民总管府。下。至元中，置。领州二：
益良州，下。强州。下。

孟杰路。下。泰定三年，八百媳妇蛮请官守，置木安、孟杰二府于其地。

木安路。下。泰定三年置。

普安路。下。南诏东边东爨乌蛮七部落居之。其后爨酋阿宋据其地，号于矢部，世为酋长。宪宗七年，内附，命为于矢万户。至元十三年，改普安路总管府。明年，更立招讨司。十六年，改宣抚司。二十二年，罢司为路。

曲靖等路管军总管府。唐为曲州、靖州。后没于南诏蒙

氏，置石城郡。段氏因之。后为磨弥蛮酋所据。宪宗六年，内附。置磨弥部万户府。至元八年，改为中路。十三年，改曲靖路总管府。二十年，隶皇太子位下。二十五年，升宣抚司。二十八年，以曲靖路宣抚司改立管军总管府。领县一：

南宁。下。倚郭。唐为南宁州，治石城，后没于南诏蒙氏，改石城郡。段氏时，乌蛮酋据其地。宪宗三年，内附。六年，立千户所。至元十三年，升南宁州。二十二年，降为县。

州五：

陆凉州。下。南诏落温部蛮据其地。宪宗三年，内附，置落温千户所，。隶于落蒙万户。至元十三年，改为陆凉州。领县二：

芳华，落温部之地，夷名忻歪，又名部封。元初，置千户。后改为县。河纳。下。治蔡村。蒙氏置陆郎县。元初，复并于落温部，置百户。至元中，改河纳县。

越州。下。旧为鲁望川，普么部蛮居其地。宪宗四年，内附。六年，置千户所。至元十二年，改越州。

罗雄州。下。旧为塔敝纳夷甸。相传盘瓠之裔，有罗雄者，前居此甸。至其孙普恐，名其部曰罗雄。宪宗四年，内附。七年，隶普磨千户。至元十三年，析夜苴部为罗雄州。领县一：

亦佐。下。本夜苴部地。至元十三年，置县。

马龙州。下。夷名撒匡，僰刺蛮居之。后为纳垢蛮部所夺。至罗苴内附。置千户所。至元十三年，改为州。即马龙旧城也。领县二：

马龙，下。通泉。下。本通泉乡，纳垢蛮之孙易陬分居

其地。元初，为易笼百户。后改为通泉县。

霫益州。下。唐为西平州，又改盘州。后没于南诏，为爨、刺二种蛮所居。磨弥部又夺之。元初，其孙普垢刳内附。宪宗七年，以本部隶磨弥万户府。至元十三年，改霫益州。领县三：

交水，下。治易隰笼城。磨弥部酋蒙提居之。后大理高氏逐其子孙，而有其地。宪宗五年，内附。至元十三年，立为县。后至元二年，与罗山、石梁并入巡检司。石梁，下。石梁山，本伍勒部酋世居其地。至元十三年，立为县。后并入巡检司。二十四年，复立。罗山下。夷名落蒙山，乃磨弥部东境。至元十三年，立为县。后并入巡检司。

徵江路。下。唐南宁、昆二州地。后没于南诏，名罗伽甸、么、些蛮居之，又为爨蛮所夺。蒙氏置河阳郡。大理段氏析为三部：曰强宗，曰休制，曰步雄。步雄部后居罗伽甸者，又号罗伽部。宪宗四年，内附。六年，置罗伽万户府。至元三年，改万户为中路。十六年，升为徵江路。领县三：

河阳，下。附郭。归附后为千户所。至元十六年，改河阳州。二十六年，降为县。江川，下。南诏徙曲旺蛮居此。段氏以些、么蛮子孙分管其地，名步雄部。宪宗时，其酋弄景内附，置千户所。至元十三年，改千户为江川州。二十年，降为县。又置双龙县，旋省。阳宗。下。么、些蛮居此，号强宗部。宪宗时，其酋卢舍内附，立为千户所。至元十三年，改为阳宗县。译言强为阳也。

州二：

新兴州。下。唐求州，为羁縻州。后没于南诏，置温富州。段氏徙些、么蛮居其地。元初，内附，置部傍、普舍二千户所。至元十三年，改部傍千户为休纳县，又于休纳置新兴州，隶徵江路。旧领休纳、普舍、研和三县，后省休纳县入本州。领县二：

普舍，下。强宗部蛮之裔长曰部傍，据普具龙城，次曰普舍，据普札龙城。后普舍孙苴刷内附，立普舍千户所。至元十三年，改为县，治普札龙城。研和。下。步雄部蛮居此。其孙龙钟内附，立百户，至元十三年，改为县。

路南州。下。夷名路甸，有城曰撒吕，黑爨蛮之裔落蒙所筑，因名落蒙部。宪宗时，内附，置落蒙万户府。至元七年，并落蒙、罗迦、末迷三万户为中路。十三年，分中路为二路，改罗迦为徵江路，落蒙为路南州。旧领弥沙、邑市二县。至元二十四年，并弥沙入邑市。领县一：

邑市。下。至元十三年，即邑市、弥歪二城立邑市县，弥沙等五城立弥沙县。后并弥沙入本县。

普定路。下。本普里部蛮。元初内附，置普定府。至元二十七年，斡罗思、吕国瑞贿丞相桑哥，请创罗甸宣慰司，奏言：招到罗甸国札哇并龙家、宋家、玃狁、苗人诸种蛮夷四万六千六百户。阿卜、阿牙者来朝，为曲靖路宣慰司同知脱因及普安路官所阻。云南行省言：“罗甸即普里也，归附后改普定府，印信俱存，隶云南省三十余年，赋役如期。今创罗甸宣慰安抚司，隶湖南行省。斡罗思等擅以兵胁降普定土官矣资男、札哇、希古等，勒令同其入觐。邀功希赏。乞罢之，

仍以其地隶云南。”从之。大德七年，改为路。是年，中书省臣言：“蛇节等作乱，普定知府容苴率众效顺。容苴没，其妻适姑亦能宣力戎行，乞令袭其夫职。仍改普定为路，隶曲靖宣慰司，以适姑为本路总管，佩虎符。”按旧志普定路直隶行省，不隶于宣慰司。未知何时所改。领州四：

永宁州。下。领募役项营下二寨长官司。

镇宁州。下。本荒服地。元初始置四州，隶本路。领十二营、康佐二寨长官司。

习安州。下。领宁谷、西堡二寨长官司。

安顺州。下。

仁德府。僰、刺蛮之地，号仲割溢源部。后乌蛮名新丁者夺之，其后号新丁部，又讹新丁为仁地。或云蒙氏改为寻甸，段氏改仁德部。宪宗五年内附，明年立为仁地万户。至元十三年，改为仁德府。领县二：

为美，下。地名溢浦适侣睽甸，即仁地之故部。至元二十四年，置县。归厚。下。地名易浪浦笼，旧属仁地部。至二十四年，置傛俸县。二十五年，改归厚县。

罗罗、蒙庆等处宣慰司都元帅府。至元十二年，置罗罗宣慰司。泰定四年，八百媳妇蛮请官守，改为罗罗、蒙庆等处宣慰司都元帅府。至正二年，罢。六年，复置八百宣慰司。

建昌路。下。唐隗州中都督府。后为蒙诏所据，立城曰建昌府，以乌、白二蛮实之。传至阿宗，娶落兰部建蒂女沙智。宪宗时，建蒂内附，以阿宗守建昌。至元十二年，析其地置总管府五、州二十三、建昌其一路也。本路领州九：

建安州。下。建昌路治所。元初，置千户二。至元十五年，割建乡城十四村及建蒂四村，置宝安州。十七年，改本千户为建安州。二十六年，并宝安州入之。

永宁州。下。在建昌之东郭，名偏城。蒙诏立建昌府，领建安、永宁二州。至元十六年，分建昌为二州：在城曰建安，在东郭曰永宁。领县一：

北社。此县旧志所无，《翰墨全书》有之。《明一统志》：元属永宁州，明初改为碧舍。

泸州。下。旧名沙城睑。段氏于热水甸立城曰洩笼，隶建昌。宪宗时内附，复叛。至元九年，平之。十五年，改洩笼为泸州。

礼州。下。唐苏祈县。后吐番、乌白蛮迭据其地，号笼么城。至元九年，平其地，置千户所。十五年，改为礼州。领县一：

泸沽。罗落蛮所居。后乌蛮据之。自号曰落兰部，或称罗落。其酋蒲德遣侄建蒂内附。建蒂复叛杀蒲德自立。至元九年，平之，设千户所。十三年，升万户。十五年，改为泸沽县。

里州。下。蒙氏时，落兰部小酋阿都居此，因名阿都部。其后裔纳空随建蒂内附。中统三年，复叛。至元十年，其子耶吻效顺，隶乌蒙。十八年，置千户所。二十二年，同乌蛮叛，奔罗罗斯。二十三年，置军民总管府。二十六年，罢为州。

阔州。下。州治密纳甸，乌蒙之地。其酋仲由蒙之裔名科居此，以名为部号，后讹科为阔。至其三十七世孙樊罗内

附。至元九年，设千户所。二十六年，改为州。

邛部州。下。唐邛部县，后没于蛮。至宋，封其酋为邛都王，治乌弄城。后么、些蛮据其地，又为仲由蒙之裔所夺。宪宗时，内附。中统五年，置邛部州安抚招讨使，隶成都元帅府。至元十年，改属罗罗斯宣慰司。二十一年，降为州。

隆州，下。唐会川县之西北境。蒙氏改会川为会同逻，立五睑，本州为边府睑。其后，睑主杨大兰于睑北塼上立城名大隆城，即今州治。至元十三年，内附。十四年，设千户所。十七年，改隆州。旧置撒里府，领礼州、邛部州、隆州、其改并年分阙。

姜州。下。本会州府龙纳城，罗落蛮世居之。乌蛮仲牟由之裔阿坛绎居闷畔部，其孙阿罗仕于大理段氏，夺龙纳而有之，以祖名名其部曰绎部。宪宗时内附。至元八年，为落兰酋建蒂所破。九年，讨平之。遂隶会川。后改属建昌。十五年，改为姜州。二十七年，复属闷畔部万户府。后又属建昌。

苏州。下。本邛都地。蒙氏隶建昌府。元初，内附，立苏州，属建昌路。领县一：

中县。下。县治在回头甸，本东门蛮沙麻之地。至元十年，内附。十四年，置中州。二十二年，降为县来属。此县旧志属建昌路，又无苏州一州。《明一统志》：苏州，明初尚因之，后改为宁番卫，中县属苏州。明初尚因而不废，旧志误也。

德昌路军民府。下。蒙氏时屈部蛮所居。至元九年，内附。十二年，置定昌路，以本部为昌州。二十三年，罢定昌

路及德平路，置德昌军民府，治本州葛鲁城。领州四：

昌州。下。路治本州。乌蛮阿屈之裔。用祖名为屈部，其孙乌则至元九年内附。十二年，改本部为州。兼领普济、威龙，隶定昌路。二十三年，罢定昌路，并隶德昌。

德州。下。蒙氏时名吾越甸，城曰亦苴龙，所居蛮苴部，以远祖名部曰赧纒。宪宗时内附。至元十二年，置千户所。十三年，改为德州，隶德平路。二十三年，改隶德昌。按德平路，当是入德州，二十三年所罢。

威龙州。下。旧名巴翠部，领小部三：曰沙娲普宗，曰乌鸡泥祖，曰娲诺龙蒲，皆犛鲁蛮种。至元十五年，合三部立威龙州。

普济州。下。旧名玆甸，犛鲁蛮所居。至元九年，随屈部内附。十五年，于玆甸立定昌路。二十三年，路废。改隶德昌路。《翰墨全书》：德昌路属下有苏州。《明一统志》：苏州属建昌路。今从《一统志》。

会川路。下。唐会川县，后没于南诏，立会川都督府，又号清宁郡。至段氏，仍为会川府。至元九年，内附。十四年，置会川路，治武安州，领州五：旧有通安州，省并年分阙。

武安州。下。本名龙泥城。南诏置清宁郡。大理高凌据此。至元十四年，置管民千户所。十七年，改武安州。

黎溪州。下。蛮曰黎驱。讹为今名。蒙氏徙白蛮居之，后为罗罗蛮所夺。至元九年，蛮酋阿夷内附，改为黎溪州。

永昌州。下。治故归依城。南诏置会同府。立五睑，徙张、王、李、赵、杨、高、周、段、何、苏、龚、尹十二姓

居之，以赵氏为府主，后为王氏所夺。及高氏专大理之政，逐王氏，以其子高政治会川。宪宗三年，征大理，高氏遁去。九年，故酋王氏孙阿龙率众内附。至元八年，以其子阿禾领会川。十四年，置管民千户。十七年，改永昌州。

会理州下。旧号昔陀城，蛮酋罗于则据之。其祖名阿坛绛，遂名曰绛部。后尽有四州之地，号蒙歪。宪宗八年，其孙亦芦内附，隶阆畔万户府。至元四年，属落兰部。十二年，改隶会川路。十五年，置会理州，仍隶会川。二十七年，复隶阆畔部万户府。大德四年，并阆畔泗州、西州为一，置为磨州，其省并年分均阙。

麻龙州下。本麻笼城地，名棹罗能。乌蛮蒙次次之裔，居阆畔东川，后裔普恐迁苗卧龙，其孙阿麻内附。至元五年，为建蒂所并。十四年，立管民千户所，隶会川路。十七年，改为州。二十七年，割属阆畔部万户府。

柏兴府。旧为摩沙蛮之地。唐立昆明县。蒙氏改香城郡。至元十年，其盐井摩沙酋罗罗将獐鹿、茹库内附，十四年，置盐井管民千户所。十六年，改为闰盐州，以獐鹿部为普乐州，俱隶德平路。二十七年，并二州为闰盐县，立柏兴府，隶罗罗宣慰司。领县二：

闰盐，下。倚郭。蛮名贺头甸。金县。下。蛮酋利奚揭勒所居。至元十五年，立金州。后降为县。

临安广西元江等处宣慰司兼管军万户府。本为临安广西道军民宣抚司，改宣慰司年分阙。

临安路。下。唐为羁縻牂州，后没于南诏。蒙氏置通海郡都督府。段氏改秀山郡，复为通海郡。蛮酋互相侵夺，或

隶善阐，或隶阿𤑔。宪宗七年，内附，置阿𤑔部万户府。至元八年，改为南路。十三年，又改临安路。领县二：

河西，下。蛮名休腊。唐初置西宗州。后没于南诏，为步雄部，阿𤑔蛮又夺之。宪宗六年，内附。七年，立万户府，休腊隶之。至元十二年，改河西州，隶临安路。二十六年，降为县。蒙自，下。县境有山曰自则，汉语讹为蒙自。南诏以赵氏守其地。段氏时，阿𤑔蛮居之。宪宗六年内附，继叛。七年，平之，立千户所。至元十三年，改蒙自县。

千户一：

舍资千户。阿𤑔蛮所居地，名褒古，又曰部孛踵甸。传至裔孙舍资，因以为名。内附后，隶蒙自千户。至元十三年，改蒙自为县，以其地近交趾，遂以舍资为安南道防送军千户，隶临安路。

州三：

建水州。下。治故建水城，蒙氏所筑。每夏秋，溪水涨溢如海，蛮谓海为惠，大为厠，故名惠厠。汉语曰建水。些么徒蛮所居。内附后，立千户所。至元十三年，改建水州，隶临安路。

石坪州。下。阿𤑔蛮所居之地，宋曰石坪县。至元七年，以为州，隶临安路。

宁州。下。唐为黎州。后没于蛮。地名浪旷，夷语旱龙也。步雄部蛮些么徒据之。后属爨蛮阿几，以浪旷割与宁部酋豆圭。宪宗四年，宁部酋内附，置宁部万户府。后改宁海府。至元十三年，改宁州，隶临安路。旧领三县：通海、嵯峨、西沙。西沙，宁部蛮所居，其裔孙西沙筑城于此，因名

西沙龙。宪宗四年，其酋普提内附，居此为万户。至元十三年，置西沙县。二十六年，以隶宁州。至治二年，并入本州。领县二：

通海，下。倚郭。元初，立通海千户所，隶善阐万户府。至元十三年，改通海部，隶宁海府。二十七年，府罢，直隶临安路。后改隶宁州。嶧峨。下。旧为嶧峨蛮所居，后阿𤙖蛮酋夺之。至其孙阿次内附，立为千户所。至元十三年，改为州，领邛川、平甸二县。三十六年，降为县，并二县入之，隶临安路。又改隶宁州。

阿迷万户府。元初，隶南路总管府。大德中，直隶临安广西元江等处宣慰司。按《翰墨全书》临安路有阿迷州、王弄州。阿迷州，当由万户改之。王弄州，当由王弄山大、小二部改之。其建置、省并年分俱阙。千户所二：

纳楼。

茶甸。

广西路。下。唐为羁縻州，东爨乌蛮等部所居之地。蒙氏析为师宗、弥勒二部。宪宗七年，内附，隶落蒙万户府。至元十二年，籍二部为军，立广西路。十八年，复为民。至元中，置广南西宣抚司，其省罢年分阙。领州三：

师宗州。下。爨蛮师宗据匿弄甸，号师宗部。至元中，以本部为千户总把，领阿宁、豆勿、阿卢、豆吴四千户，属广南西路。后改置师宗州。

弥勒州。下。宋时些么徒蛮之裔据其地，号弥勒部。至元中，以本部为千户总把领，吉输、哀恶、步笼、阿欲四千

户，属广南西路。后改置弥勒州。

维摩州。下。元初立维摩千户所，隶阿迷万户府。至元中，以本部为千户总把，领维摩、屈中二千户。后改维摩州。

元江路。下。蒙氏为银生节度属地，徙白蛮苏、张、周、段等十姓戍之，又开威远等处置威远睑。后为和泥所据。又为些么蛮阿樊诸部所有。宪宗四年，内附。七年，复叛。至元十三年，遥置元江府以羁縻之。二十五年，命云南王讨平之，割罗槃、马笼、步日、思摩、罗丑、罗陀、步腾、步竭、台威、台阳、设栖、弥陀十二部于威远，立元江路。其属地曰：

马笼部千户所。因马笼山立山寨，阿樊蛮所居。元初，立千户所。属宁州万户。至元十三年，改隶元江万户。二十五年，属元江路。

步日部。蒙氏立此甸，徙白蛮居之，名步日睽。

溪处甸军民副万户府。元初置，隶云南行省。后属元江路。

亏容甸部。旧为铁容甸。

思陀甸部。旧为官桂思陀部。元初，置和泥路，隶云南行省。后属元江路。

落恐甸军民万户府。旧为伴溪落恐部。元初立万户府，隶云南行省。后属元江路。

罗槃部。

思摩部。

罗丑部。

罗陀部。

步腾部。

步竭部。

台威部。

台阳部。

设栖部。

弥陀部。

案版寨。

罗必甸。

带良甸。

普甸。

部目甸。

落甸。

带洋甸。

他郎。

因远。

不通。

沙财。

泥大。

带思。

奚泥伽。

乌尤。

罗配。

法处。

七十门二处。

大甸。

越甸。

兀好滞。

带来普胜侣也构甸。

部目司摩。

带思带良甸。

因远罗必甸。

违远带羊撒里甸。

马龙马郎沙则尼甸。

罗尼罗初不甲甸。

大理金齿等处宣慰司都元帅府。中统四年置。

大理路军民总管府。上。唐姚州，治叶榆洱河蛮。后蒙舍诏皮罗阁并蒙嵩诏、越析诏、浪穹诏、遼睢诏、浪施诏，合五诏为一，号南诏，治大和城。至阁罗凤，号大蒙国。至异牟寻，又迁于羊苴乖城，即今府治，改号大礼国。后段氏有其地，更为大理国。宪宗三年，收附。六年，置上下二万户府。至元七年，并二万户为大理路。领司一：

录事司。宪宗七年，立中千户，属大理万户。至元十一年，罢千户，立录事司。十二年，升理州。二十一年，复为录事司。

县二：

太和，下。附郭。唐开元末，皮罗凤据其地。宪宗七年，于城内外立上、中、下三千户。至元二十六年，改中千户为录事司，上、下二千户立县。云南。下。唐为云南州，又改匡州。后张仁果据之，号白子国。蒙氏、段氏并为云南州，又

称品甸。宪宗七年，立品甸千户所。至元十一年，复为云南州。后降为县。

府二：

永昌府。蒙氏、段氏皆为永昌府。宪宗七年，分永昌之永平县立千户所。至元十一年，置永昌州。十五年，升为府，隶大理路府。领县一：

永平。下。蒙氏为胜湘郡。至元十一年，改立千户所。后又为县。

藤冲府，蛮名越睽。僂、骠、峨昌三种蛮居之。唐置羁縻州。蒙氏取越睽，置软化府，又改腾冲府。宪宗三年，府酋高救内附。至元十一年，改藤越州，又立藤越县。十四年，改腾冲府。十二年，省顺江州及藤越、越甸、古涌三县。按越甸，至元中置。古涌置县年分阙。入之，隶大理路。

州三：

邓川州。下。夷有六诏，遼睽其一也。唐置遼睽州，治大厘城。蒙氏改德原城，隶大理。段氏因之。宪宗三年，内附，置德原千户所。至元十一年，改为邓川州。领县二：

浪穹，下。蛮名弥茨，乃浪穹诏所居之地。后其酋铎罗望为南诏所侵，移保剑川，更称浪剑。贞元中，南诏灭之，以浪穹、施浪、邓睽总三浪为浪穹州。宪宗七年，内附，立浪穹千户所。后改为浪穹州。至元十一年，降为县，与凤羽县俱隶本州。凤羽。下。蒙氏细奴逻兴，有凤翔于此，故名。至元十一年，置县。

蒙化州。下。为罗罗摩及僂蛮之地。后蒙氏细奴逻筑城居之，号蒙舍诏，改称南诏，改蒙舍城为阳瓜州。段氏改开

南县。宪宗七年，立千户所。至元十一年，置蒙化府。十四年，升为路。二十年，降为州，隶大理路。

赵州。下。罗落蛮所居。蒙氏立十睑，赵州睽其一也。皮罗阁置赵郡，阁罗凤改为州。段氏又改天水郡。宪宗七年，置赵睑千户所。至元十一年，改为州，又于白崖睑立建宁县隶本州。二十五年，省建宁入本州。

姚安路军民总管府。唐故州。蒙氏改为弄栋府。段氏又改姚州。宪宗三年，内附。七年，置统矢千户所、大姚堡千户所。至元十二年，罢统矢，置姚州，隶大理路。天历间，升姚安路总管府。领县一：

大姚。下。蛮名大姚堡。宪宗七年，立千户所。至元十一年，改为县。

十二关防送千户所。本云南县楚场地。至正间，因地僻险，立千户所。

蒙怜路军民府。至元二十七年，从云南行省请，以蒙怜甸为军民总管府领只迷甸、金井甸。

蒙莱路军民府。本蒙莱甸，与蒙怜路同时置。领邦毛甸、金齿等处宣抚司。其地在大理西南，土蛮凡八种，曰：金齿、白夷、白僰、峨昌、骠、繻渠、罗比、苏。自汉以来，不与中国通。蒙氏取其地为大理属部。及段氏时，金齿诸蛮浸盛。中统初，金齿、白夷诸酋各遣子弟入朝。二年，立安抚司以统之。至元八年，分金齿、白夷为东西两路安抚使。十二年，改西路为建宁路，东路为镇康路。十五年，改安抚为宣抚，置六路总管府。二十三年，罢两路宣抚司，并入大理金齿等处宣抚司。

柔远路。其地曰怒江，曰普坪睑，曰申睑熨寨，曰乌摩坪。中统初，熨酋阿八思入朝。至元十三年，与茫施、镇康、镇西、平缅、麓川俱立为路，隶宣抚司。后并于麓川路。

茫施路。其地曰怒谋，曰大枯睽，曰小枯睽。即《唐书》所谓茫施蛮也。中统初，内附。至元十三年，置为路。领甸五：

大固甸。

鹅林甸。

石甸。

孟茫甸。

罗必思甸。

镇康路。其地曰石睽，黑熨所居。中统初，内附。至元十三年，置为路。领湾甸。蛮名细睽。

镇西路。其地曰于赖睽，曰渠兰睽，白夷所居，中统初，内附。至元十三年，置为路。领甸二。甸名阙。

平缅路。其地曰骠睽，曰罗必，四庄，曰小沙摩弄，曰骠睽头，白夷所居，中统初，内附。至元十三年，置为路。至正十五年，改平缅宣抚司。

麓川路。其地曰大市茫，曰睽头附赛，曰睽中弹吉，曰睽尾福禄培，皆白夷所居。中统初，内附。至元十三年，置

为路。至顺元年，复置麓川路军民总管府。其何时省罢，无考。

南睽。其地曰阿赛睽，白夷、峨昌所居。至元初，内附。至元十五年，隶宣抚司。金齿六路、一睽，岁赋金银各有差。

顺宁府。本蒲蛮地各庆甸。泰定间，内附。泰定四年，置顺宁府，直隶宣抚司庆甸。下。与府同置。

州一：

宝通州。下。

乌撒乌蒙宣慰司。在本部巴的甸。乌撒者，蛮名也。所辖部六，曰：乌撒部、阿头部、易溪部、易娘部、乌蒙部、闷畔部。其东西又有芒布、阿晟二部。乌撒之裔折怒始强，尽有诸部之地。宪宗征大理，累招不降。至元十年，始附。十三年，置乌撒路。十五年，为军民总管府。二十一年，改宣抚司。二十四年，升乌撒乌蒙宣慰司。大德四年，立乌撒乌蒙等郡县。《翰墨全书》：乌蒙路有阿都、奚娘二县，东川府有淄都、乌撒二县。当是大德四年所置，其省并年分阙。后至元元年，乌撒、乌蒙又改隶四川行省。

木连路军民府。

蒙光路军民府。

木帮路军民府。旧名孟都，又名孟邦。至元二十六年，置总管府。领三甸。

孟定路军民府。旧名景摩。至元二十六年，置总管府。领三甸。

孟昌路军民府。至顺二年，与孟定路并置。孟定路，当是至元后裁罢。谋粘路军民府。领孟陵甸。

南甸路军民府。旧名南宋。至元二十六年，置总管府。领甸三：怒江甸，余二甸阙。

歹罗甸路军民府。领甸五：

满东甸。

蒙忙甸。

木倒甸。

大都甸。

益当甸。

陋麻甸军民官。

云龙甸军民府。领甸四：

忙兀甸。

忙吉刺甸。

忙牙甸。

忙蓝甸。

缥甸路军民府。后至元元年，置缥甸散府。

二十四寨达鲁花赤。

孟隆路军民府。本吾仲蛮地。泰定三年，奉方物来献，置孟隆路。

木朵路军民府。至元三十年，以金齿木朵甸户口增殖，立下路总管府，赐其长两珠虎符。泰定三年，置木朵路。当是已废复置。

领甸九：

木礼甸，木朵甸，小花甸，木揽甸，孟住甸，歹鲁甸，歹罗甸，罗落甸，木茅甸。

何罗拉木多等处军民官：

木楼府。

大姑等处。

云南金齿孟定各甸军民官：

孟定甸。

银沙罗甸。

孟垭甸。

景新甸。

九索带火甸。

思摩甸。

都目甸。

不里侣也构甸。

沙则泥大甸。

阿都甸。

木倒甸。

孟绫甸。

木麓甸。

震浓甸。

蒲阿思。

大部马二十四寨。

广甸。

甸尾。

银生罗茫。

必畔。

茫部奚。

八纳等部。

和能等部。

孟爱等甸军民府。至元三十一年，其酋长遣子入朝，置军民总管府。

蒙兀路。

通西军民总管府。大德元年，蒙阳甸酋纳款，遣其弟阿不刺等献方物，恳请岁贡银一千两及置驛传，置通西军民府。

木来府。至元二十九年，置散府，用其土人马列知府事。泰定三年，置木来州。当是已废复置。按自木连路以下，当俱隶乌撒乌蒙宣慰司。

邦牙等处宣慰司。至元中，于蒲緬王城置邦牙宣慰司。未几罢。后至元四年复立。至正二年罢。

建都宁远都护府。至元十一年置。

吕告蛮部安抚司。至元十七年，有安抚使王阿济。

蒙样刚等甸军民官。元贞二年复置。初置及裁置年分阙。

银沙罗甸等处军民府。天历二年，置银沙罗甸等处宣慰司都元帅府。至顺二年，改军民总管府。

者线蒙庆甸军民府。至顺二年，与银沙罗甸并置。

孟并孟广者样等甸军民官。至顺二年置。

芦传路军民总管府。至顺二年置。

傀罗府。元统元年置。

穆由甸军民官。后至元元年置。

范陵甸军民官。后至元元年置。

老告军民总管府。至正四年置。

老了耿冻路军民总管府。至正七年置。

卷四十三

志第十七

地理五

江浙等处行中书省，领路二十二、府一、州二，属州二十四，县九十六。陆站一百八十处，水站八十二处。

江南浙西道肃政廉访司。

杭州路。上。宋杭州，属浙西路。宋高宗南渡都之，为临安府。至元十三年，平宋，置两浙大都督府，又置浙西宣慰司于临安。未几，罢大都督府，立行尚书省。十五年，改杭州路总管府。二十一年，徙江淮行省于杭州，改江浙行省。二十三年，复徙行省于扬州。二十六年，仍徙杭州。本路旧领钱塘、仁和、余杭、临安、新城、富阳、盐官、于潜、昌化九县。后升盐官县为州。户三十六万八百五十，口一百八十三万四千七百一十。至元二十七年钞籍。领司二：

左、右录事司。宋迁都杭州，设九厢。元至元十四年，分为四隅录事司。泰定二年，并为左、右二司。元统二年，复立杭州四隅录事司。

县八：

钱塘，上。仁和，上。与钱塘分治城内。余杭，中。临安，中。有青山务。新城，中。富阳，中。于潜，中。昌化。中。有宁口巡检司。

州一：海宁州。中有硖石务。宋盐官县。元贞元年，升为州。天历二年改海宁州。

湖州路。上。宋湖州，属浙西路。至元十三年，升湖州路总管府。旧领乌程、武康、归安、安吉、长兴、德清六县。后升长兴县为州。户二十五万四千三百四十五。钞籍阙，用至顺钱粮数。

领司一：录事司。旧设东西南北四厢。至元十三年，立总督四厢。十四年，改录事司。

县五：

乌程，上。归安，上。与乌程皆为倚郭。安吉，中。德清，中。武康。中。

州一：

长兴州。中。宋故县。元贞元年，升为州。

嘉兴路。上。宋嘉兴府，属浙西路。至元十四年，升嘉兴路总管府。旧领嘉兴、海盐、华亭、崇德四县。后升华亭县为府，升海盐、崇德县为州。户四十二万六千六百五十六，口二百二十四万五千七百四十二。领司一：

录事司。旧置厢官。至元十四年，改录事司。

县一：

嘉兴。上。倚郭。有风泾白牛务、魏塘务。

州二：

海盐州。中。有澉浦务。宋海盐县。元贞元年，升为州。

崇德州。中。宋崇德县。元贞元年，升为州。

平江路。上。宋平江府，属浙西路。至元十三年，升平江路总管府。二十一年，徙浙西宣慰司于本路。旧领吴、长洲、昆山、常熟、吴江、嘉定六县。后升昆山、常熟、吴江、嘉定俱为州。户四十六万六千一百五十八，口二百四十三万三千七百。领司一：

录事司。

县二：

吴县，上。倚郭。长洲。上。倚郭。

州四：

昆山州。中。宋昆山县。元贞元年，升为州。皇庆二年，徙州治于太仓。

常熟州。中。宋常熟县。元贞元年，升为州。

吴江州。中。宋吴江县。元贞元年，升为州。

嘉定州。中。宋嘉定县。元贞元年，升为州。

常州路。上。宋常州，属浙西路。至元十四年，升常州路总管府。旧领晋陵、武进、无锡、宜兴四县。后升宜兴县为府，无锡县为州。户二十万九千七百三十，口一百二万一千一百一十一。领司一：

录事司。

县二：

晋陵，中。倚郭。武进。中。倚郭。

州二：

宜兴州。中。宋宜兴县。至元十五年，升宜兴府。二十年，仍为县。二十一年，复升为府，仍置宜兴县隶之。元贞元年，降为州，省宜兴县入本州。

无锡州。中。宋无锡县。元贞元年，升为州。

镇江路。下。宋镇江府，属浙西路。至元十三年，升镇江路总管府。户十万三千三百一十五，口六十二万三千六百四十四。领司一：

录事司。

县三：

丹徒，中。倚郭。丹阳，中。金坛。中。

建德路。上。宋建德府，属浙西路。至元十三年，置建德府安抚司。十四年，改建德路总管府。户十万三千四百八十一，口五十万四千二百六十四。领司一：

录事司。

县六：

建德，中。倚郭。有神泉监，宋置以铸铜钱，后废。元复置，后又废。淳安，中。遂安，下。桐庐，中。分水，中。寿昌。中。有西坞寨。

松江府。宋华亭县，为嘉兴府属县。至元十四年，升为华亭府，仍隶嘉兴路。十五年，改松江府，直隶行省。户十六万三千九百三十一。至顺钱粮数。领县二：

华亭，上。倚郭。至元十五年置。上海。上。本华亭县地，名华亭海，宋时商贩云集，又曰上海市，至元二十八年，置上海县。

江阴州。上。宋江阴军，属浙西路。至元十二年，依旧置军，行安抚司事。十四年，升为江阴路总管府。二十八年，降为州，隶常州路。后直隶行省。旧领江阴一县，省入本州。户五万三千八百二十，口三十万一百七十七。

浙东道宣慰司都元帅府。旧治婺州。大德六年，移治庆元。

庆元路。上。宋庆元府，属浙东路。至元十三年，置宣慰司。明年，改为庆元路总管府。至治三年，复庆元路，未知何时省罢。旧领鄞、慈溪、奉化、象山、定海、昌国六县。后奉化、昌国二县俱升为州。户二十四万一千四百五十七，口五十一万一千一百五十三。领司一

录事司。

县四：

鄞县，上。倚郭。有小溪镇巡检司，本唐之光溪镇。象山，中。慈溪，中。定海。中。

州二：

奉化州。下。宋奉化县。元贞元年，升为奉化州。

昌国州。下。宋改唐翁山县为昌国县。至元十四年，升为州，仍置昌国县隶之，后省县入本州。

衢州路。上。宋衢州，属浙东路。至元十三年，升衢州

路总管府。户十万八千五百六十七，口五十四万三千六百六十。领司一：

录事司。

县五：

西安，中。倚郭。龙游，上。有陈村营。至元中立。江山，下。宋改礼贤县。元初，复旧名。有任山营，在仙霞关。常山，下。宋改唐常山县为信安。元仍复旧名。有草萍营，至元二十一年立。开化，中。

浙东海右道肃政廉访司。

婺州路。上。宋婺州，属浙东路。至元十三年，升婺州路总管府。旧领金华、东阳、义乌、兰溪、永康、武义、浦江七县。后升兰溪县为州。户二十二万一千一百一十八，口一百七万七千五百四十。领司一：

录事司。

县六：

金华，上。倚郭。东阳，上。义乌，上。永康，中。武义，中。浦江，中。

州一：

兰溪州。宋兰溪县。元贞元年，升为州。

绍兴路。上。宋绍兴府，属浙东路。至元十三年，改绍兴路总管府。至正十六年，称江南行御史台治绍兴。旧领会稽、山阴、嵊、诸暨、上虞、余姚、萧山、新昌八县。后升

余姚、诸暨二县为州。户一十五万一千二百三十四，口五十二万一千五百八十八。领司一：

录事司。

县六：

山阴，上。倚郭。会稽，中。倚郭。上虞，上。萧山，中。嵊县，上。宋改剡县为嵊县，取四山为嵊之义。新昌，中。宋以枫桥镇置义安县，又改新昌。

州二：

余姚州。下。宋余姚县。元贞元年，升为州。

诸暨州。下。宋诸暨县。元贞元年，升为州。

温州路。上。宋温州，又升瑞安府，属浙东路。至元十三年，置温州路总管府。旧领永嘉、瑞安、乐清、平阳四县。后升瑞安、平阳二县为州。户十八万七千四百三，口四十九万七千八百四十八。领司一：

录事司。

县二：

永嘉，上。倚郭。乐清。下。

州二：

瑞安州，下。宋瑞安县。元贞元年，升为州。

平阳县。下。宋平阳县。元贞元年，升为州。

台州路。上。宋台州，属浙东路。至元十三年，置安抚司。十四年，改台州路总管府。旧领临海、黄岩、天台、仙居、宁海五县。后升黄岩县为州。户十九万六千四百一十三，口一百万三千八百三十三。领司一：

录事司

县四：

临海，上。倚郭。仙居，上。宁海，上。天台。中。

州一：

黄岩州。下。宋黄岩县。元贞元年，升为州。

处州路。上。宋处州，属浙东路。至元十三年，升处州路总管府。户十三万二千七百五十四，口四十九万三千二百九十二。领司一：

录事司。

县七：

丽水，中。倚郭。龙泉，中。有併山寨。松阳，中。遂昌，中。青田，中。缙云，中。庆元。中。

江东建康道肃政廉访司。大德八年，徙治宁国。

宁国路。上。宋宁国府，属江南东路。至元十四年，升宁国路总管府。户二十三万二千五百三十八，口一百一十六万二千六百九十。领司一：

录事司。旧立四厢。至元十四年，改录事司。

县六：

宣城，上。倚郭。南陵，中。泾县，中。宁国，中。旌德。中。太平。中。

徽州路。上。宋徽州，属江南东路。至元十四年，升徽

州路总管府。旧领歙、休宁、绩溪、黟、祁门、婺源六县。后升婺源县为州。户一十五万七千四百七十一，口八十二万四千三百四。领司一：

录事司。旧设四厢。至元十四年，改置录事司。二十九年，罢。

县五：

歙县，上。倚郭。休宁，中。有五城务。祁门，中。黟县，下。绩溪，下。有西坑寨，置镇守营。

州一：

婺源县。下。宋婺源县。元贞元年，升为州。惠洽乡有巡检司。

饶州路。上。宋饶州，属江南东路。至元十四年，升饶州路总管府。十九年，改隶隆兴行省。旧领鄱阳、余干、浮梁、乐平、德兴、安仁六县。后升乐平、浮梁、余干三县俱为州。户六十八万二百三十五，口四百三万六千五百七十。领司一：

录事司。旧设三厢，至元四年改置。

县三：

鄱阳，上。倚郭。德兴，上。安仁，中。

州三：

余干州。中。宋余干县。元贞元年，长为州。

浮梁州。中。宋浮梁县。元贞元年，升为州。

乐平州。中。宋乐平县。元贞元年，升为州。

江南诸道行御史台。

集庆路。上。宋江宁府，又改建康府，属江南东路。至元十四年，改建康路。十五年，立江淮行中书省，后徙于杭州，改江浙行省。二十三年，徙江南行御史于建康。天历二年，以文宗潜邸，改建康路为集庆路。旧领上元、江宁、溧阳、溧水、句容，后升溧水、溧阳二县俱为州。户二十一万四千五百三十八，口一百七万二千六百九十。领司一：

录事司。

县三：

上元，中。倚郭。江宁，中。倚郭。句容，中。

州二：

溧水州。中。宋溧水县。元贞元年，升为州。

溧阳州。中。宋溧阳县。至元十四年，改为溧州。十五年，升为溧州府。十六年，改溧阳路，领录事司并溧阳县。二十八年，罢路，止存溧阳县。元贞元年，升为州。

太平路。下。宋太平府，属江南东路。至元十四年，升为太平路总管府。户七万六千二百二，口四十四万六千三百七十一。领司一：

录事司。旧设四厢。至元十四年，改置。

县三：

当涂，中。倚郭。芜湖，中。繁昌。下。

池州路。下。宋池州，属江南东路。至元十四年，升池

州路总管府。户六万八千五百四十七，口三十六万六千五百六十七。领司一：

录事司。

县六：

贵池，下。倚郭。青阳，下。建德，下。铜陵，下。石埭，中。东流，下。

信州路。上。宋信州，属江南东路。至元十四年，升为信州路总管府。旧领上饶、玉山、弋阳、贵溪、铅山、永丰六县。后升铅山县为州，直隶行省。户四十三万二千二百九十，口六十六万二千二百一十八。领司一：

录事司。

县五：

上饶，中。倚郭。玉山，中。弋阳，中。有宝丰场，宋之旧县，后裁。元置榷场。贵溪，中。永丰，中。

广德路。下。宋广德军，属江南东路。至元十四年，升为广德路总管府。五万六千五百一十三，口三十三万九千七百八十。领司一：

录事司。至元二十八年罢。

县二：广德，中。倚郭。建平，中。

铅山州。宋铅山县，属信州。至元二十九年，升为州，直隶行省。割上饶县之乾元、永乐二乡，弋阳之新政、善政二乡来属。户二万六千三十五，口阙。

福建等处行中书省，领路八、属州二，属县四十六。

福建闽海道肃政廉访司。

福州路。上。宋福州，属福建路。至元十五年，为福州路总管府。十七年，置福建行省于本路。是年，徙于泉州。十八年，复徙于本路。十九年，又回泉州。二十二年，罢行省，置福建道宣慰司。后罢宣慰司，复立行省于本州。大德二年，又置宣慰司都元帅府，罢行省，隶江浙行省。至正十六年，复置福建等处行中书省。本路旧领闽、侯官、福清、连江、古田、永泰、长溪、永正、闽清、宁德、怀安、长乐、福安十三县。后升长溪县为福宁州，析宁德、福安隶之，又升福清县为州。户七十九万九千六百九十四，口三百八十七万五千一百二十七。领司一：

录事司。至元十五年，行中书省于府城十二厢，分四隅，置录事司。十六年，并其二，置东西二司。二十年，复并为一。

县九：

闽县，中。倚郭。侯官，中。倚郭。怀安，中。古田，上。闽清，中。长乐，中。连江中。罗源，中。永福。中。

州二

福清州。下。宋福清县。元贞元年，升为州。

福宁州。上。宋长溪县。至元二十三年，升为州。领县二：

宁德，中。福安。中。

建宁路。下。宋建宁府，属福建路。至元十六年，改建宁路总管府。户一十二万七千二百五十四，口五十万六千九

百二十六。领司一：

录事司。

县七

建安，中。倚郭。瓯宁，中。倚郭。浦城，中。建阳，中。宋建阳县，又改嘉禾。元复旧名。崇安，中。松溪，下。政和，下。

泉州路。上。宋泉州，属福建路。至元十四年，置行宣慰司，兼行征南元帅府事。十七年，改为行中书省，置泉州路总管府。是年，又徙泉州行省于隆兴。大德元年，以福建平海等处行中书省治泉州，后罢。户八万九千六十，口四十五万五千五百四十五。领司一：

录事司。至元十五年，置南北二司。十六年，并为一。

县七：

晋江，中。倚郭。南安，中。惠安，下。同安，下。永春，下。安溪，下。德化，下。

兴化路。下。宋太平军，寻改兴化军，属福建路。至元十四年，升兴化路总管府。户六万七千七百三十九，口三十五万二千五百三十四。领司一：

录事司。

县三：

莆田，中。倚郭。至元十一年，割左右两厢属录事司。仙游，下。兴化，下。宋析莆田县地置兴化，移军治于此县。后复徙治莆田。邵武路。下。宋邵武军，属福建路。至元十三年，升为邵武路总管府。户六万四千一百二十七，口二十四

万八千七百六十一。领司一：

录事司。

县四：

邵武，中。倚郭。光泽，中。泰宁，中。建宁。中。延平路。下。宋南剑州，属福建路。至元十五年，升为南剑路总管府。延祐元年，改南剑路为延平路。户八万九千八百二十五，口四十三万五千八百六十九。领司一：

录事司。

县五：

南平，中。倚郭。宋剑浦县。延祐元年，改为南平。尤溪，中。沙县，中。顺昌，中。将乐。中。

汀州路。下。宋汀州，属福建路。至元十五年，升为汀州路总管府。户四万一千四百二十三，口二十三万八千一百二十七。领司一：

录事司。

县六：

长汀，中。倚郭。宁化，中。清流，下。宋旧县。绍定中废。至元中，复置。连城，下。宋莲城。至元中，改为连城。上杭，下。武平。下。

漳州路。下。宋漳州，属福建路。至元十八年，升为漳州路总管府。旧领龙溪、漳浦、龙岩、长泰四县。至治间，以龙溪、漳浦、龙岩三县地僻远难治，析其地置南胜县，后改南靖。户二万一千六百九十五，口十万一千三百六。屯田一

百五十顷。领司一：

录事司。

县五：

龙溪，下。倚郭。漳浦，下。龙岩，下。长泰，下。南靖，下。

江西等处行中书省，领路十、州，属州十三，属县七十六

江西湖东道肃政廉访司。

龙兴路。上。宋隆兴府，属江南西路。至元十二年，置行都元帅府及安抚司。十四年，改元帅府为江西道宣慰司，本路为总管府，置行中书省。十五年六月，并隆兴省于福建，其宣慰司，除额设员数外，余并罢去。七月，复以塔出等行中书省于赣州。十六年，移赣州行省还隆兴。十七年，又并泉州行省于隆兴。十九年，并江西、福建行省为一，罢宣慰司，隶皇太子位。十一月，以袁州、饶州、兴国军复隶隆兴省。二十一年，改隆兴路为龙兴路。二十七年，移行省于吉州。后复还本路。旧领南昌、新建、奉新、丰城、分宁、靖安、武宁、进贤八县。后升丰城县为富州，析武宁、分宁二县隶宁州，又以武宁还隶本路。户三十七万一千四百三十六，口一百四十八万五千七百四十四。至元二十七年钞数。领司一：录事司。宋分置九厢。至元十三年废城内六厢，置录事司。

县六：

南昌，上。倚郭。至元二十年，割录事司所领城外二厢、

东西两关来属。新建，上。倚郭。进贤，中。奉新，中。靖州，中。武宁，中。至元二十三年，置宁州，领武宁、分宁二县。大德五年，改武宁县隶本路。

州二：

富州。上。宋丰城县，隶隆兴府。至元二十三年，升为州。

宁州。中。至元二十三年，于武宁县置宁州，武宁为倚郭县。大德八年，析武宁，直隶本路。徙州治于分宁。领县一：

分宁。宋属隆兴府。至元二十三年，改隶宁州。

吉安路。上。宋吉州，属江南西路。至元十四年，升吉州路总管府。皇庆元年，改为吉安路。旧领庐陵、吉水、安福、太和、龙泉、永新、永丰八县。后升吉水、安福、太和、永新四县俱为州。至顺间，又析永新州地置永宁县。户四十四万四千八十三，口二百二十二万四百一十五。领司一：

录事司。

县五：

庐陵，上。倚郭。永丰，上。万安，中。龙泉，中。永宁，下。本永新县地。至顺间，分置永宁县。

州四：

吉水州。中。宋吉水县。元贞元年，升为州。

安福州。中。宋安福县。元贞元年，升为州。

太和州。下。宋太和县。元贞元年，升为州。

永新州。下。宋永新县。元贞元年，升为州。

瑞州路。上。宋瑞州，属江南西路。至元十四年，升瑞州路。旧领高安、上高、新昌三县。后升新昌县为州。户十四万四千五百七十二，口七十二万二千三百二。领司一：

录事司。至元十四年置。

县二：

高安，上。倚郭。上高。中。至正九年，罢本县长官司。

州一：

新昌州。下。宋太平兴国六年，析高安县地置新昌县。元贞元年，升为州。

袁州路。上。宋袁州，属江南西路。至元十三年，置安抚司。十四年，改总管府，隶湖南行省。十九年，改隶江西行省。旧领宜春、分宜、萍乡、万载四县。后升萍乡县为州。户十九万八千五百六十三，口九十九万二千八百一十五。领司一：

录事司。至元十三年，置兵马司。十四年，改录事司。

县三：

宜春，上。倚郭。分宜，上。万载。中。

州一：萍乡州。中。宋萍乡县。元贞元年，升为州。

临江路。上。宋临江军，属江南西路。至元十三年，隶江西行都元帅府。十四年，升临江路总管府。旧领清江、新淦、新喻三县。后升新淦、新喻二县为州。户十五万八千三百四十八，口七十九万一千七百四十。领司一：

录事司。宋隶都监司。至元十三年，置兵马司。十五年

改。

县一：

清江。上。倚郭。

州二：

新淦州。中。宋新淦县。元贞元年，升为州。

新喻州。中。宋新喻县。元贞元年，升为州。

抚州路。上。宋抚州，属江南西路。至元十四年，升抚州路总管府。户二十一万八千四百五十五，口一百九万二千二百七十五。领司一：

录事司。至元十四年，废宋三厢立。

县五：

临川，上。崇仁，上。金溪，上。宜黄，中。乐安。中。

江州路。下。宋江州，属江南西路。至元十二年，置江东西宣抚司，治江州。十三年，改为江西大都督府，隶扬州行省。十四年，罢都督府，置江州路总管府，隶龙兴行都元帅府。后置行中书省，本路直隶焉。十六年，改隶黄蘄等路宣抚司。二十二年，复隶行省。至正十六年，又改为宣慰司都元帅府。户八万三千九百七十七，口五十万三千八百五十二。领司一：

录事司。宋都监司。至元十二年，立兵马司。十四年改。

县五：

德化，中。瑞昌，中。彭泽，中。湖口，中。德安。中。

南康路。下。宋南康军，属江南东路。至元十四年，升南康总管，隶江淮行省。二十二年，改隶江西行省。旧领星子、都昌、建昌三县。后升建昌县为州。户九万五千六百七十八，口四十七万八千三百九十。领司一：

录事司。

县二：

星子，下。本路治所。都昌。下。

州一：

建昌州。下。宋建昌县。元贞元年，升为州。

赣州路。上。宋赣州，属江南西路。至元十四年，升赣州路总管府。旧领赣、安远、雩都、虔化、信丰、龙南、瑞金、兴国、会昌、石城十县。后升虔化县为宁都州，析龙南、安远二县隶之。升会昌县为州，析瑞金县隶之。户七万一千二百八十七，口二十八万五千一百四十八。领司一：

录事司。至元十五年立。

县五：

赣县，上。州治所。兴国，中。信丰，下。雩都，下。石城。下。元贞元年，以石天隶宁都。其复隶赣州年分阙。

州二：

宁都州。下。宋虔化县。后改宁都县。元贞元年，升为州。领县二：

龙南，下。以县在龙滩之南，故名。至元二十四年，并入信丰县。至大二年，复置。安远。下。至元二十四年，并入会昌县。至大二年，复置。

会昌州。下。宋会昌县。元贞元年，升为州。旧志：大德元年升宁都、会昌为州，并隶赣州路。大德乃元贞之误。

建昌路。下。宋建昌军，属江南西路。至元十四年，升为建昌路总管府。旧领南城、南丰、新城、广昌四县。后升南丰县为州，直隶行省。户九万二千二百二十三，口五十万三千三十八。领司一：

录事司。至元十四年，割南城置录事司。

县三：

南城，中。新城，中。广昌。中。

南安路。下。宋南安军，属江南西路。至元十四年，升南安总管府。十五年，析大庾县城之四坊，置录事司。十六年，废。户五万六百一十二，口三十万三千六百六十六。

领县三：

大庾，中。倚郭。南康，中。上犹。下。宋上犹县，又改南安。至元十六年，改永清。后复为上犹。

南丰州。下。宋南丰县，隶建昌军。至元十九年，升为州，直隶江西行省。户二万五千七十八，口一十二万八千九百。

广东道宣慰使司都元帅府。至元十五年置。

海北广东肃政廉访司。至元三十年，治广州。

广州路。上。宋广州，属广南东路。至元十三，内附。十

五年，置广州路总管府。三十年，升为上路。旧领南海、番禺、增城、怀集、清远、东莞、新会、香山八县，后怀集析属贺州。户十七万二百一十六，口一百二万一千二百九十六。领司一：

录事司。至元十六年置，以州之东城、西城、子城并番禺、南海二海县在城民户隶之。

县七：

南海，中。倚郭。番禺，下倚郭。东莞，中。增城，中。香山，下。新会，下。清远。下。宋清县。元改清远。

韶州路。下。宋韶州，属广南东路。至元十三年，内附。十五年，置韶州路总管府。分曲江县城西厢地及城外三厢置录事司。二十九年，罢录事司。三十年，分赣州行院官一员。旧领曲江、乐昌、翁源、仁化、乳源五县。翁源析属英德州。户一万九千五百八十四，口一十七万六千二百五十六。领县四：

曲江。中。延祐五年，并翁源县入之。乐昌，下。仁化，下。乳源。下。

惠州路。下。宋惠州，属广南东路。至元十六年，升惠州路总管府，置录事司。至元二十九年，罢录事司。户一万九千八百三，口九万九千一十五。领县四：

归善，下。倚郭。博罗，下。海丰，下。河源。下。

南雄路。下。宋南雄州，属广南东路。至元十五年，升南雄路总管府，置录事司。二十九年，罢录事司。户一万七

百九十二，口五万三千九百六十。领县二：

保昌，下。倚郭。至元二十七年，降南雄州为保昌县。按保昌宋旧县，非因降改，殆省本州入保昌也。其复为南雄州，未知何时。始兴。下。

湖州路。下。宋潮州，属广南东路。至元十六年，升湖州路总管府。二十三年，复以江西等处行院副使兼广东道宣慰使司，镇潮州。旧领梅州。延祐四年，以梅州隶广东宣慰司。户六万三千六百五十，口四十四万五千五百五十。领司一：

录事司。至元二十一年置。

县三：

海阳，下。倚郭。潮阳，下。揭阳。下。

德庆路。下。宋德庆府，属广南东路。至元十四年，广西宣慰司以兵收附，改隶广西道。十七年，置德庆路总管府。二十九年，仍改隶广东道。户一万二千七百五，口三万二千九百九十七。领县二：

端溪，下。倚郭。龙水。下。

肇庆路。下。宋肇庆府，属广南东路。至元十六年，广西宣司收附，改隶广西道。十七年，置为下路总管府。二十九年，改隶广东道。户三万三千三百三十八，口五万五千四百二十九。领县二：

高要，中。倚郭。四会。中。

英德州。下。宋英德府，属广南东路。至元十三年，收附。十五年，置英德路总管府。二十七年，罢总管府，并所属真阳、浚光二县为英德州。《翰墨全书》：元管真阳、浚光二县，今为新民员州。大德四年，复升为路，置真阳、浚光、翁源三县。延祐元年，复降为州，并真阳、浚光入之。领县一：翁源。大德五年置。延祐元年，并入曲江。其复立年分阙。

梅州。下。宋故州，属广南东道。至元十六年，升梅州路总管府。二十三年，降为州，属潮州路。延祐四年，改为散州，直隶宣慰司。户二千四百七十八，口一万四千八百六十五。领县一：

程乡。下。

南恩州。下。宋故州。至元十三年，升南恩总管府。十九年，降为散州。户一万九千三百七十三，口九万六千八百六十五。领县二：

阳江，下。阳春。下。

封州。下。宋故州。至元十三年收附。明年复叛，广西宣慰司定其乱，遂隶广西道。十七年，置封州路总管府。二十九年，降为散州，仍属东道，户二千七十七，口一万七百四十二。领县二：

封州，下。开建。下。

新州。下。宋故州，属广南东路。至元十六年，升新州路。十九年，降为散州。户一万一千三百一十六，口六万七千八百九十六。领县一：

新兴。下。

桂阳州。下。宋桂阳县，属连州。至元十九年，升为散州，析连州阳山县来属，为蒙古鴈忽都忽郡王分地。旧隶湖南道宣慰司，后复隶广东道。户六千三百五十六，口二万五千六百五十五。领县一：

阳山下。

连州。下。宋故州，属广南东路。至元十三年，置安抚司，直隶行中书省。十七年，罢安抚司，升为连州路，隶湖南道。二十九年，改隶广东道。元贞元年，降散州。户四千一百五十四，口七千一百四十一。领县一：

连山下。

循州。下。宋故州，属广南东路。至元十三年，升为循州路。二十三年，降散州。户一千六百五十八，口八千二百九十。领县三：

龙川，下。兴宁，下。长乐。下。

卷四十四

志第十八

地理六

湖广等处行中书省，领路三十二、府二、州十三、安抚司十五、军三、属州十五、属县一百四十二。蛮夷土官府州县等，不在此数。

江南湖北道肃政廉访司。

武昌路。上。宋鄂州，属荆州北路。至元十一年，归附，置安抚司。十四年，置湖北宣慰司，改安抚司为鄂州路总管府。十八年，移宣慰司于潭州。十九年，本路直隶行省。大德五年，以鄂州为世祖亲征之地，改武昌路。户一十一万四千六百三十二，口六十一万七千一百一十八。至元二十七年抄籍数。领司一：

录事司。至元十三年置。

县七：

江夏，中。倚郭。咸宁，下。嘉鱼，下。蒲圻，中。崇阳，中。通城，中。武昌。下。宋武昌县，升为寿昌军，后复为县，又再为军。至元十四年，升散府。大德五年，裁府，仍改县为武昌。

岳州路。上。宋岳州，属荆湖北路。至元十三年，升岳州路总管府。旧领巴陵、华容、平江、临湘四县。元贞元年，升平江为州。户一十三万七千五百八，口七十八万七千七百四十三。领司一：

录事司。

县三：

巴陵，上。倚郭。临湘，中。华容。中。

州一：

平江州。下。宋平江县。元贞元年，升平江县。常德路。上。宋常德府，属荆湖北路。至元十二年，置安抚司。十四

年，改常德路总管府。十五年，置荆湖北道宣慰司于本路。未几罢。旧领武陵、桃源、龙阳、沅江四县。元贞元年，升桃源、龙阳为州，又析沅江县隶龙阳。户二十万六千四百二十五，口一百二万六千四百二。领司一：

录事司。

县一：

武陵，上。

州二：

桃源州。中。宋桃源县。元贞元年，升为州。

龙阳州。下。宋龙阳县，改辰阳，又复旧。元贞元年，升为州。领县一：

沅江。下。

澧州路。上。宋澧州，属荆湖北路。至元十四年，置安抚司。十四年，改澧州路总管府。延祐三年，又改为安定军民府。旧领澧阳、安乡、石门、慈利四县。元贞元年，升慈利为州。户一十万九千九百八十九，口一百一十一万一千五百四十三。领司一：

录事司。

县三：

澧阳，上。倚郭。至正十六年，倪文俊陷澧阳，元帅孙毅迁县治于新城。石门，上。安乡。下。

州一：

慈利州。中。宋慈利县。元贞元年，升为州。

土州二：

安定州。

柿溪州。

辰州路。下。宋辰州，属荆湖北路。至元十四年，升辰州路总管府。户八万三千二百二十三，口十一万五千九百四十五。领县四：

沅陵，中。辰溪，下。卢溪，下。叙浦。下。

土州二：

上溪州。

施容州。二州皆溪洞地，元初置。沅州路。下。宋沅州，属荆湖北路。至元十二年，置沅州安抚司。元贞元年，升沅州路总管府。户四万八千六百三十二，口七万九千五百四十五。领县三：

卢阳，下。黔阳，下。麻阳。下。兴国路。下。宋兴国军，属江南西路。至元十四年，升为兴国路总管府。旧隶江西行省。至元三十年，改隶湖广。户五万九百五十二，口四十万七千六百一十六。领司一：

录事司。至元十七年置。

县三：

永兴，下。倚郭。大冶，下。通山。下。

汉阳府。下。宋汉阳军，属荆湖北路。至元十年，宋守将王仪以城降。十四年，升为府。至元二十九年，割湖广省之汉阳隶河南省。其还隶本省年分阙。户一万四千四百九十二，口四万八百六十六。领县二：

汉阳。至元二十年，升中县。有阳罗堡。至元十六年，改隶鄂州路。寻复旧。

汉川。下。旧治大赤。至正二十二年，移治长城乡。《翰墨全书》：“汉阳、汉川二县，俱隶岳州路。”至元十二年，取岳州。十四年，己置汉阳府，不容隶岳州为县。今不取。

归州。下。宋故州，属荆湖北路。至元十二年，置安抚事。十四年，升归州路总管府。十六年，降为州。至正十五年，改隶四川行省。户七千四百九十二，口一万九百六十四。领县三：

秭归，下。倚郭。巴东，下。兴山。下。靖州路。下。宋靖州，属荆湖北路。至元十二年。置安抚司。元贞元年，沅州升为路，以靖州隶之。延祐四年，升靖州路总管府。后至元四年，以湖广行省元领新化洞，古州潭溪、龙里，洪州诸洞来属。九年，罢总管府，改立靖州军民安抚司。户二万六千五百九十四，口六万五千九百五十五。领县三：

永平，下。会同，下。通道。下。

湖南道宣慰司都元帅府。至元十五年，置治衡州。十八年，移治潭州。至正十年，以宣慰使司兼都元帅府。岭北湖南道肃政廉访司。天临路。下。宋潭州，属荆湖南路。至元十三年，置安抚司。十四年，改潭州路总管府。十六年，迁行省于鄂州，湖南道宣慰司治潭州。天历二年，以潜邸所幸，改天临路。旧领长沙、湘潭、益阳、湘阴、醴陵、浏阳、攸、衡山、安化、湘乡、宁乡、善化十二县。元贞元年，升醴陵、浏阳、攸、湘乡、湘潭、益阳、湘阴并为州。户六十万三千五百一，口一百八万一千一十。领司一：

录事司。宋置兵马司。至元十四年改。县五：

长沙，上。倚郭。善化，上。倚郭。衡山，上。宋改属衡州，后又属潭州。元初因之。后又改属衡州。宁乡，上。安化，下。

州七：

醴陵州。中。宋醴陵县。元贞元年，升为州。

浏阳州。中。宋浏阳县。元贞元年，升为州。元初迁州治于居仁镇。

攸州。中。宋攸县。元贞元年，升为州。

湘潭州。下。宋湘潭县。元贞元年，升为州。

益阳州。中。宋益阳县。元贞元年，升为州。

湘阴州。下。宋湘阴县。元贞元年，升为州。

衡州路。上。宋衡州，属荆湖南路。至元十三年，置安抚司。十四年，改衡州路总管府。旧领衡阳、茶陵、耒阳、常宁、安化、酃六县。至元十九年，升茶陵、常宁、耒阳为州。后至元二年，分衡阳界置新城县。户一十万三千三百七十三，口二十万七千五百二十三。领司一：

录事司。宋立兵马司，分城中民户为五厢。至元十三年改置。

县四：

衡阳，上。倚郭。安仁，下。酃县，下。宋隶茶陵军。元初改隶本路。新城，下。旧为衡阳东乡，后析置。

道州路。下。宋道州，属荆湖南路。至元十三年，置安抚司。十四年，改道州路总管府。户七万八千一十八，口一十万九百八十九。领司一：

录事司。

县四：

营道，中。倚郭。宁远，中。江华，中。元统二年，立涛墟巡检司。永明，下。旧治在潇水南。元初移今治。元统二年，立白面墟巡检司。

永州路。下。宋永州，属荆湖南路。至元十三年，置安抚司。十四年，改永州路总管府。户五万六千六百六十六，口一十万五千八百六十四。领司一：

录事司。

县三：

零陵，上。倚郭。东安，上。祁阳，中。郴州路。下。宋郴州，属荆湖南路。至元十三年，置安抚司。十四年，改郴州路总管府。户六万一千二百五十九，口九万五千一百一十九。领司一：

录事司。宋置兵马司。至元四年改。

县六：

郴阳，中。倚郭。宋郴县。至元十三年，改郴阳县。宜章，中。永兴，中。兴宁，下。宋资兴县，后改兴宁。桂阳，下。桂东，下。宋析桂阳置桂东县，治上犹寨。

全州路。下。宋全州，属荆湖南路。至元十三年，置安抚司。十四年，改全州路总管府。户四万一千六百四十五，口二十四万五百一十九。领司一：

录事司。宋置兵马司。至元十五年改。

县二：

清湘，上。倚郭。灌阳。下。宝庆路。下。宋邵州，升宝庆府，属荆湖南路。至元十二年，置安抚司。十四年，改宝庆路总管府。至正十一年，置湖南元帅府，分府宝庆。户七万二千三百九，口一十二万六千一百五。领司一：

录事司。

县二：

邵阳，上。倚郭。新化。中。

武冈路。下。宋武冈军，属荆湖南路。至元十三年，置安抚司。十四年，改武冈路总管府。户七万七千二百七，口三十五万六千八百六十三。领司一：

录事司。宋置兵马司。至元十五年改。

县三：

武冈，上。倚郭。宋旧县，后废。元复置。新宁，下。宋废武冈县，置新宁于水头江北。元因之。绥宁。下。宋蒨竹县，属邵州。后改隶本路。

桂阳路。下。宋桂阳军，属荆湖南路。至元十二年，置安抚使。十四年，改桂阳路总管府。户六万五千五十七，口一十一万二千二百四。领司一：

录事司。

县三：

平阳，上。临武，中。蓝山。下。

茶陵州。下。宋茶陵县，属衡州，后升县为军，复为县。

至元十九年，升为州。户三万六千六百四十二，口一十七万七千三百二。

耒阳州。下。宋耒阳县，属衡州。至元十九年，升为州。户二万五千三百一十一，口一十一万一千。

常宁州。下。宋常宁县，属衡州。至元十九年，升为州。户一万八千四百三十一，口六万九千四百二。

广西两江道宣慰使司都元帅府。至元十四年，置广西道宣抚司。是年，改宣慰司。元贞元年，并左右两江宣慰司为广西两江道宣慰司，仍分司邕州。至正二十三年，改广西等处行中书省。

岭南广西道肃政廉访司。

静江路。上。宋静江府，属广南西路。至元十五年，升静江路总管府。至正二十三年，置广西等处行中书省。户二十一万八百五十二，口一百三十五万二千六百七十八。领司一：

录事司。

县十：

临桂，上。倚郭。兴安，下。灵川，下。理定，下。宋迁治上津驂。元初又迁治上权塘。义宁，下。修仁，下。荔浦，下。阳朔，下。宋旧县。《宋史·地理志》漏之。永福，下。古县，下。

南宁路，下。宋邕州，属广南西路。至元十三年，置安

抚。司十六年，改邕州路总管府，兼左右两江溪洞镇抚。泰定元年，改南宁路。旧领丹行等处长官司，后废。户一万五百四十二，口二万四千五百二十。领司一：

录事司。

县二：

宣化，下。武缘。下。

梧州路。下。宋梧州，属广南西路。至元十四年，置安抚司。十六年，改梧州路总管府。户五千二百，一万九百一十。领县一：

苍梧。下。

浔州路。下。宋浔州，属广南西路。至元十三年，置安抚司。十六年，改浔州路总管府。户九千二百四十八，口三万八十九。领县二：

桂平，下。平南。下。宋属龚州，绍兴中州废，以县隶本州。

柳州路。下。宋柳州，属广南西路。至元十三年，置安抚司。十六年，改柳州路总管府。户一万九千一百四十三，口三万六百九十四。领县三：

柳城，下。倚郭。旧治龙江。元初移治龙江东。马平，下。宋柳州，治马平。元初徙治柳城。洛容。下。

庆远南丹溪洞等处军民安抚司。宋为庆远府，属广南西

路。至元十三年，置安抚司。十六年，改庆远路总管府。大德元年，并南丹州安抚司为庆远南丹溪洞等处军民安抚司。户二万六千五百三十七，口五万二百五十三。领县六：

宜山，下。忻城，下。天河，下。思恩，下。河池，下。荔波，下。宋荔波州。元初，降为县。

土州四：

南丹州。宋元丰三年置，管辖诸洞蛮酋。元初置安抚司，后并入庆远。旧领丹平等处蛮夷长官司，后废。

东兰州。宋兰州，命土人韦氏为知州。元初，改东兰州。

那州。蛮徭所居，旧名那地。宋置那州。元初因之。

地州。宋故州，又析置孚州，后省。元初因之。

平乐府。宋昭州，属广南西路。大德五年，升为平乐府。户七千六十七，口三万三千八百二十。领县四：

平乐，下。倚郭。恭城，下。立山，下。龙平，下。

郁林州。下。宋故州，旧治兴业县，后徙治南流，属广南西路。至元十四年，仍行州事。户九千五十三，口五万一千五百二十八。领县三：南流，下。倚郭。兴业，下。博白，下。

容州。下。宋故州，属广南西路。至元十三年，置安抚司。十八年，改容州路总管府。大德五年，降散州。户二千八百九，口七千八百五十四。领县三：

普宁，下。北流，下。陆川，下。

象州。下。宋故州，属广南西路。至元十三年，置安抚司。十五年，改象州路总管府。大德五年，降散州。户一万九千五百五十八，口九万二千一百二十六。领县三：

阳寿，下。来宾，下。武仙，下。

宾州。下。宋故州，属广南西路。至元十三年，置安抚司。十六年，改宾州路总管府。大德五年，降散州。户六千一百四十八，口三万八千八百七十九。领县三：

岭方，下。倚郭。上林，下。宋旧属邕州，后来属。迁江。下。

横州。下。宋故州，属广南西路。至元十三年，置安抚司。十六年，改横州路总管府。大德五年，降散州。户四千九百四十八，口三万一千四百七十六。领县二：

宁浦，下。倚郭。永淳。下。宋永安县，后改永淳。

融州。下。宋故州，属广南西路。至元十四年，置安抚司。十六年，改融州路总管府。二十三年，降散州。户二万一千三百九十三，口三万九千三百三十四。领县二：

融水，下。怀远。下。

藤州。下。宋故州，属广南西路。至元十三年，仍行州事。户四千二百九十二，口一万一千二百一十八。领县二：

谭津，下。倚郭。岑溪。下。

贺州。下。宋故州，属广南东路，后改属西路。至元十三年，仍行州事。户八千六百七十六，口三万九千二百三十五。领县四：

临贺，下。倚郭。富川，下。桂岭，下。怀集。下。宋属广州。至元十五年，改隶本州。

贵州。下。宋故州，属广南西路。元初因之。旧领郁林县，大德九年废县，止行州事。户八千八百九十一，口二万八百一十一。

田州上思等处宣抚使司都元帅府。

左右两江溪洞。至元二十八年，置左右两江宣慰司都元帅府。元贞元年罢。

思明路。宋思明州，属邕州永平寨。至元二十三年，置思明路。户四千二百二十九，口一万八千五百一十。领土州七：

上思州。宋故州，属邕州，迁隆寨。元初，改隶本路。泰定元年，黄胜许致仕，其子志熟袭为上思州知州。

志明州。宋故州，属迁隆寨。元初，改隶本路。

禄州。宋故州，属邕州永平寨。元初，改隶本路。领县一：

武黎。

西平州。宋故州，属永平寨。元初，改隶本路。

思明州。宋故州，属永平寨。元初，改隶本路。天历二年，思明州土官黄思永贡方物。

上石西州。宋故州，属永平寨。元初，改隶本路。

下石西州。宋分石西州为上、下二州。元初，改隶本路。

江州。宋故州，属古万寨。元初，改隶本路。领县一：

罗自。《翰墨全书》思明路有忠州，领县一：宁福，又有遇隆州。当为大德后所省并。

太平路。宋平岭南，于左右二江溪洞立五寨，其一曰太平寨，与古万、迁隆、永平、横山四寨各领洞溪州县，属邕州。元初，仍为五寨。后废，置太平路于丽江，以控制左江

溪洞州县。户五千三百一十九，口二万二千一百八十六。领县四：

陀陵，宋旧名骆驼县，后改名，隶古万寨。崇善，宋旧县，隶古万寨。永康，宋旧县，隶迁隆寨，后升为州。罗阳。宋名福川县，后改隶迁隆寨。

土州十六：

太平州。旧名瓠阳，为西原农峒地。唐波州。宋为太平州，隶太平寨。元初，改隶本路。

思诚州。本西原地。宋分上思诚、下思诚二州。至元中，并为一，隶太平寨。元初，改隶本路。

安平州。旧名安山，亦唐波州地。宋置安平州，隶太平寨。至元十四年，知州李惟屏以所属溪洞来附。

养利州。宋故州，隶太平寨。

万承州。旧名万阳。唐置万阳、万杉二州。宋省为一州，隶太平寨。

左州。旧名左阳。宋故州，隶古万寨。

全茗州。旧名连冈谷，西原地。宋置州，隶邕州。

镇远州。旧名古陇，宋置州。

思同州。旧名永宁，为西原地，宋置州。

茗盈州。宋故州。泰定三年，全茗州土官许文寇茗盈州。

龙英州。宋龙英洞，隶太平寨。元初，升为州，省上怀思州入之。

结安州。旧名营周，亦西原地。宋置结安洞，隶太平寨。元初，升为州。

结伦州。宋结伦洞，隶太平寨。元初，升为州。

都结州。宋都结洞，隶太平寨。元初，升为州。

上、下冻州。旧名冻江，宋置冻州，隶太平寨。元初，分上冻、下冻二州，隶本路。寻合为一，改隶龙州。

田州路军民总管府。宋田州，隶邕州横山寨。元初，升田州路。户一千九百九十一，口一万六千九百一。领县一：上林。

土州七：

上隆州。宋故州，隶横山寨。元初，改隶本路。

恩诚州。宋故州，隶横山寨。元初，改隶本路。

归德州。宋故州，隶横山寨。元初，改隶本路。

果化州。宋故州，隶横山寨。元初，改隶本路。

泗城州。宋故州，隶横山寨。元初，改隶本路。

向武州。宋故州，隶横山寨。元初，改隶本路。

领县一：

富劳。

都康州。宋故州，隶横山寨。元初，改隶本路。

军民府一：

思恩军民府。宋隶邕州迁隆镇。元初，改隶本路。

利州，宋故州，隶邕州横山寨。元初，改隶本路。

奉议州。宋故州，隶广西行省安抚司。元初，隶广西两江道宣慰司。

龙州。宋故州，隶太平寨。元初，改太平路。大德中，升为龙州万户府。王圻《续通考》田州路下有思恩府，功饶、怀德、婪凤、兼下、隆武、龙归、朝归、辰等州，罗波、船带、唐兴、强山、咸德、永宁、都阳、古带、南海、武林、顺阳、

华阳等县。与《翰墨全书》合，疑亦大德后所裁并。

来安路军民总管府。宋来安军。至元十三年，知来安军李维屏、知来安军兼知冻州事岑从义降，升为来安路。《续通考》来安路有程县、上林长官司、安隆长官司、罗博州、俟州、龙川州、安德州、归仁州、乐归州、顺隆州、昭假州、训州、路城州。《翰墨全书》又有七源州、唐兴州、回城州。延祐六年，来安路总管岑世兴叛，据唐兴州。

镇安路军民总管府。宋镇安洞，置右江军民宣抚司。元初，改为镇安路。至元十八年，召镇安州岭从毅入覲。二十九年，从毅始降，以老疾，诏其子斗荣袭佩虎符，为本路军民总管。

海北海南道宣慰司都元帅府。

海北海南道肃政廉访司。至元三十年，置。后罢。大德三年，复置。

雷州路。下。宋雷州，属广南西路。至元十五年归附，置安抚司。十七年，为海北海南道宣慰司治所，改安抚司为雷州路总管府，隶宣慰司。户八万九千五百三十，口一十二万五千三百一十。领县三：

海康，中。徐闻，下。遂溪，下。

化州路，下。宋化州，属广南西路。至元十五年，置安抚司。十七年，改化州路总管府。户一万九千七百四十九，口五万二千三百一十七。领县三：

石龙，下。吴川，下。石城。下。

高州路。宋高州，属广南西路。至元十五年，置安抚司。十七年，改高州路总管府。户一万四千六百七十五，口四万三千四百九十三。领县三：

电白，下。茂名，下。信宜。下。

钦州路。下。宋钦州，属广南西路。至元十五年，置安抚司。十七年，改钦州路总管府。户一万三千五百五十九，口六万一千三百九十三。领县二：

安远，下。倚郭。灵山。下。宋钦州治此。元初，徙治安远。

廉州路。下。宋廉州，属广南西路。至元十七年，升廉州路总管府。户五千九百九十八，口一万一千六百八十六。领县二：

合浦，下。倚郭。石康。下。

乾宁军民安抚司。宋琼州，属广南西路。至元十五年，隶海北海南道宣慰司。元统二年，以潜邸所幸，改乾宁军民安抚司。户七万五千八百三十七，口一十二万八千一百八十四。领县七：

琼山，下，倚郭。澄迈，下。临高，下。文昌，下。乐舍，下。会同。下。至元二十九年，敕以海南新附四州洞寨五百一十九，民二万余户置会同、定安二县，隶琼州。按王圻《续通考》，至元三十年析乐舍县置会同，二十九析琼山置

定安。疑误也。定安。下。天历二年，升为南康州。

南宁军。宋昌化军，又改南宁军，属广南西路。至元十五年，隶海北海南道宣慰司。户九千六百二十七，口二万三千六百五十二。领县三：

宜信，下。昌化，下。感恩。下。

万安军。下。宋万安州，改为军，属广南西路。至元十五年，隶海北海南道宣慰司。户五千三百四十一，口八千六百八十六。领县二：

万安：下。倚郭。陵水。下。

吉阳军。下。宋朱厓军，后废为县，又复为吉阳军，属广南西路。至元十五年，隶海北海南宣慰司。户一千四百三十九，口五千七百三十五。领县一：

宁远。下。

八番顺元等处宣慰司都元帅府。《经世大典》：顺元诸蛮，又名亦奚卜薛。至元十五年，罗殿国主罗阿察、河中府方蕃主韦昌盛皆纳土。十六年，西南八番等同卧龙番主龙昌顺、大龙番主龙延三、小龙番主龙延万、武盛军番主程延随、遏蛮军番主龙罗笃、太平番主石延贤、永顺军番主洪延畅、静海军番主卢延陵皆来降。其部曲有龙文貌、龙文求等，朝廷立八番宣慰司以统之。至元十六年，潭州行省招降西南诸番洞寨一千六百二十有六、户十万一千一百六十有八，西南五番千一百八十六寨、户八万九千四百，又西南番三百一十五寨、大龙番三百六十寨。二十二年，改隶西川行省。二十六年，置八番、罗甸二宣慰司，隶四川行省。是年，改隶湖广行省。二十八年，复隶四川。是年，析八番洞蛮隶湖广。二十九年。又

以罗甸宣慰司隶云南。是年，合八番、罗甸二宣慰司都元帅府为一，改八番顺元等处宣慰司都元帅府。三十年，复改隶湖广行省。至治二年，置八番军民安抚司，改长官所二十有八为州县。

罗番遏蛮军安抚司。唐番酋龙应召之后，世据罗番。至元十六年，归附。

程番武胜军安抚司。唐末程元龙平溪洞，世据程番。至元十六年，归附。

金石番太平军安抚司。唐番酋石宝之后。至元十六年，归附。

卧龙番南宁州安抚司。唐番酋龙德寿之后。至元十六年，归附。

小龙番静蛮军安抚司。唐番酋龙方灵之后。至元十六年，归附。

大龙番应天府安抚司。唐番酋龙昌宗之后。至元十六年，归附。

洪番永盛军安抚司。至元十六年，归附。

方番河中府安抚司。唐番酋方德恒之后，以征讨九蛮授土官。至元十六年，归附。

卢番静海军安抚司。唐番酋卢君聘之后。至元十六年，归附。以上二十一年并授安抚使怀远大将军，佩虎符。

韦番蛮军民长官。唐番酋辛四海之后。按大小龙番合为一部，故曰八番方番之长。韦氏又析其族，分设长官与卢番同。

木爪狍狍蛮军民长官。元初，番酋石朝玺归附，设长官司。木爪狍狍，亦作水东狍狍。此金石番之分族。

卢番蛮军民长官。又作签卢番。

安远府。至元二十九年，析卢番安抚司西北境，置八番宣慰司；抚定光兰诸州洞蛮，置定远府，领桑州。至元二十七年，桑州总管黄布蓬，那州长罗光寨安，郡州长闭光过内附。

章龙州。

必化州。宋宝化州，讹必化。

小罗州。

思同州。《翰墨全书》有安庆州、东滦州、曾州、知山州、那州、郡州、洪池州、龙里州。

朝宗县。

上桥县。又作上马桥。唐番酋方定远授土官，历宋，至元初因之。

新安县。

麻峡县。

小罗县。

章龙县。

岛山县。

华山县。

都云县。

罗博县。《翰墨全书》又有会朝县、必际县、鸭水县、高县、伯纳县、龙里县。疑大德后所裁并。

管番民总管府。至元二十一年，罢西南番安抚司，置总管府。二十五年，改隶四川行省。按番族甚多，八番设安抚司，又别立定远府及管民总管府以统之。领：

小程番。以下各设蛮夷长官。

独塔等处。

客当客地。又作各营各迪。

天台等处。

梯下。

党兀等处。

勇都、朱砂、古筑等处。《翰墨全书》：“金竹府所辖蛮夷长官曰：勇都朱砂古筑等处，大小化等处，浴甲洛屯等处，低当低界等处，百眼佐等处，独石寨，重州，阿孟州，上龙州，峡江州，罗赖州，乘州，向州，阿岛州，罗邦州。”多为管番民官总管府辖地，附著以备参考。

大小化等处。

浴甲洛屯等处。

低当低界等处。

独石寨。

百眼佐等处。至治二年，百眼等处蛮夷长官司言：康佐寨王等杀巡检王忠以叛，宣慰司讨平之。

罗来州。

那历州。

重州。宋勛州，废为重州长官司。

阿孟州。

上龙州。本桑州上隆寨，元初置上龙州，后降为长官司。

峡江州。

罗赖州。木爪狍猪地。

桑州。至元二十九年，斡罗斯招抚桑州生苗，诣关贡献。

白州。

北岛州。

罗那州。

龙里等寨。

六寨等处。

帖狍猪等处。

木当三寨等处。

山斋等处。即山寨之讹。

羨塘带灾等处。

都云桑林独立等处。

六洞柔远等处。

竹古弄等处。至元二十七年，金竹府土官言：招降竹古弄、古鲁花等处三十余寨。

中都云板水等处。

金竹府。唐蛮酋金密定，授金竹寨土官。至元二十六年，

改四川金竹寨为金竹府。二十七年，置金竹府大隘等处四十二寨蛮夷长官。二十九年，金竹知府臊驴言：“招谕平岱山斋寨主，今有百眼佐阿冒谷各营各迪等久欲内附。”招从之。

都云军民府。至元二十八年，洞蛮烂土立定云府。后至元元年，平伐都去定云酋长等来降，即其地复立宣抚司。《翰墨全书》：都云定云安抚司所辖军民官，曰万朝平坝焦溪江水望城等处，吴黎当溪等处，中都云板水等处，大洞干真等处，李殿李稍等处，上都云等处，八千寨楼等处，丹竹杨西等处，上官溪厓斗厓尾铜鼓等处，黎波重端等处，周色竹明等处，上水洞等处，平珠平驼等处，所辖蛮夷长，曰安化洞长官，安化中州等处，卯雄中团等处，曰安化下州只隆思丹归仁各丹五寨长官，曰铜人大小江等处古州八万等处，容江八黄等处，十利合水等处，新化等处，宝安等处，湖耳洞提溪等处，省溪等处，务溪等处，董寨等处，万灰等处，平岳溪等处，施溪等处，武龙潭溪皮林铜左五开赖寨地西七洞邦厓等处。其中都云板水、李殿李稍等地名，已见上下文，附著以备参考。

万平等处。

南宁丹州。至元二十九年，谕平伐等部诏书：南顺丹州北怀金竹。旧志州误竹。

陈蒙烂土等处。至元二十六年，中下烂土等处洞长忽带等，以洞三百寨一百一十来降。二十八年，改陈蒙洞为陈蒙州。二十九年，置陈蒙烂土军民安抚司。

李稍李殿等处。

阳安等处。

八千蛮。

恭焦溪等处。

都镇。又作都镇马乃等处。

平溪等处。

平月。

李厓。

阳并。

卢山等处。

乖西军民府。皇庆元年置。二年，又隶播州宣抚司。

上都云等处。《明一统志》：上都云等处、中都云板水等处，并元置。

顺元等路军民安抚司。至元二十年，讨平四川九溪十八洞，大处为州，小为县，分立总管府，听顺元路宣慰司节制。宣慰司改安抚司年分阙。二十八年，改隶湖广行省。

雍真乖西葛蛮等处。唐蛮酋杨立信之后。皇庆元年，改乖西等处军民府，隶播州宣慰司。

葛蛮雍真等处。大德五年，葛蛮雍真土官宋隆济叛。七年，讨平之。

曾竹等处。大德七年，顺元同知宣抚事宋阿重，尝为曾竹蛮夷长官，以其叔宋隆济叛，上言宜深入乌撒、乌蒙。至水东，招木楼苗，擒隆济以献。

龙平寨。王圻《续文献通考》作把平寨，《明一统志》同。

骨龙等处。《经世大典》作龙骨长官。蛮酋宋国，以征南功，授土官。

底寨等处。唐蛮酋蔡氏，以讨黑羊功授底寨土官，子孙

世据其地。宋隆济反，达鲁花赤也思干避于底窝扬若寨，即底寨。

茶山百纳等处。

纳坝紫江等处。唐紫姜县，后讹江。至元二十九年，安抚使宋子贤招谕平伐大瓮眼、紫江、皮陵、潭溪、九堡等处蛮夷，皆降。

磨波雷波等处。

漕尼等处。

青山远地等处。至元二十六年，青山苗以不莫台卑包等三十三寨内附。

木窝普冲普泥等处。

武当等处。

养龙坑宿征等处。唐番酋蔡崇隆，以征九洞革老，授养龙土官。

骨董龙里清江木楼瓮眼等处。

高桥青塘鸭水等处。

落邦札佐等处。大德五年，猺獠阿斛寨，去落邦札佐长官司十里。

平迟安得等处。

六广等处。

贵州等处。

施溪样头朵泥等处。宋丹川县。

水东寨。

市北洞。

平月。

中曹百纳等处。又作中嵯。旧志管番民总管府下。复出中嵯百纳及底窝紫江瓮眼纳八二处，今删。

龙里寨。《明一统志》：“龙里长官司与湖耳洞、亮寨、欧阳、新化、中林验洞、示溪喃洞六长官司，均元置，隶思州宣抚司。”湖耳等四寨，均见思州安抚司下，惟中林验洞不见旧志。

思州军民安抚司。宋思州。元置安抚思，原辖：乐敦洞、上黎平、水从、潭溪、八丹、洪州、曹滴、古州、新化、湖耳、亮寨、欧阳十二长官司。至元十八年，改安抚司为宣慰司，兼管内安抚使，自龙泉坪徙司治于清江。二十一年，省宣慰司，以思、播二州隶顺元路宣慰司。后复置。二十九年，改思州宣慰司为军民安抚司，领婺川县。宋务川县，所属蛮夷洞官曰：明溪甘细瓮甸古州八万龙团横坡得明地野新坑欧阳

镇远府婺州楠木洞。至元二十一年，白厓洞、楠木洞蛮侵辰州，讨平之，立为一府、九州。镇远府当置于此。厓白为施溶州，亦此时。

古州八万洞。宋镇远州。至元十八年，置镇远沿边溪洞招讨司。二十年。立总管府，以五开洞属之。至治二年，府废，五开洞改为上黎平长官司。

偏桥中寨。宋蛮酋安崇诚，以功授偏桥长官司。至元二十年，来附。

野鸡坪德胜寨。

偏桥四甲等处。

思印江等处。元初，蛮酋张恢以功授印江长官司。

石千等处。

晓爰泸洞赤溪等处。又作亦溪喃洞。

卑带洞大小田等处。

黄道溪。宋丹阳县。元为鸡坪黄道溪地。

省溪坝场等处。

金容金远等处。镇远府附郭。元初，置镇安县。寻又改安夷县。后改金容金远及杨溪公俄两长官司。

台蓬若洞住溪等处。思州附郭。

洪安等处。

葛章葛商等处。

平头著可通达等处。

溶江芝子坪等处。

亮寨。

沿河。

龙泉平。思州旧治龙泉平，及火，其城移治清江。至元十七年，敕安抚事还旧治。蛮酋张坤元，以功授龙泉坪长官司。

祐溪。

水特姜。

杨溪公俄等处。镇远府附郭。

麻勇洞。

恩勒洞。

大万山苏葛办等处。元初，蛮酋田谷以功授大万山长官司。

五寨铜人等处。

铜人大小江等处。初隶都云都安抚司，后改隶思州。

德明洞。

乌罗龙干等处。唐蛮酋杨通禄，以功授乌罗长官司。

西山大洞等处。

秃罗。

浦口。

高丹。宋蛮酋何永寿，以功授高丹洞长官司。

福州。

永州。

迺州。

奎州。

程州。

三旺州。

地州。

忠州。

天州。

文州。

合凤州。

芝山州。

安习州。

茆薤等团。

苏枝安化上中下蛮。

曹滴等洞。

洛卜寨。

麦著土村。亦曰麦著黄洞。

衙迪洞。

会溪施容等处。

感化州等处。

契锄洞。

腊惹洞。

劳岩洞。

驴迟洞。

来化州。

客团等处。

中古州。

乐墩洞。后至元四年，古潭溪龙里洪州诸洞三百余处洞民六万余户，分隶清州、中古州、洪州，均隶思州安抚司。龙里则隶管民总管府。至治二年，置中古州乐墩洞长官司。

上里坪。即上黎平。至元二十年，立古州八万军民总管府。至治二年，改总管府为上黎平长官司。

洪州泊李等洞。《明一统志》：洪州泊里与潭溪蛮夷长官司、八丹蛮夷长官司，俱宋置军民长官司，元因之。

张家洞。

朗溪洞。

旋秉前江等处。至元二年置。

提溪等处。

石阡等处。元初，蛮酋杨九龙，以功授石阡副长官司。

欧阳寨。

新化。

湖耳洞。

溶江芝子平茶。

溶江芝麻子平。《翰墨全书》又有晓隘坡德明上甲寨德牙松明洞小江西庄寨毛栅等处，金容金洞等处，葛安葛齐等处。

沿边溪洞宣慰使司。宋蛮酋田二凤，以功授沿边溪洞军民宣抚司，子孙世袭其职。元初改宣慰司。

播州军民安抚司。宋播州安抚司，本隶四川省。至元十六年，改播州为播南路。二十八年，从播州万户杨汉英之请，以播州等处管军万户杨汉英为绍庆、珍州、南平等处宣慰使，行播州军民宣抚使，播州等处管军万户。二十九，改隶湖广行省，领播州军民都镇抚司。播州宣慰使杨鉴降明，所领安抚司二：曰草塘，曰黄平。是黄平、草塘二处俱设安抚司。旧志略。所领长官民事六。曰真州，即珍州，曰播州，曰余庆，曰白泥，曰容山，曰重安。惟重安不见旧志。

播川县。附郭。宋鼎山县。至元十五年，以鼎山仍隶播州。十六年改鼎山为播川县。

黄平府。至元二十八年置。至治三年，罢播州长官所，徙其民隶黄平府。

平溪上塘罗骆家等处。

水车等处。

石粉罗家永安等处。

锡乐平等处。

白泥等处。元初，蛮酋杨正宝，以功授泊泥司副长官。

南平綦江等处。宋以南川县铜佛顶地，置南平军。

珍州思宁等处。唐之播川镇。后改镇为珍州。至正末，改为真州。

水烟等处。

漆洞涪洞等处。宋废漆州漆溪寨。

洞天观等处。

葛浪洞等处。

赛坝垭黎焦溪等处。

小孤单张倒柞等处。

乌江等处。

旧州草塘等处。

恭溪沓洞水囤等处。

平伐月石等处。

下坝。

寨章。

横坡。

平地寨。

寨劳。

寨勇。

上塘。

寨坦。

喀奔。

平模。

林种密秀。

洞河祐溪等处。元初，蛮酋张坤义以功授沿河祐溪长官司。

余庆州。唐蛮酋毛巴，以功授余庆州刺史，子孙世有其地。

容山等处。《翰墨全书》：洪溪马峡等处，清江、中平、三都、望浦、仁怀、古磁、俱隶播州军民安抚司。

新添葛蛮军民安抚司。唐蛮酋宋景阳以功授大万谷落总管，子孙世有其地。至元二十八年来降，置安抚司。大德元年，授葛蛮驿券一。南宋时，蛮酋宋永高攻麦新城蛮，克之，改曰新添城，别号新添，为遏蛮军。后又讹为葛蛮。

南渭州。宋羁縻州，属荆湖路。元初属新添葛蛮安抚司。

落葛谷鸛桥等处。自落葛谷鸛等处至麦傲，《翰墨全书》皆为八番顺元宣慰司所属。

昔不梁骆拓密约等处。又作骆杯密约。有洛白河，骆拓即洛白。

乾溪吴地等处。

啖耸古平等处。宋隆济作乱，自贵州至新添界啖耸波瓮城都朵等处，都朵又作都桑。

都镇马乃等处。

坪普乐重壩等处。又作落重顿。

落同当等处。又作落重同。

独禄。

三陂地蓬等处。

小葛龙洛邦到骆豆虎等处。

罗月和。

麦敖。

大小田陂带等处。

都云洞洪安画剂等处。

谷霞寨。至大三年，谷霞寨主洛卜傍来降。

刺客寨。

吾狂寨。至大三年，吾狂寨主的鴟来降。

必郎寨。

谷底寨。

都谷部寨。至大三年，都谷部寨主只验来降。

玃狔寨。《明一统志》：玃狔寨，亦元置，并隶平越指挥司。

平伐等处军民安抚司。大德元年，平伐九寨来降，立长官司。至大三年，升军民安抚司。后至元元年，复改宣慰司。三年，又为安抚司。

安刺远。

思楼寨。元贞初，宣慰使呼鲁国图招降思楼、浴暮、梅求诸蛮。

浴暮寨。

梅求望怀寨。

甘长。

桑州郎寨。

永县寨。

平里县寨。

锁州寨。

双隆寨。

思母寨。

归仁寨。

各丹洞。自各丹至光州，《翰墨全书》为永顺、保静、南渭三州安抚司所属蛮夷军民长官。

木当寨。

雍郎、客都等处。

雍门犵狁等处。

栖求等处。

伴客蛮娄水等处。又作仲家娄水。

乐赖、蒙囊、吉利等处。

华山谷津等处。

青塘、望怀、甘长、不列、独良等处。

光州。宋功州，声转为光州。至元三十年，光州蛮光龙等入贡，授蛮夷长官。

者者寨。

安化思云等洞。

北遐洞。

茅难、思风、北郡、都变等处。《翰墨全书》属永顺等三州安抚司。

必证县

潘乐盈等处。

诚州富盈等处。

赤畚洞。

罗章特团等处。

福水州。

允州等处。

钦村。

硬头三寨等处。

颜村。

水历吾洞等处。

顺东六龙图。

推寨。

橘叩寨。

格慢等处。

客卢寨。

地省等处。

平魏。

白厓。唐以宋沱洞、乌引洞、芦荻洞、村望洞、白厓洞五寨，命田氏世官其地。宋因之。至元二十一年，升为施溶州。后仍为白厓长官司。

雍门、客当、乐赖、蒙囊、大化、木瓜等处。

嘉州。

分州。

平硃。大德元年，平硃六洞蛮及十部洞蛮皆来降。二年立平硃石洞三蛮夷长官司，设土官二十四员。

洛河洛脑等处。

宁溪。

瓮除。

麦穰。

孤顶得同等处。

邑瓮。

陂控州。

南平。

独山州。至大三年，独山州土官蒙天童款附，置独山州
窖洞木洞都谷部等处诸军民司。

木洞。

瓢洞。

窖洞。

大青山骨计等处。

百佐等处。

九十九寨蛮。

当桥山齐朱谷列等处。

虎列谷当等处。

真除杜珂等处。

杨坪杨安等处。

棣甫都城等处。

杨友阇。

百也客等处。

阿落传等寨。

蒙楚。

公洞龙木。

三寨猫狍刺等处。

黑土石。

洛滨洛咸。

益输沿边蛮。

割和寨。

王都谷浪寨。

王大寨。

只蛙寨。

黄平下寨。

林拱章秀拱江等处。

密秀丹张。丹张即前单张，各郎西即前葛浪洞，草堂即前草塘，恭溪、焦溪、林种俱见前。疑诸地前属播州，后属平伐，遂重复如此。

林种拱帮。

西罗剖盆。

杉木笏。

各郎西。

恭溪、望城、崖岭等处。

孤把。又名孤把当。

焦溪笃住等处。

草堂等处。

上桑置。

下桑直。元初置桑直县安抚司，至正末废。

米坪。

今其平尾等处。

保靖州。宋羁縻州，元因之。

特团等处。

西北地附录。太祖长子术赤、次子察合台及太祖孙旭烈兀分封之地，为西北三藩。称笃来帖木儿、月祖佰、不赛因

位下者，文宗至顺三年《经世大典》成书，据当时藩王位下载其封地，故不称术赤诸王。旧志采自《经世大典》，今因之。其地名与《经世大典图》互有出入，则纂修《大典》者之疏也。

笃来帖木儿位下。察合台大王五世孙。

途鲁吉。《经世大典图》在可失哈耳北，阿力麻里西南。本西突厥之地，后属西辽。太祖灭西辽，以其地封察合台。

柯耳鲁。《大典图》在阿力麻里西北，本突厥三姓叶护葛逻普之地。太祖六年，其酋阿尔思兰来降。后帖木耳附马封其子沙哈普于其地。

畏兀儿地。本高昌地，唐置交河郡，又为回鹘所据，后自号畏兀儿。太祖六年，其亦都护来朝，置达鲁花赤监之。

哥疾宁。城名。《大典图》作嘎自尼。唐漕国之鹤悉那城。后为货勒自弥属城。太祖十六年，取之。

可不里。城名。《大典图》在哥疾宁城东，货勒自弥属地。

巴达哈伤。城名，亦部落名。本西辽地。哲别克西辽，其酋将遁入巴达克山，即此地。

忒耳迷。城名。本唐之喝密。《图》货勒自弥属地。太祖十五年，自将大军攻下之。

不花刺。城名。唐安国地。本西辽属部，后为货勒自弥所并。太祖十五年，取之。

那黑沙不。城名。唐那色波国地。太祖十七年，驻兵此地。英宗以后元人称其地曰咳而什。葛葛儿克汁建宫殿于其地。国语称宫殿曰咳尔什。

的里安。城名。《大典图》作的安里，在不花刺、柯提之

间。

撒麻耳干。城名。本唐康国地，后为回纥所据，货勒自弥复取之。太祖十六年，攻拔其城。宪宗置阿梅河等处行尚书省，治此。后为附马帖木儿都城，东有养夷沙鹿梅牙、塞蓝、塔什干、西有渴石、迭里迷诸城，皆隶焉。

忽毡。地名。《大典图》在察赤南，撒麻耳干东。本唐俱战提国地。太祖十五年，征货勒自弥，使别将攻克忽毡。

马耳亦囊。城名。

可失哈耳。城名。本西辽属地，太祖十三年取之。

忽炭。城名。《图》在倭赤之西，可失哈耳之东南。本兀丹部，又曰斡端。至元中，置宣慰司都元帅府。未几罢。

柯提。城名。《大典图》在货勒自弥东南，为货勒自弥旧部。

兀提刺耳。《图》在撒麻耳干之北。城名。蒙古人称为卯危巴里克，译言恶城，以攻城多伤士卒。

巴补。城名。《大典图》在忽毡东。

讹迹邗。《大典图》作讹迹，即旧史本纪之养吉干。

倭赤。城名。

苦叉。亦作曲先。元初置曲先答林元帅府。

柯散。城名。《大典图》在察赤西，本宁远国之渴寨城。唐置休循州都督府。

阿忒八失。《大典图》在亦刺八里西南，又曰浑八升。

八里茫。《大典图》在倭赤北，屠寄说茫为沙之误字，八里沙即八刺沙衮。西辽都城。

察赤。唐石国地，又名塔什干。太祖十五年，征西域，攻

拔其城。

也云赤。城名。《大典图》在亦剌八里西。

亦剌八里。城名。《大典图》在阿力麻力西南。

普剌。城名。

也迷里。城名。《大典图》在普剌东北。定宗潜邸在此。

阿力麻里。城名。《大典图》在苦叉北。至元八年，北平王南木合建幕庭之地。

合剌火者。本火州治。至治间，地入察合台后王。至顺元年，复立总管府。

鲁古尘。《图》在合剌火者之东，他古新之西。唐柳中县，又曰柳陈城。

别失八里。《图》在鲁古尘之北，本回鹘五城，为畏兀儿地。宪宗置行尚书省。至元二十年，改立宣慰司元帅。后为察合台后王属地。

他古新。城名。《大典图》在鲁古东北。

仰吉八里。

古塔巴。

彰八里。《大典图》在别失八里之西，由此而西为古塔巴，又西仰吉八里。

月祖伯大王位下。术赤五世孙。

撒耳柯思。部族名。太祖十六年，命速不台征其部落，取之。《大典图》在阿兰、阿思之南。

阿兰、阿思。部族名。亦名阿速。太祖十六年，速不台取其地。

钦察。部族名。

斡罗斯。部族名。详外国列传。

不里阿耳。部族名，亦城名，又作布尔嘎尔。《大典图》在钦察东北。唐波腊国。太祖十六年，速不台征其部族。后拔都西戎，始城之。

撒吉刺。部族名，亦城名。斡罗斯之属地。

花刺子模。部族名。又作货勒自弥。详外国列传。

赛蓝。城名。本西突厥地。先为海都分地，又属拔都后王。后为附马帖木儿所取。

巴耳赤邗。城名。一曰八儿真。太祖十五年，术赤攻拔其地。

毡的。城名。一名郑成。太祖征西域，术赤分兵取毡的、养吉干。

不赛因大王位下。旭烈兀四世孙。

八哈刺因。地名，沈曾植说：当作哈刺八因。

怯失。地名。《大典图》：与八哈刺因，隔海东西相对。

八吉打。即报达。详列传。

孙丹尼牙。哈儿班答大王所筑都城。

忽里模子。地名。大德中，合赞大王遣使来朝，浮海归，其登陆处为忽普谟斯，即此地。

可咱隆。城名。《大典图》在失罗子西。先为法而斯部属地。

设刺子。法而斯之都城。一名石罗子。

泄刺失。城名。《大典图》在设刺子东。

苦法。

瓦夕的。城名。与苦法均为报达属城。

兀乞八刺。城名。《大典图》在毛夕里东南，报达属城。

毛夕里。本一小国。中统三年旭烈兀大王灭之。

设里汪。地名。《大典图》在兀乞八刺东，一名失儿湾。太祖十六年，者别攻拔其城。按《大典图》误，当作兀乞八刺东北，当次于巴耳打阿、打耳班之下，不当介于毛夕里、罗耳之间。

罗耳。国名。旭烈兀灭之。

乞里茫沙杭。城名。报达属城。宪宗七年，旭烈兀克之。

兰巴撒耳。城名。《大典图》在乞里茫沙东，又曰伦白塞耳，本木刺夷堡。宪宗六年，降于旭烈兀。

那哈完的。城名。又曰你诃温多。唐阿昧国城都。

亦思法杭。城名。本货勒自弥属城，为波斯旧都。

撒瓦。

柯伤。

低兼。地名。又曰低楞。木刺夷堡。旭烈兀平木刺夷，其部众负嶮自守，至哈而班答始取之。

胡瓦耳。

西模娘。城名。《图》在塔米设之南，撒里牙之东，即辽之仙门国。

阿刺模忒。城名。本木刺夷属堡，旭烈兀攻降之。

可疾云。城名。又曰憨颜。货勒自弥属地。太祖十五年，大将哲别攻拔之。

阿模里。《大典图》直里海正南，为马三德兰部之会城。

撒马牙。本马三德兰部属城。

塔米设。达拔里斯单部属城。

赞章。城名。《大典图》在可斯费音西北。

阿八哈耳。城名。

撒里茫。本毛夕耳部属城。旭烈兀征报达道，破此城。

朱里章。本货勒自弥属城。

的希思丹。地名。

巴耳打阿。本阿而俺部都城。

打耳班。地名。译言门。波斯筑城乞儿吉思山之要隘，打耳班其通行之门。者别、速不台讨钦察等部，即取道于此。

巴某。城名。《大典图》失载。又曰八米俺。太祖追札剌勒哀丁道，攻此城，皇孙阿秃干中流矢卒。城破，夷为平地。

塔八辛。城名。《大典图》失载。

不思忒。本昔义斯单部之会城。

法因。本木剌夷之属城。

乃沙不因。太祖十六年，皇子拖雷攻拔其城。

撒刺哈西。城名。太祖十六年，拖雷克之。

途思。本货勒自弥属城。本祖十二年，拖雷克之。

巴瓦儿的。城名。

麻里兀。又曰马鲁。为呼拉商属部四大城之一。其三曰弥沙不儿，曰巴里黑，曰哈烈。

塔里干。城名。本唐之咀刺健国。又曰塔思寒。太祖十六年，亲征攻拔其城。

巴黑里。城名。唐之缚喝国地。

吉利吉思、撼合纳、谦州、益兰州等处。吉利吉思者，初以汉地女四十人与乌思之男结婚此地。乞利译言四十，吉思译言女子也。相传乃蛮部始居此。元初，析其民为九千户。其

地长一千四百里，广半之。昂可刺为吉利吉思之附庸，因水名其地。昼长夜短，日没炙羊脾熟，东方已曙。乌斯亦以水为名。撼合纳，译言布囊也，地形似之。至元中，徙兀连、撼合结、吉利吉思三部人于肇州。谦州，又曰欠欠祝，或曰汪汗始居此地。益兰州。益兰者，译言蛇。初其地见一巨蛇穴中出，饮河水，故名之。至元七年，刘好礼为吉利吉思、撼合纳、谦州、益兰州等处断事官，以益兰州为治所。

征东行中书省，领招讨司二、劝课使五。至元二十年，置征东行中书省。大德三年，改镇东行中书省。五年，复为征东行中书省。未几罢。至大元年，复置。皇庆元年，又罢。《方輿胜览》：镇东行中书省，领安抚高丽总管府、浚州高丽总管府、耽罗国军民安抚司。按高丽总管府并于浚州高丽总管府，改属辽阳行省。旧志征东行省下，复列浚阳等路高丽军民总管府，一路隶于两省。误甚矣。耽罗安抚司，后改总管府，大德五年，与五道税课使皆罢。

征东招讨司。

庆尚州道劝课使。

东界交州道劝课使。

全罗州道劝课使。

忠清道劝课使。

西海道劝课。

耽罗国招讨司。其贡赋，每岁进毛施布百匹。后改为军

民都达鲁花赤总管府。二十一年，又改为军民安抚司。三十一年，还隶高丽国。大德四年，复置耽罗总管府。五年，改军民万户府。是年，高丽王昞请罢耽罗总管府，隶本国，置万户府如合浦镇边事例。从之。

卷四十五

志第十九

河渠一

河防 至正河防记

至元十七年，世祖以学士都实为诏讨使，佩虎符，寻河源于万里之外。都实既受命，道河州，至州东六十里之宁河驿。驿西南有山，曰杀马关，行一日至巅。西上愈高，四阅月始抵河源。是冬，还报，并图其城传位置以闻。其后，翰林学士潘昂霄从都实之弟曰阔阔出者得其说，撰为《河源志》。临川朱思本又从八里吉思家，得帝师民所藏梵字书，而以华文译之，与昂霄所志，互有详略。旧史采《河源志》，而以思本之说注其下，参差不一。

按河源在吐蕃朵甘思西鄙，有泉百余泓，沮洳散涣，弗可逼视，方可七八十里，履高山下瞰，灿若列星，故名火敦淖尔。火敦，译言星宿；淖尔，译言海子也。思本曰：河源

在中州西南，直四川马湖蛮部之正西三千余里，云南丽江宣抚司之西北千五百余里，帝师撒思加地之西南二千余里。水从地涌出如井。其井百余，东北流百余里，汇为大泽，曰火敦淖尔。群流奔凑，近五七里，汇二巨泽，名阿刺淖尔。自西而东，连属吞噬，行一日，迤邐东汇成川，号赤宾河。又二三日，有水西南来，名亦里出，水与赤宾河合。又三四日，有水南来，名忽阑水。又有水东南来，名耶里术。水合流入赤宾河，其流寢大，始名黄河，然水犹清。思本曰：忽阑河源，出自南山，其地大山峻岭，绵亘千里，水流五百余里，注耶里出河。耶里出河源，亦出自南山，西北流五百里，始与黄河合。又一二日，歧为八九股，名耶孙斡伦，译言九渡，通广五、七里，可度马。又四五日，水浑浊，土人抱革囊，骑过之。自是两山夹束，广可一里、二里或半里，其深叵测。朵甘思东北有大雪山，最高，番语腾乞里塔，即昆仑，山腹至顶，皆雪，冬夏不消。自九渡水至昆仑，行二十日。思本曰：自浑水东北流二百余里，与怀里火图河合。怀里火图河源自南山，水正北偏西流八百余里，与黄河合。又东北流百余里，过郎麻哈地。又正北流百余里，乃折而西北流二百余里，又折而正北流百余里，又折而东流，过昆仑山下。番名亦耳麻不刺山。其山高峻非常，山麓绵亘五百余里，河随山足东流，过撒思加阔即、阔提地。

河行雪山南半日，又四五日，至地名阔即及阔提，二地相属。又三日，地名哈刺别里赤尔，四达之冲也，多寇盗，有官兵镇之。近北二日，河水过之。思本曰：河过阔提，与亦西八思今河合。亦西八思今河源自铁豹岭之北，正北流凡五

百余里，与黄河合。雪山以西，人鲜少，吐番部落多处山南。山不穹峻，水亦散漫，兽有髦牛，野马、狼、狍、獐羊之类。其东，山益高，地益渐下，岸狭处，狐可越而过之。行五六日，有水西南来，名纳邻哈刺，河译言细黄河也。思本曰：哈刺河自白狗岭之北，水西北流五百余里，与黄河合。又两日，有水南来，名乞里马出河。二水合流入河。思本曰：自哈刺河与黄河合，正北流二百余里，过阿以伯站，折而西北流，经昆仑之北二百余里，与乞里马出河合。乞里马出河源自威、茂州之西北，岷山之北，水北流，即古当州境，正北流四百余里，折而西北流，又五百余里，与黄河合。

河水北行，转西流，过雪山北，一向东北流，约行半月，至贵德州，地名必赤里，始有州治官府。州隶吐蕃等处慰司，司治河州。又四五日，至积石州，即后世所误认之小积石山，非《禹贡》导河之积石。五日，至河州安乡关。一日，至打罗坑。东北行一日，洮河水南来入河。思本曰：自乞里马出河与黄河合，又西北流，与鹏赞河合。折而西北流三百余里，又折而东北流，过西宁州、贵德州、马岭凡八百余里，与邈水合。又东北流，过土桥站古积石州来羌城、廓州构米站界都城凡五百余里，过河州与野庞河合。又东北流百余里，过踏白城银川站，与湟水、浩亶河合。又东北流百余里，与洮河合。以上皆番地。

又一日，至兰州，过北卜渡，至鸣沙河，过应吉里州。正东行，至宁夏府南。东行，即东胜州，隶大同路。自发源至汉地，南北涧溪，细流旁贯，莫知纪极。山皆石，至小积石方林木畅茂。世言河九折，彼地有二折，乞里马出河一折也。

贵德州二折也，过此始入小积石。思本曰：自是迳兰州，又东北流，至宁夏府。出塞过游牧地，凡八百余里。过丰州西受降城，折而正东流，过游牧地古天德军中受降城、东受降城，凡七百余里。折而正南流，过大同路云内州、东胜州，与黑河合。又正南流，过保德州。葭州及兴州境，又过临州，凡千余里，与保德州乞那河合。又南流三百里，与延安河合。又南流三百里，与汾河合。又南流二百里，过河中府，遇潼关与太华大山绵亘，水势不可复南，乃折而东流。大概河源东北流，所历皆西番地，至兰州凡四千五百余里，始入中国。又东北流过沙漠地，凡二千五百余里，始入河东境内。又南流至河中，凡千八百余里。通计九千余里。盖旧史所述如此。

至我大清乾隆间平西域，始知葱岭为河之初源，都实所访星宿海及重出之源耳。然河为中国患千有余年，世祖欲穷其源委，以施疏导之方，勤民之至意也。今撮其大要，载于篇首，以备一代之掌故云。

自河徙而南，冲决之患，至元而日甚。其治河之法，凡物料工程轮运，以至叠埽修堤之事，皆沿袭宋金旧法，承用百年，著为条格者也。

河防之令九：

一，每岁选旧部官一员，沿河上下。兼行户、工部事，督令分治都水监及京府州县守涨，从实规措，修固堤岸。如所行事务，有可久为例者，即关移本部，仍候安流，就便检覆。次年春，工物料讫，即行还职。

一，分治都水监及勾当河防事务，并驰驿。

一，州县提举管勾河防官，每六月一日至八月终，各轮一员守涨，九月一日还职。

一，沿河兼带河防知县官，虽非涨月，亦轮上提控。一应沿河州县。若规措有方，能御大患，及守护不谨，以致堤岸疏虞者，具以奏闻。

一，河桥埽兵，遇天寿圣节及元日、清明、冬至、立春俱给假一日。祖父母、父母吉凶二事，并自身婚娶，俱给假三日。妻子吉凶二事，给假二日。其河水平安月分，每月朔给假一日。若水势危险，不用此令。

一，沿河州府遇河防危险之际，若兵力不足，劝率水手人户协济救护至，有干济或难迭办须当进暂差夫役者，州府提控官与都水监及巡河官同为计度，移下司县，以远近量数差遣。

一，河防军疾疫须医治者，都水监移文近京州县，约取所须药物并从官给。

一，河埽堤岸遇霖雨水涨变时，分都水司与都巡河官往来提控，官兵多方用心固护，无致为害，仍每月具河埽平安申覆尚书省工部呈阅。

一，除滹沱、漳、沁等河有埽兵守护外，其余大川巨浸如有卧著冲刷危险等事，并仰所管官事约量差夫作急救护，其卢沟河行流去处，每遇泛涨，当该县官与崇福埽官司一同协济防护，差官一员系监勾之职或提控巡检。

每岁守涨河防之制六：

一，开河。宜于上流相视地形，审度水性，测望斜高，于冬月记料，至次年春兴役开挑，须涨月前终毕。待涨水发随

势去隔堰水入新河，又须审势疏导。假如河势丁字正撞堤岸，剪滩截嘴，撩浅开挑费功不便，但可解目前之急，亦有久而成河者，如相地形，取直开挑，先须钤旱谓上下平岸口也分水势，以解堤岸之危。若欲全夺大势，更于对岸抛下木石修刺，于刺影水势渐以木石钤固河口，因复填实，损而复修，至坚固不摧塌，则新河迤邐畅流，旧河自然淤实。

一，闭河。先行检视旧河岸口，两岸植立表杆，次系影水浮桥，使役夫得于两岸通过。于上口下撒星桩，抛下木石镇压狂澜，然后两岸各进草纸三道、土纸两道，又于中心拖下席袋土包。若两岸进纸，至近合龙门时，得用手持土袋土包抛下，兼鸣罗鼓以敌河势。既闭后，于纸前卷拦头压埽于纸上，修压口堤。若纸眼水出，再以胶土填塞牢固，仍设边检以防渗漏。

一，定平。先正四方位置，于四角各立一表，当心安置水平。其制长二尺四寸，广二寸五分，高二寸。先立桩于下，高四尺，纂在内，桩上横坐水平。两头各开小池，方一寸七分，深一寸三分，注水于中，以取平。或中心又开池者，方深同，身内开槽子，广深各五分，令水通过两头池子内，各用水浮子一枚，方一寸五分，高一寸二分，刻上头，侧薄只厚一分，浮于池内，望两头水浮之首，参直遥对立表处，于表身画记，即知地形高下。

一，修砌石岸。先开掘槛子嵌坑，若用阔二尺，深二丈，开与地平。顺河先铺线道板一，次立签桩八，各长二丈，内打钉五尺入地，外有一丈五尺。于签桩上，安跨塌木板六，每留三板，每板凿二孔中间。撒子木六，于撒子木上匀铺秆草

束。先用整石修砌，修及一丈。后用荒石再砌一丈。一例高五尺。第二层，除就签桩外，依前铺塌木板、撒子木、秆草，再用石段修砌，高五尺。第三层，亦如之，高一丈。功就，通高二丈。

一，卷埽。其制亦昉于竹槌石菑，今则布薪刍以卷之，环竹缁以固之，绊木以系之，挂石以坠之，举其一二以称之，则日𡗗音混。𡗗既下，又填以薪刍，谓之盘簟。两𡗗之交，或不相接，则包以网子索，塞以秆草，谓之孔塞盘簟。孔塞之费，有过于埽𡗗者。盖随水去者太半故也。其𡗗最下者，谓之扑崖草，又谓之入水埽。𡗗之最上者，谓之争高埽。河势向著，恐难固护，先于堤下掘坑卷埽以备之，谓之卷埽。叠二三四五而卷者，以沙壤疏恶，近水即溃，必借埽力以捍之也。下𡗗既朽，则水刷而去，上𡗗压之，谓之实垫。又卷新埽以压于上，俟定而后止。凡埽去水近者，谓之向著。去水远者，谓之退背。水入埽下者，谓之紧刷。若暴雨涨溢，下埽既去，上埽动摇，谓之埽喘。

一，筑城。此非河事，以水圯近河，州县亦或用之。城高四十尺则加厚二十尺。其上斜收，减高之半。若高增一尺，则其下亦加厚一尺，上收亦减其半。若高减，则亦减之。开地深五尺，其广视城之厚。每身一十五步，栽永定柱一，长视城之高，径一尺至一尺二寸。夜叉柱各二。每筑高二尺，横用经木一。瓮城至马面之类，准此。他如工程之限，输运之直，与夫合用物料之多寡，皆综核详密，品式粲然，为都水司奉行之条例云。

世祖中统以前，河患无可考。至元九年七月，卫辉路新

乡县河决北岸五十余步。八月，北岸又决八十二步，去广盈仓仅三十步。遣都水监丞马良弼偕本路官相视，金丁夫修筑之。二十三年十月，河决开封、祥符、陈留、杞、太原、通许、鄢陵、扶沟、洧川、尉氏、阳武、延津、中牟、原武、睦州十五处，金南京民夫二十万四千三百二十三人分筑堤防。二十五年正月，河决襄邑，又决太康、通许、杞三县，陈、颍二州皆水，命本道宣慰司督修堤之役。二十九年三月，敕都水监二十八年，丞相完泽奏置都水监于京师，岁以官一、令史二、奏差二、壕寨官二，分监于汴治决河。分视黄河河堤堰。

元贞二年九月，河决杞、封邱、祥符、宁陵、襄邑五县。大德元年七月，河决杞县蒲口，遣尚书耶怀、御史刘賡与廉访使尚文相视，筹长久之计。文上言：“长河万里，湍猛东注，盟津以下，地平土疏，荡徙不常，失禹故道，流患中土。治得其当，则力省而患迟，失之则功费而患速。今陈留抵东西百有余里，南岸故河口十一，已塞者二，自涸者六，通水者三，岸高于水六七尺或四五尺。北岸高于水，仅三四尺，或高下与水等。大较南高于北，约八九尺，堤安得不决，水安得不北也。蒲口今决千有余步，迅快东行，得河旧渚，行二百里，至归德，复会正流。若强加涸遏，上决下溃，终究无成。揆之今日河北郡县顺水之性，远筑长堤以御泛滥。归德、徐、邳听民避冲决，图所安，量给淤田，俾为永业。他决视此。即救患之良策也。蒲口不塞便。”议上，山东长吏争言，若不塞蒲口，河北良田必尽化鱼鳖之区，廷议从之，命河南行省官董其役，凡修七堤二十有五处，总三万九千九十二步，

用苇束四十万四千，径尺桩二万四千七百二十，役民夫七千九百余人。明年，蒲口复决。自是，修筑之役无岁无之。

至大二年七月，河决封邱县。三年十一月，河北河南道廉访司言：

黄河决溢，千里蒙害。浸城郭，漂室庐，壤禾稼，百姓已罹其毒，然后访求修治之法。而且众议纷纭，互陈利害，当事者疑惑不决，必须上请。比至议定，其害滋大，所谓不预已然之弊。大抵黄河伏槽之时，水势似缓，观之不足为害，一遇霖潦，湍良迅猛。自孟津以东，土性疏薄，崩溃决溢，可翘足而待。

近岁颖、亳之民，幸河北徙，有司不能远虑，失于规画，使陂泺尽为陆地。东至杞县三汉口，播河为三。官吏建言，相次湮塞南北二汉，使三河之水合而为一。下流既不通畅，自然上溢。由是观之，是自夺分泄之利也。故上下溃决，为害日甚。今水势趋下，有复入钜野、梁山之意。苟不为远计，不出数年，曹、濮、济、郛蒙害必矣。

今之所谓治水者，议论虽多，并无良策。水监之官，既非精选，知河之利害者，百无一二。虽每年累驿而至，名为巡河，徒应故事。问地形之高下，则懵不知。访水势之利病，则非所习。乃或妄兴事端，劳民动众，阻违水性，翻为后患。

为今之计，莫若于汴梁置都水分监，妙选廉干、深知水患之人，专任其事。可疏者疏之，可增者增之，可防者防之。职掌既专，则事功可立。较之河已决溢，民已被害，然后卤莽从事以劳民者，不可同日而语矣。

中书省下其议于都水监。先是省臣奏升都水监为正三品，

添设二员，铸分监印，巡视御河，就令提点黄河之事。至是，本监议：“为御河添官铸印，兼提点黄河，若分监在彼，则有妨御河公事。况黄河已有拘该官司正官提调，莫若使分监者以十月往，与各处官司巡视缺坏，会计工程，俟年终分监新官至，则交割代还，庶不相误。”

工部言：“大德九年，黄河决徙，逼近汴梁，几至浸没。本处官吏权宜开薰盆口，分入巴河，以杀其势，遂使正河水缓，并趋支流。缘巴河旧隘，不足吞伏。明年急遣萧都水等闭塞，而其势愈大，卒无成功。致连年为害，南至归德，北至济宁，尽患沦胥。欲为经久之计，非用通知古今水利之人专任其事，终无补益。河南宪司所言详悉，都水监止援旧例议拟未合。如量设专官，精选廉干、深知地形水势者，任以河防之职，往来巡视，以时疏塞，庶可除异日之患。”省议及令都水分监专治河防，任满交代云。

延祐元年八月，河南行省言：“黄河涸出之地，水泊污地，多为势家所据，忽遇泛滥，水无所归。由此观之，非河侵人，人自侵水。拟差知水利都水监官偕行，廉访司相视，可以疏辟堤障，未至泛滥，先加修治，用力少而成功多。又汴梁路睢州诸处，决口数十，内开封县小黄村计会月堤一道，所拟不一，宜委行省官与本道宪司、都水分监官及州县正官，亲历按验，从长讲议。”由是遣太常丞郭奉政、前都水监丞边丞务、都水监卿朵儿只、河南行省石右丞、本道廉访副使站木赤、汴梁路判官张承恩，上至河阴，下至陈州，与拘该州县官沿河相视。开封县小黄河口，测量比旧减六尺，陈留，通许、太康旧有蒲苇之地，后以塞西河、塔河诸口，以便种植，

故他处连年溃决。

公议：“治水之道，惟当顺其性之自然。黄河迁徙不常，每岁泛滥两岸，时有冲决。强为闭塞，已及农时，科桩金，发丁夫，动至数万，所费不可胜纪，民不堪命。盖自治之法，惟宜顺水疏泄。今相视上抵河阴，下抵归德，夏水盛涨，甚于常年，以小黄河口分泄之故，并无冲决，此其明验也。若将小黄村河口堵闭，必移患于邻封。决上流南岸，则汴梁被害。决下流北岸，则山东可扰。事难两全，当遗小就大。详视陈州，最为低洼被水之地。今岁麦禾不收，民饥特甚，请免陈州差税，赈其饥民。陈留、通许、太康县被灾之家，依例取勘赈恤。其小黄村河口仍旧通流，筑月堤及障水堤以资抵捍。别难拟议。”中书省韪之，依议施行。

至五年正月，河北河南道廉访副使奥屯言：“近年河决杞县小黄村口，滔滔南流，莫能御遏，陈、颖濒河膏腴之地浸没大半，百姓流亡。今水迫汴城，远无数里，倘值霖雨水溢，仓卒何以为计。方今农隙，宜为讲究，使水归故道，达于江、淮，不惟陈、颖之民得遂其生，亦可除汴梁异日之患。”于是大司农下都水监移文分监修治，自六年十一月一日兴工，至七年三月九日工毕，北至槐疙疸两旧堤，南至窑务汴堤，通长二十里二百四十三步。创修护城堤一道，长七千四百四十三步。堤下广十六步，上广四步，高一丈，六尺为一工。计工二十五万三千六百八十，用夫八千四百五十三，除风雨妨工，三十日毕。内流水河沟，南北阔二十步，水深五尺。修堤阔二十四步，上广八步，高一丈五尺，积十二万尺，取土稍远，四十尺为一工，计三万工，用夫万人。每步用大桩二，

计四十，各长一丈三尺，径四寸。每步草束千，计二万束，签桩四，计八十桩，各长八尺，径三寸。大船二，梯镢绳索备焉。

是年七月，荥泽县塔海庄河决，未几，开封县苏村及七里寺复决二口。本省平章政事站马赤亲率本路官及都水分监并工修筑。至治元年正月兴工，条堤岸四十六处，计工一百二十五万六千四百九十四，用夫三万一千四百一十三。八年，河决原武县，浸灌数属，其工役案牘无征莫得而详焉。

泰定二年，御史姚炜以河屡决，请立行都水监于汴梁，仍令沿河州县知河防事。从之。是年，睢州河决。三年，郑州阳武县又决，漂民房一万六千余家。五年，兰阳县河又决。

至顺元年六年，曹州济阳县魏家道口河决。先是，堤将溃，济阳县防河官与县尹郝承务差募民夫创修护水月堤，又以水势大，复筑月堤于北。功未竟，水忽泛滥，新旧三堤俱决。明日，外堤复坏，湍流迅猛，有蛇出没于中，所上桩工，一埽无遗。缺口东西五百余步，深二丈余。外堤缺口，东西四百余步，又磨子口护水堤，低薄不足御水，东西长一千五百步。乃先筑磨子口，七月十六日兴工，二十八日工毕。郝承务言：“魏家道口砖堦等村缺口，累下桩土，冲决不存，堤周回皆泥淖，人不可居，又无取土之处。且沛郡安乐等堡，去岁旱灾，今复水涝，民皆缺食，难于差徭。其不经水村堡，先已遍差补筑黄家桥、磨子口诸处堤堰，似难重役。请俟秋凉水退，僉夫修理，庶苏民力。计冲坏新旧堤七处，共一万二千二百十六步，下广十二步，上广十四步，高一丈二尺，计用夫六千三百人，桩九百九十，苇箔一千三百二十，草束一

万六千五，六十尺为一工，无风雨妨工，度五十日可毕。”

郝承务又言：“九月三日兴工，连日风雨，辛马头、孙家道口堤又坏，计工役倍于元数，添差二千人同筑。二十六日，元与武成、定陶二县分筑魏家道口八百二十步工竣。其辛马头孙家道口之缺口，南北阔一百四十步，内水地五十步，深者二丈，浅者亦不下八九尺，补筑七日工竣。又创筑月堤一道，斜长一千六百二十七步，内武城、定陶分筑一百五十步，实筑一千四百七十七步。惟堠头魏家道口外堤未筑，以冬寒土冻，俟来春补筑焉。”

是年，遣太禧宗祿院都事盖苗行视河道。苗还言：“河口淤塞，今不治，异日必为中原大患。”都水监难之，事遂寝。不及十五年，而白茅堤之口决。

至正四年正月，河决曹州，雇民夫一万五千八百人筑之。五月，大霖雨，平地水深二丈，河暴溢，决白茅堤，曹、濮、济、衮皆水。十月，议筑黄河堤堰。六年，以河决，立河南、山东等处行都水监，专治河防。九年三月，河北决。五月，白茅河东注沛县，遂成巨浸。是年冬，帝命集群臣廷议，言人人殊，惟监察御史余阙言：

禹河自大伾而下，酺为二渠，皆东北流。自周定王时，河始南徙。讫于汉，而禹之故道始失。自瓠子再决，而其流为屯氏诸河。其后河入千乘，偶合于禹所治河，由是而讫东都。至唐，河不为患者千数百年。赵宋时，河又南决。至于南渡，乃由彭城合汴、泗东南以入淮，而汉之故道又失。

尝考中国之地，西南高而东北下，故水至中国而入海者，一皆趋于东北。古河自龙门即穿西山，踵趾而入大陆，地之

最下者也。河之行于冀州，北方也，数千年而徙千乘。自汉而后，千数百年而徙彭城。然南方之地，本高于北，故河之南徙也难，而其北徙也易。自宋南渡至今，殆二百年，而河旋北，乃地势使然，非关人力也。

比者河北破金堤，逾丰沛、曹、郛诸郡大受其害，天子哀民之垫溺，乃疏柳河，欲引之南，工不就。今诸臣集议，多主浚河故道，复引河以南入彭城，筑堤起曹南讫嘉祥，东西三百里，以障河之北流，则渐可以导之使南。

嗟乎！谚有之曰：不习为吏，眠已成事。今所谓南流故道者，非河之故道也。使反于大禹北流之故道，由汉之千乘以入海，则国家将无水患千余年，如东汉与唐之时，而又何必障而排之，使南乎？

今庙堂之议，非以南为壑也。其虑以为河之北，则会通之漕废。不知河即北，而会通之漕不废。何也？漕以汶，而不以河也。河北流，则汶自彭城以下必微微。则吾有制而治之，亦可以行舟以漕粟，所谓浮于汶达于河者是也。阙特防钜野，而使河不妄行。俟河复千乘故道，然后复相水之宜而修治之。此千古之明鉴，非一人之私言也。

十年四月，以军士五百人修白茅河堤。十二月，命大司农秃鲁、工部尚书成遵行视决河，议其疏塞之法以闻。十一年春，遵等自济宁、曹、濮、大名行数千里，掘井以量地形之高下，测岸以究水势之深浅，以为河之故道不可复，其议有八。时右丞相脱脱复相，锐于任事。都漕运使贾鲁以治河二策进：其一，修筑北堤，以制横溃，则用工省；其一，疏塞并举，挽河复故道，其功数倍。脱脱韪鲁后策。及遵兴秃

鲁至，力陈不可。脱脱不听，以其事属鲁。迁鲁为工部尚书，总治河防使。发汴梁、大名十三路民夫十五万，庐州等处十八翼军二万，自黄陵冈南达白茅，放于黄堠、哈只等口，又自黄陵西至杨青村合于故道，凡二百八十里百五十四步有奇。命中书右丞玉枢虎儿哈等率卫军以镇之。自四月兴工，至十一月，水土工毕，诸埽诸堤成，河复故道，南汇于淮，又东入于海。帝遣使者报祭河伯，召鲁还京师，论功超拜荣禄大夫、集贤大学士，赐脱脱世袭达刺罕，命翰林学士承旨欧阳元撰河平碑，以旌劳绩。元治河三大役：曰蒲口，曰小黄村，曰白茅堤。当时名臣多谓宜顺水势，勿堙塞，其言率迂不可用。脱脱黜成遵，从贾鲁，挽河复故道，尤为不世之功。欧阳元作《至正河防记》，载其施功次第详矣。用附著左方，俾治河者有考焉。

治河一也，有疏，有浚，有塞，三者异焉。酈河之流，因而导之，谓之疏。去河之淤，因而深之，谓之浚。抑河之暴，因而扼之，谓之塞。疏浚之别，有四：曰生地，曰故道，曰河身，曰减水。河身地有直有纡，因直而凿之，可就故道。故道有高有卑，高者平之以趋卑，高相就，则高不壅，卑不滞，虑夫壅生溃，滞生堙也。河身者，水虽通行，身有广狭。狭难受水，水溢悍，故狭者，以计辟之。广难为岸，岸善崩，故广者以计御之。减水河者，水放旷，则以制其狂，水堕突，则以杀其怒。

治堤一也，有创筑、修筑、补筑之名，有刺水堤有截河堤，有护岸堤，有缕水堤，有石船堤。

治埽一也，有岸埽、水埽，有龙尾、栏头、马头等埽。其为埽台及推卷、牵制、薶挂之法，有用土、用石、用铁、用草、用木、用栈、用纆之方。

塞河一也，有缺口，有豁口，有龙口。缺口者，已成川。豁口者，旧常为水所豁，不退则口下于堤，水涨则溢出于口。龙口者，水之所会，自新河入故道之濇也。

此外不能悉书，因其用功之次第而就述于其下焉。

其浚故道，深广不等，通长二百八十里百五十四步而强。功始自白茅，长百八十二里。继自黄陵冈至南白茅，生地十里。口初受，广百八十步，深二丈有二尺，已下停广百步，高下不等，相折深二丈及泉。曰停、曰折者，用古算法，因此推彼，知其势之低昂，相准折而取匀停也。南白茅至刘庄村接入故道十里，通折垦广八十步，深九尺。刘庄至专固百有二里二百八十步，通折广六十步，深五尺。专固至黄固，垦生地八里，面广百步，底广九十步，高下相折，深丈有五尺。黄固至哈只口，长五十一里八十步，相折停广垦六十步，深五尺。乃浚凹里减水河，通长九十八里百五十四步。凹里村缺河口生地，长三里四十步，面广六十步，底广四十步，深一丈四尺。自凹里生地以下旧河身至张赞店，长八十二里五十四步。上三十六里，垦广二十步，深五尺。中三十五里，垦广二十八步，深五尺。下十里二百四十步，垦广二十六步，深五尺。张赞店至杨青村，接入故道，垦生地十有三里六十步，面广六十步，底广四十步，深一丈四尺。

其塞专固缺口，修堤三重，并补筑凹里减水河南岸豁口，通长二十里三百十有七步。其创筑河口前第一重西堤，南北

长三百三十步，面广二十五步，底广三十三步，树植桩橛，实以土牛、草苇、杂梢相兼，高丈有三尺。堤前置龙尾大埽。言龙尾者，伐大树连梢系之堤旁，随水上下，以破啮岸浪者也。筑第二重正堤，并补两端旧堤，通长十有一里三百步。缺口正堤长四里。两堤相接旧堤，置桩堵闭河身，长百四十五步，用土牛、稍土、草苇相兼修筑。底广三十步，修高二丈。其岸上土工修筑者，长三里二百十有五步有奇，高广不等，通高一丈五尺。补筑旧堤者，长七里三百步，表里倍薄七步，增卑六尺，计高一丈。筑第三重东后堤，并接修旧堤，高广不等，通长八里。补筑凹里减水河南岸豁口四处，置桩木、草土相兼，长四十七步。

于是塞黄陵全河，水中及岸上修堤，长三十六里百三十六步。其修大堤刺水者二，长十有四里七十步。其西复作大堤刺水者一，长十有六里百三十步。内创筑岸上土堤，西北起李八宅西堤，东南至旧河岸，长十里百五十步，颠广四步，趾广三之，高丈有五尺。仍筑旧河岸至入水堤，长四百三十步，趾广三十步，颠杀其六之一，接修入水。

两岸埽堤并行。作西埽者，夏人水工，征自灵武。作东埽者，汉人水工，征自近畿。其法以竹络实以小石，每埽不等，以蒲苇线腰索径寸许者从铺，广可一二十步，长可二三十步。又以曳埽索绹径三寸或四寸，长二百余尺者衡铺之。相间复以竹苇麻蒜大纤，长三百尺者为管心索，就系绵腰索之端于其上，以草数千束，多至万余，匀布厚铺于绵腰索之上，橐而纳之。丁夫数千，以足踏实。推卷稍高，即以水工二人立其上，而号于众，众声力举，用小大推梯，推卷成埽，高

下长短不等。大者高二丈，小者不下丈余。又用大索，或互为腰索，转致河滨。选健丁操管心索，顺扫台立踏，或挂之台中铁猫大槩之上，以渐缒之下水。埽后掘地为渠，陷管心索渠中，以散草厚覆，筑之以土，其上覆以土牛、杂草、小埽梢土，多寡厚薄，先后随宜。修叠为埽台，务使牵制土下，缜密坚壮，互为犄角，埽不动摇。日力不足，火以继之。积累既毕，复施前法，卷埽以灰先下之扫，量浅深，制埽厚薄，叠之多至四埽而止。两埽之间，置竹络，高二丈或三丈，围四丈五尺，实以小石、土牛。既满，系以竹缆。其两旁并埽，密下大桩，就以竹络大竹腰索系于桩上。东西两埽及其中竹络之上，以草土等筑为埽台，约长五十步或百步。再下埽，即以竹索或麻索长八百尺或五百尺者一二，杂厕其余管心索之间。俟埽入水之后，其余管心索如前挂，随以管心长索远置五七十步之外，或铁猫，或大桩，曳而系之，通管束累日所下之埽，再以草土等物通修成堤。又以龙尾大埽，密挂于护堤大桩，分析水势。其堤长二百七十步，北广四十二步，中广五十五步，南广四十二步。自颠至趾，通高三丈八尺。

其截河大堤，高广不等，长十有九里百七十七步。其在黄陵北岸者，长十里四十一步。筑岸上土堤，西北起东西故堤，东南至河口，长七里九十七步，颠广六步，趾倍之二强二步，高丈有五尺，接修入水。施土牛，小埽梢草杂土，多少厚薄，随宜修叠。及不竹络，安大桩，系龙尾埽，如前两堤法。唯修叠埽台，增用白阑小石，并埽上及前游修埽堤一，长百余步，直抵龙口。稍北，栏头三埽并行，大堤广与刺水二堤不同。通前列四埽，间以竹络，成一大堤，长二百八十

步，北广百一十步，其颠至水面高丈有五尺，水面至泽腹高二丈五尺，通高三丈五尺。中流广八十步，其颠至水面高丈有五尺，水面至泽腹高五丈五尺，通高七丈。并创筑缕水横堤一，东起北截河大堤，西抵西刺水大堤，又一堤，东起中刺水大堤，西抵西刺水大堤。又一堤，东起中刺水大堤，西抵西刺水大堤。通长二里四十二步，亦颠广四步，趾三之，高丈有二尺。修黄陵南岸，长九里六十步。内创岸土堤，东北起新补白茅故堤，西南至旧河口，高广不等，长八里二百五十步。

乃入水作石船大堤。盖由是秋八月二十九日乙巳，道故河流，先所修北岸西中刺水及截河三堤犹短，约水尚少，力未足恃。决河势大，南北广四百余步，中流深三丈余，益以秋涨，水多故河十之八，两河争流，近故河口，水刷岸北行，洄漩湍急，难以下埽。且埽行或迟，恐水尽涌入决河，因淤故河，前功随堕。鲁乃精思入故河之方，以九月七日癸丑，逆流排大船二十七艘，前后连以大桅或长桩，用大麻索、竹纆绞缚，缀为方舟。又用大麻索、竹纆，用船身缴绕上下，令牢不可破，乃以铁猫于上流碰之水中。又以竹纆绝长七八百尺者，系两岸大槩上，每纆或碰二舟或三舟，使不得下，船腹略铺散草，满贮小石，以合子板钉合之。复以埽密布合子板上，或二重或三重，以大麻索缚之急。复缚横木三道于头桅，皆以索维之，用竹编笆，夹以草石，立之桅前，约长丈余，名曰水帘桅。复以木樁柱，使帘不偃仆。然后选水工便捷者，每船各二人，执斧凿，立船首尾，岸上捶鼓为号，鼓鸣，一时齐凿，须臾舟穴，水入，舟沉，遏决河。水怒溢，故

河水暴增。即重树水帘，令后复布小扫土牛白阑长稍，杂以土草等物，随以填垛。继之以石船下诣实地，出水基趾渐高，复卷大埽以压之。前船势略定，寻用前法，沉余船，以竟后功。昏晓百刻，役夫分番甚劳，无少间断。船堤之后，草埽三道并举，中置竹络盛石，并埽置桩，系缆四埽及络，一如修北截水堤之法。第以中流水深数丈，用物之多，施工之大，倍他堤。距北岸才四五十步，势迫东河，流峻若自天降，深浅叵测。于是先卷下大埽约高二丈者，或四或五，始出水面。修至河口一二十步，用工尤艰。薄龙口，喧腾猛疾，势撼埽基，陷裂欹倾，俄远故所。众议沸腾，以为难合，然势不容已。鲁神色不动，机解捷出，进官吏工徒十余万人，日加奖谕，辞旨恳至，众皆感激赴功。十一月十一日丁巳，龙口遂合，决河绝流，故道复通。

又于堤前通卷栏头埽各一道，多者或三或四。前埽出水，管心大索系前埽，碰后阑头埽之后，后埽管心大索亦系小埽，碰前栏头埽之前，后先羁縻，以锢其势。又于所交索上，及两埽之间，压以小石白阑土牛，草土相半，厚薄多寡，相势措置。

埽堤之后。自南岸复修一堤，抵已闭之龙口，长二百七十步。船堤四道成堤，用农家场圃之具曰轱轴者，穴石立木如比栳，蕤前埽之旁。每步置一轱轴，以横木贯其后，又穴石，以径二寸余麻索贯之，系横木上，密挂龙尾大埽，使夏秋潦水、冬春凌簿，不得肆力于岸。此堤接北岸截河大堤，长二百七十步，南广百二十步，颠至水面高丈有七尺，水面至泽复高四丈二尺。中流广八十步，颠至水面高丈有五尺，水

面至泽腹高五丈五尺，通高七丈。仍治南岸护堤埽一，通长一百三十步，南岸护岸马头埽三道，通长九十五步，修筑北岸隈防，高广不等，通长二百五十四里七十一步。

白茅河口至板城，补筑旧堤，长二十五里二百八十五步。曹州板城至英贤村等处，高广不等，长一百三十三里二百步。稍冈至砀山县，增培旧堤，长八十五里二十步。归德府哈只口至徐州路三百余里，修完缺口一百七十处，高广不等，积修计三里二百五十六步。亦思刺店缕水月堤高广不等，长六里三十步。

其用物之凡，桩木大者二万七千，榆柳杂稍六十六万六千，带稍连根株者三千六百，藁桔蒲苇杂草以束计者七百三十三万五千有奇，竹竿六十二万五千，苇席十有七万二千，小石二千艘，绳索小大不等五万七千，所沉大船百有二十，铁缆三十有二，铁猫三百三十有四，竹箴以斤计者十有五万，碓石三千块，铁钻万四千二百有奇，大钉三万三千二百三十有二。其余若木龙、蚕椽木、麦秸、扶桩、铁叉、铁吊、枝麻、搭火钩，汲水、贮水等具，皆有成数。

官吏俸给，军民衣粮、工钱，医药、祭祀、赈恤、驿置马乘及运竹木、沉船、渡船、下桩等工，铁、石、竹、木、绳索等匠佣资，兼以和买民地为河，并应用杂物等价，通计中统钞百八十四万五千六百三十六锭有奇。

鲁尝有言：“水工之功，视土工之功为难；中流之功，视河滨之功为难；决河口，视中流又难；北岸之功，视南岸为难。用物之性。草虽至柔，柔能狎水，水渍之生泥，泥与草并，力重如碇。然维持夹辅，缆索之功实多。”盖由鲁习知河

事，故其功之所就如此。

是役也，朝廷不惜重费，不吝高爵，为民辟害。脱脱能体上意，不惮焦劳，不恤浮议，为国拯民。鲁能竭其心思智计之巧，乘其精神胆气之壮，不惜劬瘁，不畏讥评，以报君相知人之明。宜悉书之，使职史氏者有所考证也。

卷四十六

志第二十

河渠二

通惠河 阜通七坝 金水河 双塔河
积水潭 白河 御河 会通河
衮州闸 扬州运河 镇江运河 练湖
济州河 胶莱河

元之运河，自通州至京师为通惠河，自通州至直沽为白河，自临清至直沽为御河，自东昌须城县至临清为会通河，自三汉口达会通河为扬州运河，自镇江至常州吕城堰为镇江运河，南逾江淮，北至京师，为振古所无云。

通惠河，一名阜通河，又名坝河，上源出于白浮、瓮山诸泉。先是，中统三年，郭守敬面奏：“中都旧漕河，东至通州，引玉泉水以通舟，岁可省雇车钱六万缗。”从之。迨至元

二十八年，守敬复建言：“疏凿通州至都漕河，改引浑水溉田，于旧闸河踪迹导清水，上自昌平县白浮村引神山泉，西折而南合双塔、榆河、一亩、马眼、玉泉诸水，绕出瓮山后，汇为七里泺，东入西水门，贯积水潭，东南出文明门，东至通州高丽庄入白河，总长一百六十里一百四步。塞清水口二十处，闸坝十处，共二十座，节水以通漕运，诚为便益。”帝览奏喜曰：“当速行之。”于是复置都水监，以守敬领之。首事于至元二十九年春，告成于三十年秋，赐名通惠河。凡役军一万九千二百二十八，工匠五百四十二，水手三百一十九，没官囚奴一百七十二，计二百八十五万，用钞一百五十二万锭。工兴之日，命丞相以下皆亲操畚闸为之倡。置闸之处，往往于地中得旧时砖石，人皆叹服。船既通行，公私便之。

其闸坝之名曰：“广源闸；西城闸二，上闸在和义门外西北一里，下闸在水门西三步；海子闸，在都城内；文明闸二，上闸在丽正门处水门东南，下闸在文明门西南一里；魏村闸二，上闸在文明门东南一里，下闸西去上闸西去上闸一里；籍东闸二，在都城东南王家庄；郊亭闸二，在都城东南二十五里银王庄；通州闸二，上闸在通州西门外，下闸在通州南门外；杨尹闸二，在都城东南三十里；朝宗闸二，上闸在万亿库南百步，下闸去上闸百步。又筑阜通七坝，潭沟坝九，王村坝二，郑村坝一，西阳坝三，郭村坝二，千斯坝一，通州石坝一。宋本《都水监厅事记》，通州新坝作常庐坝。以大都至通州地势相悬高下四丈，故多为闸坝，以资蓄泄焉。

元贞元年，工部言：“通惠河创造闸坝，所费不资，全在守者上下照看修治，今拟设提领三员，管领人员专巡护之事，

其西城闸改名会川，海子闸改名澄清，魏村闸改名惠和，籍东闸改名庆丰，郊亭闸改名平津，通州闸改名通流，河门闸改名广利，杨尹闸改名溥济。”

大德六年，漕司言：“岁漕百万，全藉船坝夫力。自冰开发运，至河冻时止，计二百四十日，日运粮四千六百余石。所辖船夫一千三百余人，坝夫七百二十人，占役昼夜不息。今年水涨决坝堤六十余处，虽经修毕，巩霖雨冲圯，走泄运水。点视河堤，量加修筑，计深沟坝一万五千一百五十二工，王村坝七百十三工，郑村坝一千一百二十五工，西阳坝一千二百六十二工，郭村坝一千九百八十七工，千斯坝下一处一万工，总用工三万二百四十。”议上，中书省如所请。

至大四年，中书省臣言：“通州至大都运粮河闸，始务速成，故皆用木，岁久木朽，一旦俱败，然后致力，将恐不胜其劳。今为永固计，宜用砖石，以次修治。”从之。至泰定四年，工始竣。

天历三年，中书省臣言：“世祖时开挑通惠河，全籍上源白浮、一亩等泉之水以通漕运。今诸寺观及权势之家，私决堤堰，灌田安碇，致河淤浅妨漕事，乞禁之。”诏：“白浮、瓮山直抵大都运粮河堤堰，诸人毋挟势偷决。”大司农、都水监严禁之。

凡通惠河之上源，曰金水河，出于宛平玉泉山，流至义阳门南水门入京城。至元二十九年，中书右丞马忽速言：“金水河所经运石大河及高良河西河，俱有跨河跳槽，今已损坏，请新之。”从之。至大四年，敕引金水河注于光天殿西花园石山前旧池，置闸四，以节水势，工成，役夫匠二十九，工二

千七百二十三。

曰双塔河，出昌平县孟村一亩泉，经双塔店而东，至丰善村，合榆河，入通惠河，至元三年，巡河官言：“双塔河时将泛滥，不早为备，恐至溃决。”都水监乃差夫修治，凡合闭水口五处，用工二千一百五十五。

曰白浮、瓮山。白浮泉水，在昌平县界，西折而东，经瓮山湖，自西水门入都城。大德七年，瓮山等处看闸提领言：“自闰五月，昼夜雨不止，六月九日，山水暴发，漫流堤，冲上决水口。”都水监自九月二十一日兴工，至十月工竣，实役军夫九百九十三人。十一年三月，白浮、瓮山河堤崩三十余里，编荆笆为水口，以泄水势，计笆口十一处，四月兴工，十月工竣。皇庆元年，都水监言：“白浮、瓮山提，多低薄崩陷处，宜修筑。”来春二月入役，八月工竣，总修长三十七里二百十五步，计工七万三千七百七十。延祐元年，都水监言：“自白浮、瓮山下至广源闸堤堰，多淤，源泉不能通流。”会计工程，差军夫千人疏濬之。泰定四年八月，山水泛滥，冲决瓮山诸处笆口。自八月二十六日兴工修筑，九月十二日工竣。役军夫二千人，实役九万工，四十五日。

其西北诸泉之水汇于都城内者，为积水潭，一名海子，以石甃其四围。延祐六年，都水监计会前后，与旧石岸相接。用石三百五，各长四尺，宽二尺六寸，厚一尺，用工三百五，役丁夫五十，石工十九。至治三年，大都河道提举司言：“海子南岸东西道路，当两城要冲，金水河浸润于上，海子冲啮于下，且道狭，多泥淖，车马难行，如以石砌之，实长久之计。”从之。

金水河，又谓之隆福宫前河。至治二年，敕：金水河在世祖时濯手有禁，今则洗马者有之，比至秋疏浚，禁诸人毋得污秽。

白河，源出塞外，经朔州为潮河川，南流至通州潞县，合榆、浑诸水，亦名潞河，又东南至香河县，又过武清县，达于静海县，至直沽入海。

至元三十年九月，漕司言：“通州运粮河，全仰白、榆、浑三河之水合流，舟楫之行有年矣。今岁新开闸河，分引浑、榆二河上源之水，故自李二寺至通州三十余里，河道浅涩。今春夏天旱，有水深二尺处，粮船不通，改用小料船搬载，淹延岁月，致亏粮数。先是，都水监相视白河，自东岸吴家庄前，就大河西南，斜开小河二里许，引榆河合流至深沟坝下，以通漕舟。今丈量，自深沟、榆河上湾，至吴家庄龙王庙前白河，西南至坝河八百余步。及巡视，知榆河上源筑闭，其水尽趋通惠河，止有白佛、灵沟子母有二小河水入榆河，水浅不能胜舟。拟自吴家庄就龙王庙前闭白河，于西南开小渠，引水自坝河上湾入河榆，庶可漕运。又深沟乐岁五仓，积贮新旧粮七十余万石，站车挽运艰缓。访视通州城北通惠河积水，至深沟村西水渠，去乐岁、广储等仓甚近。拟自积水处由旧渠北开四百步，至乐岁仓西北，以小料船载甚便。”中书省议，从之。

大德五年五月，中书省言：“自杨村至河西务河堤三十五处，用苇一万九千一百四十束，军夫二千六百四十人，度三十日工毕。”都水监言：“分官自濠寨至杨村历视坏堤，督军夫修筑，以霖雨水溢，故工役倍元料，自寺洵口北至蔡村、清

口、孙家务、辛庄、河西务堤，就用元料苇草，修补卑薄，创筑月堤。其杨村两岸相对出水河口四处，苇草不敷，令军夫采刈，至九月工竣。惟杨村堤岸随修随圯，盖为用力不固，徒烦工役，其未修者俟来春水涸兴工。”

延祐六年十月，中书省言：“漕运粮储及南来商贾舟楫，皆由直沽达通惠河。今岸崩泥浅，不早疏浚，有碍舟行，必致物价腾贵。都水监职专水利，宜分官一员以时巡视，遇有颓圯浅涩，随宜修筑。如功力不敷，有司差夫助役，怠事者究治。”敕下都水监施行。

至治元年正月，漕司言：“夏运海粮一百八十九万余石，转漕往返，全藉河道通便。今小直沽汴河口潮汐往来，淤泥壅积七十余处，漕运不能通行，宜移文都水监疏浚。”工部议：“农作方兴，兼民多艰食，若不差军助役，民力有所不逮。”枢密院言：“军人不敷。”省议：“方东作之时，若差民丁，恐妨岁事。其令大都募民夫三千人，日给佣钞一两、糙粳米一升，委正官验日支給，令都水监及漕司督其役”从之。

泰定三年三月，都水监言：“河西务菜市湾水势冲啮，与仓相近，将来为患。宜于刘二总管营相对河东岸，截河筑堤，改水道与旧河合，可杜水患。”四年正月，省臣奏准，枢府差军五千，大都路募夫五千人，日支糙粳米五升、中统钞一两，都水监工部委官与前卫董指挥同监役。三月十八日兴工，六月十一日工竣。

天历二年三月，漕司言：“元开刘二总管营相对河，北旧河运粮过远，乞复浚旧河便。”四年，遣兵部员外郎邓衡、都水监丞阿里、漕使太不花等督军七千浚治。三年，又募民夫

三千人助役，兵部改委辛侍郎监之。是年，浚濠州运河，至入通惠河。

御河，出辉州苏门山，经新乡汲县而东，至大名路浚州淇水入之，名为御河。经凡城县东北，流入济宁路馆陶县西，与漳水合，又东北至临清县，与会通河合。从河间路交河县北入清池县界，永济河入之。又北至清州静海县，会白河入于海。

至元三年七月，都水监言：“运河二千余里，漕公私物货，为利甚大。自兵兴以来，失于修治，清州之南、景州之北，颓缺岸口三十余处，河流淤塞。至癸巳年，朝廷役夫四千修筑，乃复行舟。今又三十余年，无官主领。沧州地分，水面高于平地，全藉堤防。其园圃之家掘堤作井，深至丈余或二丈，引水灌园。复有濒河居民，就堤取土，渐至缺坏，走泄水势，不惟有妨粮运，或致漂没田庐。其长芦以北、索家马头以南，水内暗藏桩橛，尤为行舟之患。”工部议以滨河州县佐贰之官兼河防事，沿河巡视，修补堤堰，拔去桩橛，仍禁居民毋穿堤作井，七年武清县河溢，僉民夫浚之，历八十日工竣。

至大元年六月，左翼屯田万户府言：“五月十八日，水决会川县孙家口岸约二十余步，南流灌本管屯田。已移河间路、武清县、清州有司，发丁夫修筑。”于是，枢密院亦檄河间路左翊屯田万户府，差军并工筑塞。十月，大名路浚州言：“七月十一日连雨至十七日，清、石二水溢李家道口。询之社长，称水源自卫辉路汲县东北，连本州淇门西旧黑荡泊、溢流出岸，漫黄河古堤，东北流入本州齐贾泊，复入御河。窃计今

岁水施逆行，乃下流漳水涨溢遏绝，以致如此，实非人力可胜。又七月十二日，御河水骤涨三尺，十八日复添四尺，其水逆流，明是下流壅遏，乞差官巡治。”

延祐二年七月，沧州言：“往年景州吴桥县御河水溢，冲决堤岸。万户千奴恐伤淇河屯田，差军筑塞旧泄水郎儿口，故水无所泄，浸民庐及已熟田数万顷。及七月四日，河决吴桥县柳斜口东岸三十余步，千户移僧又遣军堵塞郎儿口，水壅不泄，必致漂荡张管、许河、孟村三十余村。本州摘官相视，移文约会开放。不从。”四年五月，都水监始遣官与河间路官相视郎儿口下流故河，至沧州约三千余里，及减水故道名曰盘河。应增浚故河，决积水，由沧州城北达滹沱河以入于海。泰定元年九月，都水遣官督丁夫五千八百九十一人。是月兴工，至十月工竣。

会通河，起东昌路须城县安民山之西南，由寿张西北至东昌，又西北至临清，达于御河。

至元十七年，江南平，置汶泗都漕运司，控引江、淮，以供亿京师。自东阿至临清二百里，舍舟而陆车运至御河，役民一万三千二百七十六户。经茌平县，地势卑，夏秋霖潦，道路不通，公私病之。于是寿张县尹韩仲晖、太史院令史边源相继言开河置闸，引汶水达于御河，较陆运利相什佰。诏廷臣议之。二十五年，遣都漕运副使马之贞偕源按视地势，之贞等图上可开之状。丞相桑哥奏言：“安民山至临清，为渠二百六十五里。若开浚之，为工三百万，当用钞三万定，米四万石，盐五万斤。其陆运夫一万三千户复罢为民，其赋入及

刍粟之估，为钞六万八千定，费略相当。然渠成，亦万世之利，请来春浚之。”从之。二十六年春正月，诏出楮币一百五十万缗，米四百石，盐五万斤以为佣直，征旁县丁夫三万，以断事官忙哥速儿、礼部尚书张孔孙、兵部郎中李处选等董其役。建闸三十有一，度高低，分远近，以节蓄泄，以六月辛亥工竣，凡用工二百五十一万七千四百四十有八，赐名会通河，置提举司职河渠事。元初，遏汶入洸，以益漕，汶始与洸、泗、沂合，独未分于北。至元二十年，自济宁新开河，分汶、泗诸水西北流至须城之安民山，入济水，故渎以达于海，而犹未通于御河。至是，又自安民山西南开河直达临清，而泗、汶诸水始通于御河焉。

二十七年，以霖雨岸崩，河淤浅，中书省臣奏，拨放罢输运站户三千，专供挑浚之役。是后，岁委都水监官一人，佩分监印，率令史、奏差、濠寨官巡视，且督工，易石闸，以工之缓急为先后。至泰定二年，始克毕事云。

会通镇闸三、土坝二，在监清北，头闸，至元三十年建。中闸，南至隘船闸三里，元贞二年至大德二年建。隘船，南至李海务闸一百五十二里，延祐元年建。李海务，南至周家店闸十二里，元贞二年建。周家店，南至七级闸十二里，大德四年建。

七级闸二：北闸，至南闸三里，大德元年建；南闸，至阿城闸十二里，元贞二年建。

阿城闸二：北闸，至南闸三里，大德三年建；南闸，至荆门北闸十里，大德二年建。

荆门闸二：北闸，至荆门南闸二里半，大德二年建；南

闸，至寿张闸六十三里，大德六年建。

寿张闸，南至安山闸八里，至元三十一年建。安山闸，南至开河闸八十五里，至元二十六年建。开河闸，南至济州闸一百二十四里。

济州闸三：上闸南至中闸三里，大德元年建；中闸，南至下闸二里，至治元年建；下闸，南至赵村铺六里，大德七年建。

赵村闸，南至石佛闸七里，泰定四年建。石佛闸，南至辛店十三里，延祐六年建。辛店闸，南至师家店闸二十四里，大德元年建。师家店闸，南至枣林闸十五里，大德二年建。枣林闸，南至孟阳泊闸九十五里，延祐五年建。孟阳泊闸，南至金沟闸九十里，大德八年建。金沟闸，南至隘船闸十二里，大德十年建。

沽头闸二：北隘船闸，南至大闸二里，延祐二年建；南闸至徐州一百二十里，大德十一年建。徐州三汉口闸入盐河，南至土山闸十八里，泰定三年建。

然惠通河以汶、泗二水为上源，故又于衮州立闸堰约泗水西流，堰城立闸堰，分汶水入河南，会于济州，以六闸撙节水势。

至元二十七年，运副马之贞言：“至元十二年，丞相伯颜访问自江淮达于大都河道。之贞乃言宋、金以来汶、泗相通河道。郭都水按视，可以通漕。二十年，中书省奉委兵部李尚书等开凿拟修石闸十四。二十一年，省委之贞与尚监察等同相视，拟修石闸八、石堰二。除已修毕外，有石闸一、石堰一、堰城石堰一，至今未修。”之贞又言：“据汶河堰城二

闸、一堰，泗河攢州闸堰，济州城南闸，乃会通河上源之喉襟。去岁堰城汶河土堰、袁州泗河土堰冲决，宜移文袁州、泰安州金夫修筑。又被水冲坏梁山一带堤堰，走泄水势，通入旧河，致新河水小，粮船滞涩，乞移文断事等官转下东平路修筑，上流拨属河淮漕司，下流属之贞管领。若已后新河水小，直下济州监闸官并泰安、袁州、东平修理。据袁州石闸一、石堰一、堰城石闸一，合用材物已行措置完备，乞移文江淮漕司修筑。其泰安州、梁山一带堤岸，济州闸等处，虽拨属江淮漕司，今后如水涨冲决堤堰，仍乞照会东平、济宁、泰安，如承文字，亦仰奉行。”中书省依所议行之。

延祐元年二月，中书省言：“江南行省起运诸物，皆由会通河以达于都，为其河浅涩，大船充塞于中，阻碍余船不得往来。每岁台、省差人巡视。据差官言，始开河时，止许行百五十料船，近年权势之人并富商大贾贪嗜货利，造三四五料或五百料船，以致阻滞官民舟楫。如于沽头置小石闸一，止许行百五十料船便。臣等议，宜依所言，中书及都水监差官于沽头置小闸一，又于临清相视宜置闸处，亦置小闸一，禁约二百料之上船，不许入河行运。”从之。

至治三年四月，都水分监言：“会通河沛县东金沟、沽头诸处，地形高峻，旱则水浅舟涩。省部已准置二滚水坝。近延祐二年，沽头闸上增置隘闸一，以限巨舟，每经霖雨，则三闸月河、截河土堰，尽为冲决。自秋摘夫刈薪，至冬水落，或来岁春初修治，工夫浩大，动用丁夫千百，束薪十万有余，数月方完，劳费万倍。又况延祐六年雨多水溢，月河、土堰及石闸雁翅日被冲啮，土石相离，深及数丈，其工倍多，至

今未完。若运金沟、沽头并隘闸三处现有之石，于沽头月河内修一所堰闸，更将隘闸移置金沟闸月河或沽头闸月河内，水大则大闸俱开，使水道动流，小则闭金沟大闸，上开隘闸，沽头则闭隘闸，而启正闸行舟。如此岁省修治之费，又可免丁夫冬寒入水之苦，诚为一劳永逸。”会验监察御史亦言：“延祐初，元省臣尝请置隘闸以限巨舟，臣等议从之。至梭板等船，乃御河、江、淮行驶之物，宜遣出任其所之，于金沟、沽头两闸中置隘闸二，各阔一丈，以限大船。若欲于通惠、会通河行运者，止许一百五十料，违者罪之，仍没其船。其大都、江南红头花船，一体不许来往。”部议从之。

泰定四年，御史台臣言：“巡视河道，自通州至真、扬，会集都水分监及沿河州县官民，询考利弊，不出两端：一曰壅决，一曰经行。自世祖屈群策，济万民，疏河渠，引清、济、汶、泗，立闸节水，以通江、淮、燕蓟，实万古无穷之利也。惟水性流变不常，久废不修，旧规渐坏，虽有智者，不能善后。辄有管见，倘蒙采录，责任都水监谨守勿失，能事毕矣。不穷利病之源，频岁差人巡视，徒为烦扰，无益。于是都水监元立南北隘闸。各阔九尺，二百料下船梁头八尺五寸，可以入闸。愚民嗜利无厌，为隘闸所限，改造减舷添仓长船至八九十尺，甚至百尺，皆五六百料，入至闸内，不能回转，动辄浅搁，盖缘隘闸之法，不能限其长短。宜于隘闸下岸立石则，遇船入闸，必须验量，长不过则，然后放入，违者罪之。”中书省下都水监，委濠寨官与济宁路、东昌路委官相视，如所议行之。

扬州运河，亦名盐河，北至三汉口，达于会通河。至元二十七年，江淮行省奏加疏浚。

延祐四年，两淮运司言：“盐课甚重，运河浅涩无源，请浚之。”明年，中书省移河南行省，委都事张奉政及宣慰司、运司、州县仓场官集议：“河长二千三百五十里，有司差濒河有田户佣夫修一千八百六十九里，仓场盐司协济有司修四百八十二里。运司言：“近岁课额增多，船灶户日贫，宜令有司通行修治，省减官钱。”中书省议准：诸色户内顾觅丁夫万人，日支盐粮钱二两，计用钞二万定，以盐司盐课及减驳船款下协济。

练湖，在镇江，为运河之上源。运河自镇江，南至常州吕城坝。

至治三年，中书省臣言：“镇江运河全藉练湖之水，官司漕运供亿京师，及商贾贩载、农民往来，其舟楫莫不由此。宋时专设人员，以时修浚。若运河浅阻，开放湖水一寸，则可添河水一尺。近年淤浅，舟楫不通，凡有官物，差民运递，甚为不便。镇江至吕城坝，长百三十里，计役民万五百十三人，六十日可毕。又用三千人浚练湖，九十日可毕。一夫日支粮三升、中统钞一两。行省、行台分官监督。合行事宜，依江浙行省所拟。”敕从之。于是江浙行省委参政董中奉董其役。

董中奉言：“练湖、运河非一事也。宜仿假山诸湖农民取泥之法，用船千艘，船三人，以竹篙捞泥，日可三载，月计九万载，三月计通取二十七万载，就用其泥增筑湖堤。自镇江城外程公坝至常州武进县吕城坝，河长一百三十一里一百

四十六步，河面阔五丈，底阔三丈，深四尺，与见有水二尺，共积深六尺。于镇江、常州、江阴州、溧阳州田多上户内均差夫役。若浚湖与开河二役并兴，卒难办集。宜先开运河，工毕就浚练湖。”中书省议从之。泰定元年正月，各监工官沿湖相视，上湖沙冈黄土，下湖茭根丛杂，泥坚硬不可簞取，又两役并兴，相去三百余里，往来监督劳费，甚愿先开运河，期四十七日工毕，次浚练湖，期二十日工毕。

是年二月，省臣奏：“开浚运河、练湖、重役也，应依行省议，仍许便宜从事。”其后各监工官言：“分运河作三坝，依元料深阔丈尺开浚，已于三月七日积水行舟。”又任奉议指划元料，增筑湖坝，共增阔一丈二尺，平面至高底滩脚，共量斜高二丈五尺。依中堰西石碣东旧堤卧羊滩修筑，如旧堤已及所料之上。中堰西石碣至五百婆堤西上增高土一尺，有缺补之。五百婆堤至马林桥堤水势稍缓，不须修治。归勘任水监元料，开运河夫万五百十三人，六十日毕，浚练湖夫三千人，九十日毕，人日支钞一两、米三升，共该钞万八千十四定二十两，米二万七千二十一石六斗，实征夫万三千五百十二人，共役三十二日，支钞八千六百七十九定三十六两，米万三千十九石五斗八升，视原料省半焉。

运河开未久，旋废不用者，曰济州河，曰胶莱河。济州河，至元十二年，姚演建议开济州泗河入大清河，至利津入海。阿合马等议从之，命阿八赤董其役。十八年十二月，遣奥鲁赤、刘都水及通算学者一人，给宣差印，往济州，定开河夫役。令大名、卫州新军助其工。然海口沙淤，船出入不

便。既而右丞麦术丁奏：“阿八赤所开河，益少损多，敕候漕司忙古鰓至议之。海道便，则阿八赤河可废。”未几，忙古鰓自海道运粮至，济州河遂废。

胶莱河，亦名胶东河，在胶州东北，分南北流，南流自胶州麻湾口入海，北流至掖县海仓口入海。至元十七年，姚演建议开新河，凿地三百余里，起胶西县陈村海口西北，至掖县海仓口，以达直沽。然海沙易壅，又水潦积淤，功讫不就。二十二年，以劳费不赀，罢之。

卷四十七

志第二十一

河渠三

浑河 滹沱河 冶河 滦河
吴松江 淀山湖 四川江堰
盐官州海塘 诸路水利

浑河，又名卢沟河，其上流为桑乾河，发源于太原之天池，伏流至朔州马邑县，浑泉涌出，曰桑乾泉，东流自奉圣州入宛平界，至都城四十里东麻峪，分为二派：一自通州高丽庄入白河，一南流至武清县合御河入于海。

太宗七年八月，河决牙梳口，刘冲禄言：“率水夫二百余人已依期修筑，恐水涨不时冲决，或贪利之人盗决溉灌，请禁之。”廷议命冲禄领其事，盗决者以违制论。如遇修筑之役，其丁夫物料于应差处调发。

至大二年十月，河决左都威卫营西大堤，没左右二卫及后卫屯田麦。三年二月，中书省下左右卫后卫及大都路督修，至五月工毕。

皇庆元年二月，东安州言：“河决黄塌堤十七所。”同知枢密院塔失帖木儿奏：“浑河决坏屯田，已发军士五百人筑决口。臣等议：治水有司事也。宜命中书省檄所属董其事。”从

之。是年六月，霖雨，浑河堤决二百余步，发民丁刈杂草筑之。

延祐元年六月，河决武清县高家庄左卫，差军士七百人与东安州民夫同修决口。二年正月，大雨，河决。三年，中书省议：“浑河决堤堰，没田禾，军民蒙害，既已奏闻。差官相视，上自石径山金口，下至武清县界旧堤，长三百四十八里，中间因旧堤修筑者四十九处，应修补者十九处。创修者八处，宜疏通者二处，计工三十八万一百，役夫三万五千，九十六日可毕。如通筑则劳费太甚，宜分三年筑之。”从之。七年四月，营田提举司言：“去岁十二月，屯户巡视广赋屯北河堤二百余步将崩，恐来春水涨，浸漫为患。”都水监季濠寨官，会营田提举司、武清县，督民夫筑之，凡用工五万三千七百二十二。

至治元年五月，运河再决。泰定元年七月，河又决。

金口河者，金时自大都西麻峪村，分引浑河。穿南山而出，谓之金口河。

至元二年，都水少监郭守敬言：“其水可以溉田。兵兴，典守者惧有所失，因以大石塞之，若按视故道，使水得通流，上可以致西山之利，下可以广京畿之漕。”又言：“当于金口西，预开减水口，西南还大河，令其深广。以防涨水突入之患。”朝廷韪其议而未行。二十八年，有言浑河自麻峪口行舟可至寻麻林，遣守敬相视，回奏不能通舟楫。

大德二年，浑河水发，都水监闭金口闸板以防之。五年，河溢，水势汹涌，守敬恐冲没南北二城，又将金口以上河身，用土石尽塞之。盖守敬已知前议之不可用矣。

至正二年正月，中书参议李罗帖木儿、都水监傅佐建言：“起自通州南高丽庄，直至西山石峡铁板，开古金水口一千二十里，凿新河一道，深五丈，广二十丈，放西山金口东流，合御河，按引海运至大都城内输纳。”是时，脱脱为右丞相，奏而行之。廷臣多言其不可，右丞相许有壬言尤力。脱脱排群议不纳，遂以正月兴工，至四月工毕，起闸放金口水，流湍迅急，须臾冲决二十余里，都人大骇。脱脱急令塞之。是役也。毁民庐舍坟墓无算，又劳费不赀，卒以无功。御史纠李罗帖木儿、傅佐之罪，俱论死。

滹沱河，出山西繁峙县泰戏山，东流经真定路真定、藁城，平山诸县，又东北抵宁晋县境，入卫河。

延祐七年十一月，真定路言：“真定县城南滹沱河，北决，浸近城。闻其源本微，与治河不相通，后二水合，势遂迅猛，屡坏大金堤为患。本路达鲁花赤哈散于至元三十年奏准，引治河自为一流，滹沱水势十减三四。至大元年七月，水溢漂南关百余家，治河口淤塞，复入滹沱。自后，岁有冲决之患。略举大德十年至皇庆元年，节次修堤，用卷埽苇草二百余万，官备佣直百余万定。及延祐元年三月至五月，修堤二百七十余步。近年米价翔贵，民匮于食，有丁夫正身应役，单丁须募人代替，佣直日不下三五贯，前工未毕，后役迭至。

延祐二年，本路总管马思忽尝开治河，已复湮塞。今岁霖雨，水溢北岸数处，浸没田庐。其河元经康家村南流，后徙于村北。数年修筑，皆于堤北取土，故南高北低，水俞趋下侵啮。西至木方村，东至护城堤，约二千余步，比来春修

治，田桩稍筑土堤，亦非经久之计。若浚木方村南枯河引水南流，闸闭北岸河口，下至合头村北与本河合，如此去城稍远，庶无水患。”都水监议截河筑堤，阔千余步，新开之岸，止阔六十步，恐不能御千步之势。莫若于北岸阙坏低薄处，比元料增夫力，苇草卷埽补筑，便拟均料各州县上中户，价钞及仓米于官钱内支給。中书首依所议行之。

至治元年三月，本路又申前议，浚木方村南旧渚，导水东南流，至合头村入本河。都水监言：“治水者，行其无事也。截河筑堤一千余步，开掘老岸，阔六十步，长三十里，霖雨之时，水拍两岸，所开河止阔六十步，焉能容纳？上咽下滞，必致溃决，徒糜官钱，劳民力非善策也。若顺其自然，增添物料、如法卷埽，修筑坚固，诚为官民便宜。”省议从之。

泰定四年八月，中书省奏：“本路言滹沱源自五台诸山，至平山县王母村山口下，与平定州娘子庙石泉冶河合，夏秋霖雨水涨，弥漫城郭，宜自王子村平安村开河，长四里余，接鲁家湾旧涧，复开二百余步，合入冶河，以分其势。又木方村南岸故道，疏浚三十里，北岸下桩卷埽，筑堤捍水东流。今岁储材，九月兴工，十一月工竣。物料佣值，官为供给，庶几力省工多，永免异日之患。工部议，二河并治，役重民劳，应先开冶河，如本路民夫不敷，可于顺德路差募，如侵碍民田，官酬其直。”后真定路又言：“闰九月以后，天寒地冻，难于兴工，宜俟来春开浚。”奏上，诏如所请。

冶河，出井陘县山中，经平山县西门外，又东北流十里入滹沱河。

元贞元年正月，丞相完泽等言：“往年先帝尝命开真定治河，已发丁夫。适先帝升遐，以聚众罢之。今宜遵旧制，卒其事。”从之。

皇庆元年七月，治河龙花、判官庄诸处堤坏，都水监与本路官议：自平山县西北，改修滚水石堤、下修龙塘堤，东南至水碾村，开河道一里，又至蒲吾桥西，开河道一里，疏其淤淀，筑堤分上流入旧河，以杀水势。又议于栾城县北圣母堂治河东岸，开减水河，以去真定水患。省议俱从之。

滦河，源出金莲川，由松亭北，经迁安东、平州西，至滦州入海。

至元二十八年，敕姚演浚滦河挽舟而上，漕运上都。寻遣郭守敬相视，以难于施工而罢。

大德五年六月，大雨，滦河与肥、洳二水并溢水入城，官民庐舍漂荡殆尽。中书省委吏部员外郎马之贞与都水监官修之。东西二堤，计用工三十一万一千五百，钞八千八十七定十五两，桩木等价钞二百十四定二十六两。

延祐四年六月，上都留守司言：“城南御河西北岸为河水冲啮，渐至颓坏，恐水涨，漂没居民。请调军供役，庶可速成。”敕曰：“今维其时，宜发军速为之。”于是虎贲司发三百人供其役。

泰定三年七月，右丞相塔失帖木儿等奏：斡耳朵思住人营盘，为滦河走凌冲坏，应筑护水堤，请敕枢密院发军一千二百人修之。从之。

吴松江，受太湖诸水，东汇淀山湖以入海，潮汐淤沙，湮塞河口。宋人置撩洗军以疏导之。世祖取江南，罢散军人，又任势豪租占田荡，淤垫益甚。

至治三年，江浙行省言，嘉兴路高治中、湖州路丁知事同本管正官体究旧浚通海故道，及新生沙涨应开河道五十处，内常熟州九处，昆山州十处，嘉定州三十五处，其松江府各属应浚河渠，华亭县九处，上海县十四处。上海、嘉定连年旱涝，皆缘河口淤塞，旱则无以灌溉，涝则不能流泄，累致凶歉，官民俱困。至元三十年以后，两经疏浚，稍获丰稔。比年又复壅塞。势家租占愈多。上海县岁收官粮十七万石，民粮三万余石，延祐七年灾伤五万八千七百余石，至治元年灾伤四万九千余石，二年十万七千余石，水旱连年，殆无虚岁。近委人相视，讲求疏浚之法，其通海大江，未易遽治，旧有河港联络官民田土之间、藉以灌溉者，今皆填塞，必须疏通，以利耕稼。欲令有田民户自为整治，而工役浩大，民力不能独举。由是议，上海、嘉定河港，宜令本处管军、民、官、站、灶、僧、道诸色有田者，以多寡出入，备粮修治，州县正官督役。其豪势租占田荡者。并当除辟。民间粮税权免一年，官租减半。华亭、昆山、常熟州河港，比上海、嘉定缓急不同，从各处正官督有田之家，备粮并工修治，既阴阳家言：癸亥年通土有忌，预为咨呈可否。

至泰定元年十月兴工，旭迈杰等奏请依所议行之，命脱颜答剌罕诸臣同提调，监察左丞朵儿只班及前都水少监董其役。

淀山湖，与太湖相通，东流入海。

至元末，参知政事梁德珪言：“忙古赳请疏治淀山湖，因受曹总管金而止。张参议等相随言之，识者咸以为便。臣等议，此事可行无疑。请选委巡行官相视，会计合同军夫。”帝从之。既而平章政事帖哥言：“民夫足用，不须调军。”帝曰：“有损有益，其均齐并科之。”

未几，世祖崩，成宗即位。帖哥又其言事，且建议用湖田粮三万石，以募民夫四千、军四千隶于都水防田使司，职掌收捕海贼，修治河渠等事。帝命伯颜察儿与枢密院同议，并召宋降臣范文虎及朱清、张瑄询之。瑄等言：“亡宋屯守河道，用手号军，大处千人，小处不下三四百人，隶巡检司管领。文虎言：“差夫四千，非动摇四十万户不可，若令五千军屯守，就委万户一员，事或可行。”枢府黻文虎言，奏行之。

四川江堰，凡一百三十有二处，岁治堤防役民兵多者万余人，少者犹千人或数百人。役例七十日，不及七十日，虽竣不得休息。不役者，日出钞三贯为佣直。岁费不下七万贯，官民俱困。

元统二年，四川肃政廉访司佥事吉当普巡视，得要害之处三十有二，余悉罢之。与灌州州判张宏议，甃以石。宏出私钱，试为小堰。堰成，水暴涨而堰不动。遂决计行之。

至元元年七月兴工，先从事于都江堰。少东为大小钓鱼，又东跨二江为石门，以节北江之水，又东为利民台，又东南为侍郎、杨柳二堰，其水自离堆分流入于南江。

南江东至庙角，又东至金马口，又东过大安桥，入于成

都，俗名大皂江，江之正源也。又东为虎头山、斗鸡台。台有水则，以尺画之，凡十有一。水及其九，其民喜，过则忧，没则困。又书“深淘滩，高作堰”，相传为秦守李冰所教云。又东为离堆，又东至三石洞，酺为二渠。其一自上马骑东流入成都，古之外江也。

南江自利民台有支流，东南出万工堰，又东为骆驼堰，又东为碓口堰，鹿角之北涯，有渠曰马坝，东流至成都，入于南江。渠东行二十余里，水决其南涯四十有九处。乃自其北涯凿二渠，与杨柳渠合，又东与马灞渠合，自金马口之西凿二渠，合金马渠，东南入于新津江，罢蓝淀、黄水、千金、白水、新兴至三利十二堰。

北江三石洞之东为外应、颜上、五斗诸堰，其水皆东北流于外江。外江东至崇宁，亦为万工堰。堰之支流，自北而东，为三十六洞，过清白堰东入彭、汉之间。而清白堰水溃其南涯。乃疏其北涯旧渠，直流而东，罢南涯之堰及三十六洞之役。

他如嘉定之青神，有堰曰鸿化，则授成于长吏，应期功毕。成都之九里堤，崇宁之万工堰，彰之壩口、丰洞诸堰，未及施功，则使长吏于农隙为之。诸堰，都江及利民台之役最大，侍郎、杨柳、外应、颜上、五斗次之，鹿角、万工、骆驼、碓口、三利又次之。都江居大江中流，故以铁万六千斤铸大龟，贯以铁柱，置堰下以镇之。诸堰皆甃以石，范铁以关其中，取桐油，和石灰，杂麻杲，而捣之使熟，以苴罅漏。岸善崩者，密筑碎石以护之。所至或疏旧渠以导其流，或凿新渠以分其势。遇水之会，则为石门，以时启闭。五越月，工

竣。吉当普以监察御史召，省台上其功，诏学士揭傒斯撰碑文以旌之。

盐官州海塘，去海岸三十里。旧有捍海塘二，后又添筑咸塘。大德三年，塘岸崩，中书省遣礼部郎中游中顺，与本省官相视，以虚沙难于施力，议筑石塘。又以劳费甚，不果，延祐中，盐官州海溢，累坏民居，陷地三十余里，行台、行省官共议于州城北门外添筑土塘，再筑石塘，东西长四十三里，又以潮汐河涨而止。

泰定四年六月，海溢，盐官州告灾，乃遣使祀海神，与有司视形势所便，复议筑石塘捍海。诏曰：“筑塘是重劳吾民也，其增石囤捍御，庶天其相之。”

先是，致和元年，江浙行省建议作籬籐，实以石，鳞次叠之，以御海潮。已而皆沦于海。乃改造石囤，以救一时之急焉。未几，杭州路又言：“八月以来，秋潮汹涌，水势愈大，见筑沙地塘岸，东西八十余步，造木柜石囤以塞其要处。本省左丞相脱欢等议，安置石囤四千九百六十，以资抵御。计工物，用钞七十九万四千余定，粮四千余石，接续兴修。”中书省议遣户部尚书李家奴、工部尚书李嘉宾、枢密院属卫指挥青山、副使洪灏、宣政院佥事南哥班与行省左丞相脱欢及行台、行宣政院，庸田使司，会议修治之策。合用军夫，除戍守州县关津外，酌量差拨，从便支給口粮。合役丁力，附近有田之民及僧，道、也里可温、签迭儿等户内点佥。凡工役之时，诸人毋或沮坏，违者罪之。既而李家奴等以已置石囤，不曾崩陷，是已略见成效，乃东西接垒十里，其六十里

塘下旧河，就取土筑塘，以备崩坏焉。

天历元年，都水庸田司言：“八月十四日，祈请天妃入庙。十五日至十九日，海岸浮沙东西长七里余，南北广或三十余步，或数十百步，渐见南北相接。西至石囤，已及五都，修筑捍海塘与盐塘相接。石囤东至十一都六十里塘，东至大尖山嘉兴、平湖三路所修海口。自八月一日，探海二丈五尺。至十九日探之，先二丈者今一丈五尺，先一丈五尺者今一丈。西自六都仁和县界赭山、雷山为首，添涨沙涂，已过五都四都，盐官州廊东西二都，沙土流行，水势俱浅。二十七日至九月四日大泛，本州岳庙东西，水势俱浅，涨沙东过钱家桥海岸，元下石囤木植，并无颓圯，水息民安。”诏改盐官州曰海宁州。

诸路水利之可考者。中统三年，中书左丞张文谦荐邢台郭守敬习水利，征诣行在。守敬面陈六事：其一，引玉泉水及开蘆榆河，已见前。其二，顺德达活泉引为三渠，灌城东之地。其三，顺德泮河东至古任城，失其故道，没民田一千三百余顷。若开河，自小王村合滹沱入御河，可通舟楫，其田亦可耕种。其四，磁州东北漳、滏二水合流处，开引河，由滏阳、邯郸、洺州、永年，下经鸡泽，入泮河，可溉田三千余顷。其五，怀孟沁河虽已通渠溉，尚有漏堰余水，与舟河相合，开引东流，至武陟县，北合御河，可溉田千余顷。其六，黄河自孟州西，开引河，经新旧孟州中间，顺河古岸下至温县，南入大河，其间亦可溉田二千余顷。帝喜曰：“成吾国家之务者，其斯人乎！”并依所奏行之。

至元元年，守敬从文谦行省西夏。其濒河五州，皆有古渠。在中兴州者，一名唐东渠，长袤四百里，一名漫延渠，长

袤二百五十里。他州渠十，长袤各二百里，支渠大小六十有八。计溉田可九万余顷。兵乱后，皆淤废。守敬因古道疏浚之。更立闸堰。役不逾时，诸渠皆通利。二年，守敬入为都水少监，奏言：“臣向自中兴还，顺河而下，四昼夜至东胜，可通漕运。又查泊兀郎海，古渠甚多，皆应修理。”帝并颺之。元一代治水利者，咸推服守敬，以为不可及云。

其后，学士虞集建畿辅水利议，谓：“京师之东，濒海数千里，北极辽海，南滨青、徐、萑苇之场也，海潮日至，淤为沃壤。用浙人之法，筑堤扞水为田，听富民愿得官者，合其众分授以地。官定其畔以为限制，能以万夫耕者，授以万夫之田，为万夫之长，千夫、百夫亦如之，察其惰者而易之。一年勿征也。三年视其成，以地之高下定额于朝廷，以次渐征之。五年有积蓄，命以官，就所储给以禄。十年佩之符印，以传子孙，如军管之法，则东西民兵数万，可以近卫京师，外御岛夷、宽东边之运，以行疲民，遂富民得官之志，而获其用。江海游食盗贼之类，亦有所归。

至正十二年，丞相脱脱当国，遂仿集之议，奏：“京圻近水地，召募江南人耕种，岁可收粟麦百余万石。不烦海运，京师足。”上从之。于是西自西山，南自保定、河间，北抵檀、顺，东至迁民镇，凡系官地及原管各处屯田，悉从司农司立法佃种。合用工价、牛具、农器、谷种，给钞五百万锭。命悟良合台、乌古孙良桢并为大司农卿。又于江南召募能种水田及修筑围堰之人，各一千。为农卿降空名，添设职事敕牒十二道，募农夫一百名者，授正九品；二百名，正八品；三百名，正七品；就令管领所募之人。所募农夫，每名给钞十

定。未几，中原盗起，脱脱亦罢斥，其建置卒无成效。

后至元五年，洛磁路言：“洺州城内井泉咸苦，居民饮之多疾，有死者。请疏浚旧渠，置闸坝，引滏水。分灌洺州城濠，以济民用。计会渠东西长九百步，阔六尺，深三尺，役四百七十五工，民自备器用。岁二次放闸，不妨漕事。”中书省议从之。

广济渠者，在怀孟路，引沁水以达于河。先是，中统二年，提举王允中、大使杨端仁奏诏开渠。修石堰长一百余步，高一丈三尺。石斗门桥，高二丈，长十四步，阔六步。渠四道，计六百七十里，经济源、河内、河阳、温、武陟五县。渠成，民甚利之，赐名广济渠。三年八月，中书省臣忽鲁不花等奏：“广济渠司言，沁水渠成，今已验工分水，恐久远权豪侵夺。”乃下诏依本司所定水分，已后毋许侵夺。

至大三年，怀庆路同知阿合马言：“天久旱，秋谷种不入土。近访问耆老，咸称丹水浇灌山田，居民深得其利。有沁水亦可溉田，中统间王学士亦为天旱，奉诏开此渠，募自愿人户于沁口古迹，置分水渠口，开渠四道，历温、陟入河，约五百余里，渠成名曰广济渠。设官提调，遇旱则官为斟酌，验工多寡，分水浇灌，济源等处五县民田三千余顷咸受其赐。二十余年后，因豪家截河起堰，立碾磨，壅水势。又经霖雨，渠口淤塞。河渠司旋亦革罢，有司不为整顿，因致废坏。今五十余年，分水渠口及旧渠迹，均尚可考。若蒙依前浚治，引水溉田，于民大便。”寻据孟州等处申言：“旧日沁水筑土堰，遮水入广济渠，岸北虽有减水河道，不能吞伏，后值霖雨，荡没田禾，以此堵闭。今若枋口上连土岸，置立石堰，复还本

河，又从减水河分杀其势，如此庶不为害。”工部牒都水监相视施行。

三白渠，在京兆路，太宗十一年，梁泰奏请修三白渠堰，比之旱地，其收数倍。帝从之。仍敕泰佩元降金符，充宣差，规措三白渠，以郭时中副之，置司于云阳县。所用田户及牛畜，敕塔海绀不于军前应副。

洪口，在奉元路。至治元年十月，陕西屯田府言：“年例八月差水户，自泾阳县西仲山下截河筑堰，改泾水入白渠，下至泾阳县北白公斗，分为二限，并平石限，盖五县分水之要所。北限入三原、栌阳、云阳，中限入高陵，南限入泾阳，浇官民田七万余亩。近至大三年，陕西行台御史王琚言：泾阳洪口展修石渠，为万世之利。计展修八十五步。用石十二万七千五百尺，石工二百人，丁夫三百人，金火匠二人，火焚水淬，日凿石五百尺，二百五十日工毕。延祐元年二月兴工，石性坚厚，凿至一丈，水泉涌出。乃续展十七步，石积二万五千五百尺，增夫匠百人，日凿六百尺，一百四十二日工毕。”

天历元年六月，泾水溢洪口堰及小龙堆尽圯。水入泾，白渠内水浅。屯田府以为言。陕西行省议：“洪口自秦汉至宋，一百二十激，经由三限，分浇五县民田七万余顷。验田出夫千六百人，自八月一日修堰，至十月放水溉田，以为年例。近奉元亢旱，人相食，流亡疫死者十七八，差役不能办集。今修堰，除见在户依例差役，其逃亡之家合出夫数，宜令泾阳县近限水利户添差一人，官日给米一升，并工修筑。”中书省依所议行之。

泾渠，宋名丰利渠，移古白渠口上五十余步。

元至元中，立屯田府。大德八年，泾水暴涨，渠堰坏，屯田总管府夹谷伯颜帖木儿与泾源尹王琚疏导之。编荆作囤，贮之以石，复填以草，叠为堰，岁时修筑，未尝废圯。

至大元年，王琚为西台御史，建言于丰利渠上移北二百余步，更开石渠五十一丈，阔一丈，深五尺，方一尺为一工，用十五万三千工。自延祐元年兴工，五年渠成，名为御史渠。

至正三年，御史宋秉元言：渠积年坎取淤土，叠于岸，岸益高，送土不易，请开鹿巷以便夫役。廷议从之。三十年，行省左丞相帖里帖木儿遣都事杨钦修治，凡溉田四万五千余顷。

古郑渠，东北行，合冶谷、清谷、浊谷诸水，迳富平、蒲城以注于洛白渠，东南行，循泾水，迳高陵、临潼以注于渭。郑渠湮已久，后世所谓白渠者，引水出中山口，亦非汉白之旧。元渠本宋之丰利渠，更移北二百余步，愈非旧白渠矣。

卷四十八

志第二十二

百官一

世祖命刘秉忠、许衡定官制，以中书省管政事，枢密院管兵，御史台司纠劾，又设行省、行台，使内外均其轻重，以相维系，立法之善，殆为唐宋所不及。然上自中书省，下逮郡县亲民之吏，必以蒙古人为之长，汉人、南人贰之。终元之世，奸臣恣睢于上，贪吏掊克于下，痛民蠹国，卒为召乱

之阶甚矣。王天下者，不可以有所私也。至一事而分数官，一官而置数员，秩位滥于遥授，事权隳于添设，率大德以后之所增益，不尽为世祖旧制也。《元典章》之内外文武职品，与旧史亘有同，今亦附著下方，备参考云。

太师、太傅、太保为三公。正一品。太祖十二年，以木华黎为太师，后又以耶律秃花为太傅。太宗时，耶律阿海为太师，耶律秃花为太傅，石抹明安为太保，皆崇以位号，无专职。世祖至元元年，以刘秉忠为太保。至成宗以后，始三公并建。《元典章》：太师府、太傅府、太保府参军，俱正五品。又有太尉、大司徒、司徒，大司徒，秩从一品。余品秩无考。至元十九年，罢司徒府。或置或不置；其置者，或开府或不开府。大德十一年，又置太子太师、少师、太傅、少傅、太保、少保，寻并罢。

中书省：中书令一员。太宗二年，立中书省，以耶律楚材为中书令。自世祖以后，为皇太子兼官。中统三年，以皇子燕王守中书令。至元十年，立燕王为皇太子，仍兼中书令。大德十一年，以皇太子领中书令。延祐三年，以皇太子行中书令。至正十三年，命皇太子领中书令。

右丞相、左丞相各一员。正一品。《元典章》：中书左、右丞相，均从一品。未详何时改正一品。元初官制，中书令正一品，左、右丞相从一品。居令之次，令缺则总省事，佐天子理万机。

平章政事四员。从一品。贰丞相，凡军国重事，无不由之。

右丞、左丞各一员。正二品。副丞相裁成庶务，号左右辖。

参知政事二员。从二品。参决大政，其职亚于丞。

参议中书省事。正四品。典左右司文牒，为六曹之管辖。

左司：郎中二员，正五品。员外郎二员，正六品。都事二员。正七品。掌吏礼房之科有九，一曰南吏，二曰北吏，三曰贴黄，四曰保举，五曰礼，六曰时政记，七曰封赠，八曰牌印，九曰好事。知除房之科有五，一曰次品，二曰常选，三曰台院选，四曰见缺选，五曰别里哥选。户杂房之科有七，一曰定俸，二曰衣装，三曰羊马，四曰置计，五曰田土，六曰太府监，七曰会总科。粮房之科有六，一曰海运，二曰攒运，三曰边远，四曰赈济，五曰事故，六曰军匠。银钞房之科有二，一曰钞法，二曰课程。应办房之科有二。一曰饮膳，二曰草料。

右司：郎中二员，员外郎二员。都事二员。品秩同前。掌兵房之科有五，一曰边关，二曰站赤，三曰铺马，四曰屯田，五曰牧地。刑房之科有六，一曰法令，二曰弭盗，三曰功赏，四曰禁治，五曰枉勘，六曰斗讼。工房之科有六，一曰攒造军器，二曰常课段匹，三曰岁赐，四曰营造，五曰应办，六曰河道。

照磨一员，正八品。掌磨勘左右司钱谷出纳、营缮料例，凡数计、簿籍之事，皆领之。

管勾一员，正八品。掌纳四方文移，邮递之程期，曹司之承受。

架阁库管勾二员，正八品。掌度藏省府帐籍案牒。

至正元年，吏兵刑分为二库，户工分为二库，各设管勾一员。

又蒙古架阁库管勾一员，回回架阁库管勾一员。品秩同前。

太宗二年始置左、右丞相，以粘合重山、镇海为之。

世祖中统元年，立行中书省于燕京、置中书丞相一员，平章政事二员，参知政事一员。二年，增置右丞相二员，左丞相二员，平章政事四员，右丞一员，左丞二员，参知政事二员。三年，增左右丞为四员。

至元二年，增置丞相五员，不分左、右。四年，复省为右丞相一员，左丞相一员。七年，立尚书省，中书省增置左丞相一员，平章政事以下如故；尚书省置平章政事一员，同平章事一员，参知政事三员。九年，罢尚书省，左丞相仍省为一员，平章政事三员，左、右丞各一员，参知政事二员。二十三年，定省台院部官，中书省除令外，左、职丞相各一员，平章政事二员，左、右丞各一员，参知政事二员。二十四年，复立尚书省，置尚书平章政事二员，尚书右丞、左丞各一员，参政政事二员；中书省左、右丞缺不置。二十五年，尚书省置右丞相一员，中书省罢左丞相不置。二十八年，罢尚书省，专任一相，增中书平章政事为五员，一员为商议省事。三十年，又增平章政事一员，置右丞二员，一员为商议省事。

元贞元年，改商议省事为平章军国重事。从一品。

大德三年，复置左丞相。七年，诏中书省设官，自左右丞相以下，平章二员，左右丞各一员，参知政事二员，定为八府。

至大二年，再立尚书省，置尚书省左、右丞相各一员，平章政事三员，左、右丞各一员，参知政事二员；中书省增平章政事为五员，右丞二员，左丞三员。四年，尚书省并入中书省，尚书省丞相以下诸官并罢；中书省左、右丞相为四员，参知政事三员。

至顺元年，定平章政事为四员，右丞一员，左丞一员，参知政事二员。三年，以燕铁木儿专权，专任一相，不设左丞相。自后，左丞相或置或不置。

元统三年，命右丞相伯颜独长台司。

后至元五年，加右丞相伯颜为大丞相。八年，命脱脱为右丞相，复置左丞相。

至正七年，置议事平章四员。十二年，以贾鲁为添设左丞，悟良合台为添设参知政事，又以杜秉彝为添设参政，哈麻为添设右丞。十四年，以吕思诚为添设左丞。二十七年，以蛮子为添设第三平章，帖里帖木儿为添设左丞相。

参议中书省事，中统元年始置一员，至元二十二年累增至六员，大德元年省为四员。其治曰参议府、左右司，中统元年置，后改给事中、中书舍人，校正等官。至元九年，仍设左右司，并为一司。十五年，分置两司。至大二年，并左右司为一。四年，仍分置如旧制。

照磨，中统元年置二员，至元八年省为一员。

管勾，中统元年置二员，至元三年省为一员。

架阁库管勾，至元三年始置二员，其后增置员数不一，至顺初定为二员。

断事官，正三品。元初职行最重，以御位下及中宫、东

宫诸王各投下怯薛丹等人为之。中统元年，十六位下置三十一员。至元六年，十七位下置三十四员。七年，十八位下置三十五员。二十八年，分立两省断事官，随省并置。二十九年，十八位下置三十六员，并入中书省。三十一年，复增二员。后定置，自御位下及诸王位下共四十一员。

经历一员，从七品。

知事一员。从八品。

客省使。正五品。使四员，正五品。副使二员，正六品。掌直省舍人、宣使等选举差遣之事。

检校官四员，正七品。掌检校左右司、六部公事程期、文牒稽失之事。

至元九年，置客省使二员，一员兼通使，一员不兼。二十八年，置中书省检校官二员，考核户工部文案疏缓者，大德元年，增置使四员，副使二员，检校官四员。至元七年，置直省舍人二员，后增置三十三员，掌给使差遣之役，无品级，与宣使等。至大二年，置尚书客省使、副各一员，尚书省罢，应与同罢。

详定使司：正三品。使二员，正三品。副使二员，正四品。掌书记二员。正七品。掌详定四方献言，择其善者以闻于上。至正十七年置，以中书官提调之。

吏部：尚书三员，正三品。侍郎二员，正四品。郎中二员，从五品。员外郎二员。从六品。掌官吏选授调补之政令，及勋封爵邑之制，考课殿最之法。中统三年，以吏户礼为左三部，尚书二员，侍郎二员，郎中四员，员外郎六员。至元

二年，吏礼自为一部，尚书三员，侍郎仍二员，郎中仍四员，员外郎三员，三年复为左三部，吏部仍设考功郎中、员外郎、主事正七品。各一员。五年，又合为吏礼部，尚书仍二员，侍郎、郎中、员外郎各一员。七年，始分六部，吏部尚书一员，侍郎一员，郎中二员，员外郎二员。八年，复为吏礼部，尚书、侍郎、郎中各一员，员外郎二员。十三年，分置吏部，尚书增置七员，侍郎三员，郎中二员、员外郎四员。十九年，尚书减为二员，侍郎一员，郎中一员，员外郎二员。二十一年，增尚书一员。案旧史本纪：二十一年，升六部尚书为二品，未知何时复降三品。二十三年，定六部尚书、寺郎、郎中、员外郎各二员。二十八年，增尚书为三员，主事三员。大德元年，增吏部尚书一员。至大二年，增郎中、员外郎、主事各一员。四年，罢增置之员，如旧制。后至元三年，考功郎中、员外郎、主事各设一员。至正元年，置司绩一员。正七品。掌考察百官行止，以凭叙用。

户部：尚书三员，侍郎二员，郎中二员，员外郎三员。品秩同前。掌天下户口、钱粮、田土之政令，及贡赋之出纳，金币之转通，府藏之委积。中统元年，以吏户礼为左三部尚书。至元二年，分立户部，尚书三员，侍郎、郎中四员，员外郎三员。三年，复为左三部。五年又分为户部、尚书一员，侍郎、郎中各一员，员外郎二员。七年，增尚书一员，侍郎、郎中一员。十三年，又增尚书一员。十九年，郎中、员外郎俱增至四员。二十一年，省泉府司入户部。至元十六年，置泉府司。《元典章》：泉府大卿，从二品；泉府司富藏库使，从

七品。二十三年，六部尚书、侍郎、郎中、员外郎定以二员为额。明年，以户部所掌繁剧，增尚书二员。大德五年，省尚书一员、员外郎一员置主事八员，至大二年，增侍郎、员外郎各一员，四年，罢增置之员，如旧制。至正元年，设司计官四员，依至元二十八年例添设二员。正七品。共属附见于后：《元典章》：户部尚书规措应昌运粮事，正三品。

都提举万亿宝源库，掌宝钞、玉器。都提举一员，正四品。提举一员，正五品。同提举一员，从五品。副提举一员，从六品。知事一员，从八品。提控案牒一员。《元典章》：宝源总库有达鲁花赤一员，从五品。至元二十五年，置分万亿库为四库：曰宝源、广源、绮源、赋源。

都提举万亿广源库，掌香药、纸札等物。置官同上。提控案牒二员。

都提举万亿绮源库，掌诸色段匹。置官品秩同前。惟提举增一员。提控案牒三员，后省二员。《元典章》万亿储支纳一员，从七品。

都提举万亿赋源库，掌丝线、布帛等物。置官。品秩同前。提控案牒二员，后省一员。

四库照磨兼架阁库。管勾一员，从九品。至元二十八年置。

提举富宁库，掌万亿宝源库出纳金银之事。提举一员，从五品。同提举一员，从六品。副提举一员，从七品。至元二十七年置。

诸路宝钞都提举司，掌交钞公事。达鲁花赤一员，正四品。都提举一员，正四品。副达鲁花赤一员，正五品。提举

一员，正五品。同提举一员，从五品。副提举二员，从六品。知事一员，从八品。照磨一员。从九品。至元七年，案旧纪宪宗癸丑，立交钞提举司，与志不合。立交钞提举司。正五品。至元八年罢。十三年又置行户部于大名，掌印造交钞。二十四年，改诸路宝钞都提举司，升正四品，增副达鲁花赤、提控案牘各一员。后定置各员，又增提控案牘一员。

宝钞总库，达鲁花赤一员，从五品。大使一员，从五品。副使三员。正七品。至元二十五年，改元宝库为宝钞库。正六品。二十六年，升从五品。本纪：二十五年，升宝钞总库永盈库为从五品。未详孰误。永盈库，二十六年罢，以所领币帛入太府监及万亿库。增大使、副使诸员。

印造宝钞库，达鲁花赤一员，正七品。大使一员，从七品。副使二员。正八品。中统四年，始置大使。从八品。至元二十四年，升从七品，增达鲁花赤一员。后定置诸员。

烧钞东、西二库，达鲁花赤各一员，正八品。大使各一员，从八品。《元典章》作正八品。副使各一员。从九品。至元元年，昏钞库始置监钞昏钞官，用正九品印。二十四年，分立烧钞东西二库，置达鲁花赤等员。二十八年，罢大都烧钞库，各路昏钞令行省官监烧。《元典章》：行省烧钞库大使，正九品。

诸路宝泉都提举司，至正十年置，其属曰鼓铸局，秩正七品。曰永利库，秩从七品。掌鼓铸铜钱、印造宝钞。

行用六库。中统元年，立中都行用库，提领一员，从七品。大使一员，从八品。副使一员，从九品。《元典章》：大都平淮十行用库大使，从九品。至元二十四年，大都改置库

者三：曰光熙，曰文明，曰顺承。二十六年，又置三库：曰健德，曰和义，曰崇仁。皆因城门之名为名。

大都宣课提举司，掌诸色课程，并领京城各市，提举二员，从五品。同提举一员，从六品。副提举一员，从七品。提控案牒一员。至元十九年，并大都旧城两税务为大都税课提举。《元典章》：大都税课提举，从五品，乃至大以前官制。至大元年，改宣课提举司。其属曰：

马市猪羊市，提领一员，从七品。大使一员，从八品。副使一员，从九品。至元三十年置。

牛驴市果木市，设官同前。

鱼蟹市，大使一员，副使二员。至大元年置。

煤炭所，提领一员，从八品。大使一员，从九品。副使一员，至元二十二年置。

大都酒课提举司，掌酒醋榷酤之事。提举一员，从五品。同提举二员，从六品。副提举一员，从七品。提控案牒二员。至元八年置。廿八年，省同提举一员、副提举一员。《元典章》：鸳鸯泊仓粮酒务，从五品；泥河仓粮酒务大使，龙兴酒务大使，俱从九品。

钞纸坊，提领一员，正八品。大使一员，从八品。副使二员。从九品。中统四年置，用九品印，止设大使、副使各一员。至元二十七年，升正八品，增提领、副使各员。

印造盐茶等引局，掌印造腹里行省盐、茶、矾、铁等引，大使一员，从八品。副使一员。从九品。元二十四年置。

京畿都漕运使司，秩正三品。运使二员，正三品。《元典章》：京畿都漕运使司达鲁花赤，正三品。同知二员，正四品。

副使二员，正五品。判官二员，正六品。经历一员，正七品。知事一员，从八品。提控案牘兼照磨一员。正九品。掌凡漕运之事。中统元年，立军储所。至二十七年，改储峙提举司为军储所，乃别立一官，非中统元年所置者。四年，改漕运河渠司。旧纪至元元年立漕运司，十五年罢，以其事隶行中书省。与志彼此互异，未详孰误。至元二年，改漕运司。十二年，改都漕运司。秩正五品。十九年，改京畿都漕运使司。秩正三品。二十四年，内外分立两运司。京畿都漕运司之额如旧，止领京仓出纳粮斛及新运粮提举司攒运公事，省同知、判官、知事各一员。延祐六年，增同知、副使、判官各一员。后定置正官各二员，首领官四员。后至元二年，增提调官、运副、运判各一员。九年，增海道巡防官二员，经正七品印，相副官二员。

新运粮提举司，秩正五品。达鲁花赤一员，正五品。都提举一员，正五品。同提举二员，从六品。副提举一员，从七品。吏目一员，管站车二百五十一辆。至元十六年置。延祐三年，改为京畿运粮提举司。

京师二十二仓：秩正七品。万斯北仓，中统二年置。万斯南仓，至元二十四年置。千斯仓，中统二年置。永平仓，至元十六年置。永济仓，至元四年置。惟亿仓，既盈仓，大有仓，并皇庆元年置。屡丰仓，积贮仓，并皇庆元年增置。以上十仓，各仓置监支纳一员，正七品。大使二员，从七品。副使二员。正八品。丰穰仓，广济仓，并皇庆元年置。广衍仓，至元二十九年置。大积仓，至元二十八年置。既积仓，盈衍仓，并至元二十六年置。相因仓，中统二年置。顺济仓，至

元二十九年置。以上八仓，各置监支纳一员，大使二员，副使二员。通济仓，中统二年置。庆贮仓，至元四年置。丰实仓，置年缺。以上三仓，各置监支纳一员，大使一员，副使一员。

通惠河运粮千户所，秩正五品。中千户一员，正五品。中副千户二员。正六品。至元三十一年置。

都漕运使司，秩正三品。运使二员，正三品。同知二员，正四品。副使二员，正五品。运判三员，正六品。经历一员，从七品。知事一员，从八品。提控案牒二员，内一员兼照磨，正九品。掌御河上下至直沽、河西务、李二寺、通州等处漕运。至元二十四年，立置总司于河西务，置分司于临清。其属仓七十有五：

河西务十四仓：秩正七品。永备南仓，永备北仓，广盈南仓，广盈北仓，充溢仓，以上五仓，各置监支纳一员，正六品。《元典章》：永备仓提点，从五品。大使二员，从六品。副使二员。正七品。崇墉仓，大盈仓，大京仓，大稔仓，足用仓，丰储仓，丰积仓，恒足仓，既备仓，以上九仓，各置监支纳一员，大使一员，副使一员。《元典章》：万盈、广积、永备、景运、平盈五仓，副使俱正七品。永盈仓副使，从七品。大有、忙安、广盈、和余、新城、丰州、广盈，平地县平济，云内州广贮八仓，监支纳俱正八品。大有，和余、忙安、丰州、广盈，云内州广贮，静州广贮，新州广盈，东胜州大盈，平地县平济十仓，大使俱正九品。丰储仓大使，从九品。

通州十三仓：秩正七品。有年仓、富有仓、广储仓、盈

止仓、及秭仓、乃积仓、乐岁仓、庆丰仓、延丰仓，以上九仓各置监支纳一员、大使二员、副使二员，足食仓、富储仓，衍仓、富及衍仓，以上四仓，各置监支纳一员、大使二员、副使一员。

河仓十七，用从七品。印馆陶仓，旧县仓、陵州仓、傅家池仓，以上四仓，各置监支纳一员、从七品。大使一员、从八品。副使一员。秦家渡仓、尖冢西仓、尖冢东仓、长芦仓、武强仓、夹马营仓、上口仓、唐宋仓、唐村仓、安陵仓、四柳树仓、淇门仓、伏恩仓，以上十三仓，各置监支纳一员、从八品。大使一员。从九品。副使一员。

直沽广通仓，秩正七品。大使一员。从七品。荣阳等纲凡三十，曰：济源、陵州、献州、白马、濠阳、完州、河内、南宫、沂莒、霸州、东明、获嘉、盐山、武强、胶水、东昌、武安、汝宁、修武、安阳、开封、仪封、蒲台、邹平、中牟、胶西、卫辉、浚州、曹濮州，每纲皆设押纲官二员，计六十员，秩正八品。每编船三十只为一纲。船九百余只，运粮三百余万石，纲官以掌选正八品为之。

檀景等处采金铁冶都提举司，秩正四品。提举一员，正四品。同提举一员，正五品。副提举一员，从六品。《元典章》作从七品。掌各冶采金炼铁之榷税。中统初，置景州提举司，管景州、滦阳、新匠三冶。至元十四年，又置檀州提举司，《元典章》：檀州采金都提是举司达鲁花赤，正五品。管双峰、暗峪、大峪、五峰等冶。大德五年，并为檀景等处都提举司。大德元年，罢顺德、彰德、广平等路五提举司，立都提举司二，升正四品，设官四员，直隶中书户部。卫辉路

提举司隶于广平彰德都提举司，真定铁冶隶于顺德都提举司。事见本纪，旧志遗之。河东山西济南莱芜等处冶提举司及益都金总管府，其设置省并均不可考。又至元十九年立铁冶总管府，罢提举司，是否由总管府改都提举司，简册无征，不能臆断矣。《元典章》宣德云州等处、银冶等场都提举正四品，檀州采金都提举司达鲁花赤正五品，棋阳彰德济南高山汴梁等处，太原大同徐邳州景州溧阳等处、顺德等处、檀州等处、泰安州莱芜等处、广平等处、卫辉仓谷辽阳路安平山等处、易州紫荆关十七所铁提举司提举，俱从五品；以上同提举，俱从六品。宣德云州等处银冶提举司，从六品。

大都河间等路都转运盐使司，秩正三品。使二员，正三品。同知一员，正四品。副使一员，正五品。运判二员，正六品。经历一员，从七品。知事一员，从八品。照磨一员。从九品。掌榷办场灶盐货。太宗二年，始立河间税课所。六年，改盐运司。十二年，改提举盐榷所。六皇后称制二年，又改提举沧清盐使所。定宗四年，又改提举盐榷沧清盐使所。宪宗二年，改河间课程所为提举沧清深盐使所。中统元年，改立宣抚司，提领沧清深盐使所。四年，改为转运司。至元二年，以刑部侍郎右三部郎中兼沧清深盐使司。寻改立河间都转运盐使司，又立沧清深三盐司。十二年，改为都转运使司。十九年，以户部尚书行河间等路都转运使司事。寻罢，立大都芦台越支三叉沽盐使司。二十三年，改为河间等路都转运使。二十五年，复立芦台、越支、三叉三盐使司。二十七年，改令户部尚书行河间等路都转运使司事。二十八年，改河间等路都转运司。大德五年，并大都三盐运司入河间。延祐六

年，颁分司印。

盐场二十二所，曰：利国场、利民场、海丰场、阜民场、阜财场、益民场、润国场、海阜场、海盈场、海润场、严镇场、富国场、兴国场、厚财场、丰财场、三叉沽场、芦台场、越支场、石碑场、济民场、惠民场、每场置司令一员，从七品。司丞一员。从八品。

山东东路都转运盐使司，使二员，同知一员，副使一员，运判一员，经历一员，知事一员，照磨一员。太宗二年，立益都课税所。六年，改山东盐运司。中统三年，命课税隶山东都转运司。四年，诏以中书左右部兼诸路都转运司。至元二年，改立山东转运司。十二年，改山东都转运使司。按旧纪，山东盐课都转运为都转运盐使司在八年，改山东转运使司为都转运使司兼济南酒税醋课在二十五年，与志互异。《元典章》各处转运盐使司正四品，乃大德以前之官制。延祐五年，颁分司印，罢胶莱盐司所属各场。至元十九年，立山东滨乐安及胶莱莒密盐使司。

盐场十九所：永利场、宁海场、官台场、丰国场、新镇场、丰民场、富国场、高家港场、永阜场、利国场、固堤场、王家冈场、信阳场、涛洛场、石河场、海沧场、行村场、登宁场、西由场，各场设司令一员，司丞一员，管勾一员。

河东陕西等处都转运盐使司，使二员，同知一员，副使一员，运判二员，经历一员，知事一员，照磨一员。太宗二年，立平阳府征收税课所。中统二年，改置转运司及提举解盐司。至元二年，罢运司、命赴制国用使司输课。寻复置转运司。二十二年，改立陕西都转运司。兼办诸色税课。二十

九年，置盐运司，专掌盐课，解盐司亦罢。延祐六年，更为河东陕西等处都转盐运使司，案旧纪，改陕西盐课都转运司为都转盐使司，在至元八年，与志互异。直隶省部，颁分司印二。其属：

解盐场，管勾一员。正九品。同管勾一员。从九品。

河东等处解盐管民提领所。正提领一员，从八品。副提领一员。从九品。

安邑等处解盐管民提领所，正提领一员，副提领一员。二提领所，均延祐六年置。至元四年，立开元等路转运司，其省罢年分未详。《元典章》广东盐课都提举，正五品。

礼部：尚书三员，侍郎二员，郎中二员，员外郎二员。品秩同前。掌礼乐、祭祀、朝会，燕享、贡举之政，及符印、简册之制。中统元年，以吏户礼为左三部尚书。至元二年，分立吏礼部，尚书三员，侍郎二员，郎中四员，员外郎四员。七年，别立礼部，尚书三员，侍郎一员，郎中二员，员外郎四员。明年，又合为吏礼部。十三年，又别为礼部。二十三年，定尚书、侍郎、郎中、员外郎各二员。元贞元年，复增尚书一员，会同馆主事二员。至大二年，增侍郎、郎中各一员。其属附见于后：

左三部照磨所，秩正八品。照磨一员，正八品。掌左三部钱谷计帐之事。

侍仪司，秩正三品。使四员，正三品。引进使知侍仪事二员，正四品。典簿一员。从七品。掌朝会、即位、册后、建储、上尊号及外国朝觐之礼。至元八年，置左右侍仪奉御二员，礼部侍郎知侍仪事一员，引进使知侍仪事一员，左右侍

仪使二员，左右直侍仪使二员，副使二员，佾事二员，引进副使、侍仪令、丞、奉班都知、《元典章》：侍仪司丞、奉班都知，俱正七品。尚衣局大使各一员。十二年，省左侍仪奉御，通曰左右侍仪，省引进副使及侍仪令、尚衣局等。十三年，并侍仪司入太常寺。二十年，复置。大德十一年，升秩正三品。至大二年，增典簿一员。延祐七年，定置侍仪使四员。《元典章》：左右侍仪副使，正六品。后又定置引进使、知侍仪事二员。属官：承奉班都知一员，正七品。通事舍人十六员，从七品。侍仪舍人十四员。从七品。

法物库，秩从五品。掌大礼法物。提点一员，从五品。大使一员，从六品。副使一员，从七品。直长二员，正八品。

拱卫直都指挥使司，正三品。达鲁花赤一员，正三品。都指挥使四员，正三品。副指挥使二员，从三品。佾事二员，正四品。经历一员，从七品。知事一员。从八品。掌控鹤六百户及仪卫之事。至元三年，立拱卫司。置都指挥使一员，副使一员，钤辖一员，正六品。提控案牘一员。九年，长拱卫司为拱卫直都指挥使司。旧纪至元十七年，改拱卫司为都指挥使，疑误。十六年，升正三品，降虎符，增置达鲁花赤，隶宣徽院。十九年，降正四品，仍收其虎符。二十五年，改隶礼部。元贞元年，复升正三品。案旧纪：至元五年，隶宣徽院。九年，升拱卫司为拱卫直都指挥使。大德九年，升正三品。俱与志互异。皇庆元年，置经历一员。二年，改钤辖为佾事。至顺元年，拨隶侍正府。定置诸员。其属：

控鹤百户所，秩正七品。色目百户十三员，汉百户十三员，总十三所。

仪从库，秩从七品。掌收仪仗。大使一员，从七品。副使一员。从八品。

仪凤司，秩从三品。大使五员，从三品。副使四员，从四品。《元典章》作正五品。经历一员，从七品。知事一员。从八品。掌供奉祭飨之乐工。中统元年，立仙音院。复改为玉宸院。置乐长，正四品。乐副，正五品。乐判，正六品。各一员。八年，改隶宣徽院。二十年，改仪凤司，仍隶宣徽院。置大使、副使各一员，判官三员。按旧纪：二十一年，以仪凤司隶卫尉院，志不载。二十五年，改隶礼部，省判官。三十一年，置达鲁花赤一员，副使一员。大德十一年，升玉宸乐院。秩从三品。置院使、副使、佾事、同佾、院判。至大四年，复为仪凤司。秩正三品。延祐七年，降从三品，改仪凤卿为仪凤大使，定置诸员。其属：

云和署，秩从五品。署令二员，署丞二员，管勾二员，协音一员，协律一员。掌乐工调音律及部籍更番之事。至元十二年置。秩正七品。按旧纪二十三年，省入教坊司，不知何时复置。至大二年，拨隶玉宸乐院。皇庆元年，升从六品。二年，升从五品。署令以下品秩，旧志缺。署令当为从五品，丞从七品。管勾从八品。《元典章》仅载安和署令从七品，丞从八品，当是皇庆以前之官制。皇庆二年，令、丞皆升秩矣。

安和署，秩从七品。署令二员，从七品。署丞二员，从八品。管勾二员。协音一员，协律一员。至元十三年，置。秩正七品。二十五年，罢。二十七年，复置。皇庆二年，升从五品。

常和署。秩正六品。管回回乐工。皇庆元年，置管勾司。

秩正七品。延祐三年，改常和署。署令一员，署丞二员，管勾二员。

天乐署，秩从五品。管河西乐工。至元十七年，置昭和署。从六品。大德十一年，升正六品。至大四年，改天乐署。皇庆元年，升从五品。署令二员，署丞二员，管勾二员，协音一员，协律一员。

广乐库，秩从九品。掌乐器。皇庆元年，置大使一员、副使一员。

教坊司，秩正四品。达鲁花赤一员，正四品。大使三员，正四品。副使四员，正五品。知事一员，从八品。《元典章》：教坊司判，从八品；管勾，从九品。掌承应乐人及管领兴和等署五百户。中统二年置。秩从五品。五年，隶宣徽院。至元十二年，升正五品。十六年，并入拱卫司。后复置。十七年，改提点教坊司。秩正四品。二十五年，改隶礼部。大德八年，升正三品。延祐元年，改提点教坊司事为大使。七年，复降正四品。其属：

兴和署，秩从六品。署令二员，署丞二员，管勾二员。

祥和署，至大四年，增置官属，同。

广乐库。秩从九品。大使一员，副使一员。

会同馆，秩从四品。礼部尚书领会同馆事一员，正三品。大使二员，从四品。副使二员，从六品。提控案牘一员，掌引见诸番蛮夷峒官之来朝者。至元九年置。二十五年，罢为四宾库。二十九年，改四宾库复为会同馆。元贞元年，以礼部尚书领馆事。遂为定制。其属：

收支诸物库，从九品。大使一员，副使一员。至元二十

九年，以四宾库改置。

铸印局，秩正八品。掌凡刻印、销印之事。大使一员，副使一员，直长一员。至元五年置白纸坊，秩从八品。掌造诏旨、宣敕纸札。大使一员，从八品；副使一员。至元九年，置掌薪司。秩正七品。司令一员，正七品；司丞二员，正八品。大德八年置。

兵部：尚书三员，侍郎二员，郎中二员，员外郎二员。品秩同前。掌郡邑、邮传、屯牧之政，凡兵站、屯田之籍，官私刍牧之场，及远人之归化者，悉以任之。中统元年，以兵刑工为右三部，置尚书二员，侍郎二员，郎中五员，员外郎五员。至元元年，兵刑自为一部，尚书四员，侍郎三员，郎中五员，员外郎五员。三年，并为右三部。五年，复析为兵刑部，尚书二员，省侍郎二员，郎中如故，员外郎一员。七年，分六部，刑部尚书一员，侍郎一员，郎中、员外郎各一员。明年，又合为兵刑部。十三年，复析为兵部。二十三年，定尚书、侍郎、郎中、员外郎以二员为额。至大四年，罢通政院，以其事归兵部，增尚书一员、员外郎一员。十一月，又增置侍郎、郎中各一员。其属附见于后：

陆运提举司，秩从五品。提举二员，从五品。副提举一员，从七品。吏目一员。掌两都陆运粮斛之事。至元十六年，置运粮提举司。《元典章》新旧运粮提举司，俱从五品。延祐四年，改今名。海王庄、魏家庄、七年庄、腊八庄四所，各设提领一员，用从九品印。

管领随路打捕鹰房民匠总管储。秩从三品。达鲁花赤一

员，从三品。总管一员，从三品。副总管二员，正四品。经历、从七品。知事从八品。各一员，提控案牘一员。初，太祖以随路打捕鹰房民户七千余户拨隶旭烈兀大王位下，中统二年置总管府，至元十二年阿八合大王奏归朝廷，隶兵部。

管领本投下大都等路打捕鹰房诸色人匠都部总管府。秩正三品。达鲁花赤一员，正三品。总管一员，正三品。同知一员，正五品。副总管一员，从五品。知事一员，从八品。提控案牘一员。掌哈赞大王位下事。大德八年，置官吏皆王选用。至大四年，省并衙门，以哈儿班答大王别无官属，存总管府不废。其属。

东局织染提举司，秩从五品。达鲁花赤一员，从五品。提举一员，从五品。副达鲁花赤一员，从七品。副提举一员，从七品。提控案牘一员。

随路诸色民匠打捕鹰房等户都总管府。秩正三品。达鲁花赤一员，正三品。总管一员，正三品。同知一员，正五品。经历一员，知事一员，提控案牘兼照磨一员，掌别吉大营盘事及管领大都路打捕鹰房等户。至元三十年置。秩从三品。延祐四年，升正三品。

管领本位下打捕鹰房民匠等户都总管府。秩正三品。达鲁花赤一员，总管一员，副达鲁花赤一员，同知一员，副总管一员，判官一员，从六品。经历一员，知事一员，提控案牘兼照磨一员，掌别吉大营盘城池阿哈探马儿一应差发、薛彻干定王位下事。泰定元年置。

刑部：尚书三员，侍郎二员，郎中二员，员外郎二员。品

秩同前。掌刑名法律，凡大辟之按覆，系囚之详讞，孥收产没之籍，捕获功赏之格，悉以任之。中统元年，以兵刑工为右三部，别置郎中、员外郎各一员，专署刑部。至元二年，析置兵刑部，尚书四员，侍郎二员，郎中四员，员外郎五员。三年，复为右三部。七年，始置刑部，尚书一员，侍郎一员，郎中一员，员外郎二员。八年，改为兵刑部。十三年，又为刑部。二十三年，定六部尚书、侍郎、郎中、员外郎各二员。大德四年，增尚书一员，主事三员。至正十二年，增尚书侍郎、郎中、员外郎各一员。其属：

司狱司，司狱一员，正八品。狱丞二员。正九品。初以右三部照磨兼管刑部狱。大德七年，始置专官。

司籍所，提领一员，同提领一员。至元二十年，改大都等路断没提领所为司籍所，隶刑部。

工部：尚书三员，侍郎二员，郎中二员，员外郎二员。品秩同前。掌百工之政，凡营造之程式，材物之给受，铨注局院司匠之官，悉以任之。中统元年，置右三部，尚书、郎中五员，员外郎五员，内二员专署工部事。至元二年，分立工部，尚书四员，侍郎三员，郎中四员，员外郎五员。三年，复为右三部。七年，始置工部，尚书二员，侍郎二员，郎中三员，员外郎五员。二十三年，定工部尚书、侍郎、郎中、员外郎各二员。明年，又增尚书二员。二十八年，省尚书一员，增主事五员，置司程官四员。正七品。其属附见于后：

右三部照磨一员。从七品。

左右部架阁库，秩正八品。管勾二员，正八品。掌六部

文卷簿籍架阁之事。中统元年，左右部各置。二十三年，并为左右部架阁库。

诸色人匠总管府。秩正三品。达鲁花赤一员，正三品。总管一员，正三品。同知二员，正五品。副总管二员，从五品。经历一员，从七品。知事一员，从八品。《元典章》：诸色人匠总管府，照磨兼管勾承发架阁，正九品。提控案牒一员。掌百工之技艺。至元十二年，置总管、同知、副总管各一员。十六年，置达鲁花赤一员，增同知、副总管和一员。二十八年，省同知。三十年，省副总管。后定置诸员。其属：

梵像提举司。秩从五品。提举一员，从五品。《元典章》工部大仓提举，从五品。同提举一员。从六品。吏目一员。掌绘佛像及土木刻削之工。至元十二年，置梵像局。从七品。延祐三年，升提举司。

出蜡局提举司，秩从五品。提举一员，副提举一员，从七品。吏目一员。掌出蜡铸造之工。至元十二年，置局。从七品。延祐三年，升提举司。

铸泻等铜局。秩从七品。大使一员，从七品。副使一员。从八品。掌铸泻之工。至元十年，置官三员。二十八年，省管勾一员。

银局。秩从七品。大使一员，从七品。直长一员。正八品。掌金银之工。至元十二年置。

镔铁局。秩从七品。大使一员。掌镔铁之工。至元十二年置。

玛瑙玉局。秩从八品。直长一员。从八品。掌琢磨之工。至元十二年置。

石局。秩从七品。大使一员，管勾一员。掌攻石之工。至元十二年置。

木局。秩从七品。大使一员，直长一员。掌攻木之工。至元十二年置。

油漆局。副使一员，用从七品印。掌髹漆之工。至元十二年置。《元典章》：怯怜口皮局、貂鼠局、羊山玛瑙局提举，俱从五品。

诸物库。提领一员，从七品。副使一员。从八品。掌诸物之出纳。至元十二年置。

管领随路人匠都提领所。提领一员，从七品。大使一员，从七品。俱受省檄掌工匠之词讼。至元十二年置。

诸司人匠总管府。秩正三品。达鲁花赤一员，总管一员，副达鲁花赤一员，同知一员，副总管一员，经历一员，知事一员，提控案牒一员。掌两都金银器皿及符牌等十四局事。至元十四年置。二十四年，以八局隶工部及金玉府，止领五局、一库，掌毡毯等事。《元典章》：仪鸾器物、金丝子、犀象牙、木，大都银器皿局大使，俱从五品。上都诸色人匠金银器皿，宣德等处打码磁，保定、云南、南宫三织染局提举，俱正六品。其属：

收支库，秩正九品。大使一员。掌出纳之事。

大都毡局。秩正七品。大使、正七品。副使正九品。各一员。管人匠一百二十五户。

大都染局。秩正九品。大使一员。管人匠六十三户。

上都毡局。秩正七品。大使、副使各一员，管人匠九十七户。

隆兴毡局，大使、副使各一员。管人匠一百户。

剪毛花毯蜡布局。大使、副使各一员。管人匠一百十八户。

提举右八作司。秩正六品。同提举一员，提举一员，副提举一员，吏目一员。掌出纳内府漆器、红瓷、捎只等，并都城局院造作镔铁、铜、钢、镢石，东南筒铁，两都支持皮毛、杂色羊毛、生熟斜皮，马牛等皮，驢尾、杂行沙里陀等物。中统元年，置提领八作司。秩正九品。至元二十五年，改提举八作司，升正六品。二十九年，分左右两司。大德二年，以八作司旧制八员，令分左右二司，减去二员。上都八作提举司注品秩与大都八作司同。据此知左右八作司直隶大都留守司，不应隶上都也。

提举左八作司。秩正六品。置官同上。掌出纳内府毡货、柳器等物。《元典章》：诸路金玉人匠总管府达鲁花赤总管，俱正三品；副达鲁花赤、副总管，俱正四品；同知、正五品。

诸路杂造总管府。秩正三品。达鲁花赤一员，总管一员，同知一员，副总管一员，知一一员，提控案牒一员。至元元年，改提领所为提举司。十四年，又改工部尚书行诸路杂造局总管府。其属：

帘纲局。大使、副使各一员。受省札。至元元年置。

收支库。大使、副使各一员。至元三十年置。

茶迭儿局总管府。秩正三品。达鲁花赤一员，总管一员，同知一员，提控案牒一员。掌诸色人匠造作等事。宪宗置。至元十六年，设总管一员。二十七年，诸司局。用从七品印。提领一员，相副官二员。中统三年置。

收支库。提领一员，大使、副使各一员。掌造作出纳之物。

大都人匠总管府。秩从三品。达鲁花赤一员，总管一员，同知一员，经历一员，提控案牘一员。至元六年置。其属：绣局，用从七品印，大使、副使各一员。掌绣造段匹。纹锦总院，提领一员，大使、副使各一员。掌织造段匹。涿州罗局，提领一员，大使一员。掌织造纱罗段匹。

尚方库，提领一员，大使、副使各一员。掌出纳丝金颜料等物。《元典章》：异样、文锦两局，钞局，罗綾锦织染两局，提举俱从五品。

随路诸色民匠都部管府。秩正三品。达鲁花赤一员，总管一员，同知一员，副总管一员，经历一员，知事一员，提控案牘一员。照磨一员。掌仁宗潜邸诸色人匠。延祐六年，拨隶崇祥院。后又属将作院。至顺三年，改隶工部。其属：

织染人匠提举司。秩从七品。达鲁花赤一员，从五品。提举一员，从五品。同提举、从六品。副提举从六品。各一员，吏目一员。至大二年置。

杂造人匠提举司。秩从七品。置官同上。

大都诸色人匠提举司。秩从五品。达鲁花赤一员，提举一员，同提举、副提举各一员，吏目一员。

大都等处织染提举司。秩从五品。达鲁花赤一员，提举一员，副提举一员，吏目一员。管阿难答王位下人匠一千三百九十八户。

收支诸物库。秩从七品。提领一员。大使、副使各一员。提举都城所。秩从五品。《元典章》：都城所有达鲁花赤

一员，从五品。提举二员，从五品。同提举、从六品。副提举从七品。各二员，照磨二员，吏目一员。掌修缮都城内外仓库等事。至元三年置。其属：

左右厢，官四员，用从九品印。至元十三年置。

受给库。秩正八品，提领一员，大使、副使各一员。掌京城内外营造木石等事。至元十三年置。

符牌局，秩正八品。大使一员，正七品。副使一员，正八品。直长一员。掌造虎符等。至元十七年置。

旋匠提举司。秩从五品。提举一员，从五品。副提举一员。从七品。至元九年置。

撒答刺欺提举司。秩正七品。提举一员，从七品。副提举一员，正八品。提控案牘一员。初为组练匠提举司。至元二十四年，以札马刺丁率匠人成造撒答刺欺与丝绸，同局造作，改为撒答刺欺提举司。

别失八里局，秩从七品。大使一员，秩从七品。副使一员。从八品。掌织造御用领袖纳失失等段。至元十三年置。

忽丹八里局。大使一员。给从七品印。至元三年置。

平则门窑场。提领一员，大使、副使各一员。给从六品印。至元十三年置。

光熙门窑场。提领一员，大使、副使各一员。给从八品印。至元二十五年置。

大都皮货所。提领一员，大使、副使各一员。用从九品印。至元二十九年置。

通州皮货所。提领一员，大使、副使各一员。用从九品印。延祐六年置。

晋宁路织染提举司。秩正六品。提举一员，正六品。照略案牘一员。其属：

提领所一，系官织染人匠局一，云内人匠东西局二，本路人匠局一。河中府、襄陵、翼城；潞州、隰州、泽州、云州等局七。每局设提领，从七品。副提领从八品。各一员，云州、泽州止设提领一员。

冀宁路织染提举司。秩正六品。提举一员，正六品。同提举、正七品。副提举各一员，照略案牘一员。

真定路织染提举司，品秩置官同上。其属：

开除局。大使、副使各一员，照略案牘一员。

真定路纱罗兼杂造局。大使一员，从七品。副使一员。从八品。

南宫、中山织染提举司。各设提举、同提举、副提举一员，照略案牘一员。

中山刘元帅局。大使一员，从七品。副使一员。从八品。

中山察鲁局，大使一员，副使一员。

深州织染局。大使一员，副使一员，照略案牘一员。

深州赵良局。大使一员，副使一员。

弘州人匠提举司。提举一员，同提举、副提举各一员，照案牘一员。《元典章》弘州寻麻林人匠提举司，同提举正七品。

纳纳失、毛段二局。院长一员。按纳失失、毛子旋二局，《元典章》均有大使、副使，与旧志不同。

云内州织染局。大使一员，副使一员，照略案牘一员。

大同织染局，大使一员，副使一员，照略案牘一员。

朔州毛子局。大使一员。

恩州织染局，大使、副使各一员，照略案牒一员。

恩州东昌局，提领一员。

保定织染提举司。提举一员，同提举、副提举各一员，照略案牒一员。

大名人匠提举司。提举一员，同提举、副提举各一员，照略案牒一员。《元典章》：大名织染局提举司达鲁花赤，正六品。

永平路纹绵等局提举司。提举一员，同提举、副提举各一员，照略案牒一员。

大宁路织染局，大使一员，副使一员，照略案牒一员。

云州织染提举司。提举一员，同提举、副提举各一员，照略案牒一员。

顺德路织染局。大使、副使各一员，照略案牒一员。

彰德中织染人匠局，大使一员，副使一员，照略案牒一员。

怀庆路织染局。大使、副使各一员，照略案牒一员。

宣德府织染提举司。提举一员，同提举、副提举各一员，照略案牒一员。

东圣州织染局。院长一员，局副一员。

宣德八鲁局。提领一员，副使一员。

东平路疃局。直长一员。

兴和路寻麻林人匠提举司。提举一员，同提举、副提举和一员，照略案牒一员。

阳城天城织染局。提领一员，副使一员，照略案牒一员。

巡河提领所。提领二员，副提领一员。《元典章》：绫锦

纹绣、大同织染、弘州锦院、玛瑙、朔州毛子镇铁、云内州织染、唐像、出腊、石局、铜局、大都毡局，别失八里人匠、彰德熟皮甸皮人匠、银局、塑局，大都染局，中山真定杂造等，麻纳失失、缙山毛子旋正局，各局大使三百户下，一百户上，俱从七品。织染局、纹绣局，将作院、帘绫锦杂造别失八里人匠、平阳县官杂造、寻麻林纳失失、弘州锦院、上和大都中山真定铁局、怀孟深州大名路恩州织染局，各局副使俱从八品。上都毡、出腊、彰德人匠、大同织染、顺德织染、浮梁磁、唐像各局，副使俱正九品。

中书分省。至正十一年，置中书分省于济宁，以松寿为参知政事。十二年，中书右丞玉枢虎儿吐华等开分省于彰德。十四年，升济宁分省参政为平章政事。是后，尝置右丞。十五年，彰德分省增左右丞二员。十七年，以平章答兰等分省陵州，平章臧卜分省冀宁。二十三年，罢冀宁分省。二十七年，以添设平章蛮子分省保定，左丞相也速分省山东，沙蓝答里仍中书左丞相分省大同。又置分省于冀宁、真定二处。

行中书省。秩从一品，国初，有征伐之事，皆称行省，未有定制。至元元年，始分立行中书省，皆以省官出领其事。其后嫌于外重，改为行中书省。凡军国重事，无不领之，与都省相为表里。至元二十四年，改行尚书省，寻如旧。至大二年，又改行尚书省。二年，复如旧。凡十省，每省丞相一员，从一品。平章二员，从一品。右丞一员，左丞一员。俱正二品。参知政事二员，从二品。甘肃、岭北二省各减一员。郎中二员，从五品。员外郎二员，从六品。都事二员。从七品。旧制：参知政事之下，有佥省、同佥。大德九年，罢，不置。

丞相或置不置，以慎于择人，故往往缺焉。又其属：

检校所。检校一员。正七品。

照磨所。照磨一员，从八品。

架阁库，管勾一员，正八品。

理问所。理问二员，正四品。副理问二员，从五品。知事一员，提控案牘一员。

都镇抚司。都镇抚一员，副都镇抚一员。

河南江北等处行中书省。至元五年，诏参政阿里金行省事于河南等路，立省。二十八年，以河南江北系要冲之地，宜于汴梁立省，以控治之，遂移行省于汴梁路。

江浙等处行中书省。至元十三年，置江淮行省，治扬州。二十一年，迁于杭州。二十二年，割江北诸路隶河南，改江浙行省。

江西等处行中书省。至元十四年置。十五年，并入福建行省。十七年，仍置省于龙兴府，福建自为行省。二十年，并泉州行省入福建，治泉州。二十二年，并福建于江西。二十三年，又以福建并入江浙。

湖广等处行中书省。至元十一年，伯颜伐宋，行中书省事于襄阳。寻以别将分省鄂州。为荆湖等路行中书省。十三年，徙治潭州。十八年，复徙鄂州。

陕西等处行中书省。中统元年，以商挺领秦蜀五路四川行省事。三年，改立陕西四川行中书省，治京兆。至元三年，移利州。十七年，复还京兆。十八年，分省四川。二十一年，仍合为陕西四川行省。二十三年，四川置行省，本省所辖惟陕西诸路。

四川等处行中书省。至元三年置，治成都。十年罢。二十三年，复置。

辽阳等处行中书省。至元二十四年置，治辽阳路。

甘肃等处行中书省。中统二年，立行省于中兴。十年罢。十八年，复立。二十二年，复罢。二十三年，置甘肃行省于甘州。三十一年，分省按治宁夏，寻并之。

岭北等处行中书省。大德十一年，置和林等处行中书省。皇庆元年，改岭北行省，治和宁路。

云南等处行中书省。至元十一年置，治中庆路。

征东等处行中书省。至元二十年，命高丽王置省，典征日本军事，师还而罢。大德三年，复置。既而王言其不便，罢之。至治元年，复置。以高丽王领行省丞相，得奏选属官，治沈阳府。

淮南江北等处行中书省。至正十二年置，治扬州，设平章二员，右丞、左丞各一员，参知政事二员，及首领属官共二十五员。平章一员兼提调淮南王府事。至正中置行省凡六，其设置惟淮南江北一省可考，作并无征。

福建等处行中书省。至正十六年置，福州。十八年，右丞朵歹分省建宁，参政讷都赤分省泉州。二十八年，又置福建江西等处行中书省，山东行中书省。至正十七年，置广西行中书省。至正二十三年，置胶东行省。二十三年置，治莱阳。

卷四十九

志第二十三

百官二

枢密院。秩从一品。掌兵事之机密及宫禁宿卫、军官选授简阅之政令。知院六员，从一品。同知四员，正二品。副使二员，从二品。佾院二员，正三品。同佾二员，正四品。院判二员，正五品。参议二员，正五品。经历二员，从五品。都事四员，正七品。承发兼照磨二员，正八品。架阁库管勾一员，正九品。同管勾一员，从九品。中统四年，置枢密副使二员，佾书院事一员。至元七年，置同知院事一员，院判一员。二十三年，定台、省、部、院官，枢密院除枢密院使处，同知枢密院事一员，副使、佾枢密院事各一员，院判一员。二十八年，置知院一员，增院判一员，又以中书平章商量院事。大德十年，增知院二员，同知五员，副使五员，佾院五员，同佾三员，院判二员。至大三年，增知院至七员，同知二员，副使二员，佾院二员，同佾一员，院判二员。罢议事平章。延祐四年，以分镇北边，增知院一员。五年，增同知一员。后定置诸员如上。至正七年，置议事平章二员。十五年，添置佾院一员、院判一员。

客省使。秩从五品。大使二员，从五品。副使二员。从六品。掌选举差遣之事。至元十四年，置大使一员。十六年，

增一员。二十一年，置副使一员。延祐五年，增一员。天历元年，又增一员。寻定置大使、副使各二员。

断事官。秩正三品。掌决军府之狱讼。至元元年，置断事官二员。寻省。八年，复置，增二员。十九年，又增一员。二十年，又增二员。大德十一年，又增四员。后定置断事官八员、经历一员。从七品。《元典章》：枢密院断事官知事，从八品。

右卫。秩正三品。掌宿卫扈从兼屯田。都指挥使三员，正三品。副使二员。从三品。佾事二员，正四品。经历二员，从七品。知事二员、照磨一员。俱从八品。中统三年，置武卫。至元元年，改为侍卫亲军，分左右翼，置都指挥使。八年，改为左、右、中三卫。二十年，增都指挥使一员，副使一员。二十一年，置佾事二员。大德十一年，增都指挥使二员，副使一员。至大元年，增都指挥使三员，副使一员。四年，省都指挥使五员，副使二员。后定置诸员如上。《元典章》各卫奥鲁官从五品，副官正六品。其属：

镇抚所。镇抚二员。正五品。

行军千户所十。秩正五品。达鲁花赤十员，正五品。副达鲁花赤十员，从五品。千户十员，正五品。副千户十员，从五品。弹压二十员，正八品。百户二百员，正七品。知事一员，从八品。

弩军千户所一。达鲁花赤一员，千户一员，弹压二员，百户十员。

屯田左右千所二。达鲁花赤二员，千户二员，弹压二员，百户四十员，教官二，无品级。蒙古字教授一员，儒学教授

一员。掌屯卫行伍。耕战之暇，使学习国文，通晓书记。初由枢府选举，后归吏部。

左卫。品秩同前。都指挥使二员，副使二员，僉事二员，经历二员，知事二员，照磨一员。至元八年，置副指挥使一员。十六年，增副都指挥使一员。二十年，置僉事一员。二十二年，增僉事一员。二十四年，增都指挥使、副都指挥使一员。大德十一年，增都指挥使五员，副使二员，僉事二员。至大四年，省都指挥使六员，副都指挥使二员。后定置诸员。其属：

镇抚所。镇抚二员。

行军千户所十。达鲁花赤十员，千户十员，副千户十员，弹压二十员，百户二百员，知事十员。

弩军千户所一。达鲁花赤一员，千户一员，弹压二员，百户十员。

屯田左右千户所二。达鲁花赤一员，千户二员，弹压二员，百户四十员，教官二，蒙古文字教授一员，儒学教授一员。

中卫。品秩同前。都指挥使三员，副都指挥使二员，僉事二员，经历二员，知事二员，承发架阁照磨一员。至元八年，置都指挥使一员，副都指挥使一员。二十年，增副使一员。二十一年，置僉事二员。二十三年，增都指挥使一员。大德十一年，增都指挥使二员，副使三员。至大元元年，增都指挥使三员。后定置诸员如上。其属：

镇抚所。镇抚二员。

行军千户所十。达鲁花赤十员，副达鲁花赤十员，千户

十员，弹压二员，百户二百员，知事十员。

弩军千户一。达鲁花赤一员，千户一员，弹压二员，百户十员。

屯田左右千户所二。达鲁花赤二员，千户二员，弹压二员，百户四十员，教官二，蒙古字教授一员，儒学教授一员。

前卫。品秩同前。都指挥使三员，副使二员。佾事二员，经历一员，知事二员，承发架阁照磨一员。至元十六年，以侍卫亲军置前、后二卫。是年，置都指挥使一员，副都指挥使二员。十八年，增都指挥使二员。二十年，置佾事一员。大德十一年，增都指挥使五员，副使一员，佾事三员。至大四年，省都指挥使五员，副使一员，佾事三员。后定置诸员如上。其属：

镇抚所。镇抚二员。

行军千户所十。达鲁花赤十员，副达鲁花赤十员，千户十员，副千户十员，弹压二十员，百户二百员。

弩军千户一。达鲁花赤一员，千户一员，弹压二员，百户十员。

屯田千户所二。达鲁花赤二员，千户二员，弹压二员，百户四十员。门尉二：正六品。平则门尉一员，顺承门尉一员。教官二，蒙古字教授一员，儒学教授一员。

后卫。品秩同前。都指挥使三员，副都指挥使二员，佾事二员，经历二员，知事二员，照磨一员。至元十六年，置都指挥使二员，副使二员。后又增副使一员，十八年，增都指挥使二员。二十年，置佾事二员。大德十一年，增都指挥使五员，佾事二员。至大四年，省都指挥使五员，副使二员，

佥事二员。后定置诸员如上。其属：

镇抚所。镇抚二员。

行军千户所十。达鲁花赤十员，副达鲁花赤十员，千户十员，副千户十员。弹压二十员，百户二百员。

弩军千户所一。达鲁花赤一员，千户一员，弹压二员，百户十员。

屯田千户所一。达鲁花赤一员，千户一员，弹压二员，百户四十员，教官二，蒙古字教授一员，儒学教授一员。

武卫亲军都指挥使司。秩正三品。掌修治城隍及京师内外工役，兼大都屯田。达鲁花赤一员，正三品。都指挥使三员，副使二员，佥事二员，经历二员。知事二员，照磨一员。至元二十六年，枢密院官暗伯奏：以六卫六千人，塔刺海、勃可所镇大都屯田三千人，近路迤南万户府一千人，总一万人，立武卫，设官五员。按中统二年有武卫亲军都指挥使，似非至元时始置此官。二十五年，改虎贲司为武卫司，又似别为一官。均无从考订。元贞、大德间，累增都指挥使四员。至大三年，省都指挥使四员，副指挥使一员。后定置诸员如上。其属：

镇抚所。镇抚二员。

行军千户所七。达鲁花赤七员，副达鲁花赤七员，千户七员，副千户七员，百户一百四十员，弹压十四员。

屯田千户所六。达鲁花赤六员，千户六员，百户六十员，弹压六员，教官二，蒙古字教授一员，儒学教授一员。

隆镇卫亲军都指挥使司。品秩同前。掌屯军徼巡盗贼于居庸关南、北口。都指挥使三员，副使二员，佥事二员，经

历二员，知事二员，承发兼照磨一员。睿宗在潜邸，立南、北口屯军徼巡盗贼，各设千户所。至元二十五年，以南、北口上千户领之。至大四年，升万户府，分钦察、唐兀、贵赤、西域、左右阿带诸卫军三千人并南北口、太和岭旧隘汉军六百九十三人屯驻东西四十三处，置隆镇上万户府以领之。皇庆元年，升万户府为隆镇卫。置都指挥使三员，副使二员，僉事二员。延祐二年，又以哈儿鲁军千户所并隶之。四年，置色目经历一员。至治二年，置爱马知事一员。后定置诸员如上。其属：

镇抚所。镇抚二员。

北口千户所。秩正五品。达鲁花赤一员，正五品。千户一员，正五品。百户七员。从六品。

南口千户所。达鲁花赤一员，千户一员，百户一员，弹压一员。

白羊口千户所。达鲁花赤一员，千户一员，百户二员，弹压一员。

碑楼口千户所。达鲁花赤一员，千户一员，百户一员，弹压一员。

古北口千户所。达鲁花赤一员，千户一员，百户六员，弹压一员。

迁民镇千户所。达鲁花赤一员，千户一员，百户六员，弹压一员。

黄花镇千户年。达鲁花赤一员，千户一员，百户六员，弹压一员。

芦儿岭千户所。达鲁花赤一员，千户一员，百户六员，弹

压一员。

太和岭千户所。达鲁花赤一员，千户一员，百户六员，弹压一员。

紫荆关千户所。达鲁花赤一员，千户一员，百户六员，弹压一员。

隆镇千户所。达鲁花赤一员，千户一员，百户八员，弹压一员。

左、右翼屯田万户府二。秩从三品。分掌斡端、别十八里遣归汉军及大名、卫辉之新附军并迤东回军，合为屯田万户府。达鲁花赤各一员，从三品。万户各一员，从三品。副万户各一员，正四品。经历各一员，知事各一员，提控案牘各一员。至元二十六年置。延祐五年，隶詹事院，并入卫率府。后改隶枢密院。其属：

镇抚所。镇抚各二员。从五品。

千户所八。达鲁花赤八员，千户八员，副千户八员，百户五十九员，弹压十六员。

千户所四。达鲁花赤四员，千户四员，副千户四员，百户五十二员，弹压八员。

左卫率府。秩正三品。率使三员，正三品。副使二员，从三品。僉事二员，正四品。经历一员，从七品。知事一员，从八品。照磨一员。从八品。至大元年，拨河南行省万户府精锐汉军为东宫卫军，立卫率府，设官十一员。延祐五年，改作为中翊府。又改为御临亲军指挥司。又以御临，古无此官，改为羽林。复隶东宫，仍为左卫率府。其属：

镇抚所。镇抚二员。

行军千户所十。达鲁花赤一员，千户十员，副千户十员，百户二百员，弹压二十员。

弩军千户所一。达鲁花赤一员，千户一员，百户十员，弹压一员。

屯田千户所三。达鲁花赤三员，千户三员，百户六十员，弹压三员，教官三员，蒙古文教授一员，儒学教授一员，阴阳教授一员。

右卫率府。品秩同前。率使二员，副使二员，金事二员，经历二员，知事二员，照磨一员。延祐六年，以詹事秃满迭儿所管速怯那儿万户府及迤东女直两万户府、右翼屯田万户兵，合为右卫率府。其属：

镇抚所。镇抚二员。

千户所五。千户五员，百户四十五员，弹压二员，教官一，儒学教授一员。

河南淮北蒙古军都万户府。秩正三品。都万户一员，正三品。副都万户一员，从三品。经历一员，知事一员，提控案牘一员。至元二十四年，以四万户奥鲁赤改为蒙古军都万户府，设府官四员，奥鲁官四员。大德七年，改为河南淮北蒙古军都万户府。延祐四年，罢奥鲁官、副镇抚等员，定置诸员如上。其属：

镇抚二员。从五品。

元贞元年，立西川蒙古军都元帅府，隶枢密院，未知何时裁并。

八撒儿万户府。秩从三品，万户一员，从三品。副万户一员，正四品。经历、知事、提控案牘各一员。其属：

镇抚一员。

千户所十翼。达鲁花赤十员，千户十员，副千户十员，百户七十二，弹压十员。

札忽儿台万户府。万户一员，经历、知事、提控案牒各一员。其属：

镇抚一员。

千户所七翼。千户七员，百户三十八员，弹压七员。

脱烈都万户府。万户一员，副万户一员，经历、知事、提控案牒各一员。其属：

镇抚一员。

千户所九翼。千户九员，百户六十二员，弹压九员。

和尚万户府。万户一员，副万户一员，副万户一员经历、知事、提控案牒各一员。其属：

镇抚一员。

千户所六翼。达鲁花赤四员，千户六员，副千户四员，百户四十七员，弹压六员。

炮手千户所一翼。千户一员，百户六员，弹压一员。

哨马千户所一翼。达鲁花赤一员，千户一员，副千户一员，弹压二员，百户九员，奥鲁官二员，从五品。

右阿速卫亲军都指挥使司。掌宿卫城禁，兼管潮河、苏沽两川屯田，供给军储。达鲁花赤一员，都指挥使三员，副使二员，僉事二员，经历二员，知事二员，承发架阁照磨一员。至元九年，初立阿速拔都达鲁花赤。二十三年，遂名为阿带军。至大三年，改立右阿速卫亲军都指挥司，置达鲁花赤三员，都指挥使三员，副使二员，僉事二员。四年，省达

鲁花赤三员。后定置诸员如上。其属：

行军千户所。千户七员，百户九员。

把门千户一员，门尉一员。从六品。

本投下达鲁花赤二员，长官一员，副长官一员。

庐江县达鲁花赤一员，从六品。主簿一员。正九品。

教官：儒学教授一员。

左承带卫亲军都指挥使司。达鲁花赤一员，都指挥使三员，副使二员，佾事一员，经历二员，知事二员，照磨一员。其属：

镇抚二员。

本投下达鲁花赤二员，长官二员。

镇巢县达鲁花赤二员，主簿一员。

围宿把门千户所十三翼。千户二十六员，百户一百三十员，弹压十三员。

教官：儒学教授一员。

回回炮手军匠上万户府。秩正三品。达鲁花赤一员，正三品。万户一员，正三品。副万户一员，从三品。经历、知事、提控案牒各一员。至元十一年，置炮手总管府。十八年，立为都元帅府。二十一年，改为万户府。后定置诸员如上。其属：

镇抚二员。

千户三翼。达鲁花赤三员，千户三员，副千户三员，百户三十二员，弹压三员。

唐兀卫亲军都指挥使司。总领河西军二千人，以备征讨。都指挥使三员，副使二员，佾中二员，经历、知事、照磨各

一员。至元十八年，置都指挥使二员。副使二员。二十二年，增都指挥使二员，佾事一员。大德五年，增都指挥使二员。至大元年，增都指挥使一员。四年，省都指挥使三员，副使一员。后定置诸员如上。其属：

镇抚二员，奥鲁官一员，正五品。副奥鲁官一员。正六品。

二千户所九翼。千户九员，副千户九员，百户七十五员，弹压九员，奥鲁官正副各九员。

门尉三：建德门一，和义门，肃清门一。

教官二：蒙古文教授一员，儒学教授一员。

贵赤卫亲军都指挥使司。达鲁花赤一员，都指挥使二员，副使二员，佾事二员，经历、知事各二员，照磨一员。至元二十四年，置都指挥使二员，副使二员，佾事二员。二十九年，置达鲁花赤一员，都指挥使四员，副使三员。至元三十一年，罢贵赤卫屯田总管府，当是改都指挥司为总管府。后又改为都指挥司。其年分不可知矣。后定置诸员如上。其属：

镇抚所。镇抚二员。

千户所八翼。达鲁花赤八员，千户十六员，百户八十员，弹压八员，门尉二员。

延安屯田打捕总管府。秩从三品。管析居、放良人户，并兀里吉思田地蒙古人户。达鲁花赤一员，从三品。总管一员，从三品。同知一员，从四品。经历、知事各一员。至元十八年置。二十五年，改隶安西省。后复隶枢密院。其属：打捕屯田官十二员。正九品。

大宁、海阳等处屯田打捕所。秩从七品。掌北京、平滦

等路析居、放良、不兰奚等户。达鲁花一员，从七品。长官一员。至元二十年，置总管府。元贞元年，罢为屯田打捕所。教官：蒙古文教授一员，儒学教授一员。

忠翊侍卫亲军都指挥使司。都指挥使三员，副使二员，僉事二员，经历、知事各二员，照磨一员。至元二十九年，始立屯田府。大德十一年，立为大同等处指挥使司。至大四年，皇太后修五台寺，改隶徽政院。延祐元年，改中都威卫使司。至治元年，改为忠翊侍卫亲军都指挥使司，改录枢密院。后定置诸员如上。其属：

镇抚二员。

行军千户所十翼，达花赤十员，副达鲁花十员，千户十员，副千户十员，百户二百六员，弹压二十员。

弩军千户所一翼。达鲁花赤一员，千户一员，百户十员，弹压十员。

屯田左右手千户所二翼。达鲁花赤二员，千户二员，百户四十员，弹压四员。

西域亲军都指挥使司。达鲁花赤一员，都指挥使二员，副使二员，僉事二员，经历、知事各二员，承发架阁兼照磨一员。元贞元年立，设官十一员。大德十一年，增都指挥使二员，增指挥使三员，副指挥使二员，僉事二员。至大四年，省都指挥使五员、副使二员、僉事二员。后定置诸员如上。其属：

镇抚二员。

行军千户所。千户十三员，百户二十九员。

把门千户二员，百户八员，门尉一员。

教官：儒学教授一员。

宗仁蒙古侍卫亲军都指挥使司。都指挥使三员，副使二员，僉事二员，经历、知事各二员，照磨一员。至治二年，右丞相拜住奏：先脱别铁木叛时，没入亦乞列思人一百户，与今所收蒙古子女三千户、清州彻匠二千户，合为行军五千。请立宗仁卫以统之。其属：

镇抚二员。

蒙古军千户所十翼。千户二十员，百户一百员，弹压十员。

屯田千户所。千户四员，百户四十员，弹压四员。教官二：儒学教授一员，蒙古教授一员。

山东河北蒙古军大都督府。秩从二品。掌各路军民科差征进及调遣总摄军马公事。大都督三员，从二品。同知一员，从三品。副都督一员，从四品。经历一员，从六品。都事二员，从七品。承发兼照磨一员。正八品。至元二十一年，罢统军司，立蒙古军都万户府。大德七年，改山东河北蒙古军都万户府。延祐五年罢。天历二年，改立为大都督府。定置诸员如上。其属：镇抚二员。元贞元年，立蒙古军都元帅府于西川，径隶枢密院。当是因兵事暂置。

左手万户府。万户一员，从三品。副万户一员，正四品。经历一员，从七品。知事一员，从八品。提控案牘一员。从八品。其属：

镇抚一员。从五品。

千户九翼。千户十一员，百户七十四员，弹压十一员。

右手万户府。万户一员，副万户一员，经历一员，知事

一员，提控案牒一员。其属：

镇抚一员。

千户九翼。千户九员，百户六十三员，弹压九员。

拔都万户府。达鲁花赤一员，万户一员，副万户一员，经历一员，知事一员，提控案牒一员。其属：

镇抚一员。

千户六翼。千户七，百户四十一员，弹压五员。

哈达万户府。达鲁花赤一员，万户一员，经历一员，知事一员，提控案牒一员。其属：

镇抚一员。

千户八翼。千户八员，百户二十四员，弹压八员。

蒙古回回水军万户府。达鲁花赤一员，万户一员，副万户一员，经历、知事、提控案牒各一员。其属：

镇抚二员。

千户八翼。达鲁花赤二员，千户六员，百户四十六员，弹压九员。

玳都哥万户府。达鲁花赤一员，万户一员，副万户一员，经历、知事、提控案牒各一员。初隶都府。七千户翼。延祐三年，枢密院奏改万户府。属官：

镇抚二员。

千户七翼。千户九员，百户三十五员，弹压八员，

哈必赤千户翼。千户一员，百户四员，弹压一员，直隶大都督府。

洪泽屯田千户赵国宏翼。达鲁花赤一员，千户一员，副千户一员，百户四十员，弹压二员。直隶大都督府。

左翊蒙古侍卫亲军都指挥使司。都指挥使三员，副使二员，佾事二员，经历、知事各二员，承发架阁兼照磨一员。至元十八年，以蒙古侍卫总管府依五卫之例为指挥使司。设官十二员，奥鲁官二员。大德七年，奏改为左翼蒙古侍卫亲军都指挥使司。至大四年，增置指挥使一员。延祐五年，罢奥鲁官。其属：

镇抚二员。

千户所七翼。千户七员，副千户七员，知事七员，弹压七员，百户六十二员。教官二：蒙古文教授一员，儒学教授一员。

右翊蒙古侍卫亲军都指挥使司。都指挥使三员，副使二员，佾事二员，经历、知事各二员。承发架阁兼照磨一员。至元十七年，以蒙古侍卫总管府依五卫例为指挥使司，设官十二员，奥鲁官二员。大德七年，奏改为右翊蒙古侍卫亲军都指挥使司。至大四年，增置指挥使一员。延祐五年，罢奥鲁官。后定置诸员如上。属官：

镇抚二员。

千户所十二翼。千户十二员，副千户十二员，知事十二员，弹压十二员，百户一百九员，教官二：蒙古文教授一员，儒学教授一员。

虎贲亲军都指挥使司。管上都路元籍军人兼奥鲁事。都指挥使三员，副使二员，佾事二员，经历、知事、照磨兼承发各一员。至元十六年，立虎贲军，设官二员。旧纪：至元二十五年立，又改为武卫司。与志不合。十七年，置都指挥使二员，副使一员。又增置副使一员。元贞元年，改为虎贲

亲军都指挥使司。十一年，增都指挥使六员。至大四年，省都指挥使九员。后定置诸员如上。属官：

镇抚二员。

撒的赤千户翼。正达鲁花赤一员，副达鲁花赤一员，正千户一员，副千户一员，百户二十员，弹压二员。

不花千户翼。正达鲁花赤一员，副达鲁花赤一员，正千户一员，副千户一员，百户二十二员，弹压二员。

脱脱不千户翼。正达鲁花赤一员，副达鲁花赤一员，正千户一员，副千户一员，知事一员，百户二十八员，弹压二员。

大忽都鲁千户翼。正达鲁花赤一员，副达鲁花赤一员，正千户一员，副千户一员，知事一员，百户二十四员，弹压二员。

杨千户翼。正达鲁花赤一员，副达鲁花赤一员，正千户一员，副千户一员，知事一员，百户二十二员，弹压二员。

迷里火者千户翼。正达鲁花赤一员，副达鲁花赤一员，正千户一员，副千户一员，知事一员，百户二十员，弹压二员。

宣忠斡罗思扈卫亲军都指挥使司。秩正三品。至顺元年置宣忠扈卫亲军都万户府，总斡罗思军士，隶枢密院。二年，改今名。

大都督府。秩正二品。管领左右钦察两卫、龙翊侍御东路军元帅府、东路军蒙古万户府。旧纪：至顺元年，改东路蒙古军元帅府为东路钦察军万户府。二年，改东路蒙古军万户府为东路蒙古侍卫亲军指挥使司。哈刺鲁万户府。大都督三员，正二品。同知三员，正三品。副都督三员，从三品。佾都都事二员，正四品。经历二员，从六品。都事二员，从七

品。管勾一员、照磨一员。俱正八品。天历二年，始立钦察亲军都督府。秩从二品，后改大都督府。

右钦察卫亲军都指挥使司。秩正三品。达鲁花赤一员，正三品。都指挥使二员，正三品。副使二员，从三品。佾事二员，正四品。经历二员，从七品。知事二员，照磨二员。俱从八品。至元二十三年，依河西卫等例立钦察卫，设官十员。二十八年，增钦察卫经历一员。至治二年，分为左、右卫。天历二年，拨隶大都督府。属官：

镇抚二员。

行军千户所十八所。达鲁花赤各一员，千户三十六员，百户一百八十员，弹压十八员。

屯田千户所。达鲁花赤二员，千户二员，百户二十员，弹压二员。

左钦察卫亲军都指挥使司。都指挥使三员，副使二员，佾事二员，经历二员，知事二员，照磨一员。属官：

镇抚二员。

行军千户所十翼。千户十员，百户八十二员，弹压二员，奥鲁官四员。

守城千户所一翼。达鲁花赤一员，千户一员，百户九员。

屯田千户所一翼。达鲁花赤一员，千户一员，百户十员，弹压一员。教官：儒学教授一员。

龙翊侍卫亲军都指挥使司。都指挥使三员，副使二员，佾事二员，经历一员，知事二员，照磨一员。天历元年始立，设官十四员。二年，又置爱马知事一员。属官：

镇抚二员。

行军千户所六翼。达鲁花赤一员，千户六员，副千户一员，百户四十五员，弹压五员。

屯田一翼钦察千户所。达鲁花赤一员，千户一员，百户二十二员，弹压二员。教官二：蒙古文教授一员，儒学教授一员。

哈刺鲁万户府。掌守禁门等处，应直宿卫。达鲁花赤一员，万户一员，经历、知事各一员，提控案牘一员。至元二十四年，招集哈刺鲁军人，立万户府。寻移屯襄阳，后征交趾。大德二年，置司南阳。天历二年，奏隶大都督府。属官：镇抚一员，吏目一员。

千户所三翼。千户三员，百户九员，弹压三员。

枢密分院。至正十五年，置分院于卫辉，又添设彰德分院员知、副枢各一员，直沽分院副枢一员，都事一员。十六年，又置分院于沂州，以指挥使司隶之。十八年，以参知政事崔敬为山东等处行枢密副使，分院于濠州，兼屯田事。

行枢密院。有大征伐之事，则置之，止曰行院。为一方之事而设，则称某处行枢密院事，已则罢。

西川行枢密院。中统四年，置设官二员，管四川军民课税、交钞、打捕鹰房人匠及各投下应管公事，节制官吏诸色人等并军官迁授、征进等事。至元十年，又别置东川行枢密院，增员金枢密院事一员。十三年，省东川行枢密院入西院。十五年，西川行院亦罢。二十一年，复立四川行院于成都。二十八年，徙于嘉定。八月，复徙成都。

荆湖等路行院。至元八年，改山东东路都元帅府为山东

行枢密院。十一年罢山东行院及河南行中书省，置荆湖等路行院，设官三员，又置淮西等路行院，设官四员。十一年俱罢。二十一年，复立江淮、荆湖、江西、四川行院，各设官五员。二十八年，徙岳州行院于鄂州，江淮行院于建康。其后，行院俱并归行省。

甘肃行枢密院。至大四年，置于甘州，设官四员，提调西路军马。后罢。

河南行枢密院。致和元年分置。天历元年罢。至正十九年，以河南行省平章察罕帖木儿为河南山东行枢密院知院。

岭北行枢密院。天历二年，置知院一员，同知二员，副使一员，佾院二员，同佾一员，院判二员，经历一员，都事二员，品秩枢密院。掌北边军务，凡大小事宜，悉从裁决。至正十三年，添设断事官二员。又立镇抚司，镇抚二员；管勾所，管勾一员，兼照磨。又添设佾院二员，都事一员。

四川、湖广、江西三处行枢密院，均后至元三年置。每处知院一员，同知、佾院、院判各一员。湖广、江西二省，添同佾一员。各院经历一员，都事二员，照磨一员，客省副使一员，断事官一员。至元四年俱罢。

淮南江北等处行枢密院。至正十五年，置于扬州。

江浙等处行枢密院。至正十六年，置于杭州。知院二员，同知二员，副枢二员，佾院二员，员佾二员，院判二员，经历、知事各一员，断事官二员。

福建、江西等处行枢密院。至正二十六年置。

卷五十

志第二十四

百官三

御史台，从一品。掌纠察百官善恶、政治得失。至元五年，定御史台合行条划：一，弹劾中书省、枢密院、制国用使司等内外百官奸非，刷磨诸司案牍，并监察祭祀及出使之事。一，中书省、枢密院、制国用使司，凡有奏禀公事，与台官同奏。一，诉讼冤抑人等，民户经左右部，军户经枢密院，钱谷经制国用使司，如理断不当，赴中书省陈告。若省官看徇或理断不当，许台官纠弹。一，诸官司刑名违错，赋役不均及造作不如法者，委监察纠察。一，诸官员如任满不行迁转，或迁转不依格者，委监察纠察。一，不奉朝命擅补注官品者，委监察纠察。一，随路总管府诸官及大府监应管财物文帐，委监察，每季照刷。一，和买如不依时价，冒支官钱或克减给散不实者，委监察纠察。一，诸官侵使官物或移易借贷者，委监察纠察。一，办课程官除正额外，若有增羨不尽实到官者，委监察纠察。一，营造役工匠之处，委监察随事弹纠。一，诸衙门系囚及不合考讯之人，如实系冤枉，即行移原问官归结改正。若元向官违错，许纠察。一，诸囚禁非理死损者，委监察随事推纠。一，诸承追取合审重刑及应照刷文案，若有透漏者，委监察纠察。一，诸鞠勘罪囚皆

连职官同问，不得专委本厅及典史推问。如违，仰监察纠察。一，职官有老病不胜任者，委监察体察。一，诸官吏有廉能公正者，具姓名闻奏，污滥者亦行纠察。一，诸公事行下有枉错者，承受官司即须执申，若再申不从不报者，委监察纠察。一，应禁货物及盗贼藏匿处所，若官吏禁断不严、缉捕怠慢者，委监察随事纠察。一，阻坏钞法者，委监察纠察。一，虫蝻生发飞落，不即打捕申报，及检视部内灾伤不实，委监察纠察。一，诸贫穷孤老幼疾应养济，而官不收养，或不如法者，委监察纠察。一，户口流散、籍帐隐没、农桑不勤、仓禀减耗、黠吏豪家兼并纵暴，及贫苦不能自申者，委监察纠察。一，诸求仕及诉讼人，于官员私第谒托者，委监察纠察。一，诸官府如书呈来往者，委监察纠察。一，诸官吏入茶坊酒肆者，委监察纠察。一，在都司狱司直隶本台，一，私放军人还籍及冒名相替，委监察纠察。一，军官申报俘馘不实，或将功赏增减隐漏者，委监察纠劾。一，边境但有声息，不即申报者，委监察纠劾。一，边城不完，衣甲器仗不整，委监察纠劾。一，监临官如不举劾犯法者，减罪人罪五等，台官知而不举劾，亦减罪人罪五等。一，诸违馘御史台指挥及诉不以实，或咆哮陵忽者，并行断罪。一，应有合奏稟事理，仰本台就便闻奏。一，该载不尽、应合纠察事，理委监察并行纠察。

大夫二员，从一品。中丞二员，正二品。侍御史二员，从二品。治书侍御史二员，从二品。经历一员，从五品。都事二员，正七品。照磨一员，正八品。承发管勾兼狱丞，正八品。架阁库管勾兼承发一员。正九品。

至元五年，始立御史台，设官七员：大夫，从二品。中丞，从三品。侍御史，从五品。治书侍御史，从六品。典事，从七品。检法二员。从八品。狱丞一员。从九品。七年，大夫升正二品改典事为都事。十九年，裁检法狱丞。二十一年，中丞，从三品。侍御史，正五品。治书，正六品。二十七年，侍御史升正四品。治书，正五品。增蒙古经历一员。从五品。大德十一年，大夫升从一品。中丞升正二品。侍御史，从二品。治书侍御史，正三品。皇庆元年，增中丞为三员。二年，又减一员。至治二年，增大夫一员。后定置诸员如上。统山东东西、河东山西、燕南河北、江北河南、山南江北、淮西江北、江北淮东、山北辽东十道肃政廉访司。

殿中司，殿中侍御史二员。正四品。凡大朝会，百官班序，其失仪失列，则纠罚之。在京百官到任假告事故，出三日不报者，则纠举之。大臣入内奏事，则随以入，凡不可与闻之人，则纠避之。至元五年置。正七品。大德三年升正五品。后升正四品。

察院，秩正七品。监察御史三十二员。正七品。任刺举之事。至元五年，置御史十一员，以汉人为之。八年，增六员。十九年，增十六员，始参用蒙古人。至元二十二年，参用南人二员。元贞二年，增置御史二员。

山东东西道肃政廉访司。秩正三品。廉访使二员。正三品。副使二员，正四品。佥事四员，正五品。经历一员，从七品。知事一员，正八品。照磨兼管勾一员。正九品。置司济南路。至元六年置，初为提刑按察司。十三年，以省并衙门，罢按察司。十四年复置。山北东西道、河东山西道、陕

西四川道、燕南河北道并同。十六年，各道按察司增副使、佥事各一员。二十七年，增佥事二员。二十八年，改肃政廉访司。诸道并同。

河东山西道肃政廉访司。廉访使三员，副使二员，佥事四员，经历一员，知事一员，照磨兼管勾一员。置司冀宁路。至元六年，置河东陕西道。八年，分为河东山西道、陕西四川道。

燕南河北道肃政廉访司。廉访使二员，副使二员，佥事四员，经历、知事、照磨兼管勾各一员。置司真定路。至元十二年置。

江北河南道肃政廉访司，廉访使二员副使二员，佥事四员，经历、知事、照磨兼管勾各一员。置司汴梁路。至元七年置。

山南江北道肃政廉访司。廉访使二员，副使二员，佥事四员，经历、知事、照磨兼管勾各一员。置司中兴路。至元十四年置，初隶江南行御史台。二十三年，拨隶内台。

淮西江北道肃政廉访司。廉访使二员，副使二员，佥事四员，经历、知事、照磨兼管勾各一员。置司卢州路。十四年置，初隶江南行御史台。二十三年，拨隶内台。

江北淮东道肃政廉访司。廉访使二员，副使二员，佥事四员，经历、知事、照磨兼勾各一员。置司扬州路。至元十四年置，初隶江南行台。二十三年，拨隶内台。

江北淮东道肃政廉访司。廉访使二员，副使二员，佥事四员，经历、知事、照磨兼管勾各一员。置司扬州路。至元十四年置，初隶江南行台。二十三年，拨隶内台。

山北辽东道肃政廉访司。廉访使二员，副使二员，僉事四员，经历、知事、照磨兼管勾各一员。置司大宁路。至元六年置，初为山北东西道。八年，改山北辽东道。二十年，以女真之地置海西辽东道。二十五年罢。

江南诸道行御史台。至元十四年，定行御史台合行条划：一弹劾行中书省、宣慰司及以诸官奸非，磨刷案牘，行省、宣慰司委行台监察，其余官府委提刑按察司。一，察到诸职官脏罪追问是实，若罪至停罢，咨台闻奏。一，诸官司刑名违错、赋役不均、户口流亡、擅科差发及侵欺盗用、移易错贷官钱，一切不公等事，并仰纠察。一，大兵渡江以来，不无搔动，今已抚定，宜安本业，仰各处正官每岁劝课，如无成效者纠察。一，边境有声息，不即申报者，纠察。一，随处镇戍若约束不严，甲仗不整，或管军官受贿放军离役，并虚申逃亡、冒私代替及私使贩运或作佃户，一切不公，并仰纠察。一，管军官不约束军人，致令掠卖归附人口，或诱良为驱，一切搔扰百姓者纠察。一，诸色官吏，私使系官船只诸物者纠察。一，管军官申报军功不实者纠察。一，官吏权豪占据山林川泽之利，及恐喝小民、侵夺田宅诸物者纠察。一，诸官员占使军民者纠察。一，守土田火禁不严者纠察。一，管屯营田官不为用心措置者纠察。一，把军官起补逃亡军人，搔扰军户，致军前不得实用者，纠察。一，枉被囚禁及不合拷讯之人，并从初不应受理之事纠察。一，罪囚称冤，按验得实开坐事因行移元问官，即行改正。一，朝廷政令，承受官司稽缓不行，或已行而不复检举，致有弛废者纠察。一，蝗蝻生发，不即打捕申报，及报灾不实者，纠察。一，监临官

知所部有犯法，不举劾者，减罪人罪五等纠弹之。官知而不举劾者，亦减罪人罪五等。一，鞠罪囚连职官同问，不得专委本厅人等推问，违者纠察。一，诸罪囚干连人不关利害，及虽正犯而罪轻者，召保听候，毋致非理死损，违者纠察。一，刑名词讼，若审听不明，及拟断不当或受财故，有出入者，纠察。一，司狱司直隶本台，非官府不得私置牢狱。一，诸承追取合审重囚及应照刷文卷漏报者，纠察。一，诸诉讼人如有冤抑，经行中书省理断不当者，仰纠察。一，各处官员为治有方，即听保举，其有贪暴蠹政害民及老病不称职者，并行纠察。一，诸公事行下所属，而有枉错，若承受官司再申，不从不报者，纠察。一，提刑按察司任满，行台考按，以官政肃清、民无冤滞为称职，以苛细生事、暗于大体、所按不实为不称职，皆咨台呈省。一，上诉不实或诉讼咆哮陵忽者，并行断罪。一，凡可兴利除害及一切不便于民，必当更张者，咨台呈省闻奏。其余该载不尽、应合纠弹事，理比附已降条划斟酌就便施行。大夫一员，中丞二员，侍御史二员，治书侍御史二员，经历一员，都事二员，照磨一员，架阁库管勾一员，承发管勾兼狱丞一员，品秩同内台。

至元十四年，置江南行御史台于扬州。二十一年，徙杭州。二十二年二月，徙江州。五月，复徙杭州，罢，以其所属隶御史台。未几，复置于杭州。二十三年，又徙于建康。初置大夫、中丞、侍御史、治书侍御史各一员，统淮东、淮西、湖北、浙东、浙西、江东、江西、湖南八道。十五年，增江南湖北、岭南广西、福建广东三道。二十二年，以淮东、淮西、山南三道拨隶内台。二十四年，复隶行台。三十年，增

海北海南一道。大德元年，定为江南诸道行御史台，监江浙、江西、湖广三省，统江东、江西、浙东、浙西、湖南、湖北、广东、广西、福建、海南十道。至正十六年，移行台于绍兴，增河南道廉访司。二十二年，权置山北道廉访司于惠州。二十三年，复置济南道廉访司。二十五年，置河东廉访司于冀宁。

察院。至元十四年，置监察御史十员。二十三年，增蒙古御史十四员。按本纪十五年，增设御史四员。廿年，增蒙古御史六员。二十三年增色目御史，员数与志不合，未详孰是。又增汉人御史四员。定置御史二十八员。

江东建康道肃政廉访司。廉访使二员，副使二员，僉事四员，经历、知事、照磨兼管勾各一员。置司宁国路。至元十四年置。

江西湖东道肃政廉访司。廉访使二员，副使二员，僉事四员，经历、知事、照磨兼管勾各一员。置司龙兴路。至元十四年置。至正二十五年，置分台于福建。

江南浙西道肃政廉访司。廉访使二员，副使二员，僉事四员，经历、知事、照磨兼管勾各一员。置司杭州路。至元十四年置。

浙东海右道肃政廉访司。廉访使二员，副使二员，僉事四员，经历、知事、照磨兼管勾各一员。置司婺州路。至元十四年置。

江南湖北道肃政廉访司。廉访使二员，副使二员，僉事四员，经历、知事、照磨兼管勾各一员。置司武昌路。至元十五年置。

岭北湖南道肃政廉访司。廉访使二员，副使二员，僉事四员，经历、知事、照磨兼管勾各一员。置司天临路。至元十四年置。

岭南广西道肃政廉访司。廉访使一员，副使二员，僉事二员，经历、知事、照磨兼管勾各一员。置司静江路。至元十五年置。

海北广东道肃政廉访司。廉访使二员，副使二员，僉事二员，经历、知事、照磨各一员。置司广州路，初为广东道。至元二十年，改海北广东道。

海北海南肃政廉访司。廉访使二员，副使二员，僉事二员，经历、知事各一员。置司雷州路。至元三十年置。

福建闽海道肃政廉访司。廉访使二员，副使二员，僉事四员，经历、知事、照磨兼管勾各一员。置司福州路。至元十五年，置福建广东道。二十年，改福建闽海道。

陕西诸道行御史台。大夫一员，御史中丞二员，侍御史二员，治书侍御史二员，经历一员，都事二员，照磨一员，架阁库管勾一员，承发司管勾兼狱丞一员。至元初，置河西诸道行御史台。二十年罢。二十七年，置云南诸路行御史台，设台官四员。二十九年，罢云南行台，徙于四川。三十年，复立云南行台。大德元年，移云南行台于京兆，为陕西诸道行台。延佑元年罢。二年复置，统汉中、陇北、四川、云南四道。至元十五年，复立提刑按察司于畏兀儿，其初置及省罢年分均不可考。

察院。监察御史二十员。

陕西汉中道肃政廉访司。廉访使二员，副使三员，僉事

四员，经历、知事、照磨兼管勾各一员，置司凤翔府。至元八年，置陕西四川道。后改陕西汉中道。

河西陇北肃政廉访司。廉访使二员，副使二员，僉事四员，经历、知事、照磨兼管勾各一员。置司甘州路。初为巩昌道，后改中兴道。至元二十年，改河西陇北道。至元十一年，改西夏中兴道为陇右河西道。二十四年省。

西蜀四川道肃政廉访司。廉访使二员，副使二员，僉事四员，经历、知事、照磨兼管勾各一员。置司成都路。至元十九年置。本纪作十六年。

云南诸路道肃政廉访司。廉访使二员，副使二中，僉事四员，经历、知事、照磨各一员。置司中庆路。至元二十年置。二十四年罢。二十七年，立云南行御史台。大德元年，徙云南行台于陕西，复立云南道。至元二十年，各道按察司增判官二员。其裁罢年分未详。

大宗正府。秩从一品。札鲁忽赤四十二员，从一品。郎中二员，从五品。员外郎二员，从六品。都事二员，从七品。承发架阁库管勾一员，从八品。司狱二员。从八品。

太祖称尊号，首置断事官曰札鲁忽赤，会决庶务。凡诸王、驸马投下蒙古、色目人等应犯一切公事，及汉人轻重罪囚，每岁从驾分司上都存留住冬诸事，悉掌之。

至元二年，置十员。三年，省为八员。九年，定为从一吕，银印。诏札鲁忽赤乃太祖所置，宜居百僚之右。只理蒙古公事，以诸王为府长，余悉御位下及诸王之有国封者，又有怯辞人员奉旨署事，别无颁受宣命。是年，置左右司。十四年，置十四员。十五年，置十三员。十七年，从阿合马请，

立大宗正府，以前只札鲁忽赤署事，至是始定官名。二十一年，增至二十一员。二十二年，又增至三十四员。二十八年，增至四十六员。大德四年，省五员。至大四年，裁为二十八员。皇庆元年，省二员，以汉人刑名归刑部。泰定元年，复命兼理，定置四十二员，令史改为掾史。致和元年，以上都、大都所属蒙古人并怯辞、军、站、色、目与汉人相犯者，归宗正府处断，其余路府州县汉人、蒙古、色目人词讼悉归有司及刑部管理。后至元元年，中书省奏：“大宗正府，仁宗时减去大字。今宜遵世祖旧制，仍为大宗正府。”至正十年，增掌判二员。

大司农司。秩从一品。掌农桑、水利、学校之事。大司农四员，从一品。大司农卿二员，正二品。少卿二员，从二品。丞二员，从三品。经历一员，从五品。都事二员，从七品。架阁库管勾一员，正八品。照磨一员。正八品。至元七年，立司农司。是年，又改司农司为大司农司，添设巡行劝农使、副使各四员。按中统二年，姚枢为大司农，不始于至元七年，或旧纪误也。十二年罢，以按察司兼领劝农事。十八年，改立农政院。十九年，复罢。二十年，又改立务农司，秩从三品。掌官田邸舍人民，置达鲁花赤一员，务农使一员，同知二员。是年，又改司农寺。达鲁花赤一员，司农卿二员，司丞一员。二十三年，仍为大司农司。秩正二品。大德元年增领大司农事一员。皇庆元年，升从一品，定置诸员如上。

籍田署。秩从六品。掌耕籍田以奉宗庙祭祀。署令一员，从六品。丞一员。从七品。至元七年立，隶大司农司。十四年，改隶太常寺。二十三年，复隶大司农司。

供膳司。秩从五品。掌供给应需货买百色生料，并桑哥籍入资产。达鲁花赤一员，从五品。《元典章》供膳库达鲁花赤，从五品。提点一员，从五品。司令一员，正六品。丞一员。正七品。至元二十二年置，隶大司农司。其属辅用库，秩正九品。掌规运息钱以给供需。大使一员，正九品。副使一员。

兴中州等处油户提领所。秩从九品。岁办油十万斤以供内庖。提领一员，从九品。大使一员，副使一员。至元二十九年置。蔚州面户提领所。掌办白面、葱、菜以给应办，岁计十余万斤。提领一员，副使一员。《元典章》宏州种田纳面提举，正六品。

永平屯田总管府，秩从三品。达鲁花赤一员，从三品。总管一员，从三品。同知一员，从五品。知事一员。正八品。至元二十四年，立于永平路南旧马城县，以北京采木三千人隶之。所辖昌国、济民、丰赡三署，各置署令一员，从五品。署丞二员。从七品。

分司农司。至正十三年，命中书右丞悟良合台、左丞乌古孙良桢兼大司农卿，给分司农司印。西自西山，南至保定、河间，北至檀、顺等州，东至迁民镇，凡系官地及各处屯田，悉归分司募民佃种。

行大司农。至元二十九年，升江淮行大司农司，秩正一品。设营田司六员。秩正四品。其建置省罢年分均不可考。

大兵农司。至正十五年，置大兵农司四曰：保定等处，河间等处，武清等处，景蓟等处。其属有兵农千户所二十四处，百户所四十八处，镇抚司各一。

大都督兵农司。至正十九年。置于西京，仍置分司十道，掌屯种之事。

翰林兼国史院。秩从一品。承旨六员，从一品。学士六员，正二品。侍读学士二员，从二品。侍讲学士二员，从二品。直学士二员，从三品。待制二员，正五品。修撰三员，从六品。应奉翰林文字五员，从七品。编修官十员。正八品。检阅四员，正八品。典籍二员，从八品。经历一员，从五品。都事一员。从七品。《元典章》翰林院典簿、翰林国史院典簿，均从七品。

中统二年，立翰林国史院，秩正三品。以王鹗为翰林学士。《元典章》：翰林学士、知制诰、监修国史，正三品；监修国史参军，正五品；监修国史长史，正六品，皆中统初立国史之官制。至元六年，置承旨三员，学士二员，侍读学士二员，侍讲学士二员，直学士二员。八年，升从二品。十四年，增承旨一员。十六年，增侍读学士一员。十七年，增承旨二员。二十年，并集贤院为翰林国史集贤院。二十一年，增学士二员。二十二年，复分立集贤院。二十三年，增侍讲学士一员。二十六年，置官吏五员掌教习亦思替非文字。《元典章》：教习亦思替非博士，正七品。二十七年，又增承旨一员。大德九年，升正二品。改典簿为司直，置都事一员。按旧纪置都事在皇庆元年，未详孰误。至大元年，置承旨九员。四年，制定承旨五员，学士、侍读、侍讲、直学士各二员。皇庆元年，升从一品，改司直为经历，置经历、都事各一员。延佑五年，置承旨八员。后定置诸员如上。

蒙古翰林院。秩从一品。掌译写一切文字及颁降玺书，并

用蒙古字，仍各以其国字副之。承旨七员，学士二员，侍读学士二员，侍讲学士二员，直学士二员，待制四员，修撰二员，应奉文字五员，经历一员，都事一员，品秩并同翰林国史院。承发架阁库管勾一员。正九品。

至元八年，始置新字学士于国史院。十二年，别立蒙古翰林院，置承旨一员，直学士一员，待制二员，修撰一员，应奉四员。十八年，增承旨一员，学士三员。二十九年，增承旨一员，侍讲学士一员。三十年，增管勾一员。大德五年，升正二品。九年，置司直一员，都事一员。皇庆元年，升从一品，设官二十又八。延佑二年，改司直为经历。后定置诸员如上。

内八府宰相。掌诸王朝觐宾价之事，遇有诏令则与蒙古翰林院官同译写而润色之。以其职贵近，似古之侍中，故宠以宰相之名。然无授受宣命，品秩则视二品云。天历元年，改为内八府宰。

集贤院。秩从一品。掌提调学校、征召贤良，凡国子监、元门道教、阴阳祭祀、占卜之事，悉隶焉。大学士五员，从一品。学士二员，正二品。侍读学士二员，从二品。侍讲学士二员，从二品。直学士二员，从三品。经历一员，从五品。都事二员，从七品。待制一员，正五品。修撰一员，从六品。兼管勾承发架阁库一员。正八品。

元初，集贤与翰林国史同署。至元二十二年，始分两院。置大学士三员，《元典章》昭文馆大学士，从二品，亦至元时所置，其何时裁省无考。学士一员，直学士二员，典簿一员。二十四年，增置学士一员，侍读学士一员，待制一员，寻升

正二品，置院使一员，正二品。大学士二员，从二品。学士三员，从二品。侍读学士一员，从三品。侍讲学士二员，从三品。直学士一员，从四品。司直一员，从五品。待制一员。正五品。二十五年，增都事一员，从七品。修撰一员。从六品。元贞元年，增院使一员。大德十一年，升从一品，置院使六员，经历二员。至大四年，省院使六员。皇庆二年，省汉经历一员。后定置诸员如上。

国子监。秩从三品。掌国之教令，以德尊望重者为之。祭酒一员，从三品。司业二员，正五品。监丞一员，正六品。专领监务典簿一员。从七品。至元二年，以许衡为集贤馆大学士、国子祭酒，教国子与蒙古四怯薛人员，选七品以上朝官子弟为国子生，随朝三品以上官得举凡民之俊秀者入学为陪堂生伴读。至元二十四年，定置诸员如上。至大元年，升正三品。延佑七年，降从三品。是年，复升为正三品。后复降从三品。

国子学。秩正七品。博士二员。正七品。掌教授生徒、考较儒人著述、教官所业文字。助教四员，正八品。分教各斋生员。至元六年置。大德八年，为分职上都，增助教二员，学正二员，学录二员，督习课业；典给一员，掌生员饮膳。至元二十四年，定置生员额二百人，先设一百二十人：蒙古五十人，诸色目、汉人五十人，伴读二十人。大德四年，增生员额三百人。延佑二年，又增置一百人，伴读二十人。

蒙古国子监。秩从三品。祭酒一员，从三品。司业二员，正五品。监丞一员。正六品。至元十四年，始置司业一员。二十九年，准汉人国学例，置祭酒、司业、监丞。延佑四年，升

正三品。七年，复降为从三品。是年四月，又复正三品。皇庆二年立回回国子监。延佑七年罢。

蒙古国子学。秩正七品。掌教习诸生，于随朝百官、怯薛歹、蒙古汉人官员子弟选俊秀者入学。博士二员，正七品。助教二员，正八品。教授二员，正八品。学正、学录各二员。至元八年，置官五员。后以每岁从驾上都，教习事繁，增学正、学录各二员。三十一年，增助教一员。后定置诸员如上。

兴文署。秩从六品。署令一员。从六品。以翰林修撰兼之。署丞一员，从七品。以翰林应奉兼之。至元四年，改经籍署为宏文院。院罢立兴文署。复罢。二十七年，复置。掌经籍板及江南学田钱谷。至治二年罢，置典簿一员，从七品。掌提调诸生饮膳。

新无史卷之五十七终。

卷五十一

志第二十五

百官四

宣政院。秩从一品。掌释教僧徒及吐蕃诸族之事，遇吐蕃有事，则设分院往莅之，有大征伐，则会枢密院议之。院使十员，从一品。同知二员，正二品。副使二员，从二品。佾院二员，正三品。同佾三员，正四品。院判三员，正五品。参议二员，正五品。经历二员，从五品。都事三员，从七品。照

磨一员，正八品。管勾一员。正八品。至元初，立总制院，以国师领之。《元典章》总制院使正二品，同知总制院事正三品。二十五年，因唐制吐蕃来朝见于宣政殿故事，更名宣政院。置院使二员，同知二员，副使二员，参议二员，经历二员，都事四员，管勾一员，照磨一员。二十六年，置断事官四员。二十八年，增金院、同金各一员。元贞元年，增院判一员。大德四年，罢断事官。至大初，省院使一员。至治三年，置院使六员。天历二年，定置诸员如上。其属八：断事官四员。从三品。经历一员，从五品。知事一员，从八品。至元二十五年置。

客省使。秩从五品。大使二员，从五品。副使一员。从六品。至元二十五年置。

大都规运提点所。秩正四品。达鲁花赤一员，正四品。提点一员，正四品。大使一员，副使一员，知事一员。至元二十八年置。

上都规运提点所。达鲁花赤一员，提点一员，大使一员，副使一员，知事一员。至元二十八年置。

大都提点资善库。秩从五品。掌钱帛之事。达鲁花赤一员，从五品。提举一员，从五品。同提举一员，从六品。副提举一员。从七品。至元二十六年置。

上都利贞库。秩从七品。掌饮膳及金银诸物。提领一员，从七品。副使一员。从八品。元贞元年置。

大济仓。监支纳一员，从七品。大使一员。从七品。

兴教寺。管房提领一员。

行宣政院。元统二年，罢广教总管府十六处，置行宣政

院于杭州。院使二员，同知二员，副使二员，同佥、院判各一员，经历二员，都事、知事、照磨各一员。至正二年，增设崇教所，秩正四品。以理僧俗之事。至元二年，西番寇起，置行宣政院，也先帖木儿为院使讨之。事平即罢。

宣徽院。秩从一品。掌供玉食及燕享宗戚宾客，及诸王宿卫怯怜口粮食，蒙古万户千户合纳差发，系官抽分，羊马价值刍粟，收受阑遗等事。院事六员，从一品。同知二员，正二品。副使二员，从二品。佥院二员，正三品。同佥二员，正四品。院判五员，正五品。经历二员，从五品。都事三员，从七品。照磨一员，正八品。承发架阁库一员。正八品。

至元四年，置宣徽院，以线真为使。七年，改宣徽院为光禄司。秩正三品。后仍为宣徽。十五年，置院使一员，同知、同佥各二员，主事二员，照磨一员。二十年，升从二品，增院使一员，置经历二员，典簿三员。二十三年，升正二品。置院判二员，省典簿，置都事三员。三十一年，增院使四员。大德二年，增同知二员。三年，升从一品。四年，置副使二员。至大四年，省本院参议、断事官。皇庆元年，增院使三员。始定怯辞歹万人，本院掌其给授。后定置诸员如上。其属十二：

光禄寺。秩正三品。掌起运米面诸事。领尚饮，尚酝局沿路酒坊，各路布种事。卿四员，正三品。少卿二员，从四品。丞二员，从五品。主事二员。从七品。至元十五年，改都提点为光禄寺，置卿一员，少卿三员，主事一员，照磨一员，管勾一员。二十年，改尚酝监。正四品。《元典章》监令正五品，提点从五品，丞正六品，知事正八品。二十三年，复

为光禄寺，置卿二员，少卿、丞各一员。二十四年，增少卿一员。二十五年，改隶省部。三十一年，复隶宣徽院。延佑三年，降从三品。泰定二年，复升正三品。定置诸员如上。

大都尚饮局。秩从五品。掌造上用细酒。提点一员，从五品。大使一员，正六品。副使一员，正七品。中统四年，置大使、副使各一员，俱带金符。至元十二年，增副使一员。十五年，由从六品升从五品，置提点一员。后定置诸员如上。

上都尚饮局。皇庆中始置。提点一员，大使、副使各一员。

大都尚酝局。秩从五品。掌造诸王、百官酒醴。提点一员，从五品。大使一员，正六品。副使二员，正七品。直长一员，正八品。中统四年，立御酒库，设金符宣差。至元十一年，置提点。十六年，改尚酝局，定置诸员如上。

上都尚酝局。提点一员，大使一员，副使一员，直长一员。至元二十九年置。

大都醴源仓。秩从六品。掌受香莎苏门等酒材糯米，乡贡曲药，以供上酝。提举一员，从六品。大使一员，从七品。副使一员，正八品。至元二十五年置。

上都醴源仓。秩从九品。掌受大都转输米面，并造车驾临幸供给之酒。大使一员，从九品。副使一员。至元二十五年置。

尚珍署。秩正五品。置于济宁路，掌收济宁等处子粒以供酒材。达鲁花赤一员。从五品。令一员，从五品。丞二员，从七品。吏目二员。至元十三年置，十五年罢入有司，二十三年复置。

安丰怀远等处稻田提领所。秩从九品。提领二员。从九品。掌收稻田子粒，转输醴源仓。

尚舍寺。秩正四品。掌行在帷帐之陈设及牧养骆驼供爰兰乳酪。太监二员，正四品。少监二员，正五品。监丞二员，从六品。知事二员。从八品。至元三十一年置。初为尚舍置，至元十七年升。秩正三品。三十一年，改为寺。大德十一年，改为寺。秩正三品。至大元年，改为寺。四年，仍为监。寻复为寺。延祐三年，复降，正四品。按旧纪至元十七年升尚舍监，延佑七年降正四品，与志不合，未祥孰误。定置诸员如上。

诸物库。秩从七品。掌出纳提领一员，从七品。大使一员，从八品。副使一员。正九品。大德四年置。

阑遗监。秩正四品。掌不阑奚人口、头匹诸物。太监一员，正四品。少监二员，正五品。监丞二员，正六品。知事一员，从八品。提控案牘一员。从九品。至元二十年，初立阑遗所。秩正五品。二十五年，改为监，升正四品。大德十一年，升正三品。至大四年，复正四品。寻又升正三品。延祐七年，复为正四品。定置诸员如上。

尚食局。掌御膳及出纳油面酥蜜诸物。秩从五品。提点一员，从五品。大使一员，正六品。副使二员，正七品。直长一员。正八品。中统二年，立尚食监。秩正四品。至元二年，改为局，置提点一员。《元典章》：尚食太监正四品，少监正五品，丞从六品，提举正七品。当是中统二年所置，旧志误监为局，至元二年始改为局也。大德八年，置掌薪司以供尚食，命宣徽院掌其事。二十年，省并尚药局，尚药局亦

置于中统二年。别置生料库。本局定置诸员如上。

大都生料库。秩从五品。提点二员，从五品。大使二员，正六品。副使三员。正七品。至元十一年，置生料野物库。二十年，别置库，拟内藏库例，置诸员如上。

上都生料库。掌受宏州、大同虎贲、司农等岁办油面，大都起运诸物，供奉内府，放支宫人宦者饮膳。提点一员，大使一员，副使二员，直长一员。

大都大仓、上都大仓。秩正六品。掌内府支持米豆及酒材米曲药物。二仓各设提举一员，正六品。大使各一员，从六品。副使各一员。从七品。至元五年立，设官三员，俱受制国用使司割札。十二年，改提举大仓，按旧纪，至元十七年立太仓提举司，与志不合。设官三员，隶宣徽院。二十五年，升正六品。

大都、上都柴炭局。秩正七品。达鲁花赤各一员，正七品。大都大使一员，上都大使三员，从七品。副使各二员。正八品。至元十二年置。秩从六品。十六年，改提举司，升从五品。大德八年，仍为局，降正七品。

尚牧所。秩从五品。掌大官羊。提举二员，从五品。同提举一员，从六品。副提举一员，从七品。吏目一员。至元十二年，立尚牧监。后省。至大四年，复立尚牧所，定置诸员如上。

沙糖局。秩从五品。掌沙糖蜂蜜煎造及方贡果木。提点一员，从五品。大使一员，正六品。副使一员。正七品。至元十三年置。秩从六品。《元典章》沙糖局达鲁花赤从五品。十七年，置提点一员。十九年，升从五品。

永备仓。秩从五品。掌受两部仓库，起运省部，计置油面诸物及云需府所办羊，以备临幸膳羞。提点一员，从五品。大使一员，正六品。副使一员。正七品。至元十四年置，给从九品印。二十四年，升从五品。

丰储仓。秩从九品。掌出纳车驾行幸膳羞。大使一员。从九品。

淮东淮西屯田打捕总管府。秩正三品。掌献岁入以供内府，及湖泊山场渔猎以供内膳。达鲁花赤一员，正三品。总管一员，正三品。同知一员，正五品。府判一员，正六品。经历一员，从七品。知事一员，从八品。提探案牒一员。从九品。至元十四年，立总管府，并管涟海高邮河泊提举司、沂州等处提举司事。十六年，置扬州鹰房打捕达鲁花赤总管府。二十二年，并为淮东淮西屯田打捕总管府。后至元四年，升两淮屯田打捕总管府为正三品。疑本为从三品，至惠宗时始升秩正。二十五年，以两淮新附手号军千户所隶本府。

又置屯田打捕提举司九处：高淮安州，曰高邮，曰招泗，曰安东海州，曰扬州通泰，曰安丰庐州，曰靳黄，曰镇巢，凡八处旧志脱靳黄一处，据《元典章》补。屯田打捕提举司，曰塔山徐邳沂州等处山场屯田提举司，俱秩从五品。每司达鲁花赤一员，提举一员，从五品。同提举一员，从六品。副提举一员。从七品。

又抽分场提领所凡十处：曰柴墟东西口，曰海州新坝，曰北砂太仓，曰安河桃源，曰大湖东西口，曰时堡兴化，曰高邮宝应，曰汶湖等处，曰云山白水，曰安东州，每所各设提领一员，同提领一员，副提领一员，俱受宣徽院割付。

满浦仓，秩正八品。掌收受子粒米面等物，以待转输京师。大使一员，正八品。副使一员，正九品。至元二十五年置。《元典章》满浦仓监支纳从七品。

圆米棋子局、软皮局，各置提领一员，副提领一员，俱受宣徽院割付。

手号军人打捕千户所。秩从四品。管军人打捕野物皮货。达鲁花赤一员，从四品。上千户一员，从四品。上副千户一员，正五品。弹压一员，从八品。至元二十五年置。

龙庆栽种提举司。秩从五品。管缙山岁输梁米，及易州、龙门、净边官园瓜果等物，以奉上供。达鲁花赤一员，从五品。提举一员，从五品。同提举一员，从六品。副提举一员，从七品。至元十七年，置提举司。《元典章》缙山栽种副提举从七品。延祐七年改缙山为龙庆州，因以名之。

宏州种田提举司。秩正六品。掌输纳麦面，以供内府。达鲁花赤一员，正六品。提举一员，正六品。同提举一员，正七品。副提举一员，正八品。直长一员。

丰润署。秩从五品。掌岁入刍粟，以饲驼马。达鲁花赤一员，从五品。令一员，从五品。丞一员，从六品。直长一员。正八品。

常湖等处茶园都提举司。秩正四品。掌常湖二路茶园户二万三千又奇，采摘茶芽以贡内府。达鲁花赤一员，从五品。按都提举司正四品，达鲁花赤亦当为正四品。志作从五品，恐是并平江提举司时降都提举司为提举司也，旧志简略，无从补订，姑仍之。提举一员，从五品。同提举一员，从六品。副提举一中，从七品。提控案牘一员，从八品。都目一员。至

元十三年，置统提领所十三处。十六年，升都提举司。又别置平江等处榷茶提举司，掌岁贡御茶。二十四年，罢平江提举司，并掌之。统提领所七处，曰乌程，曰武康德清，曰长兴，曰安吉，曰归安，曰湖汶，曰宜兴《元典章》：榷茶提举有杭州、宁国、龙兴、建宁、庐州、岳州、鄂州、常州、湖州、潭州、静江、临江、兴国、常德府、古田、建安十六处。各设正、同、副提领一员，受宣徽院札付，掌九品印。

建宁北苑武夷茶场提领所。提领一员，受宣徽院札，直隶宣徽。

太禧宗人院。秩从一品。掌神御殿朔望岁时讳忌日辰禋祀典礼。院使都典制神御殿事六员，秩从一品。同知兼佐仪神御殿事二员，正二品。副使兼奉赞神御殿事二员，从二品。佾院兼祗承神御殿事二员，正三品。同佾兼肃治神御殿事二员，正四品。院判供应神御殿事二员，正五品。参议二员，正五品。经历二员，从七品。都事二员，从七品。管勾一员，从八品。照磨一员，从八品。断事官四员，从三品。客省使大使四员，从五品。副使二员。从六品。天历元年，罢会福、殊祥二院，改置太禧院以总制之。秩正二品。是年，升从一品，置参议二员。二年，改太禧宗禋院，立四总管府、一司为之属。定置诸员如上。至顺元年，命所隶总管府，各置副达鲁花赤一员。后至元六年罢。

隆禧总管府。秩正三品。达鲁花赤一员，正三品。总管一员，正三品。副达鲁花赤一员，正四品。同知一员，从四品。治中一员，从五品。判官一员，正六品。经历一员，从七品。知事一员，正八品。照磨一员。从八品。至大元年，建

南镇国寺初立规运提点所。三年，改规运都总管府，领大崇恩福元寺钱粮。十一月，改大崇恩福元寺规运总管府为隆禧院。秩从二品。天历元年，罢殊祥院，以隆禧、殊祥并立殊祥总管府。寻又改隆禧总管府。后至元六年，罢太禧宗祿院，隆禧总管府改为规运提点所，秩正五品。隶宣政院。其属七：

曰：福元营缮司。秩正五品。达鲁花赤一员，正五品。司令一员，正五品。大使一员，正六品。副使一员。正七品。天历元年，以南镇国寺所立怯怜口事产提举司改为崇恩福元提点所。三年，又改为福元营缮司。

曰：普安智全营缮司。达鲁花赤一员，司令一员，大使、副使各一员。天历元年，以太玉山普安寺、大智全寺两规运提点所并为一，置提点二员。三年，又改为营缮司。

曰：祐国营缮都司。达鲁花赤一员，司令一员，大使、副使各一员，知事一员，提控案牘一员。天历元年，置万圣祐国营缮提点所。三年，改营缮都司。

曰：平松等处福元田赋提举司。秩从五品。达鲁花赤一员，从五品。提举一员，从五品。同提举一员，从六品。副提举员。从七品。

曰：田赋提举司。提举一员，同、副提举各一员。

曰：资用库。至大三年，立规运都总管府，以资用库、大益仓隶之。大益仓，志无名。提领一员，从五品。大使一员，正六品。副使一员。正七品。

曰：万神库。提领一员，大使一员，副使一员。

会福总管府。达鲁花赤一员，总管一员，同知一员，治中一员，府判一员，经历、知事、提控案牘各一员。至元十

一年，建大护国仁王寺及昭应宫，置财用规运所。秩正四品。十六年，改规运所为总管府。《元典章》：大护国仁王寺昭应宫规运财赋都总管府，达鲁花赤、总管，俱正三品。至大元年，改都总管府。秩从二品。寻升会福院，置院使五员。延祐三年，升正二品。天历元年，改会福总管府，降正三品，定置诸员如上。后至元六年，改夫运提点所。其属五：

曰：仁王营缮司。达鲁花赤一员，司令一员，大使一员，副使一员。至元八年，立仁王寺镇遏提举司。十九年，改镇遏所。二十八年，并三提领所为诸色人匠提领所。天历元年，改镇遏民匠提领所。三年，改为仁王营缮司。

曰：襄阳营田提司。达鲁花赤一员，提举一员，同提举一员，副提举一员。初为襄阳等处水陆地土人户提领所，设官四员。大德元年，改提举司。天历二年，仍为襄阳营田提举司。

曰：江淮等处营田提举司。达鲁花赤一员，提举一员，同提举一员，副提举各一员。至元二十七年置。

曰：大都等路民佃提领所。秩从七品。提领一员，从七品。大使一员，从八品。副使一员。正九品。至元二十九年，以武清等十处，并立大都水陆地土种田人民提领所。十五年，又设随路管民都提领所。天历元年，并为大都等路民佃提领所。

曰：会福财用所。秩从七品。提领一员，从七品。大使一员，从八品。副使二员。正九品。至元十七年，立财用库。二十六年，立盈益仓。天历元年，并为会福财用所。

崇祥总管府。达鲁花赤一员，总管一员，副达鲁花赤一

员，同知、治中、府判各一员，经历、知事、提控案牘兼照磨各一员。至大元年，立大承华普庆寺都总管府。二年，改延禧监。寻改崇祥监。皇庆元年，升崇祥院。秩正二品。延祐七年罢。后复置。泰定四年，改为大承华普庆寺总管府。天历元年，改崇祥总管府。后至元六年，改规运提点所。其属九：

曰：永福营缮司。达鲁花赤一员，司令一员，大使、副使各一员，都目一员。延祐五年，置大永福寺都总管府。秩正三品。后降为营缮提点所。天历三年，改永福营缮司。

曰：昭孝营缮司。达鲁花赤一员，司令一员，大使、副使各一员。天历元年立寿安山规运提点所，三年改昭孝营缮司。旧隶大禧总管府。至顺二年，改隶崇祥总管府。

曰：普庆营缮司。达鲁花赤一员，司令一员，大使、副使各一员。天历二年，改普庆修寺人匠提举司为普庆营缮提点所。三年，改营缮司。

曰崇祥财用所。提领一员，大使、副使各一员。至大二年，置诸物库。四年，置普贍仓。天历二年，并为崇祥财用所。曰：永福财用所。掌出纳颜料诸物。提领一员，大使、副使各一员。延佑三年，置诸物库，又置永积仓。天历二年，并为永福财用所。

曰：镇江稻田提举司。达鲁花赤一员，提举、同提举、副提举各一员。

曰：汴梁稻田提举司。达鲁花赤一员，提举、同提举、副提举各一员。

曰：平江等处田赋提举司。达鲁花赤一员，提举、同提

举、副提举各一员。

曰：冀宁提领所。提领一员。

隆祥使司。从二品。司使四员，从二品。同知二员，正三品。副使二员，从三品。司丞二员，正五品。经历一员，从五品。都事二员，正七品。照磨兼架阁一员。正八品。天历二年，中宫建大承天户圣寺，立隆祥总管府，秩正三品。八员。至顺二年，升隆祥使司，升从二品。定置各员如上。后至元六年，改为规运提点所。其属十一：

曰：普明营缮都司。秩正四品。掌营造出纳钱粮之事。达鲁花赤一员，司令、大使、副使各一员，知事一员，提控案牒一员。天历元年，创大龙兴普明寺于海南，置规运提点所。二年，拨隶龙祥府。三年，改为都司。

曰：集庆万寿营缮都司。达鲁花赤一员，司令、大使、副使各一员，知事一员，提控案牒一员。天历二年，建龙翔、万寿两寺于建康，立龙翔万寿营缮提点所，属隆祥总管府。三年，改为营缮都司。

曰：元兴营缮都司。达鲁花赤一员，司令、大使、副使各一员，知事一员，提控案牒一员。天历元年，置大元兴规运提点所。三年，改为营缮都司。

曰：宣农提举司。秩从五品。达鲁花赤一员，提举、同提举、副提举各一员。天历二年，以大都等处田赋提举司隶隆祥总管府。三年，改提举司。

曰：护圣营缮司。秩正五品。掌营造工匠、僧众衣粮、收征房课诸事。达鲁花赤一员，司令、大使、副使各一员。天历二年，立大承天护圣营缮所。三年，改营缮司。

曰：平江善农提举司。秩从五品。达鲁花赤一员，提举、同提举、副提举各一员。天历二年，立田赋提举司。三年，改提举司。

曰：善盈库。提领一员，大使、副使各一员。天历二年置，隶隆祥总管府。

曰荆襄等处济农香户提举司。秩正五品。达鲁花赤一员，司令一员，提举、同提举、副提举各一员。天历二年，以荆襄提举司所领河南、湖广田土为大承天护圣寺常住，改为荆襄济农香户提举司。

曰：龙庆州田赋提领所。秩正九品。提领、同提领、副提领各一员。掌龙庆州所有田土岁赋。天历二年置。

曰：平江集庆崇禧田赋提领所。提领、同提领、副提领各一员。天历三年置。

曰：集庆崇禧财用所。大使、副使各一员。天历三年置。至顺元年，立益都广农提举司及益都般阳、宁海诸提领所，并隶隆祥总管府。二年，罢益都等处广农提举司，改立总管府，秩从三品，仍令隆祥总管府统之。

寿福总管府。掌祭供钱粮之事。达鲁花赤一员，总管一员，副达鲁花赤一员，同知一员，治中一员，府判一员，经历、知事、案牒照磨各一员。至大四年，建大圣寿万安寺，置万安规运提点所。秩正五品。延祐二年，升都总管府。秩正三品。寻升寿福院。秩正二品。泰定元年，改立总管府。后至元六年，改规运提点所。其属五：

曰：万安营缮司。达鲁花赤一员，司令、大使、副使各一员。延祐三年，以万安规运提点所既罢，复立万安营缮司。

曰：万宁营缮司。达鲁花赤一员，司令、大使、副使各一员。大德十年，置万宁规运提点所。天历元年，改营缮司。后至元六年，四总管府及隆祥使司俱改规运提点所，仍立万宁提点所，直隶宣政院。

曰：收支库。提领一员，大使一员。

曰：延圣营缮司。达鲁花赤一员，司令、大使、副使各一员。初为天源营缮提点所。天历二年，改营缮司。

曰：诸物库。提领一员，大使一员。延祐三年，立广贮库，秩正七品，置官三员，隶寿福院。

卷五十二

志第二十六

百官五

太常礼仪院。秩正二品。掌祭享宗庙社稷、封赠谥法等事。院使二员，正二品。同知二员，正三品。佾院二员，从三品。同佾二员，正四品。院判二员，正五品。经历一员，从五品。都事一员，从七品。照磨兼管勾承发架阁一员。正八品。中统元年，中都立太常寺，设寺丞一员。《元典章》太常寺卿，正三品，少卿，正四品，丞，正六品。至元八年，并太常寺入翰林院。十八年，复立太常寺，设卿一员，从三品。少卿以下五员。十四年，增博士一员。二十年，升正三品。大德九年，设奉礼郎二员，协律郎一员，法物库官二员。《元典

章》法物库副使正七品。十一年，升太常礼仪院。秩正二品。设官十二员。至大四年，复为寺，降正三品。延祐元年，复改升院，以大司徒领之。七年，降从二品。天历元年，复升正二品。定置诸院员如上。其属：博士二员，正七品。奉礼郎二员，从八品。奉礼兼检讨一员，从八品。协律郎二员，从八品。太祝十员，从八品。礼直管勾一员。从九品。《元典章》太常奉祀郎，从八品。

太庙署。秩从六品。掌宗庙行礼。令一员，从六品。丞一员。从七品。至元三年置。

郊祀署。秩从六品。掌郊祀行礼。令一员。从六品。大德九年置。

廩牺署。秩从六品。掌太庙郊祀廩牺。令一员，从六品。丞一员。从七品。初，太庙、郊祀二署令兼廩牺署事，至大二年始置。

社稷署。令二员，丞一员。品秩同上。大德元年置。

大乐署。掌礼生、乐工四百七十九户。令二员，丞二员。品秩同上。中统五年置。

典瑞院。秩正二品。掌宝玺、金银符牌。院使四员，正二品。同知二员，正三品。佾院二员，从三品。同佾二员，正四品。院判二员，正五品。经历二员，从五品。都事二员，从七品。照磨兼管勾承发架阁库一员。正八品。《元典章》：符牌局大使，正八品。当亦为典瑞院属官。中统元年，置符玺郎二员。至元十六年，立符宝局，给六品印。《元典章》：符宝郎，从五品。十七年，升正五品。十八年，改典瑞监。秩正三品。《元典章》：太监，从三品；少监，从四品；丞，从

五品。又，典瑞监卿，正三品。二十年，降正四品。省卿二员。二十九年，复正三品。仍置监卿二员。大德十一年，升典瑞院，正二品。定置诸员如上。至大四年，复典瑞院为监。

太史院。秩正二品。掌天文、历数。院使五员，正二品。同知一员，正三品。佾院二员，从三品。同佾二员，正四品。院判二员，正五品。经历一员，从五品。都事一员，从七品。《元典章》：太史院照磨，从八品。管勾一员。从九品。《元典章》作从八品。至元十五年置院，设太史令等官。至大元年升从二品。设官十员，延祐三年升正二品。后定置诸员如上。其属：春官正兼夏官正一员，正五品。秋官正兼冬官正中官正一员，正五品。保章正五员，正七品。保章副五员，正八品。《元典章》作从七品。掌历二员，正八品。腹里印历管勾一员，从九品。各省司历十二员，正九品。印历管勾二员，从九品。《元典章》有江浙印历局管勾、江西印历局管勾，俱从九品。灵台郎一员，正七品。监候六员，从八品。副监候六员，正九品。星历生四十四员，无品秩。挈壶正一员，从八品。司辰郎二员，正九品。灯漏直长一员，无品秩。教授一员，从八品。学正一员，从九品。《元典章》：星历教授、学正，均从八品。校书郎二员。正八品。

太医院。秩正二品。掌制造奉御药物，领各属医职。院使十二员，正二品。同知二员，正三品。佾院二员，从三品。同佾二员，正四品。院判二员，正五品。经历二员，从七品。都事二员，从七品。照磨兼承发架阁库一员。正八品。《元典章》：太医院知事从八品，管勾正九品。中统元年，置宣差提点太医院事，给银印。至元五年，以太医院隶宣徽院。二十

二年，改为尚医监。秩正四品。《元典章》：尚医监正四品，少监从五品，监丞正六品。二十二年，复为太医院，给银印，置提点四员，《元典章》：尚药提点正五品。院使，《元典章》：院使正四品。副使、判官各二员。大德五年，升正二品。设官十六员。十一年，增院使二员。皇庆元年，又增院使二员。二年，增院使一员。至治二年，定置诸员如上。其属附见：

广惠司。秩正三品。掌修制御用回回药物及和剂，以疗诸宿卫士及在京孤寒者。司卿四员，少卿二员，《元典章》广惠司令，从六品。按本司有丞，必有令，旧志漏之。司丞二员，经历、知事、照磨各一员。延祐六年升正三品。其属：

大都、上都回回药物院二。秩从五品。掌回回药事。达鲁花赤一员，从五品。大使二员，从五品。副使一员。正七品。至元二十九年置。至治二年，拨隶广惠司。

御药院。秩从五品。掌受各路诸番进贡药品。达鲁花赤一员，从五品。大使二员，从五品。副使二员，正七品。直长一员，正八品。都监二员。正九品。至元六年置。

御药局。秩从五品。达鲁花赤一员，从五品。局使二员，从五品。副使二员。正七品。《元典章》御药局副提举、同提举，均从六品。

行御药局。掌两都行篋药品。达鲁花赤一员，大使三员。品秩同上。大德九年置。

御香局。秩从五品。掌修合御用诸香。提点一员，从五品。司令一员。至大元年置。

大都惠民局。秩从五品。掌收官钱，出息修药剂，以惠贫民。提点一员，从五品。司令一员。正七品。中统二年置，

受太医院札。至元十四年定。秩从六品。二十一年。从五品。

上都惠民局。提点一员，司令一员。中统四年置。《元典章》安西路惠民局提点，从五品，同知四川药材医局、惠民局，正五品。

医学提举司。掌考校诸路医生课艺，试验太医教官，校勘名医撰述文字，辨验药材。秩从五品。医学提举一员，从五品。副提举一员。从七品。至元九年置。十三年罢。十四年复置。

官医提举司。秩从五品。掌医户差役词讼。至元二十五年置。大都、保定、彰德、东平四路，设提举、同提举、副提举各一员。河间、大名、晋宁、大同、冀宁、广平、济宁、济南、辽阳、兴和十路，设提举、副提举各一员。卫辉、怀孟、大宁三路，设提举一员。此腹里路分官医提举司，改隶于太医院。其河南等五省各立一司，隶于本省。

奎章阁学士院。秩正二品。大学士四员，正二品。侍书学士二员，从二品。承制学士二员，正三品。供奉学士二员，正四品。参书二员，从五品。典签二员，正七品。照磨一员，正八品。天历二年，立于兴圣殿西，命儒臣进经史之书，考帝王之治。置大学士二员，正三品。寻升为学士院。至顺二年，定置诸员如上。属官：授经郎二员，正七品。天历二年置。后至元六年罢奎章阁。至正元年立宣文阁，不置学士，惟授经郎及鉴书博士以宣文阁系衔。

群玉内司。秩正三品。掌奎章阁图书及常御之物。司监一员，正三品。司尉一员，从三品。亚尉一员，正四品。佾司一员，从四品。司丞一员。正五品。典簿一员，正七品。天

历二年，更司籍郎，为秩正六品。群玉署，至顺元年升群玉内司，后至元元年罢。

艺文监。秩从三品。掌以国语译儒书及儒书之合校仇者。太監检校书籍事二员，从三品。少監同检校书籍二员，从四品。監丞参校书籍事二员，从五品。典簿一员，正七品。照磨一员。正八品。天历二年置，至元六年改崇文監，至正元年改隶翰林国史院。

監书博士。秩正五品。掌品定书画。博士二员。正五品。天历二年置。

艺林库。秩正六品。掌藏贮书籍。提点一员，正六品。大使一员，从六品。副使一员。正七品。天历二年置。

广成局。秩正七品。大使一员，从七品。副使二员，正八品。直长二员。正九品。掌传刻经籍。天历二年置。

侍正府。秩正二品。掌内廷近侍之事。侍正十四员，正二品。同知二员，正三品。参府二员，从三品。侍判二员，正四品。经历一员，从六品。都事一员，从七品。照磨一员。从八品。至大元年，立尚服院。秩从二品。三年升正二品。后省。至顺二年，置侍正府，领速古儿赤四百人、奉御二十四员。后至元元年，以待政府属徽政院。

奉御二十四员，秩从五品。尚冠二员，从五品。副奉御二员，从六品。尚衣奉御二员，副奉御二员，尚鞶奉御二员，副奉御二员，尚沐奉御二员，副奉御二员，尚饰兼尚鞶奉御二员，正六品。副奉御二员，正七品。掌簿四员。从七品。以四怯薛之速古儿赤为之。至大元年，设尚冠、尚衣、尚鞶、尚沐、尚鞶、尚饰六奉御，秩从五品。凡四十八员，隶尚服院。

天历初，省为二十四员，改隶侍正府。

给事中。秩正四品。掌随朝省、台。院诸司凡奏闻之事，悉纪录之，如古左右史。给事中兼修起居注二员，正四品。右侍仪奉御同修起居注一员，左侍仪奉御同修起居注一员。从五品。《元典章》左、右侍仪奉御，正四品。至元六年，置起居注、左右补阙。十五年，改给事中兼修起居注，左右补阙改为左右侍仪奉御兼修起居注。皇庆元年升正三品。延佑七年，仍详定正四品。后定置诸员如上。

将作院。秩二从品。掌造金玉珠翠、犀象、宝贝、冠佩、器皿，刺绣缎匹纱罗，异样百色造作。院使七员，正二品。同知二员，正三品。同佾二员，正四品。院判五员，正五品。经历一员，从五品。都事一员，从七品。照磨管勾一员，正八品。《元典章》将作院收支库大使，从九品。至元三十年，置院使一员，经历、都事各一员。三十一年，增院使二员。元贞元年，又增二员。大德十一年，升将作院，秩从二品。延祐七年，省院使二员。后升正二品。定置诸员如上。

诸路金玉人匠总管府。秩正三品。掌造金玉冠饰系腰束带、金银器皿，并总诸司局事。达鲁花赤二员，正三品。总管二员，正三品。副达鲁花赤二员，正四品。同知、二员，从四品。副总管二员，正五品。经历一员，从七品。知事一员，从八品。照磨一员，正九品。管勾一员。正九品。中统二年，立金玉府。秩正五品。至元三年，改总管府，置总管一员，经历、提控案牘各一员。十二年，又置同知副总管各一员。二十五年，置达鲁花赤一员。大德四年，又置副达鲁花赤、副总管各一员。后定置诸员如上。其属曰：

玉局提举司。秩从五品。提举一员，正七品。同提举一员，从七品。副提举一员。正八品。中统二年，以和林人匠置局，始设直长。至元三年，立玉匠局，用正七品印。十五年，改提举司。

曰：金银器盒提举司。提举一员，同提举一员，副提举一员，品秩同上。吏目一员。至元十五年，置金银局。秩从七品。二十四年，改提举司。秩正六品。大德间升从五品。按玉局、金银、玛瑙四提举司，俱秩从五品，提举亦当为从五品，旧志作正七品，《元典章》金银器盒提举正六品，阳山玛瑙局提举从五品，均参差不合。

曰：玛瑙提举司。提举一员，同提举一员，品秩同上。吏目一员。至元九年，置大都等处玛瑙局。

秩从七品。管玛瑙匠户五百又奇，置提举三员，受金玉府札。十五年，改立提举司，领大都、宏州两处造作，升。从五品。三十年，省副提举一员。

曰：阳山玛瑙提举司。提举一员，同提举一员，副提举一员，品秩同上。至元十五年置。

曰：金丝子局。秩从五品。大使一员，从五品。副使一员，正七品。直长一员。中统二年设二局，二十四年并为一。

曰：鞋带斜皮局。秩从八品。大使一员，从八品。副使一员。至元十五年置。

曰：瑾玉局。秩从八品。大使一员。从八品。至元十五年置。

曰：浮梁磁局。秩正八品。掌烧造磁器并漆造马尾棕藤笠帽等。大使一员，从八品。副使一员。正九品。至元十五

年置。《元典章》浮梁磁局副使正九品，则大使应为从八品，磁局秩从八品，旧志作从九品误。

曰：画局。秩从八品。掌描画诸色样制。大使一员。从八品。至元十五年置。

曰：管领珠子民匠官。正七品。掌采蛤珠于杨村、直沽等处。中统二年置。子孙世袭。

曰装订局。秩从八品。大使一员。从八品。《元典章》装订局大使，从九品。至元十五年置。

曰大小雕木局。秩从八品。大使一员。从八品。至元十五年置。

曰：宣德隆兴等处玛瑙人匠提举司。秩正六品。至元十五年，提举一员，从七品。副提举一员。从八品。至元十五年置。

曰：温犀玳瑁局。秩从八品。大使一员。至元十五年置。

曰：上都金银器盒局。秩从六品。大使一员，从六品。副使一员，正七品。直长一员。至元十六年置。

曰：漆纱冠冕局。大使、副使各一员。至元十五年置。

曰：大同路采砂所。管领大同路拨到民一百六户，岁采磨玉夏水砂二百石，起运大都以给玉工。大使一员。至元十六年置。

曰：管匠都提领所。秩从七品。掌金石府人匠词讼。都提领一员。从七品。至元十三年置。

曰：监造诸般宝贝官。秩正五品。达鲁花赤二员。正五品。至元二十一年置。

曰：收支诸物库。秩从八品。大使一员，从八品。副使

一员。正九品。至元十五年置。

行诸路金玉人匠总管府。秩从三品。达鲁花赤一员。从三品。总管一员，从三品。同知一员，正五品。副总管一员，从五品。经历一员，从七品。知事一员，从八品。提控案牘一员。从九品。世祖定江南，置浙西金玉人匠提举司。至元十七年，又置浙西道金玉人匠总管府。至元二十七年，并提举司入总管府。后罢之。至大间，复置总管府于杭州路。

异样局总管府。秩正三品。达鲁花赤一员，正三品。总管一员，正三品。同知一员，从四品。《元典章》作正五品。副总管一员，正五品。经历一员，从七品。知事一员。正八品。中统二年，立异样局提点所，掌御用织造。至元六年，改总管府，置总管一员。十四年，置同知、副总管各一员。二十一年，增总管一员。二十九年，置达鲁花赤一员。三十年，省同知、副总管各一员。后定置诸员如上。其属曰：

异样文绣提举司。秩从五品。提举一员，从五品。同提举一员，正七品。副提举一员。正八品。中统二年立局，至元十四年改提举司。

曰：绫绵织染提举司。提举一员，同提举一员，副提举一员。品秩同上。至元二十四年，改局置提举司。

曰：纱罗提举司。提举一员，同提举一员，副提举一员。品秩同上。至元十二年改局置提举司。

曰：纱金颜料总库。秩从九品。大使、副使各一员。从九品。中统二年置。至元二十九年，置织造段匹提举司，其裁并年分不可考。《元典章》犀象牙木局使，从五品。

大都等路民匠总管府。秩正三品。总管一员，从三品。同

知一员，正五品。副总管一员，从五品。《元典章》作正五品。经历一员，从七品。知事一员，从八品。《元典章》：大都等路人匠提举，从五品。提控案牒一员。至元七年置。秩从三品。十四年升。正三品。其属曰：

备章总局。秩正六品。大使一员，正六品。副使一员。至元十三年省并杨茵等八局为总局。

曰：尚衣局。秩从五品。达鲁花赤一员，从五品。提举一员，从五品。同提举一员，正七品。副提举一员。正八品。至元二年置。

曰：御衣局。达鲁花赤一同，提举、同提举、副提举各一员。品秩同上。中统四年置。

曰御衣史道安局。秩从五品。大使一员，从五品。副使一员。从六品。至元二年置，以史道安掌其职，因以名之。

曰：高丽提举司。秩从五品。提举一员。至元二十二年置。按旧纪二十一年，以高丽提举司隶工部，未详孰误。

曰：织佛像提举司。秩从五品。提举一员，从五品。副提举二员。正八品。延祐三年，置织佛像工匠提领所。秩正七品。四年，改提领所为提举司。

通政院。秩从二品。大都院使四员，从二品。同知二员，正三品。副使二员，从三品。佥院一员，正四品。同佥一员，从四品。院判一员，正五品。经历一员，从五品。都事二员，从七品。照磨兼管勾承发架阁一员。正八品。上都院使、同知、副使、佥院、判官各一员，经历、知事各一员。品秩同上。元初，置驿以给使传，设脱脱禾孙以辨奸伪。至元七年，初立诸站都统领司以总之。十三年，改通政院。十四年，分

置大都、上都两院。二十七年，置大都东西二驿脱脱禾孙，以通政院领之。二十九年，又置江南分院。大德七年罢。至大元年，复置，升正二品。三年，省通政院六员，存十二员。四年罢，以其事归兵部。是年，复置上都通政院，只管达达站赤。延祐七年，复从二品。仍兼领汉人站赤，定置诸员如上。其属：

廩给司。秩从七品。掌边远使客饮食供张。提领一员，从七品。司令一员，正八品。司丞一员。正九品。至元十九年置。

中政院。秩正二品。掌中宫财赋并番卫之士汤沐之邑。院使七员，正二品。同知二员，正三品。佾院二员，从三品。同佾二员，正四品。院判二员，正五品。幕职司议二员，从五品。长使二员，正六品。照磨兼管勾承发架阁一员。正八品。元贞二年，置中御府，秩正三品。卿二员。大德元年，增中御府官一员。四年，升中政院。秩正二品。至大元年，升从一品。定置诸员如上。三年，改皇太子妃怯怜口都总管府为典内司，四年，升为院，并中政院入之。皇庆元年，升正二品。二年，复为中政院。其属：

中瑞司。秩正三品。掌皇后宝册。卿五员，正三品。丞二员，正四品。典簿二员。从七品。至大三年置。

内正司。秩正三品。掌营缮之役，地产之储，以供膳服，备赐予。卿四员，正三品。少卿二员，正四品。丞二员，从五品。典簿二员，从七品。照磨兼管勾一员。正九品。其属日：

尚工署。秩从五品。掌百工营地缮之役。令一员，从五

品。丞二员。从六品。皇庆元年置。领于尚工署者为玉列赤局。秩从七品。掌裁缝之事，提领一员，大使、副使各一员，直长二员，延祐六年置。

曰：赞仪署。秩正五品。掌乘輿之器备。提领一员，大使一员，副使一员，直长二员。皇庆二年置。

典饮局。秩正七品。大使二员，副使二员，典史一员。掌造酒醴以供内府。初置嘉酝局，秩从六品。隶家令。至大二年，改典饮局，两都分置。皇庆元年，拨隶中宫。旧纪至顺二年，置典瑞司，秩正三品，掌中宫佛事。

管领六盘山等处怯怜口民匠都提举司。秩正四品。达鲁花赤一员，正四品。都提举一员，正四品。同提举二员，正六品。副提举二员，从七品。知事一员，提控案牒一员。至大四年置。元初，未有官署，赋无所稽，后遣使核实著籍，设司领之。其属曰：

奉元等路、平凉等处、开城等处、甘肃宁夏等路、察罕脑儿等处长官司。秩正五品。各设达鲁花赤一员，长官一员，副长官一员，提控案牒一员，都目一员。延祐二年，以民匠提举司所领地里阔远，乃酌远近众寡，立长官司、提领所以分理之。提领所凡十：秩正七品。奉元等路、凤翔等处、平凉宁环等处、开城等处、察罕脑儿等处、甘州等处、肃沙等路、永昌宁夏等路、长城等路，各设提领一员，同提领一员，副提领一员，隶于各长官司。

翊正司。秩正三品。掌怯怜口民匠五千余户，岁办钱粮造作。令五员，正三品。丞四员，正四品。典簿二员。从七品。至元三十一年，置御位下管领随路民匠打捕鹰房纳棉等

户总管府，秩正三品。后隶正宫位下。至大元年省，四年复置。秩正三品。延祐六年，改翊正司，岁终会其出纳以达于中政院。后至元无年罢。其属曰：

管领上都等处诸色人匠提举司。秩从五品。达鲁花赤一员，从五品。提举一员，从五品。同提举一员，从六品。副提举一员，从七品。直长一员，都目一员，吏目一员。元贞元年置，管户二千五百又奇。

曰：管领随路打捕鹰房纳棉等户提举司。达鲁花赤一员，提举一员，同提举一员，副提举一员。品秩同上。直长一员。都目一员，吏目一员。元贞元年置。

曰：管领归德亳州等处管民提领所。秩从七品。提领一员，同提领一员，副提领一员，典史一员。元初收附归德、楚州、通州等三百五十六户，令脱忽伯管领。大德二年置提领所。

管领大都等路打捕民匠等户总管府。秩正三品。达鲁花赤一员，正三品。总管一员，正三品。同知一员，正四品。副总管一员，正五品。经历一员，从七品。知事一员，从八品。提控案牒照磨一员。从九品。元初，收河南诸路民户一万五千有奇，置官管领。至元八年，属有司。二十年，改隶中尚监。二十六年，置总管府。其属曰：

在京提举司二，秩从五品。达鲁花赤一员。从五品。提举一员，从五品。同提举一员，从六品。副提举一员，从七品。都目一员。至元十六年，给从七品印。大德四年，省并京外为十一处，改提举司，升从五品。

涿州、保定、真定、冀宁、河南、大名、东平、东昌、济

南等路提举司，凡九处。设官品秩同上。

提领所凡二十五处：大都等路，东安州、济宁州、曹州、祁州、完州、河间、济南、济阳、大同、元氏、冀宁、晋宁、归德、南阳、怀孟、汝宁、卫辉、浚州、涿州、真定、中山、平山、大名、高唐等处。各设提领一员，同提领一员，副提领一员，典史一员。

江浙等处财赋都总管府。掌江南没入资产。达鲁花赤一员，都总管一员，同知一员，副总管一员，经历一员，知事一员，照磨一员，提控案牒一员。品秩同上。至大元年置。旧纪至大三年，立江浙等处财赋提举司，隶章庆院，与志不合。其属曰：

平江、松江、建康等处提举司，凡三处，并秩正五品。每司各设达鲁花赤一员，提举、同提举、副提举各一员，都目一员。

曰：丰盈库。掌本府钱帛。提领一员，大使一员，副使一员。

曰：织染局。掌织染岁造段匹。局使一员。

管领种田打捕鹰房民匠等处万户府。秩正三品。掌归德、亳州等处蒙古汉军种田户差税。万户一员，正三品。经历一员，从七品。知事一员，从八品。提控案牒一员。从九品。中统二年置，初隶塔察儿王位下。后改属中宫，领司属十处。旧志未载。

管领大名等处种田诸色户总管府。秩正五品。总管一员，副总管一员，都目一员。中统二年置。至元二十三年，置府大名。

管领本投下大都等处诸色户计都达鲁花赤。秩正五品。达鲁花赤一员，正五品。提控案牒一员，从九品。都目一员。中统三年置。至元十五年，置司大都。

管领大都、河间等路打捕鹰房总管府。秩正五品。总管一员，副总管一员，都目一员。中统二年置，三年给印。

管领东平等路管民官。秩正五品。总管一员，正五品。相副官一员，都目一员。中统二年置，至元二十二年给印。

管领大名等路宣抚司燕京路管民千户所。秩正七品。提领一员，副提领一员。中统二年置。

管领曹州等处本投下民户、管领东明等处本投下民户、管领蒲城等处本投下诸色户计、管领汴梁等路本投下种田打捕驱户四提领。秩正七品。提领各二员，同提领、副提领各一员，典史各一员。中统二年置，至元十四年颁印。

海西辽东哈思罕等处鹰房诸色人匠怯怜口万户府。秩正三品。管领哈思罕等处、肇州、朵因温都儿诸色人匠四千户。达鲁花赤一员，正三品。万户一员，正三品。副万户一员，正五品。经历一员，从七品。知事一员，从八品。提控案牒兼照磨一员。从九品。延祐二年置。其属曰：

镇抚司。镇抚一员。延祐四年置。

曰：哈思罕等处打捕鹰房怯怜口千户所。秩从五品。达鲁花赤一员，千户一员，副千户一员，吏目一员。至大二年置提举司，延祐六年改千户所。

曰：诸色人匠怯怜口千户所。秩从五品。达鲁花赤一员，千户一员，副千户一员，都目一员。初为提举司，后为户所。

曰：肇州等处女直千户所。达鲁花赤一员，千户一员，副

千户一员，吏目一员，延祐三年置。

曰：朵因温都儿乃良哈千户所。延祐三年置。

曰：灰亦儿等处怯怜口千户所。至治元年置。曰：开元等处怯怜口千户所。至治元年置。

曰：石州等处怯怜口千户所。延祐七年置。

曰：沈阳等处怯怜口千户所。至治元年置。

曰：辽阳等处怯怜口千户所。至治二年置。

曰：盖州等处怯怜口千户所。延祐五年置。

曰：干盘等处怯怜口千户所。至治元年置。

辽阳等处金银铁冶都提举司。秩正四品。都提举一员，正四品。同提举一员，从五品，副提举一员，提控案牒一员。延祐三年，立提举司。秩从五品。后升都提举司。

初办金银砮铁等课，分纳中书省及中政院。七年，以其赋尽归中宫。

管领本位下怯怜口随路诸色民匠打捕鹰房都总管府。秩正三品。达鲁花赤一员，正三品。翥总管一员，正三品。同知一员，正五品。副总管一员，从五品。经历一员，从七品。知事一员，从八品。照磨一员。从九品。掌怯怜口二万九千户、田万五千余顷。中统二年置，大德十年隶詹事院，至大三年隶徽政院。延祐三年改善政司，七年夏善政司为都总管府。至治二年，徽政院及其属尽罢，天历二年复立府。

管领诸路要打捕鹰房民匠等户总管府。达鲁花赤一员，总管一员，同知一员，副总管一员，品秩同上。经历一员，知事一员，提控案牒一员，照磨一员，大德三年置。其属曰：

大都等路管民提举司。达鲁花赤一员，同提举一员，副

提举一员，都目一员。

曰：唐州提举。达鲁花赤一员，提举一员，同提举一员，副提举一员，都目一员。曰：大都保定提领所。提领二员，同提领一员，副领一员，典史一员。

曰：河间真定提领所。提领二员，同提领一员，提举一员，同提举一员，副提举一员，都目一员。

曰：南阳邓州提领所。提领二员，同提领一员，副提领一员，典史一员。

曰：唐州泌阳提领所。提领二员，同提领一员，副提领一员，典史一员。

曰：襄阳湖阳提领所。提领二员，同提领一员，副提领一员，典史一员。

曰：汝宁陈州提领所。提领二员，同提领一员，副提领一员，典史一员。

曰：河南提举司。达鲁花赤一员，提举一员，同提举一员，都目一员。

曰：汴梁裕州提领所。提领二员，同提领一员，副提领一员，典史一员。

曰：河南嵩汝提领所。提领二员，同提领一员，副提领一员，典史一员。

曰：南阳唐州提领所。提领二员，同提领一员，副提领一员，典史一员。曰：济宁提举司。达鲁花赤一员，提举一员，都目一员。

曰：冀宁提领所。提领二员，同提领一员，副提领一员，典史一员。

曰：晋宁提领所。提领二员，同提领一员，副提领一员，典史一员。

宝昌库。掌受金银砵铁之课，以待储运，提领一员，大使一员。

金银场提领所凡七。梁家寨银场、明世银场、密务银场、宝山银场、烧炭峪银场、胡宝峪银场、七宝山砵灰场。俱从七品。每所设提领一员，从七品。同提领一员，副提领一员。

铁冶管勾处二所。各设管勾一员，同管勾一员，副管勾一员。

奉宸库。秩从五品。掌中藏宝货钱帛给纳之事。提点四员，从五品。副使二员，正七品。提控案牘一员。至元二十七年罢，大德二年复置。

广禧库。掌收支御膳野物，职视生料物。达鲁花赤一员，提举一员，从五品。大使一员，正六品。副使二员。正七品。大德八年置。

资政院。秩正二品。院使六员，同知、佥院、同佥、院判各二员，经历、都事各一员，管勾、照磨各一员。至元六年，为完者忽都皇后置。将昭功万户府司属，除已罢缮工司外，集庆路钱粮并入有司，拨付资政院。既而正宫皇后崩，册立完者忽都为皇后，改为崇政院。